

萬載縣志
第十三冊

地 20.91/42
= 13



萬載縣志文徵詩徵合編

萬載文徵詩徵序

志有藝文從史例也史志以記事為主藝文乃著錄之編不列部目而撰詩文實非體例或矯而正之則以詩文分隸於本事之下亦失古人流別之意章氏學誠言之詳矣檢閱先正所著述如辛侍郎從益之寄思齋李進士榮陞之厚岡集辛助教紹業之周官旁求易圖存是已刊未刊十數種率可垂光典冊而矜式後人科舉停廢入股敝屣然如陳進士池鳳之丹山稿可云懸諸國門而不能增減一字者於乎豈易言哉又如湯同知譽光之儼蘇和陶龍知州鳳祥之夢禪詩話彭孝廉壽頤之圍練新編湯進士肇熙之出山草譜亦足以資流覽擴胸次而廣見聞焉萬載設縣以來南唐惟徐氏兄弟文章彪炳獨出冠時固非後學所能擬議也今茲徵錄就前志已見於藝文者分門別類無少更張前志所未載者睹聞所及博觀而約取之繆以管見操去取之權捫心清夜惟

萬載縣志

文徵表

冀不悖是非之公有能隔我新知而攻我疵類者乎以為先器識而後文藝可也

文徵

謝封康樂侯表

宋謝靈運

昔蚩氏暴虐恃僭歷紀既噬五都志吞六合遂陷沒西河傾覆南漢凌藉紀郢
 跨越淮泗於時策畫惟疑地險已謝咸懼若臣同泯有生無餘亡祖奉國威靈
 董符戎重盡心所事克黜禍亂功參盤鼎胙土南服逮至臣身值遭大路日月
 改暉榮落代運輸稅唐化生幸無已不悟天道下濟鴻鈞曲成迺眷遐績式是
 興徵分虎紐龜復顯茅土鳴玉拖綬班景元勛澤洽往德恩覃來允永惟先隴
 遠感崩結豈臣尪弱所當忝承臣聞至公無私甄善則一皇恩遠被殘代可侔
 是以信陵之賢簡在高祖之心望諸之道復獲隆漢之封觀史歎古欽茲盛美
 豈謂榮渥近霑微躬傾宗頌元心識其會酬恩答厚罔知所由 采謝康樂集
 補



劾石亨疏

明侍郎郭瑾邑進士

謹奏爲糾劾事臣忝司刑不容縱奸竊照武清公石亨者起自布衣遭逢盛世託以股肱授以兵柄第宅富擬於王宮金帛疊出於內帑寵榮罕比際遇非常爲石亨者正宜披肝據膽竭尺寸之微勞委身忘家圖一之補報豈期本官和若謙恭而心實狡詐言似忠懇而行實乖違賄賂之門大開奔競之風盛起無功之人妄報有功而當陞無才之徒僞舉有才而可用子姪食祿者數十餘人親隸居官者百千餘輩布列要路擠排善良中外寒心縉紳側目潛構指揮鄉叔彞來私宅而講論天文擅差指揮虛昭往河南而辦理家事差人出入邊關而不敢阻擋用勢占種官田而莫敢誰何興販木植於山西而貪得無厭寄養馬騾於邊衛而擾害多端罪惡貫盈法典難宥若朝廷不加斧鉞之誅則奸臣益肆跋扈之心臣亦不忍同朝而坐視其奸也伏望皇上處以大公斷以大義防微杜漸據法行刑乞將本官拏赴法司明正其罪以懲奸欺則臣民幸甚

萬載縣志

文徵表

二

天下幸甚

按雷禮明列卿傳有司寇本傳竝載官給諫時條陳六事較諸採訪所錄尤足傳信當時辛少宰從益從京借抄寄局不知竟落誰手故仍存此

明巡按周燦進士

題爲寇氛已迫敬陳兵餉急著以固疆圉事竊惟禦寇者禦之於門庭之外若待賊逼城下僅以閉門却敵外無救援內加細作鮮克久持楚省數郡之破皆中此弊前此荆襄麻黃與江右尙隔一水長江天塹猶曰有險可憑而今破武昌在西江肩項唇齒之間不啻剝膚矣此時急作門庭之計上自袁吉下自九江皆賊充斥之路九江近設總督重兵雲集可以恃而無恐袁吉一帶如萍鄉之接醴陵萬載之接瀏陽永新之接茶陵處處須防而萍鄉尤爲第一門戶賊過岳陽一步則萍鄉危矣萍鄉不守寧但西江之患南則百粵入閩東則祁門常山將有不忍言者今日守西江卽所以守閩粵守徽浙也兵單力寡決難捍

禦亟須精兵一萬分布萍鄉萬載永新三路統以遊擊二員不獨畫藩而守且與湖南彼此角犄互壯聲援賊往武昌去巢穴益遠四面受敵若大兵會約淮皖應諸兵從九江而上更調虔粵諸兵從袁州而進會合長衡永諸兵從岳陽而下水陸合湊上下夾攻滅此朝食此其時矣但兵興糧隨前此西江無事則西江之餉解京解楚總爲寇而解今日西江有事則留西江之餉養西江之兵亦爲寇而留守得西江不爲楚省之續則兵餉皆爲有用亦不至如楚省委之逝波呼吸安危可計者當不待其言之畢也臣謹會同巡撫江西右僉都御史郭某巡撫南贛右副都御史林某合詞上請伏乞勅下戶兵二部準臣等所奏或募或調湊兵一萬計哨官隊長什長教師等項每歲約食餉八萬有餘懇祈準於本省練餉內動支至於遊擊二員一切廩餼心紅紙劄與添設營房等項不敢擅動止額谷臣等與地方有司商酌另行設措庶使軍容壯而士卒鼓進足以攻退足以守西江安而閩粵徽浙五省俱安誠今日東南半壁救時之急

萬載縣志

文徵 疏

三

著也采府志

敬陳聞見疏

清侍郎辛從益邑進士時官河南道御史

爲敬陳聞見仰祈聖鑒事竊維州縣爲黎民之官官廉明則政清而民服我皇上肅清吏治慎簡賢良凡方面大員固多奉法兢兢潔已率屬而州縣苟有不能嚴防吏役勉飭荷操者臣籍隸江西職忝言官謹就告養回籍後見聞所及敬爲我聖主陳之一書吏貸銀結交官府宜禁也查書吏中惟庫吏尤與官親近錢糧多經其手凡官未到任以前駐省既久資用必乏輒有黠吏貸與多金先行結納官感其惠到任後卽令承充庫吏從此有求必應招權納賄難保其無所有一切翫法侵帑情弊必由於此一差役橫竿平民宜懲也查州縣中有差役串商家人出票挈人私押班房者往往並無原告祇係差役捏名報賭而所挈數十人多係農人力耕起家並不賭或乘農忙之際或當除夕之前沿村訛詐強取穀石牲畜克伊飯費及僱轎之費甚至生員亦被毆辱又有

因路斃無名男子卽借命案爲名妄掣平民輒逾數里及十里外凡小民殷實之家指爲鄰佑管押取錢者此等均宜痛懲 一保甲捕緝宜整頓也查保甲以稽察奸宄捕緝以嚴緝盜賊二者相爲表裏今州縣各鄉設有保正並不挨查烟戶至有豪猾窩藏竊匪往往農民夜失牛隻曉尋踪跡輒在其家而窩戶公然苛勒事主贖錢始還原贓者鄰里畏懼不敢舉發互相容隱保甲之廢可想至於捕役一項臣回籍十年每聞各村莊屢有被竊之案並不聞有緝獲追贓之事而捕役多鮮衣肥澤其爲豪賊縱弛可知 一大員過境供應官者也查督撫司道僉入優厚旅費一切諒能自給原不必州縣供應今州縣於他省大員過境沿途皆有傳片知會遞辦供應至大員之家眷人等分作二三次到者州縣亦一體供給取媚他境如此其在本省管轄上司尤不待言 一衙署不宜攜帶多人也查大小官員簞簞自飭均宜儉以養廉若食指繁多焉能成儉今州縣署中家眷官親幕友家丁厨役人等竟有多至八九十人及百數人

萬載縣志

文徵 疏

四

者養廉所入焉能供給若非侵挪庫項必係濫取於民 一家丁挈眷外駐非宜也查外省各員隨帶家丁原宜在署服役今州縣中有聽家丁在民間租房娶妻并久住者迎親之日宴席盛設至有紳士希其奧援書寫對聯具送賀儀并挈伴冠服往賀殊爲乖廉耻之風長招搖之路 一吏胥服色宜辨也臣查京城及各省衙門在官人役服色俱止用元青而江西省州縣吏胥竟多有用紅青者至宜春萬載二縣近數年來諸捕快皂班莫不狐裘黃黃袍袴均用細毛以致皮貨爲之騰貴至有周身表裏俱係細織此皆朘削民膏所致宜加裁抑使知斂戢以上數條皆臣見聞所及不揣冒昧伏乞皇上勅下督撫嚴飭所屬州縣凡有書吏貸銀結交官府差役橫掣平民以及保甲隱奸捕緝縱賊并州縣供應過境大吏浮費隨官人數過多家丁在外租住民房吏胥服色踰制者均嚴行禁止違者叅辦則政體益肅而閭閻益安矣再各省設立學官月課久不舉行有師生之名而無訓誨之實士習文風更難望其整飭所關非淺請

宜勅下各省學政實心董率以昭風厲而崇教化臣管窺愚見是否有當謹奏
請飭查詳審以杜徇庇疏

時官掌四川道御史辛從益

爲請旨飭查詳審以杜徇庇事伏查長蘆掣鹽之法碼加增斤兩滋弊一案欽奉
諭旨查有圻等八綱總均著解任質審其校兌法碼之工部主事黃遐年前任
戶部郎中現任天津府知府張大維均著解任歸案質審欽此仰見我皇上肅
清鹽政釐剔弊源務歸確實至意臣伏思此案法碼之弊無論在商既經
奉旨審辦則工部鑄造時凡經手校兌之員俱應解任質審臣風聞大學士勒
保之子現任工部虞衡司郎中英奎當鑄造法碼時即在工部爲司員掌印
監造則英奎自應解任質審乃英奎既未經奏請解任而勒保隨同王大臣審
辦此案亦未聲請迴避頗滋外議恐難保無瞻徇情事似應請旨飭查將英奎
一體解任俟黃遐年張大維到案時一并交部質審并令勒保將因何不聲請
迴避之處明白回奏臣又思法碼鑄造雖由工部其鑄前定式及鑄後頒發必

萬載縣志

文徵疏

五

由戶部此次查出私增斤兩若係工部果有弊混則戶部亦不能無弊其戶部
經手之員似不便承審此案自應一體迴避臣風聞派出承審司員係戶部司
官瑞澍及寬寧此二人皆曾任戶部山東司查山東司係鹽課專管其法碼定
式必由該司校發而寬寧於十二年鑄造法碼時即已任山東司掌印郎中今
此案即係二人承審亦難保無扶同迴護似應請旨將此案勅交王大臣另派
司員秉公詳審以成信讞臣愚昧之見未知是否謹奏

時巡視東城掌四川道辛從益

爲請申明囤積之禁以昭平允事竊惟米商固慮其居奇糧食亦資其轉運米
鋪之盈虛亦閭閻生計所關也况京城爲四方士民雲集輻輳之區尤宜使米
糧流衍民食充足臣伏查例載五城各鋪戶所存米麥雜糧等項每種不得過
一百六十石逾數囤積居奇者照違制律治罪又載若非囤積居奇係流通糶
賣者無論米石多寡俱聽其自便不在定限一百六十石之例於立限嚴防之

中甯揆情變通之意務使商民兩便法良善也竊見五月內步軍統領衙門
奏孥獲私販米石及鋪戶囤積米石過多之案業經奉旨交部審訊并准將查
山之米總數一萬三千餘石交五城減價糶賣仰見我皇上廣裕民食嚴抑奸
商之至意臣伏思所奏各鋪戶有囤積而後包送私運者有未包送私運而但
囤積者有雖逾一百六十石之限而按之定例未可概指爲囤積者既難一律
科罪况查所開各鋪戶米數有未至一百六十石亦指爲囤積者如西直門義
盛之一百五十石零聚成之一百四十九石零慶長鋪之七十六石零裕源鋪
之五十九石零皆米數未滿例限又並無包送情節乃一概指爲囤積奏請入
官似與定例不符且京城各處米鋪甚多其存貯米數過一百六十石者正復
不少何獨於廣渠西直東便三門之鋪戶米數未滿例限者轉指爲囤積概請
入官糶賣若以該三門曾有包送米石及賣米出城之鋪遂將凡在三門附近
者所囤米數無論多寡并無論曾否包送概請入官則玉石不分恐亦未爲平

萬載縣志

文徵 疏

六

允請旨勅下刑部訊明各鋪戶如實係包送販運米石出城及知情賣米出城
者無論所存米數多少概行人官變賣以儆奸商若未經包送及知情賣米出
城者仍查照百六十石限定例說明是否囤積現在流通糶賣與否分別辦
理若既無包送情弊所存米石又不滿例限者奏請省釋免其入官庶平允昭
而定例符矣臣又伏思行貨曰商居貨曰賈市賈廣囤貨物勢所必然今米商
既經開鋪糶賣其所儲之米原非倉卒可盡縱使存儲米數累至千百餘石囤
多賣少亦無不自命爲流通糶賣者其如何方爲流通而非囤積之處請旨飭
交戶部詳爲區別明定規條曉諭各鋪戶使咸知警惕遵守卽審案亦易於判
決臣又風聞各城門兵弁近因挈獲運米出城之案查禁甚嚴至有城外貧民
入城買米不獲攜升斗以出者懲羹吹虀未免過當請旨勅下步軍統領衙門
轉飭各城守遵照十五年御史與奎奏准之例凡細米一石以內聽其出城不
得禁止以仰副我皇上軫念窮黎一視同仁至意臣愚昧之見是否有當謹奏

請飭督撫勿延擱賊報疏

時掌河南道御史辛從益

爲請飭督撫勿延擱賊報事竊維邪匪猖獗固由州縣平時不能弭賊臨時又不行早報所致然亦有地方已經稟報而督撫過於持重不卽發兵掩捕者聞昔川楚邪匪滋事之前有州縣曾經稟報而上司斥爲不曉事體因令其留省閒住不遣回任於是州縣相率諱盜不報以致賊匪滋熾卽如今年邪匪滋事肇於山東之金鄉縣臣風聞該縣紳士於六月間以邪匪聚眾密揭教官教官詳稟學臣張鵬展其時金鄉縣令在省辦案聞風恇懼經學臣詳問該縣情形屬實卽飛咨撫臣同興比撫臣會商時猶以教官黨護秀才挾嫌捏控爲疑未肯卽行遣捕經學臣力爭以爲此事勢無兩立如果係邪匪聚眾謀逆豈可不辦倘並無此事而紳士挾嫌教官黨護則應治紳士教官以誣良之罪撫臣同興感悟乃允發吏卒掩捕因得究出首逆林清藏伏附京近地得以迅速查辦是該撫當該縣教官稟報時尙無捕賊之意反疑地方教官紳士爲誣告

萬載縣志

文徵 疏

七

若非張鵬展力爭則金鄉已難保無滑縣之事幸同興終能舍己從善耳其初見則未免過於持重也臣恐各省督撫遇地方報賊之案遲疑不決以致坐失事機者不少夫百姓食毛踐土世荷聖朝覆載生成之恩聞有邪氛孰不思告官捕緝以安桑梓惟是民望官以捕賊而官又望上司之助其捕賊若督撫聞報遲疑不發甚至斥州縣爲不曉事紳士爲挾嫌則州縣自審兵微力薄上司不爲救應恐轉誣以激變良民之罪於是雖有賊匪而不敢輕捕并不敢輕報良民知官之不肯捕賊也雖報賊而地方或指爲誣良轉恐與賊匪結讎遭其荼毒亦孰敢輕於首告乎是養癰貽患雖州縣諱盜之罪亦或由督撫有以致之臣伏思賊匪起事之初黨羽必少地方官一有所聞速行掩捕自可一網盡獲縱其中或有冤誣不難於鞫訊時分別開釋亦何必過於持重以致釀成大害如上年江西龍泉縣邪教滋事撫臣先福聞報卽帶兵立時撲滅所誅人數無多而邪匪立淨此督撫聞報逮捕之效也今言事者多以諱盜爲州縣罪臣

愚以爲州縣諱盜不報上司之叅劾尙易而督撫聞報遲疑下情之仰達爲難
今三省仰廬宵旰指示諸將連獲勝仗殲戮賊匪幾盡賊無蔓延誠天下蒼生
之福惟是善後之策不厭周詳請旨特飭督撫嗣後遇州縣有邪匪聚眾之報
卽一面飭令該州縣速發吏卒或移會鄰縣掩捕一面卽帶兵相視情形馳赴
策應勿得過於持重遲疑不發如此則州縣易於捕賊百姓易於首賊矣加以
修武備影保甲廣教化勿有名無實毋始勤終怠化莠安良庶邪匪無所潛踪
而百姓安居樂業億萬年永享昇平之福臣賦性禱昧職忝言官不能仰裨國
家萬一然不敢不竭愚忱謹奏

請飭督撫詳慎甄別疏

時掌河南道御史辛從益

爲請飭督撫詳慎甄別以澄吏治事近奉上諭外任官員較之京員職守尤專
著通諭各督撫先將所屬藩臬兩司詳加察核其道府州縣丞倅佐貳以及候
補人員著各督撫督率藩臬兩司公同甄別仰見我皇上整飭官方至意臣竊

萬載縣志

文徵 疏

八

惟國家設立督撫卽古者咨牧分伯之義責任綦重天下廣輪之大州縣之眾
吏治之賢否得失豈能一一周知故於封疆大臣寄之耳目俾藩司以下聽其
舉劾以爲黜陟今欲泐衰庸非督撫之責而誰臣伏思外省甄別與京員不
同京員雖由各堂官甄別而耳目甚密稍有徇私之弊難逃皇上洞鑒至督撫
所居距京師千里或數千里地方所轄遼遠文武歸其統屬司道以下平日鞠
躬屏息唯唯聽命至於州縣職分卑微其中縱有枉抑下情未易上達若果係
公忠爲國明政體達時務之督撫則凡所甄別自係中正無私舉一人而屬吏
知勸黜一人而屬吏知儆不然者居心未淨所識又偏權勢既尊操縱甚易或
徇私容庇或任性乖張則必有夤緣奔競之徒請謁營求希免叅革恐所謂衰
庸者不果衰庸而眞衰庸者反倖逃吏議也夫年力衰頽一望可知自難欺於
眾目若夫才識之平庸與人品之卑庸則有未易悉者衰固宜黜庸尤宜黜倘
其才識人品果庸或姑息養奸或遲延廢事或審斷迂謬或徇縱書役或希耽

安逸或安肆營求如此之員年雖壯盛在所必黜倘其人年力雖老而志氣不衰辦事勤敏老成練達是固不可謂之庸亦不可謂之衰原不應入沙汰之列總在督撫公明簡別而已且督撫之好尚各殊斯其所甄別亦異剛決者喜果銳則必視安靜之吏爲庸鈍矣明敏者喜剛直則必視顛置之士爲庸迂矣甚至以利口捷給者爲才因以厚重少文者爲庸以供應承順者爲能因以趨迎簡拙者爲庸豈知州縣有當切責之處亦有當體恤之處如案件之繁久懸不結錢糧之重宕延不交盜賊多而不勤於捕緝胥吏擾而不嚴於約束保甲廢弛奸宄潛滋此宜加切責者也江浙多民欠而官墊爲難漳泉多械鬪而官辦不易江蘇有慣鬧之漕收福建有難銷之鹽課倉庫之虧或由前任軍需之葺豈無分攤此宜存體恤者也一刀民上控而本官逮訊弁人證牽連委員轉轅催提供億連月案未審而官已困矣加以大員過境餽送爲勞家丁陋規婪索未免又或上司代人託銷書籍書未到而價先付囑薦幕友幕雖劣而俸必捐若

萬載縣志

文獻疏

九

此之類不可勝舉其應命者爲能員不能者則爲庸吏矣倘以此而令加甄別其徇私任性不問可知其或自恃公正過爲刻覈接見屬員動加呵叱州縣震恐駭汗詢以公事或不敢出聲論一概目之曰庸亦恐下情未通而所謂庸者非真庸也臣愚以爲督撫大吏必先有公正體國之心持廉法之大綱畧趨承之末節務辦事之勤能責安民之實效揣時地之難易量才分之優絀而又常存敬慎之心然後可以甄別人才恭惟我皇上肅清吏治慎簡大僚各省督撫久在聖明睿照之中諒無不公正廉明勉圖報稱惟是敬慎之心刻不可忘故書稱克艱孔子言爲臣不易倘督撫自恃公正廉明而不加以敬慎則甄別之際必有流爲徇私任性而不自覺者其在於其司道於督撫雖係屬員而接見常親已難保無愛憎之偏至於州縣以下微員身卑濶絕甄別之際尤易任性夫能爲天下生民黜庸吏者亦能爲天下惜人才請旨飭下各省督撫甄別大小官員務存詳慎則吏治清而官無曠職亦無廢才國家長收臂指之效海宇

永享安謐之祿矣臣愚昧之見未知是否謹奏

請飭查兵丁橫拏平民子女疏

時官吏科給事中辛從益

為敬陳管見仰祈聖鑒事近日凱撤兵丁帶有幼孩來京仰蒙聖恩令大臣查訊如係逆犯子孫交部查辦若平人子女合宜帶回之官兵妥為收養仰見我皇上仁至義盡體恤周摯之意臣伏思從逆子孫必須查明按律辦理以彰國憲而快人心且使梟獍餘孽不致留遺近地以清首善之區典至肅也至平人子女當兵燹之後蹂躪餘生經官兵招呼有情願跟隨託命者有迫於勢而不敵不從者即使管兵大員紀律嚴明兵丁不致橫拏平民亦必有此二種若管兵大員相距稍遠兵丁等搜索村莊強拏平民子女恐難保其必無臣思此等幼孩尚非無著流民不過因兵馬匆促父母兄弟不能相保以致流離散失大兵已過各有村落宗黨可歸若地方安靜之後皇上撫恤難民而此等幼孩之父母生歸故里思念子女不無悽惻可憫即或此等子女之父母兄弟俱已不

萬載縣志

文徵 疏

十

存而伊祖宗廬墓僅賴此一綫之延又不能歸里繼守亦屬可矜且幼孩年穉無知跟隨倖生長成不無後悔况倥偬之際玉石難分其中或有仕宦子孫逃散相從至於不延血食亦未可定臣仰體皇上訓諭周詳軫恤幼孩之心再四思維若查明非從逆子孫並懇天恩飭各詢明居址村落發交該地方官送歸本宗以延嗣續亦可不致失所現在陝省軍功告竣若照此辦理亦免兵丁藉口收養強拏平民子女之弊是否可行敬陳愚昧謹奏

請嚴搜檢正文體疏

時官吏科給事中辛從益

為請嚴搜檢以別真才禁浮雜以正文體仰祈聖鑒事竊惟科目憑文取士文章之醇疵真偽即人才得失所關也是以凡出必刪而懷挾有禁近年以來京闈及外省辦考各官未免意存寬厚不肯認真搜檢臣風聞各省鄉闈俱多懷挾之弊士子有潛帶蠅頭細字小卷或場前預囑執事人等帶藏闈中臨時密付並未經搜出者雖考官閱文至公而此等懷挾之徒徼倖獲中亦難保其必

無至於三場疊試用規學養三場中尤重頭場四書文功令以清真雅正爲歸
近來士子希圖詭遇往往擇摭僻書字句以炫新奇不顧題義如去年鄉試各
省取中之文其平正無疵者固多而浮詭者亦不少如隱居以求其志三句題
文有乘麟以理駕龍而游及金策書聖錄策書寶玉策書功等語於題殊爲廓
落又如冉有曰既庶矣兩節題文抄用鬻子東門曰虛南門曰墀西門曰疵北
門曰側又用漢書郡國志注引帝王世紀夏禹之時民千三百五十五萬三千
九百有二十三周成之時民千三百七十一萬四千九百七十三等語雖出古
書究於本題富教之義不切文體亦屬支離又如使天下之人齊明盛服三句
題文云昔武王克殷使閔夭進招華之桂於太廟使伯邑考進陽木之薑於羣
廟使南宮适進九江之菌於祧廟按之題義俱爲漫溢且此數語未見所出惟
近人所刻典制文琳註釋中有之稱係山尙書大傳臣查尙書大傳並無此語
至於編造字句如山佩幾宮水佩幾羽詳深衣之度臣按公侯佩山元玉大夫

萬載縣志

文徵 疏

十一

佩水蒼玉見於玉藻非深衣所有且左徵角右宮羽凡佩玉皆然不分山佩水
佩又如哲相滌山裳臣按哲相滌裳古無此事古者山龍繪於衣并不在裳若
斯之類不勝枚舉此臣所見闡墨刊行之文也又如易經垂衣裳而天下治題
文用東都賦盛三雍之上儀一段查三雍宮名自漢朝黃帝堯舜時無之且原
賦云盛三雍之上儀修袞龍之法服鋪鴻藻信景鑠揚世廟正雅樂而此文抄
用因坊本注釋服字下有音匐二字連作爲韻遂悞認爲正文書爲鋪鴻藻
信景鑠揚將世廟五字截去又如禮記非曰豐本題抄用多識於鳥獸草木之
名題文俱經臣簽出此臣磨勘分卷所見之文也又近來士子爭效王廣心尤
侗之文臣查王尤文體最爲浮靡其運用故實往往換字縮脚幾如唐人鷓鴣
虬戶之澀體費人猜想究其意義實爲膚淺是以欽定本朝四書文概不收錄
今乃復取而誦習摹倣之科名既掇效尤滋多遂成風尙於是有慕其浮藻腹
笥不足以至如臣所云剽取子史字句抄成蠅頭小本希圖懷挾或托人藏帶

倖中者臣思言爲心鑿若故爲浮詭以希速售文體不正心術可知矧又出於懷挾乎現屆會試之期天下人才萃於京師請旨預飭典試分校各官嚴裁僞體務歸清真雅正其穿貫經史書卷紛綸者固宜取中亦必文從字順於題義實有發明至於二三場體裁雖無妨稍寬然後引經傳總期於本題有關并請旨預飭搜檢大臣於入場士子衣服器用嚴搜外凡場中一切先進器具并運送夫役及書吏執事人等逐名搜檢又各考官及監試提調副都統內外簾各官之跟役鋪陳等項均照定例逐一驗明放入以免士子轉託藏帶之弊庶真才可得文體正而士習端矣再向例鄉會試之年不准條陳科場事務臣爲掄才剔弊起見合併聲明謹奏

請飭查書吏婪索解員銀兩疏

時官吏科給事中辛從益

爲請嚴書吏濫索解員銀兩恭摺奏聞仰祈聖鑒事伏查本年三月間欽奉上諭各省鞫銀解部自應隨到隨交若輾轉拖延難保不致滋弊竇著步軍統領

萬載縣志

文徵 疏

十二

隨時密查餉鞘一經解到派員押送赴部呈報勿令稽遲欽此乃近來餉銀到京雖經押送赴部而該部書吏必向解員勒索多金方准交收近有福建詔安知縣鍾師唐領解餉銀十萬兩來京於五月二十五日到部投文該部書吏不肯收文謂每餉銀萬兩除應給飯銀及隨解常例外須給伊私銀四百兩今官餉十萬兩除常例外應給伊私銀四千兩方准交收鍾師唐無奈因臣係同鄉向臣告知臣聞不勝詫異竊意餉銀既經到部耳目眾多書吏豈能久行延擱乃迄今日久該解員自派夫役晝夜守護不惟鞘銀未經兌交并投文亦未肯收是雖經押送到部而吏不准收仍不能隨到隨交且須晝夜防護刻刻不敢疏懈若非書吏人等實有勒索情弊何延三十餘日之久並不收納該解員鍾師唐之言似爲可信鍾師唐又云除伊解餉外尚有惠安知縣鄭鐘領解頭批餉銀十萬兩於五月十六日到部在伊前十日迄今亦未收交亦因爭論私銀之故是該部書吏拖延濫索尤屬顯然臣伏思解員領解鞘銀水陸數千里搬

運照護一切人夫供贍所費不貲到部時諒無不急及投交以卸專責豈能復堪書吏稽延婪索至四千兩之多除臣所知之鍾師唐鄭銓外并聞有江西廣東解到餉銀亦久未收交恐書吏向解員似此刁難訛索者正復不少殊為大干法紀請旨飭下該部嚴行查問如果屬實即將該書吏奏交刑部究辦以懲貪詐臣又伏查收餉之事前經御史臣富勒禮奏准令該部於收餉時知會江南道御史協同監收在案惟是鞘銀到部與否御史豈能刻刻訪查若但俟收餉時有戶部監收知會始行稽查則未收之先該部書吏向解員一切交索舞弊之處何由周知故事前則無從覺察事發則與有處分臣愚昧之見請旨飭令各省嗣後解餉來京除備文送部外并備文送江南道御史令解餉官同時分投庶幾御史得以確知餉到日期行文查問稍有延擱即行糾參則書吏人等不敢延緩需索即臣愚解員所以多被書吏訛詐者惟恐免銀時伊等能高下其手捏報虛欠也查解員例有本省帶來部頒之法碼請勅令監收各官兌

萬載縣志

文徵 疏

十三

銀時務必親自秉公校兌庶書吏人等不敢藉以恐嚇取財矣臣為慎重帑項起見是否有當謹奏

劾章邱知縣掌責生監疏

時官山東學政辛從益

為知縣掌責生監上司久延不結恭摺奏仰祈聖鑒事伏查學政全書地方官擅責生員聽學政糾參又載有司撻責生員視同齊民殊非恤士之意今後生員如果犯事情重地方官先報學政俟斥革後治以應得之罪又載牛員所犯有應戒飭者地方官會同教官將事由具詳學臣酌斷批准然後扑責如有任意呵叱擅自飭責者聽學臣查參又載應戒飭之生員地方官擅自叱責者降二級留任等語臣推原立法之意優待士子正所以厚責士子使知自重也夫不詳學臣擅自叱責尚干吏議何況掌責詎有章邱知縣竇琛者專以掌責生監為能狃不悛改臣於嘉慶二十二年十二月由青州回省路過章邱有生員周世儒劉紹宗監生李樹富馬化龍等先後呈控該縣浮收錢糧無論新漕

帶征概令每斗折交京錢一千四百文伊等因求減舊漕折數被縣官濫刑掌責百餘並鎖項鑄手等語臣恐該生等包漕捏控面加盤詰同聲呼冤臣旋接見該令詢以曾否掌責據稱因伊等抗糧不服鎖押反出言頂撞故加掌責是該縣掌責生監業已自認不諱該縣旋以該生等抗欠錢糧辱罵官長補文稟知臣以州縣浮收生監抗糧罵官均干法禁但俱係一面之詞而擅責生監已屬不合當經批交濟南府嚴訊乃該府並不審結惟將生員周世需等押學至不得回籍過年而所控浮收之書役人等俱逍遙事外臣旋行文章邱學令查該生等錢糧曾否交清該學據縣牒稟覆周世儒等新舊錢糧俱於正月間完訖臣續據該生等呈稱新漕先完固不是抗舊漕懇減亦並非包今新舊糧米俱經如折數通完而冤不雪等語是該生等尚非敢於抗糧而此案至今二年未結經臣行文催審總以人證不齊為詞臣思該生等身遭凌辱方叠求申雪豈反憚於赴審至書役等係在官人役一呼可至何難集訊顯係因所控浮收

萬載縣志

文徵 疏

十四

事情重大藉詞拖案而該令竇琛掌責手滑旋於去年十二月有武生郭予燕赴臣衙門具控稱因遞呈違式值該令醉怒喝役用牛皮掌掌責二十該令旋亦以該武生酒醉遞呈肆口頂撞當即掌責二十等情具稟是該令之掌責武生又已自認不諱亦經臣移交臬司委員審理至今未據詳覆臣伏思生員縱有不法亦應詳明學臣先革衣頂然後可施敲扑若所犯不至斥革亦當會同教官稟明戒飭今該縣並不詳稟輒擅自掌責待同盜賊一之謂甚乃至於再其毫無顧忌概可想見臣又伏思士為四民之首所當養其廉恥加以禮貌則士亦顧名思義知自愛惜而不敢為苟且之行以自別於齊民民知士之足重自矜與慕效勉為君子然後風俗之厚可不期而成夫爵位名器朝廷所以勸獎天下也生監雖微名器所關如係因罪被革則所責者罪人非責生監也若未經斥革動加掌責辱同盜賊則衣頂不足為榮學校亦不足重何以服士心而伸士氣乎臣奉命來東兢兢以整頓士習為務凡實係包漕開漕滋事健

訟者經地方官詳到俱立行批革從不敢稍存姑息近年以來士習較前尚爲
安靜而地方官待士如此其虐使皆相習成風則武健嚴酷之吏皆以凌辱紳
衿爲能殊非國家優待士子之意請旨勅下山東巡撫將署章邱縣竇琛掌責
生員及是否浮收并該生監等有無辱罵之長一并提審速結按律嚴究毋任
聽原委之員因循拖緩以清塵牘事關州縣浮收擅責衿士臣今按試已周正
在清釐積案不敢再容延緩謹奏

論官理穀當流弊疏

時官內閣學士李元益

爲敬陳管見事竊查江西撫臣毓岱近有籌議民間質借穀石章程一摺奉硃
批細心妥爲之總期有益於民貧富兩便方爲至善也欽此仰見我皇上聖慮
周詳惟恐撫臣有未諳民情土俗者以愛民之意而或成累民因期以貧富兩
益臣恭讀之餘誠拆誠服臣伏查撫臣原奏以推廣社會成法爲名因民間向
有私開穀押者貧民得以物質穀以穀典錢其事甚便遂欲令官爲經理庶乃

萬載縣志

文徵 疏

十五

徒不得詭詐貧民不敢攔搶是其說雖曰調劑貧富其意實專爲防護富民也
然如其法不惟於貧民無益且於富民有害大凡官多一令卽民多一累民間
買賣典質緩急相通日川常行相安已久無論貧富皆知自計盈縮自趨便利
惟其不關涉官吏所以相與無爲也今無故官爲經理欲照當舖之例勢必紛
紜給帖則吏胥門丁紙筆飯食之費州縣年節之規名色疊出既稱富戶所取
必多縱使州縣自守清廉尙知約束安能保後任之不踵事增索彼富民積穀
雖多亦欲自圖安靜豈肯以富戶自居坐受官府之擾累其必不願領帖者情
也然官府既有給帖之令事在必行則不願官帖者吏胥刀徒必加禁制必不
准其典賣穀石則必有土豪市僧勾串書役怙然領帖以遂其壟斷之私官費
既多索價必倍攬利必專轉使良善富民有穀而不敢典賣此其爲富民害者
一也江西各州縣倉庫豈能盡實往時有借買補倉穀爲名向富民短價勒買
者既而并不給其價富民顧恤身家往往入銀代穀以求解脫今若使富民承

領押帖則凡官倉虧穀必惟該富戶是求此其爲富民害者二也往時貧民乏穀向富民典買東家講價不定尙可求之西家典買之途甚寬故貧民便之今乃惟給有官帖者始可交易則其途甚狹轉使市僧領帖得以居奇坐制民食民以物質穀則昂其質價與買貴無殊民以錢贖穀則多方刁勒使不能如限取贖此其爲富民害而因爲貧民害者三也撫臣又曰農民於新穀既登賤價售人迨春夏米貴所儲早罄欲令農民於有穀時赴富家質當其時蓋欲民毋賣穀而祇許其當以爲穀尙可取贖也此又不達民情矣夫農民當有穀時孰不思量入爲出除計口受食外昏嫁日用一切亦欲賣錢使用凡典價祇可及賣價之半譬如時價每石可賣入百文如需錢八千使用則祇賣十石已足今若禁賣使典則祇得半價勢須出典二十石方足應用是使民無故而耗去二十石也將何以資朝夕又須按月加利則何如徑賣十石之爲省乎向來民間典穀三年不贖則沒入其本其取息亦不過一分至二分而止無多至三分者

萬載縣志

文徵 疏

十六

今乃欲定爲以衣物典穀則每石加息穀三斗以穀典錢則每月加利二分五釐而又不得過一年之限過則沒入其本取息既苛限期又促斷難取贖是以二十石之穀止得半價甫及一年而盡沒之也其累貧民實甚臣所謂貧富交困者此也臣又思撫臣所以必給官帖之意爲恐穀押家被人訛詐及米貴時貧民阻米出境乘機攔搶也臣查此二者皆不常有之事遇荒歉之歲富民肯出穀典賣價縱稍昂貧民亦皆感悅惟其貪利無厭閉糴長價貧民求食不得始而羣起怨詈甚至搶奪者有之若夫歉歲阻米出境原貧民不得已之計蓋江西諸郡山多水少產米既稀西隔大庾諸嶺川廣之米不通一遇荒歲惟藉本境之米以資生活若富商圖利裝運出境貧民羣起攔阻者有之蓋欲其賣與本境耳此二者皆因有穀之家爲富不仁所致非因賣穀而致然也總在良有司善爲勸導俾富戶毋閉糴苛索毋越境牟利并出官穀糴賑嚴禁強搶則米價自平民情自安並不關官之給帖否也若富戶藉有官給行帖居奇長價

強行運米出境以致眾心不服激而生變則尤爲可慮臣竊意州縣中必有希圖添設當行可多收陋規者遂託言調劑民食懇懇撫臣入奏抑或有地方豪猾勾串吏胥希圖給帖開行盤踞重利州縣受其朦蔽亦未可知要皆病民之事也臣愚以爲封疆大吏爲治官總大綱因民所利去民所害買賣一切宜聽其自便況現在民間典賣穀石本屬相安警人本無病而投以藥劑必轉滋其害臣籍隸江西仰體我皇上勤求民隱安富恤貧之至意見聞所不敢不竭其愚心謹奏

論江蘇收漕章程疏

時官江蘇學政辛從益

爲奏明遵旨查辦情形并陳管見仰祈聖鑒事近日江蘇撫臣陶澍奏請嚴禁衿棍包漕橫索漕規一摺奉上諭江蘇漕務疲敝已久閭閻每苦浮收而各州縣用度浩繁不能不藉資津貼抗玩者卽因此挾制以爲控端必應力加整頓務令兩得其平固不使不肖官吏婪索病民亦不容衿棍把持藉端訐告著該

萬載縣志

文徵 疏

十七

撫移咨學政查察若拖欠較多實係有心抗糧停其考試倘有仍前縱恣者該學政亦卽查明斥革移咨該撫審辦不得稍涉徇縱等因欽此仰見我皇上慎重漕政肅清吏治整頓士習之至意臣伏思國課理應早完凡食毛踐土皆所共知况生監讀聖賢書尤應輸忠效順首先完納爲四民倡乃至包漕抗糧勒索白規士風頹敗至此良可痛恨臣向聞江蘇有此陋習莅任之初卽出示嚴禁并於赴學講書及每郡發落諸生時逐加剴切訓誡其有開漕滋事者經地方官詳到無不批革發審茲復欽奉諭旨彌切敬懍現在出示嚴飭各府生監俾知警惕并札飭各學教官查明欠糧抗糧之徒據實詳報分別停考交地方官押追甚者斥革審辦斷不敢稍存姑息惟是江蘇糧額本重豈堪浮收無節雖州縣之津貼自應調劑而閭閻之拮据尤宜體恤久予定額尙肆苛求竟准浮收必滋流弊况以偏重行之其弊將何底止臣莅任以來控漕者紛紛如蘇松等屬所呈除淋尖踢斛外每米一石浮收自四五斗至六七斗不等改收折

色并石自四千八百文至五千八百五十文不等查各屬米價每石不過二兩
數錢誠如所控浮收已甚其中固有刁生劣監因包漕不遂希圖挾制索規然
豈無買係正身糧戶因無力浮交情急上控冀稍減其數者今撫臣奏稱數年
以來控漕之案無歲不有積習相沿藉空爲抗仗認分肥各等語意謂控漕之
人卽包漕之人臣竊以爲未必盡然官之收漕必用書役官欲浮收勒折尤必
委其權於書役書役性多貪狠自浮折全數交官外又必圖肥己其不滿所欲
必不給契印串官既授以權柄勢不得不聽其所爲是官既浮收吏必削削不
獨爲漕良小戶之害卽漕良生監亦受其累累之不堪遂致上控亦有不得已
者撫臣又稱告漕之人如漕米未交亦當飭令完漕再予審辦此乃該省大吏
現在辦漕章程凡遇控漕必先押回本州縣勒追其意自爲清漕起見然此法
一行在矜棍固宜警知所懼特恐善良之戶橫被抑勒永無申雪之日夫交漕
已清誰肯上控其未清者非盡糧戶有心拖欠蓋亦有不肖官吏未滿貪囊多

萬載縣志

文徵疏

十八

方留難使不能清交者所賴地方大吏細核情形催令斛收實有頑抗乃予押
追庶幾不致已甚今一例發回押追地方官操縱在手恨其上控未免加倍抑
勒既滿其苛浮之數又逼令具結自誣方給糧串否則竟不斛收仍科以抗糧
之罪蓋至糧清串給原告受困已深新漕又至豈能復求申雪是徒逼糧戶以
浮交而無審辦之實也撫臣又稱因生監需索漕規地方官費無所出因取償
於漕良之小戶爲牽長補短之計臣伏思書役貪得無厭遇事婪索小民是其
常態縱無此等生監小民之被苛徵亦斷不能爲之稍減總在州縣得人能戢
吏安民而已臣查近日太倉鎮洋青浦紳士各有公呈稱漕書蓄養打手專毆
控漕之人各等語雖一面之詞豈盡無因今縱不能設法裁禁豈可張之轉令
盛也夫生監身列膠庠其有包漕開漕儘可革辦不獨學政卽督撫皆得徑行
斥革惟書役爲州縣收漕倚官爲庇印串在其掌握倘違例加倍浮收無人敢
控獨何法以懲治之臣在任兩年生監因漕案被革者多矣卒未聞書役有因

浮收獲咎者則書役之權重可知撫臣又稱州縣果有浮收入已情事必當執法嚴懲等語臣以爲此說未必能行該撫既知州縣不得不浮收而許其浮收矣若又罪其浮收而加以叅辦此必無之事且州縣所浮收入已與否督撫又何從查知臣竊惟立法貴得其中誠有加聖諭必兩持其平者且國課本有定額而浮收并無窮期今如該撫所奏凡告漕者卽謂之包漕是既予地方官以浮收之權又絕眾糧戶上控之路誠恐不肖官吏恃有此奏將來其意橫徵逐年增長則閭閻受害日深其流弊有不可勝言者夫劣衿固律所不容若必法所必裁伏乞皇上飭下該督撫妥立章程毋使偏重務期矜棍蠹吏各有懲創庶幾漕政可清而瀆良小民得沾實惠至臣職司訓士自當嚴切教誡隨時整頓斷不敢稍涉徇縱致貽地方官掣肘之嫌惟思矯枉勢必過正而創法宜防流弊管見所及不敢不以上陳謹奏

題旌義門本

清巡撫伊星阿滿洲

萬載縣志

文徵 疏

十九

爲秉公舉義懇詳請題以獎善良以廣旣陶事據署在西北布政使司布政使李承鄴詳請據州袁府知府高芝詳請萬載縣知縣謝衣詳准儒學教諭彭振東訓導李孚查看得里民周繼德同居傳及六世丁口蕃至百餘姜家之被常溫田氏之荆不瘁由茲九世同處將遙企乎張公抑或入葉同堂堪追芳於陳室一門雍和萬邑景仰紳士既同詞而請敝學合遵例以聞並據查取世系事實理合造冊清冊同族鄰甘結詳轉到縣卑職確查周繼德六世同堂之案屬實核對丁口亦屬相符並無虛捏合將送到冊結詳請本府等情據該袁州府高芝看得萬載縣民周繼德同居業經六世共爨已逾百人式好無尤雍睦之風足尙人言無間鄉里之頌堪憑於以徵聖治之感興實可爲人倫之矜式旣符旌典宜協輿情茲據該縣學查取冊結加具印結詳送前來理合具文詳請轉詳到司據該署布政使李承鄴查看得聖治光昌海宇仰鄧隆之盛皇仁周浹閭閻稱樂利之休惟朝廷之涵濡已深斯草野之雍和克著茲有萬載縣民

周繼德者六世同居一門敦睦合炊煙於累代食德飲和聚丁口者百餘型仁講讓兄弟則睦怡有序孫曾更繁衍多賢宜邀旌表以樹風聲茲據該府縣學取造冊結具詳前來本署司查與例符相應詳請具題請旌等情呈詳到臣據此該臣看得會典內載旌表義門有累世同居和睦無間者建坊里門題名忠義孝悌祠內等語茲據署布政使李承鄴詳稱有萬載縣民周繼德者六世同居一門敦睦合炊煙於累代食德飲和聚丁口者百餘型仁講讓宜邀旌典以樹風聲茲具冊結請題前來臣覆查無異除將冊結揭送禮部外理合具題伏乞皇上睿鑒勅部議覆施行

送教巡檢序

元危 素金谿

天歷至順之間海南黎毋山 在瓊州安定縣卽五指山 寇作出師討之時主將募勇悍無賴子弟爲之前驅謂之答刺罕軍答刺罕軍者縱恣無禁也於是盡斬刈黎人無遺種其後主將者官廣西用其法亦募勇悍無賴子弟以制

萬載縣志

文徵序

二十

莫猖獗人之爲寇者初亦頗立禦寇功久則習知官府事體仍潛與寇通寇出則有司必使之逐寇寇既不可得乃盜財貨牛豕斬馘良民以要賞其民罹荼毒者二十年去天萬里無所控訴歲復仰給縣官耗費亡藝言者熟知其爲粵害請罷其所給一旦發憤相呼起爲劇盜元帥府莫能制因上聞於朝數調行省兵擊之多不利殺湖廣省臣及諸將佐連撤數城震動南粵盜所未至者其民供給佛饗富完之家立致窮乏天子哀矜遠人降詔書諭降此等_盜手請命之秋也予嘗攷國朝初取南粵功狀惟靜江堅壁難下他郡縣_以送款當此之時得之敵國之手猶若是易易耳今海內既平十一年而兵連禍結賊殺王官鼠竊狗偷士煩當宁之慮是必有其故矣識時務之俊傑豈能坐視而不開口一吐其胸中之奇乎宜春教遂初 按梁孟敬先生居隱圖記稱家萬載此云宜春蓋舉古郡名言之 嘗從軍廣西論功授烏程管界巡檢昔蘇文忠公守徐州以沂多盜乞兼兵馬巡檢今遂初專居是職乃蘇公之願爲者國家

之待遂初亦云不薄遂初早用於兵間深知所以設施之宜辨止戈不殺之意知無不言臣子之義蓋歷舉陳於闕下方侍從文臣聞詔誦言無患其言之不達於天聽也余與遂初未嘗有一日之雅太史周君以聲素稱其瀆愿因其赴官而及廣西之事不識以予言爲然否采說學齋稿補

陳侯述職還任序

涂 觀豐城

述職臣子之大節也內而王畿外而藩臬以至要荒凡服命守土者皆三載修覲大庭重臣節也既至京師胥集於天官冢宰暨臺憲考其賢否以定其黜陟其賢善功最有足徵者合章上聞特頒璽書俾之復任重安民也於時吾在西萬載陳侯實在其列介行間其交游春官周君宗智等請余言爲贈予惟臣子之禮述職爲重而朝廷重在安民則又有黜陟之典近者會同考覈以善最無聞黜罷者十餘人厥選精矣陳侯賢善功最足稱奉天章擬脂車以慰父老引領之望予將何言爲之贈予聞侯以東廣雋才發身科目出宰

萬載縣志

文徵 序

二二

於袁律已僥事興利除害廉幹日著歲己丑亢旱甲午霖雨害苗稼特其時又猛虎當道啣人侯爲禱於城隍之神旱則雨降霖則晴應虎則他逸鄰邑稱爲三異民有頑狂梗化肆毒於鄉侯聞而檄召之明正其罪而竄逐之又有盜賊若干人出沒山谷爲害滋蔓侯募鄉之勇健者設法畧緝捕未幾俱獲之良善以安遠近復有除害之譽其他政事率多類此夫牧民之職興利除害爲先興利而利除害而害去非特其才之敏也其忠信誠懇之心必有素存於神人者是宜守郡者稱之爲藩臬者稱之茲述職來京冢宰臺憲亦合稱之璽書褒嘉俾之復往安民則所以修臣子之禮副民社之託上下之間交盡其道矣是行也不亦榮且重矣哉雖然古人贈言不以頌而以規傳曰官怠於宦成既盡其已然益勉其未然慎終如始以自圖遠大可也爲臣子者忠於所事黽勉竭力以安民食君之祿固無忝於心矣然上之待下旌能舉善無所不至若某也牧大郡某也莅藩司非昔之賢令丹乎君其勉之豐爵厚秩顯庸於時斷有

可期矣豈特交遊諸公之望哉亦區區贈言願望之意也

徐侯生祠志序

彭天補

廣洞橋者吾邑西鄉也已生祠徐侯而環鄉之民咸起而爭之曰吾眾人之母也豈爾鄉所得私耶邑中之民復起而爭曰吾賢父母也孰不得祀之亦孰不欲祀之而獨於爾鄉何耶乃請於今父母張侯度邑之迎春亭隙地爲通衢復捐俸佐之不旬日祠成豐棟飛臺崇廣麗緻像而肖之以識不忘一時能言之士述述揚湛濊亦既爛然文矣余率邑民百拜祠下乃相與作詩以告侯也去吾萬踰一星矣而政若新吾儕不以久故逸也其瞻依之也若撫摩噢咻之未常離不以遠故狎也是可以觀政矣侯之莅萬也百姓所安安之所患苦立罷之而其大者莫如平巨寇恤水災邑谷深山阻崎嶇曲折其治境之窮處爲沂源大圍介乎寧新楚湘犬牙相制籌薄礮澗繚繞暴悍者穴匿其中閃條跳警而殲除之令急於郵傳侯談笑樽俎默授方略遂探穴俘之林攫壑薙醜

萬載縣志

文徵序

二二

類一空且置壘設鎮增銅鼓石守禦之兵以絕亂源而食糗之鴉化爲好音歲丙子淫雨爲虐漂廬舍圯城堞莽莽巨浸民不得耕食侯出帑餘鑲庾羨粟便宜從事蹈文法之所禁而不以爲嫌予之粟以活餓者其稍有食而將餓者與之金躬自行鄉落間以口計其貧弱而賑貸之不使負戴襁褓者相屬於道其他葺津梁以資利涉營高閭以奠宇宇緩徵輸以甦積逋諸所厝注一出於純心精慮無鬻恩要譽之私程難什伯於昔牧而計效倍之是豈現定變爲哉夫衝狼牙之石者非巨流無力破駭駭之骨者非大鉞無斷微仁則雀符之眾孰與肅清沮洳之區孰與安輯民幸脫鋒鏑之警而得享更生之慶是侯之大有造於吾萬也故構而亭未已也復祀而鄉祀而鄉未已也復祀而邑冠裳赫奕俎豆森嚴衢歌巷謠朝尸暮祝稽古勿剪之棠墮淚之碑類皆得之身後未有若侯今日之過而化生而榮者也昔韓昌黎公以潮刺史量移吾袁及召還赴闕欲推放免備隸之政施之天下而袁人廟祀至今儼然潮於海內爲名

郡卽以侯才方昌黎潮亦不能竟侯才而卓軌循聲已跬步於袁之下昌黎
公有德於袁歷於茲而民不能忘今吾民去侯僅十餘稔其能不依依者豈人
情哉所居民富所去民思侯今之昌黎公也誦斯道大原仰瞻孔卓之詩卽侯
已心任之矣余不佞敬綴言於末簡

送四川都司經歷彭宗殷之任序

蜀爲坤維大都會其南則屏蔽獠獠東西殆數千里其西控制秦漢北亦數
千里邊防之警蓋無虛歲而頃者松潘諸夷之抄掠邊邑成都西也然
是以兵政不可不飭而在蜀尤爲急務大抵天下承平日久諸位武職多懈且
玩隊伍不練兵革不犀屯餉不給士卒之逃相半卒有急難罔知攸措如此者在
在然也萬載彭銘字宗殷擢爲四川都司經歷其同鄉諸友屬言送之四川都
司所領爲衛者十爲所者又軍兵指揮司一招討司一其綱領挈於都司而凡
軍政之自上達下軍情之由下訴上者其案牘出納皆綜理於經歷苟非燭之

萬載縣志

文徵序

一一一

明而稽之審則其弊甚繁而其患甚大矣銘由鄉校階職凡簿書所載必用詳
察以告諸帥使軍政之墜者以卬敝者以補軍情之鬱者以暢紓者以解武卒
由是而練武備由是而理則內可以除寇敵外可以固邊圉豈不克勝厥任也
耶若曰俎豆之事嘗聞軍旅之事未學則非所望也成化十四年戊戌三月
賜進士及第嘉謨大夫禮部右侍郎翰林侍讀學士南京國子祭酒西川周洪
謨謹贈序

贈鄉兵都統耆英彭君本道功成序

昔子游爲武城宰夫子以得人爲問則知爲政當以人才爲先也人才非一類
或德行或文學或武勇或智謀凡可以裨益治理皆爲政者所當敬重而器使
之也否則偏智獨力處無事可也一旦遇事變幾何能安戰而平定之哉袁爲
南昌大郡其屬邑萬載西抵瀏陽北接甯州深山峻谷居人稀少距治遼遠東
連上高新昌邊鄙之地奸惡互相隱匿故古今多盜賊或時而治或時而亂顧

長人者之賢否何如耳嘉靖初年邑之東鄉羅城有惡少兄弟周其姓者聚數
縣羣不逞之徒負羅城高村環溪嶺厲公陂諸險爲固潛伏往來劫掠鄉村殺
虜奸汙燒燬民居莫敢誰何上高新昌新喻分宜亦多受害縣兵出則彼沒縣
兵息則彼興捕之太急則易服色越境以避鋒隨復遠誘瀏陽諸賊歸劫其勢
愈盛民害日亟當道諸大職深爲之懼二年秋僉憲余公按臨其邑募民兵數
千併捕之擇智謀才勇之尤者爲總領時邑侯盧公賢令也有知人之明以治
之東鄉以溪彭君本道薦余公欣然受之委以鄉兵都統耆老之有智識者優
彭君受任志圖克捷與厥弟副總本朝併子姪英銳者數十輩晨夜捕緝散遣
鄉兵分屯甯瀏險隘塞其交通之路賄令各方細民密覘賊蹤有私往來者輒
擒之機智百發賊力難支脅從散亡而周氏兄弟賊勢孤矣三年二月追賊兄
至上高橫坑其鄉人共擒之以獻其邑長九月十六日捕賊弟至羅城四鼓就
擒并獲副賊強猛者數人餘凶悉殄而民患蕩平矣方俘獻盧侯而都憲盛公

萬載縣志

文徵序

二四

藩長嚴公副憲查公適皆撫按同聲稱賀嘉盧侯之知人余公之善任而賚彭
君之能不負所舉也時予修譜其家亦喜沐其平安之賜贈俚言以揄揚且其
先君子宗殷抱文武經濟分閩西蜀討平松潘諸夷厥功懋著則彭君宗殷爲
國平蠻可謂能用其勇矣忠也彭君本道爲鄉平賊可謂能繼其志矣非孝乎
忠臣孝子萃於一門莫大之福也將見能聲上達必有大任加焉彭君其勉之
毋曰吾老矣不能用也明嘉靖甲申十月賜進士第前南京監察御史督
直隸學校新喻縣黎鳳拜贈

貞烈傳後序

明治中葉 璽邑舉人

往余奈竊池陽謁忠烈祠則悚然歎其六烈女與黃趙雙忠爭不朽名寒如霜
雪亦可貴矣而六烈中若黃侍中翁夫人并二女俱赴溺死則尤爲嗟異嗚虜
死生亦難矣粉黛笄禕之流顧若是烈而貞耶彼冠裳鳴佩者相然信外後相
背之蓋也二女同心遂與其母偕耶夫忠臣烈女其義何異哉孔子曰匹夫不

可奪志蓋謂是矣乃人不欲死顧詫人曰我死弗獲死然耶初槐梟任君之自
景陵遷萬載也恭攜妻妾一子二女以行僅六十里夜盜突劫其舟任君之妻
李與其二女忿不辱於盜遂投江而死夫槐梟君於黃侍中所遭雖不倖而李
與二女之死於翁與二女之心未嘗不同一烈也說者謂翁與二女之死爲黃
侍中身化然則槐梟君亦淵源於光祿廷尉公刑于者然耶烈哉李與二女之
得其正而死也蓋其貞心峻節既不肯爲盜所辱而又恨其力不能與諸賊奴
徒堅其不從之志以禦之則彼不騁梟心於狼性不已也故寧以死於江
漢之廣毋寧以身俟及於盜賊之手卒之三姬沒彼凶殘者亦怛然寒膽遁去
槐梟君父子因得以保全然則黃之翁死於夫有婦道焉黃二女死於父有子
道焉李雖不死於夫而因全其夫以及其子則婦道貞矣任二女雖不死於父
而因全其父以及其兄則子道貞矣明識遠圖志不可奪赴死如歸誠知所處
豈感慨自潔其盡無復之者可同日語哉且攷翁夫人投水時引二女手結其

萬載縣志

文徵序

二五

裙裾及覓屍得之斗門橋下母子三人引手尙一申國人異之有司用棺斂父
老咸曰此黃狀元妻女云今按槐梟君所述李與二女死節狀亦謂其母女三
人齊扭下水後三日屍骸突出子母猶相連襟帶謹飭其面如生則又似乎翁
與二女肯豈天所以昭其烈者固然耶景陵人士亦必曰此任邑博妻女嗚呼
三姬並烈清芬不朽五葉滄滄水冽風高彼詘節而生命以死者君子宜以且
暮眎夫何足云抑又聞先正有言天之報施於人莫大於其子孫其子孫而
不知者以其身之富貴貧賤壽夭真論舛矣卽史記馮道傳見其其子孫履苟活逢
迎數主飴享高爵重祿視其若若傳舍過客然亦竟殄後也今觀任節婦李之
履行殆有烈丈夫之所難者雖其相槐梟君成大儒爲名師疑有未盡則將於
其子養元乎驗之人亦願見養元之力學績文當有以爲節婦榮也余固壯任
節婦母女之死有同於黃節婦母女之烈而深信天地之正氣人心之秉彝無
間古今未嘗泯滅獨愧夫婦女鬚眉自喪其心而爲諸姬之恥者

周義門序

知縣徐曰都奉新進士

萬載黃茆周氏七世同居天子旌其家曰義門蓋國家承平日久涵濡休養和氣薰蒸至於山陬僻壤莫不欣然向化甚且累世孝謹聚順一堂視夫異宅別爨思以肥其一身一家者蔑如也豈不盛歟月臺辛君萬載文學士又周氏姻婭也知其家甚確嘗告予曰周氏之先不及詳今歷七世世推一人主家政百數十人皆受戒焉自習舉子業以至力耕任勞服賈走四方量其力之近而命之無弗從者績紡紉緘使婦女各執一事以供冬夏之布無私鬻於市也小兒女序坐飲啖寂不聞聲家故薄所食粗糲園蔬而已魚肉非歲時伏腊不設至於老者賓客未嘗或缺凡卑幼稟命拱而立莫敢坐於長者之前平居教子弟循循有禮里中讖與不識望而知為周氏子也予聞而歎曰周氏家法推之平天下可也豈特風示一鄉一邑已哉宋江州陳義門百犬同牢而食一犬不至眾犬不嘗今周氏有豚甫生母亡旁犬就豚乳之日以為常夫和順之氣由人

萬載縣志

文徵序

二六

而及物不假勉強而皆出於性之自然即此一犬先後如出一轍是足膺義門之寵錫而無愧矣辛君請予文紀其盛予固樂道節義之事者遂書以為序使歸於義門庶有以堅其志而為天下後世法焉

高城九老齒錄序

郭大經

古者大夫退老教其鄉之子弟及興賢能鄉老鄉大夫獻其書凡以教起於鄉尚齒德厚風俗也高城古高侯鄉南唐李徵古產於斯刺袁州敕改所居曰懷舊鄉孕秀里(休舍人先聖廟記稱其炳筠州之靈可見山川秀異賢士挺生越於今雖科名不逮昔而蓄道德能文章龐詹壽考樹一鄉儀型者猶踵相接也辛氏世居其地族督瑞庵先生士林推祭酒其族蔚山公從之公並以行誼著比屋而居者為王氏明經弼子與岐山律堂二公俱端風尚屬名檢望衡居者則余族惠軒前輩以禮法範及門多造就同族西京公亦力持名教有先民矩矱惟周靜齋明經相距約數里不時過從里之人以九老目之共矜式焉憶余

弱冠後授讀山泉書屢獲謁瑞庵惠軒兩先生而靜齋弼予蔚山諸老亦時接其言論風裁每見瑞庵先生與諸老游息也來而翩然望而皤然聚而藹然其貌恭其色懌其詞簡樸而溫文蓋道氣之勝豈與古香山九老爲期矣閱歲余倖售北上薄宦於外末由過其地則聞諸老構宅一區燕集有所既而後先謝世祀木至於其中以鄉之人薰德善良當必有緬溯風規不能忍置諸懷者奚啻子孫不忘云爾哉今夏四月瑞庵先生曾孫明珠姻丈謀梓諸君錄委序於余余作而歎曰盛矣哉斯舉也自交道之衰浮薄輕棄劉孝標者論已惜乎其言之乃能於數傳而後修其祀復系以譜聯屬之思將有引於勿替者從可知諸前輩道義相結其託根也厚而後世賢子孫篤承先志其綿澤者彌遠已朋友之義孝弟之心守先待後之事悉於是乎在鄉之人觀而化焉相與崇齒讓厚風俗賢能之興若徵古其人者挺生輩出又安在今之異於古所云也是爲序

萬載縣志

文徵序

二一七

寒衣會序

辛從益

窮民無告王政必先撫而字之朝廷所望於良有司也而有司所望又在於民之相恤恤之事有二饑與寒而已饑者易爲食而寒之給衣較難天下有偶荒之歲無不寒之冬以常有之困行多費之惠宜其難也古司徒之職族使相葬黨使相救州使相周上以是帥下以是勸所以成親睦之化也我縣土瘠產薄而民情尙近厚好義樂施之舉往往有之自歲饑公米樂助外其設公會爲窮民計者有因心堂施棺之會有育嬰堂養女之會相葬相周救與合而寒衣之施尙闕焉蓋以費侈人繁情僞多而喧爭易啟也邑侯錫山丁松濤蒞任之四年頻歲豐登四民安業思所以履恩樹德求民困所未紓進父老紳士訪焉則僉以寒衣宜施對侯慨然立出金三百付之已而縣人競相傳頌以爲我公誠仁甚乃肯捐清俸爲吾縣窮民計吾儕爲同縣奈何不自相恤於是爭輸樂助不勸而集數日間得八百金而未已迺相與推廣侯惠計永侯之澤於無

窮先立輪冊登侯捐數於首邑人所輸陸續次焉弁請於侯先事酌籌製襖施襖之法及存留生息之規備具擇邑之殷實賢能者司其事官爲左右之侯既喜邑人之勇於從義也爲核定程式載於冊而屬余以序余惟賑窮恤貧俗之美政之仁也昔漢王望爲青州刺史行部因饑民裸行以便宜出所在布作褐衣晉鎮南將軍劉宏憐持更老兵無襦給韋袍複帽並見稱史冊然皆出自官帑非由減俸今以此舉視兩賢有過之無不及五袴之歌復見於今矣而縣人感侯之仁亦遂能踴躍捐助以此見善倡必應而政之大可爲也是以傳於鄉之聞風踵捐者尙不知其幾以吾邑好義之多不患公財之不聚而特慮誤於所施誠能守侯之意而推之將來釀金所舉皆有益民生事既不惑於非義之義而民得因免饑寒而益生其廉恥禮義之心我侯衣被萬人之澤豈有涯乎於是欣然櫛管而序之嘉慶丙寅八月既望

因心堂序

萬載縣志

文徵 序

二一八

嘉慶丙寅夏余攝篆萬載世家子主生本培執摯問字余愛其醇謹弁知其家學有自暇出因心堂冊索序閱之知其自太父來積德深矣堂始乾隆十八年生祖寅齋邀同志七十人爲掩骼計距今五十四載銀兩不足三十而施棺無算兼修理道路有餘則買田且構堂宇焉皆寅齋經理功也事本長民者責澁政日淺未及舉行方以爲歉生家世清貧顧毅然爲己任相因勿替豈不可敬而在堂諸君皆能因其不忍之心以行不忍之實各解私囊鳩成盛舉以視孔子麥舟驛丞蓬旅相去何如風俗不既厚乎要非倡首之功不至是夫善作者須善成今堂之始寅齋既生息致羸堂之構厥弟雲亭復偕劉恬齋輩經營得法可謂善作矣承其後者尙務所以成之當遴選老成司其出入歲有贏餘便可垂久天下事不盛則衰不消則長盈虛之數必無中立也在堂諸君其念之抑不忍之心卽仁之所見端也使因是心而充焉達則濟一世窮則盡其力之所能爲敦善行而不怠一言可行終身以是爲修心之道可卽以是爲傳心之

道亦可

聖誕碑案序

知縣江璧

夫佛門誕降猶傳香火因緣道術飛昇尙有丹砂供養矧以生民未有之聖際茲誕育之辰而可酒醴無陳牲牢不設哉然粵稽載籍崇報雖隆上丁釋菜聿修籩豆之文而庚子陳經未備樽彝之祀求諸往古典尙缺如我朝重道崇儒有加無己自雍正五年始命於先聖誕辰行釋奠之禮肇行於浙越及江右彬彬乎尊師之典邁越前朝矣萬載學宮前此年久弗洽道光辛丑歲上幸而新之鮑君鍾瑞捐錢二百千文嗣又倡捐田若干畝次則郭君如衡如盤續捐田畝及宋君鳴謙鮑君承宜捐貲敬備誕辰祭費增修祭器以垂永久厥功懋焉夫自二龍繞室五老降庭嘉祥兆於尼山靈異鍾於泗水在聖人與天無極遠待介壽於編氓而斯民率土同登竊願薦馨以祝嘏六經尊俎豆敦水原木本之思萬古仰衣冠在秋報春祈而外率行罔替式禮無愆迨丁未之冬鮑君

萬載縣志

文徵序

二九

復於聖廟墀外度隙地爲土地祠輪奐聿新有美畢備歲在丁卯予來宰是邦適當先聖誕辰修歲祀之典先期致齋肅恭將事祭之日率諸生登堂謁聖見夫棟宇森列鐘簾燦陳百度具修儀物備舉竊幸都人士雍容有禮因相與嘆聖教之昌明而人文之所由蔚起也是爲序

建義學序

古者家有塾黨有庠州有序國有學自公卿大夫與凡民子弟皆得入其中教之以聖賢之書申之以孝弟之義開之以功名之門廣教化美風俗育真才端必由此後世不然是以學校無真儒名教多敗類風俗日澆人心日僞而莫知所之萬載土瘠民貧亂靡有定數年以來講習多輟居官者謂讀書爲人自己事何煩上責也夫邑令爲民父母父母於子養之教之其心始慰坐視昏愚不爲省憂乎知縣常維楨於康熙十七年冬來吏茲土時滿城荆棘居民鮮火多方招撫次年方漸歸集鳩形鵠面何能從事詩書雖欲興起造就無由也而與

人為善惓惓不忘至十九年民氣稍舒卽立義學於關帝殿延生員汪映極為師招致生童一十餘人肄業其中所需薪米束修禮物皆捐貲以時饋緡每年約費五六十金公暇親詣督課勉勤戒惰諄諄以正心術勵廉隅敦倫紀興禮讓為先朔望發題作文精通者賞之疎謬者正之告諭條目詳列嚴謹足年冬學憲詹試袁取義學員生何士傑郭邦泰優等錄科童生辛勤學宋啟迪辛受道進邑庠二十二年學憲高進童生辛如璟郭鍾耀辛金聲辛受成宋廷御易首乾辛邦榮鄧上朱文光宋希雯汪有耀十一名補弟子員由是文風丕習亦自彬彬儒雅較之往昔日新月盛後之居官者慎勿視此為迂務也

金生兄成均入都送行序

邑歲貢喻大同

昔袁有芑山張氏當其貢入成均也躬詣京師購書數萬卷以有關於性理經濟者則列其篇目藏之閣中而甲乙之其搜羅之廣研鍊之精可謂至矣夫以學術之宜辨異同也自明之中葉以後多以宋儒為友離謬欲直決其藩而吾

萬載縣志

文徵序

三十

郡芑山之所遜志者攷學術源流之故則以性理書目統之攷治術源流之故則以經濟書目統之其不以內聖外王之學為易知而惟孜孜焉循循焉求諸內而務明性理求諸外而務達經濟益全體大用之規模在是矣此所以當日在京師是以傾動名公卿賢士於一時也逮我純皇帝詔求遺書凡內京外直省諸臣工務以闡明性學治法關係世道人心者方准採訪而進呈之與芑山購書之法若合符節是求書之法卽求學之方矣金生積學既久遠近於國朝先正可入名儒傳文苑傳名臣傳循吏傳者莫不備為搜討而決刊之今又躬詣京師徧觀諸王公巨卿本學術以眉安天下者以擴其識而壯其懷豈徒著錄成均為儒學中秉鐸一方之士也金生勉乎哉所學之規模既大有挈諸天下而裕如者矣抑自世之溺於濫時文也卽釐正文體者尙不易得况講明學術扶樹道教乎余與金生於風雨晦明之際言之屢矣然則此一行也內必要諸正學之防外必要諸正朝廷正百官正萬民之防余烏得不為舊學者告

之告之維何曰成均者所以成其平均天下之學也於祖道時宜以俯觴庶登車攬轡無不酬之壯志矣彼僅以行色之愉快相羨者要不足以知天下士光緒己卯春月

東洲敬教堂序

蔣芳南昌舉人

康樂大橋之東洲書院於多士肄業而外復建敬教堂凡小試所需悉取給於堂既歲事首事諸君子臚列其樂輸之成數終歲之出入爲一冊而屬余序余自維固陋然緬茲盛舉其曷敢辭在虞書曰敬敷五教蓋以五品爲教而敷布之欲民以有義有親有序有別有信爲務而盡倫以幾於成德也左氏傳載衛文公敬教勸學則知教與學相資教隆而學亦隆也夫人其父生而師教之故學詎曰師嚴而後道尊道尊而後民知敬學蓋以道之寄存乎教而教之施賴乎師然則言敬教而尊師之意在焉師尊而道尊是堂之名其意亦至深遠矣堂去書院僅數十步讀書者得以朝夕至游斯堂者庶幾深思敬教之義而細

萬載縣志

文徵序

三一

釋之凡爲教者則勤思夫長善救失之訓而善誘以時教之正業退息居學凡爲學者亦恪守夫大學敬道之意以馴致於知類通達強立不反則是堂之建豈獨區區財用之微實有以探古人化民成俗之本原而與書院之設相與有成也請以質之首事諸君子是爲序

連城集序

明知府汪若冰

海內文章家毋慮數十百然大率根乎性術淵靜沖恬者其文醇以典豪宕瑰瑋者其文奇以邁生平表樹亦多稱是康樂崑崙張先生雅負奇才世家高第佐南司馬曹海內想望風采迨秉憲分藩若而年周旋西粵我粵之人日祝其出擁節鉞入筦樞衡以究經濟之用不謂年不滿德位不匹才未究萬分之一至今尙論者往往於翰楮間窺見一斑今嗣汝梅彙先生遺稿若干首爲一集而問序於余不佞業從鄉父老沐先生膏澤迨入袁而先生抱疴山中僅一望見顏色然高風朗韻自得於警歎指顧之餘當粵之多事也高夷外訂山寇內

煥而巖且稜甚先生不難以其身為保障擊畫方略動中機宜宜論一檄賢於十萬師邊陲晏然家室安堵誰之力也庶幾當八面而制百蠻者哉彼妒口篋書先生不顧求幾朝論白尋補滇藩乙巳入賀遂高卧不復起則先生之能已見於天下所為履蹈固自有不朽者區區文章特賸技耳今觀序記之鋪叙詳核檄劄之縱橫曲折駢語莊麗翰東委婉川之泠然金石之音咀之冲然五味之和所謂神氣英發而德器冲恬蓋兼之也以故矢口成詞不事刻畫而文采自工即以登古作者之塲吾未知所低昂也豈與夫說鈴和鼓工鞀以見奇者同日語哉不佞鄙俚不爛古文詞而叨守名郡竊嚮慕乎先生之德因及其言之文也不辭而為之序

四書理解序

學政湯聘

崑山徐氏初學辨體一書本老泉評孟子疊山評檀弓及有明郭鍾之徒評諸經遺意而集其成然於四子書則缺而未備也處州楊廣文維鑑好古勤學迴

萬載縣志

文徵序

三二一

絕時趨晚年取四子書悉以文法評之大意與徐氏辨體相等不可謂非卓然成一家言者竊維朱子讀書之法第教人虛心涵泳切已體察不可橫生意見妄為穿鑿若徒以文求是則周子所譏為陋者矣今觀易序因辭通意之說則沿流溯源甯與航斷港絕潢而求至於海者同類而共笑也哉余悼士習文勝急欲進以實學而慮難遽轉亟因其素所沒溺者而姑為之因勢利導焉按試諸郡輒用辨體一書為多士訓揚廣文適以四書理解問序於予予嘉其能補徐氏之所未及也於是乎書

李厚岡集序

大學士費瀋浙江進士

李明允厚岡予癸未同年也為人樸誠端謹篤學勵行居家孝友鄉人化之其為文宏深肅括高出輩流不懈而及於古登第後因需次尙遠授徒鄉里陶冶羣材著作益富銓期既屆先選湖南永興今年餘以憂去服闋挑發雲南任審裁呈貢令十餘年勤心撫字治行有聲予兩任滇藩均得共勩吏事且以同譜

故益契洽焉既而浚於進取引年乞休挽留弗獲又以宦囊蕭然暫延為大理書院師明年始僦裝歸里自是以後不通音問者十餘載矣壬戌夏予防河清江嗣君光宰來謁始知厚岡已於庚申冬月朔化去並捧其所著經義攷四書細論地理考古今體詩文若干帙就正於予予細加繙閱竊歎其闡發書旨折衷醇正考訂山川見聞精確形諸吟咏抒寫性靈均足以信今而傳後者惜予防河公冗不及作序緣書此以貽之嘉慶七年壬戌七月既望

最秀園文稿序

宜春令黃河清臨進

文必載道翼經而後其言立三代下如賈生達於禮董子深於春秋韓子約六經之旨以成文比比皆是予嘗有志於學未能自力惟所至必事賢士大夫冀同志有以扶進之比來宜春於萬載得兩人一為厚岡李先生湛深經義著述等身為余所事者先生則以友遇之一為朝岳辛子為予所友者而辛子顧執禮甚恭凡予撰學堂集詩文辛子並為定而序之茲衷其最秀園稿自家走南

萬載縣志

文徵序

三三二

昌欲予一言予能無本其志而畧道其所以為文者乎夫江河之大且深也皆有重源長流不息而又匯納百川之水故能經南北數千里沛然而達於海以斯文論之六經非其重源乎辛子初見時曾以所著春秋申議相質予因知其潛心經學自後予有所作必屬是正辛子於予亦然嘉慶初就館樊副總戎益相與切劘無間而余之獲奉教於李先生亦自此始方其時公暇輒理舊業先生數郵示辨明經旨之作歲率四五通而辛子時出所為文皆本十二諸法名教殷殷求益之意溢於書問間每燭跋更關心目開朗恍乎至道正前誠不知上有公府之趨承下有簿書之執掌也以予於道無所聞於文無所得而李先生與辛子共信其不敢自是不能自己之志有同焉者故往復相深直諒多聞之助日受之而不自知而辛子之所自為亦從可識矣今徵序於余又屬審其佳惡淵淵乎不敢自是循循然不能自己之志歷久不變過此以往又烏能測其所至乎韓子云無迷其途無絕其源終其身而已矣辛子勉乎哉江之越離

堆下淫豫（卽灤瀕之轉音）河之冒積石出龍門激蕩成奇不可方物惟其來之有本故遇境斯成瓌觀也辛子其益勉乎哉今厚爾雖不復作矣而辛氏多賢融初孝廉暨進士敬堂嘗相與肆力古學敬堂遠宦都門而融初近在里開可改切磋獨余匏繫章門回思昔年師友之益澌不可再此又因序辛子稿而悵然增感者也

瞻思堂賦弁序

徐一唯

余讀七篇至端木公築室於場獨居三年事嘗撫卷日賜於尼父心喪者也尙依依不舍如是况親喪固所自盡者乎近世學者執漢儒廬墓非中之說遂視此事若有所託而逃不知事固依乎中庸尤當觀其誠僞洵根於一念之誠則古人友于兄弟者固有以身代之以痛分之二者矣又安得以廬父母之墓爲迂耶余今茲邗三易歲矣採風問俗令有責焉龍生以仁孝行人勒口碑值公暇披閱瞻思堂集玩諸名公載筆而龍生之瞻思誠所謂常目在

萬載縣志

文徵 序

三四

之中心藏之者也車溪之廬誠身與之依而神與之游矣龍生賢矣哉因託意命詞作爲茲賦以附風人之旨而事之印證固反之此心而自得云

夫何怙恃之蚤逝兮方週期而子遺製芟荷之無從兮誠弱質之易迷長夜徂以難旦兮慨甯氏之栖栖倚北極以延佇兮慕梁公之與歸悼嚴慈之不復起兮歎此離幸有母姨可以想像兮刻木者誰盼彼車溪兮若天漢之流漸有向可眠兮窅窅者其在茲諒天路之豈遐兮不可階而升隨感四序之迭運予惟野閒之淒其惟予懷之弗渝兮知造次必於是曾參養皙兮羊棗之不忍嗜親未及養兮徒絕粒以興悲築室於塋兮賜慕師尼昊天罔極兮舍親之坵墓何依曩時末照兮苦奔獸之疾趨岸谷岑寥兮聽蟋蟀之鳴時少發憤於下帷兮念書香之不可隳畢集於採芹兮何皇於衡門之棲遲誦梁甫之吟兮九野纍纍笑荷鋪之過兮埋也何爲奄大塊之飄塵兮駟馬末追冥宮之難再啟兮孰是靈衣有墓可廬兮踐履不遺思親而不見兮見親之壤卽若與親而相依嗟

有生之必化兮胡庸彼蠅飛而蚊聚寄光景於逆旅兮顧堂奧於薜荔視榮華於朝露兮繚蓬寶於辛夷嗟夫邈無內顧兮刑于寡妻牛眠逶迤兮以續以似檄論褒嘉兮帝命且至天理之在人心兮孝子永錫爾類

質平詩稿序

大學士戴均元大庾進士

萬載辛君元辰緘其尊甫質平公詩稿寓書問序於予公與予同舉於鄉歷官於蜀所至有聲內擢部曹未幾引疾去曩予視學川中校士之暇與公剪燭論詩妙契元匠心折雅深宦轍分馳駒光若駛每當花朝月夕未嘗不翫見披髮點筆時也論語言授政不達誦詩奚爲良以詩本人情該物理苟明乎溫柔敦厚之旨卽達乎弛張損益之宜公以孝友之性高潔之操仁厚之心淹雅之學措諸事業形爲咏歌儼然超出流俗蓋有存乎作詩之先者矣晨星易落宿草方滋展閱遺編不勝今昔之感率書數語郵歸元辰以志譔誼於勿忘云

敬堂文稿序

知府鄧傳安浮梁進士

萬載縣志

文徵序

三五

敬堂辛君治經先於予而遂於予予曩疑周禮何以有姜嫄廟而無帝嚳廟及得交君乃知禘所自出之確爲感生帝舍鄭氏說別無可從也又疑馬鄭俱傳古文尙書何以古文至東晉始出及聞君言乃知孔冲遠正義所列舜典汨作九共諸篇名實西漢之真古文因博求閩顧兩家書以證之嘗念予與君同受知於翁覃溪先生予治經未卒業而君著冬官旁求易圖存是已成書予自壬戌後不見君者逾十年比歲在丁丑予謁選來都而君卽世已四年矣志行與同而年命之不可恃如此豈獨故舊交遊之可傷悼也君子僕奉刊敬堂文稿求序於先生與予先生已諾之矣未及作而卒予覽君說經文字則余所歎服及蓄疑而未遽以爲然者皆在其中又覃溪先生表君墓文云所與校勘注疏說文諸條俱存予篋中而稿中無之余嘗見先生說文校本有君所辨舛爲卑隸體之說知君精於小學發明古音古義者尙多惜所存先生篋中者無從搜羅以補遺佚也當先生未卒時余屢以說經文字質於函丈先生輒手筆題

識謂今日能以考訂助我者無第二人蓋誘余以學而歎君之不存也使君尙存則予今日之游京師君必有以益余矣今執筆而序君文熱不勝情隨事遷之感云

四書日知記序

龔士範

自宋伊洛大儒出有功於六經不少顧言論孟而或遺學庸言學庸而或遺論孟未有知四子之爲全書者惟朱子號集大成定學庸論孟爲四書爲之章句集註稿經數易而後定垂沒猶修改其用功較他經尤深厥後如真氏德秀之四書集編趙氏順孫之四書纂疏劉氏因之四書集義精要胡氏炳文之四書通齋氏道傳之四書纂箋等書皆宗主章句集註而心得所抒亦有足匡其不逮者未始不爲功於朱子也萬載郭明經復齋先生績學士也余甫莅斯土卽訪知其研覃經訓老全不倦竊景仰之今年春先生手其所著四書日知記九卷來示予弁乞弁言余惟四子書習自童年而其理終身玩之不能盡惟善讀

萬載縣志

文徵序

三六

者舊學勤商新知日啟其所講明而切究者功匪淺歎也今讀先生是編見其彙參諸先儒說解而得其異同復博證羣書以折衷於一是凡一章之體要與一句一字之神理以及書中天文地理制度名物無不領會融澈辨識詳明朱子云讀書玩理外考證又是一種工夫是編兼而有之洵足拓士林之見聞而羽翼紫陽也夫

春秋內外傳類文疏義序

江西巡撫張 芾

咸豐元年三月歲試饒州浮梁教諭辛君以是編見示余閱其書輯左氏內外傳文分類而疏解之內傳分六十四類編爲二十卷外傳分三十九類編爲十卷合共三十卷凡古入文章之體例具備而訓之形聲悉明誠善於說經可以別樹一幟者也夫書無注讀者不能了然未讀羣書不可注一書欲注一書者必合羣書而會其通乃能曲暢其指是書有不注者固不贅一詞有不得不注者必苦心分明考據精核足補服杜諸家所未詳其於古音今音之同異正義

俗義之是非本義借義之可通與否無不剖析入微至於糾正舊說有所折衷或參議論於注釋之中亦皆切中情事講小學者莫能出其範圍習古文者皆可誦其涯涘其有功於學者豈淺歟哉君著述甚富此特僅見一斑吾知不脛而走海內矣

春秋異文考證序

孫丙章

說經之學易與春秋爲尤難易經劉向校於前郭京正於後中間如康成王輔嗣以翼附經篇第不無移置然文字之間其有異焉者亦寡矣春秋則三傳各守師承片言之歧動生義例故春秋之難治視易尤甚萬載幸同叔先生家世以績學著尊甫助教公纂述詩書三禮三傳凡數百卷尤精於易所著易圖存是學者稱之蓋先生研精六經皆有心得其治春秋功尤遂嘗病一字褒貶之說未能盡合經旨乃撰異文考證二十二卷微示其意其按而不斷若不欲與諸家爭者然諸家當之未有不悅然而自失焉美哉淵乎不獨先生之學問見

萬載縣志

文徵序

三七

而性情亦見矣我朝經學昌明漢學末學並臻極盛其治易春秋者則安溪李氏桐城方氏予尤心折焉乃今復得君家父子蓋文貞公之於易象助教公之於易圖皆能啟千秋未啟之鑰必傳無疑方望溪之解春秋也謂經之所書孰爲春秋之文孰爲聖人所作必辨之不惑然後經旨可見而先生則謂三家之經文各異三家之傳說各異必經文定而後傳說可得而折衷其於望文立說之弊廓清尤力昔助教公易圖存是序云一圖之成必求有據一義之立必爲可通先生實師其意凡治經者所宜取法也獨易也哉獨春秋也哉

新建進士侍講熊爲霖

丹山文稿序

客有抱父癸之盃康侯之鼎犧象之尊薄遊五都之市者過者見之見者亦過之或笑而摩挲之或嘖之客亦卒無一言祇自莞爾而已既而有譏嘆者曰之人也之器也曷殷紅隱碧如是耶中互雲紘雷轟其研丹飛翠塗乙以爲是者則客亦弗言又於稠人喧豨中有一凝神而諦觀者曰客從何來乃抱此絕世

法物也惜哉恐識者之希也古有之知希道乃貴吾子假欲邀鑒賞於大地也胡不綴之以夜光之珠荆山之玉星屑而錯以乳金之跌紉乃徒抱爾土花苔觸之餘留數千年真舊質耶君子曰皆非也世豈有父癸之盍康侯之鼎犧象之事向於稠人喧逐中求知已耶知者自知不知者自不知見可過亦可吾自存吾寶焉風雨有靈天與相深耳丙申初夏陳子丹出從袁山來鹿洞從子遊稍憩息出其存謀以視予因有感夫此情此境書跋以歸之未審亦相眎而笑莫逆於心否耶

又章文集序

分宜進士林有序

萬載龍江水古名蜀水其源發於錫杖山流入瑞河不與袁江匯然水極清潔無異於袁江也辛又章先生產龍江以歲貢授石城學論石人士佩其教爲立主祀義學中生平科舉藝數十首皆其族祖殿開孝廉所評薦者吾選錄一帙附於江右諸名家後因憶昔人論文每取水以喻茲帙也殆所謂風水相遭自

萬載縣志

文徵序

三八

然成文者與

環碧山房詩集序

東鄉進士艾 暢

詩失古久矣世之爲詩者非其衷萬不容已也不過藉以致悅於人以取名於世耳此孔子所謂巧言令色鮮仁者也就其彼善於此則惟莊而不佻麗而有則無戾於立言之旨者爲差近焉予曩在京師與士大夫論詩嘗持此說羣病其苛蓋古學不明於天下士不知守已務道以自全其性命惟溺其心於詞章以相媚悅積習難返亦無怪其然也吾同年友辛君德生嗜奇好古而性狷介雖屢空常泊然於世無所營其爲學誠未知其於道何如然固知守已自重不以爲悅故其爲詩亦祇自寫其天趣無悅世取名之心今歿已十餘年其子曇抱其遺集屬予序而傳之嗚呼德生晚得一科卒不遇以死其平日艱苦自守縱使不能詩予尙思有以傳其人况其詩莊而不佻麗而有則與予所謂與古差近者爲有合哉德生畫工古梅瘦竹老松怪石蒼鬱瀟遠絕俗千尋然頗

自矜重遇所當意卽累幅不惜否雖豪貴人齎重金不能強其品可知也
存心軒稿序

上邑舉人李祖陶

存心軒稿萬載盧翰坡太守所著其子清沈昆仲於居喪之次從篋中檢出得
時文一百篇試帖詩若干首雜詩若干首分爲四卷以書抵予屬爲校勘且云
古文不多作間有所需多情代人代草惟稟覆林文忠公一札實山已手亦附其
內予先取其札閱之則粵西土俗民情分別綦析中陳買補倉穀河理盜源二
策亦切中機宜末爲管梧關者言情尤款款動聽文亦有條有理不蔓不占嘆
曰此真古文手亦濟時才也次閱時文試帖及雜詩五七律佳者綦多但貴精
不貴多因乙其中之平平無奇及題之有名作在前者四十篇詩之涉於應酬
者若干首試帖亦略爲刪存而以稟稿附於其末詢之清沈昆仲僉以爲然且
屬爲序予惟世之論文者多謂年少早達之士類皆天分優人功拙其學不能
遂其文亦不能精况時文爲敲門磚既得藉以進身矣則高者求功求名次者

萬載縣志

文徵序

三九

圖富圖貴其精力皆別有所用而不暇胥胥於文卽偶有以詩古文自豪者亦
稗販以爲應酬餽釘以爲羔雁豈復能原本性情按據時勢卓卓然爲有用文
哉太守未冠已遊於庠甫冠卽舉於鄉逾二年成進士以卽用縣分發浙江歷
任臨安石門海鹽三縣政聲卓著行取入京成皇帝以同知陞用浙憲謂海塘
工鉅非君莫可留羈此任首尾三年濟險出艱心力交瘁而目爲之傷暨之粵
西任則隻身遠邁窮極西南邕容兩管馳驅殆遍又前後三辦兵事餐宿於蠻
烟瘴雨之中暨守桂林遂以勞瘁卒於任其於文墨真昔人所云一行作吏此
事便廢者也乃太守於服官後始作雜詩仍復不廢時文文旣朗暢和平與世
之艱澁其詞纖仄其體者有別詩亦清真刻露與俗之矯飾其情藻繪其采者
迥殊是何早達服官政之人而猶與樵悴專一者之能以文采見也孔子曰仕
而優則學學而優則仕太守筮仕時學猶未優旣仕則循分盡職之餘不營情
於富貴不紛心於博奕性無他嗜晷有餘閒購書數萬卷暇卽坐臥其間以優

其學既邃而發之於文遂不但詩工時文工并稟覆之詞之出於官文書者亦如菽粟之可以充饑藥石之可以已病仕而優則學學而優則仕夫豈一朝一夕之故哉吾聞大守之在浙也卽以政事見賞於程月川中丞其在粵也始見知於林少穆先生繼見重於周敬修先生使得承其年知功名亦不在諸公後矣讀此稿者甚無僅僅以文士目大守也

不負軒文稿序

學政蒲城進士王鼎

爲文之道本乎學學之既裕而以文達之必能合乎聖賢立言之意而不苟爲藻纈艱深之詞以求勝於人蓋其所以爲學者於四子書六經之義往復尋繹深得其旨趣之所歸而又博求秦漢以來典籍證以先儒論說與夫日用行習之宜本不徒以文見也卽以之爲文亦必充然沛然使人見其文而知其學之底於成東坡所云博觀而約取厚積而薄發流於既溢之餘而發於持滿之末者正謂此也予嘗持此說以論文自有明王唐歸胡以及金陳章羅輩與清熊

萬載縣志

文徵序

四十

劉以下諸家雖所入之途不一所造之域亦殊而其所言之理皆純粹精當而非俗儒意計之所及者學之有餘而不可以襲取爲也嘉慶壬申視學西江日與諸生論文其文之佳者固可卽文以驗學其文之未卽佳者勉以爲學之道而其後文亦蔚然可觀充積既深發越自茂必然之理也萬載末生理暨姪廷英持其先祖不負軒文稿請序於予予觀其根柢盤深枝葉峻茂才力闔肆而一歸醇雅不悖乎王唐歸胡以來所傳之法誠非尋常操觚所可及以爲其故不徒在文也其必肆力於經史博覽乎古今而於文發之也劉彥和言積學以儲寶酌理以富才其斯爲善於文者乎其斯爲不負所學者乎

滄螺集序

萍邑進士蕭玉銓

同叔先生玉銓年好友也以所著滄螺集就質於銓而屬爲序銓與公別久不獲接風雨作促膝設得一讀其近作殆不覺肝膈之傾寫如驟然相遇於銓紅酒綠間也先生種學積文浸淫於古韶訖時卽擢藻震儕輩弱冠遂捷賢書蹕

厲風發雖干將莫邪之鋒不足方也晚乃困春明屈志於新平學博靡史枕經
益閱以肆其爲文高簡堅栗間溢其餘波兼及應制錯采鏤金皆蔚然可觀非
屑屑墮人窠臼者夫試帖權輿李唐至清而極盛作者林立類皆自闢闢奧出
新意於法度之外確然足以信今而傳後先生登其堂而咀其裁由此益引商
刻羽含英吮膏知他日和其聲以鳴大庭之盛者將於是在銓不敏不敢自
謂牙曠之知音竊於公而窺其崖畧爰弁數語而歸之

出山草譜序

瑞安孫衣言

萬載湯侯來宰平陽不數月威惠盛行循良之頌達乎四境予聞而心慕之既
而邑之人士衷其所爲條教文字數十百篇寄以示余既受而卒讀之竊歎侯
之爲政所謂誠乎爲民者也昔在宋時平陽號爲難洽與枯之松陽婺之東陽
有三陽之稱作邑者頗患苦之蔡任季重平陽人也而宰松陽初至官輒大署
其門曰我與斯民爲一體誰言此邑號三陽夫官之與民苟不知其實爲一體

萬載縣志

文徵 序

四一

則其聰明知慮之所及政教號令之所施必不能深察乎民之微適符乎民之
志况於秦越之相視哉今之平陽畏法而知義其易治固異於宋之時而侯之
與民一體其用心乃無異於季重將見平之民變而至道侯之美政日盛月新
久而不可勝書矣此尤予所深慕也光緒甲申序

小同詩鈔序

邑訓導盧 讜

己丑春與萬載辛同叔先生相見都下談理鋒發知其學有淵源其苦補助教
公號敬堂者以經述著聲翁覃溪學使歎爲絕羣同叔先生其嗣也相濶十
有八年余方司訓萬邑先生謝學博家居遂得重追風歎宴談之下若怛然有
不自得者一日冒雨相過出小同試律遺稿屬余校定且問序小同爲先生令
嗣高才博學不幸蚤世不忍付之湮沒也遺稿凡八十四首詞華之茂紀律之
森神韻之綿澌一一見於其間當其得意忘言冥情物表心精所驚發窮開微
有老師宿儒所不能詣者而英年詣之傷優乎有餘暇此豈淺近才耶萬邑山

高水駛人士類多杰特辛氏族運尤盛擢巍科登膺仕者相續也小同以助教公爲祖以同叔先生爲父從兄子兼復以鄉薦領解天若假之以年俾得從父兄後馳騁名場必能大有表見卽不然鍵戶著書續緝前人遺緒所就亦未可量而乃芳蘭其質朝菌其年石火電光歟然一現誠不知天之因材爲何胡篤之而又促之也昔覃溪學使哭助教公詩云老屋青燈淚誰能贖敬之其感悼如此使其得見小同其感悼又當何如矧其爲我同叔耶雖然王翁李賀詩人之後也亦高才亦蚤世同時富貴壽考者不知幾千百人迄今勃與賀傳幾千百人者悉皆木枯而草腐得無壽夭之所關在此不在彼耶特此語同叔先生亦可無庸怛然也

分守金滄道叅政彭公平叛碑

明御史保山進士潘一柱

粵稽雲南實漢郡縣慨唐政不經封疆之吏弗諳遠略始而滋萌旣乃憤機一挫弗振遂舉職方版圖委而棄之自唐終宋蒙段竊據元興再拓我明高皇帝

高載縣志

文徵 碑銘

四二

蕩以神武漸以文教平寧熙治二百年於茲瀚者雲龍州逆寇段進忠故段酋別部恃其強固數加凌暴旋謀篡奪驟襲嘉龍殺之殘裂肢體僭據矯命寬之勿誅猶勿悛弗戢反謀益急治械儲餽劫戮橫肆颺來颺去爲大永諸郡憂萬厯庚申歲我萬載彭公以叅知銜命守金滄兼攝分巡密受指畫於今撫軍吳興沈公傲煇前直指南海潘公濬旣抵鎮廣詢熟諮聚米畫地得其險扼所在進兵所由計非五萬眾不可公曰么虜狡寇急之則困獸必且爲逸虎惟計攻之則一籠鳥耳廉諸郡僚得其精練警敏威信素著者永昌陳郡公大理陸司理麗江陳倅雲龍州牧各授方畧或揚我皇威或昭我大信或攜其腹心或離其儔黨左提右挈前掩後角舉逆寇所恃爲常策而萬無一危者我盡得其要領而禡其神魄賊遂進退齟齬援道絕乃僞托赴愬希騁詭辨冀緩須臾且以跋扈故態擁衛強兵逼城而陣名爲待命將出於不意以得志因率逆眾由永平間道驟抵大理乃公之分布已定賊適入穀中命薛中軍陳周二揮使一

鼓擒縛諸脅從罔治論而遣之不遺一寇不僇一人隨往撫餘民則錐崖滑壑
險歷百盤猿攀猱接窮其巢窟搜獲藏鏃數斗儲械無數議者乃服公成算云
竊惟滇徼諸彝世以爵土爲我外藩巨藪深山易於伏莽所貴犄角獠牙得機
早制弧張阱設相地施防則搏噬之兇自勿反熾乃蠢爾小醜竟以恩而勿格
倒以柄而愈恣若養癰疔不忍割決尤而效者觀望踵起非公沈幾妙算及諸
大夫宣勞運奇必勤大舉滇西諸郡雲龍生靈豈能安枕乎夫張晉三軍以斬
馘奏功未始非聲罪致討之宜也然在仁人不忍言而智者尤有萬全之慮焉
若天寶故事可鑒已孰有兵不試而威震費不殫而功全殄積年之大熟貽列
郡以承謐斯民之爰止是土者食平定生全之福其祠廟尸祝當億萬禩何紀
極耶周守首奉公密計躬履危險備極勞瘁知公功最詳載公德最厚謂不可
無紀以貽後世乃屬爲之頌其敢以不文辭謹志其略如此公名自新號祖銘
壬辰進士江西萬載縣人繫以詩曰西南郡縣自漢元封固以外藩界收雲龍

萬載縣志

文徵 碑銘

四三

黑水爲池表鎮崇峯唐治不經淫黷作凶赫赫天亶盡界蠻貊明德開天統一
區宇北掃炎氛漸以干羽眷茲歸正世作藩輔詎謂異孽種有猘獠戕類賊貌
恣睢跋扈弗洽彝狄大我皇仁德不可懷兇頑弗俊負彼狡穴治械儲固劫眾
張威慘戮邊民襲酋篡奪奄有蘭津廣我牧伯赫斯震怒爰整戎旅尅期師度
彭公至止淵慮卻顧諒茲小醜跳梁魚鮒但叩囊底甯煩搜捕乃諮庶尹藉以
前籌虛受轉圜才智兼收上策攻心乃亂乃謀進退趨趨狼狽而投伏奔升陵
險譎深幽螳臂猶恣適罹兕罟一鼓盡縛不試戈矛反首接足斷以懸醜封豕
既殪萬口騰謳誰其貽安方岳列侯祠貌社稷報祀千秋欣爲王民耘耔田疇
薄賦輕徭化日優游凡爾百彝共戴天庥逆族殄除順則懷柔恪保乃世毋爲
後羞 采滇南文略補

何侯去思碑 名錫命

清邑舉人宋希陳

我萬載無公署官無倉厥學無義館也蓋數十餘年矣歲丁丑何侯適來甫下

車見舊洽傾地毅然曰是誠在我當是時以數十年之蔓草荒煙而欲復興於一旦鮮不以爲難侯捐貲經營百堵皆作麗譙有樓胥吏有次錢糧有庫內外秩然而後四民有所仰萬邑積貯多至數萬石按籍則實視倉則虛侯詳請上憲因按察司行衙改爲常平倉而後積貯有所備復於學宮旁建立義館珍聘西席課會生徒擇其尤者陶成之無力從師者收之適館授餐勞來備至而後英才有所振慨萬自寇變而後荒絕者多是以節年錢糧尾欠萬千我侯整囊墊解而且飾學宮建二門師生有次絃誦盈耳闢是萬之人文蔚起謂非我侯興賢育士之效歟至其操守壁立絕暮夜之金聽訟明斷無含冤之獄省刑罰免徭役禁取辦秉仁慈之性宅寬洪之量氣度溫潤中兼具卓犖灑衍之概令人提之不盡其數歷新喻宜春二縣民爭誦之况萬民食德飲和八年於茲可無甘棠之頌以誌弗諼乎陳走筆記之壽諸石以俟誌乘者采焉

蓮溪石橋碑

邑令海寧舉人朱有成

萬載縣志

文徵 碑銘

四四

古人之爲政也有當然之務必因自然之勢故矯強屠注之勞有所不用而卒底於成蓮溪者縣北六區羅城鄉之支流也濫觴王皮山下匯上高鎮渡其以蓮溪名橋則邑人敖鑑之爲也越今歷祀久遠潰於沙泐於石阨於水於是峭岸崩迤廢址犖确而往來行人且臨河興嘆矣余承乏茲邑道弗不治以尤伍保輿梁未興以詎羸老有薦紳宿儒偕一二耆耆踵門告曰願有破吁此獨諸君子之責哉余曷敢止乃察天時寒燠不愆於序乃權年穀蜡腊不置於曠乃觀人情貧富不睽於慮因首爲之疏而粟者米者錢者金者于于然輸而斲者礪者斲者播者暵暵然奮矣工興於乾隆戊申六月告竣於庚戌臘月廣丈有六尺袤二十六丈二尺醜水五道有階有級翼以兩欄如其表之數凡用工五萬有奇用銀九千兩有奇於鑠哉毫倪驩騰輪蹄交集首事乃請文以記實余謂一邑之政有關利濟上卽不爲之倡下必竭蹶以圖茲舉也地方好義者眾余歎篤責課祭之勤用藉手以觀厥成爰樂綴以文而徇眾望焉至襄事勞勩

者例得載碑陰其來請記之士則邑廩生盧爾洛貢生李珽生員高起鳳周書高世亨鄒日輝也與垂不朽矣載爲之銘曰疊石衡從適我闔方趾越越履我發爾出爾入勿之越王道蕩蕩民所活視我斯碣毋抹撥乾隆五十六年辛亥季夏

故鎮南節度左廂兵馬使檢校工部尚書前守潭州都督府長史兼御史大夫上柱國潁川陳節公墓志銘

唐姓歐 彥龍

粵天地晦明故冰焮之運行人倫修短彼生沒之定數夫儼籜裾於聖代食祿於名邦勳赫著聲公忠立事實曠古罕矣故尚書諱節先禰本建鄴之人躋昔帝霸先之緒裔也自隋末中原鼎沸四海狼奔伊五世祖去浙右遷居於洪都因爲茲境之名家盛族迄今不泯者歟曾祖秋祖恒俱隣業許之蹤樂煙霞之性退隱岳谷偃仰唐堯究蹟道深碩儒羣彥靡不欽重追贈贊部大夫榮臨幽壤慶及子孫豈弗謂軒冕承家朱紫繼世皇妣鄒氏德齊孟女禮過姜妻秉志

萬載縣志

文徵 墓志

四五

懷仁而有令嗣尚書幼敦禮樂夙慕顯光於尊卑必孝悌溫恭處鄉黨能儉遜謙敬洞魏理人之政常施濟物之心果膺禎瑞奄列班寮值壬寅載當府潁川鍾相公上應元機下安庶俗布條化則入郡肅清震英雄則萬方瞻駭搜賢選士攻敵練兵貴翊佐得人權謀可託因任公充白沙都鎮討遏使弁特奏署潭州長史兼御史大夫撫綏疲羸捍捍奸慝致農桑有序編戶譎仁展戍旗而匪讓安西攻戰勝而欲輕燕北尋相國藉其忠勇委以腹心命赴府庭重加祿秩將專殷務更縮劇司后至大順元年府相請充使入奏蒙恩賜對獲趨紫殿而頰天顏榮臨玉案之前屹立金階之側功同竇憲禮若王商一動聖心戒頒殊寵賜工部尚書勲名盛過六印美媿三秦旣握魚鬚合居虎竹時情讚矚儕友推先頃以驛騎皇都星馳丹闕跋屨康路往復長衢調理偶乖倏中瘖疾乃輒假還西故園請尋醫求術及歸於寢寓浹變躋月千方萬藥竟無徵效凡屬遐邇日佗痊甯其奈神道曹昧邁斯哀釁里閭傷感親族驚悲曷玉彩以將昏忽

珠光而潛沒公娶南陽郡鄧氏夫人夫婦之道琴瑟諧音唯仁與賢內外和睦男四人長曰從諲鎮南觀察衙前兵馬使銀青光祿大夫檢校國子祭酒充楊林鎮副使兼御史中丞性惟端恪守職奉公排難解圍屢効雄烈次曰從訓鎮南觀察押衙銀青光祿大夫檢校國子祭酒兼御史中丞操持有自於已無私可統重任而方觀其能次曰從錯脩進士舉韞職聰悟肄業專勤期春浪以化龍指霜鷗而中鵠郊旣芳桂翁子錦衣當刻時而取次曰軍郎杞梓植林瓌琪重器善幻詩禮挺間羣流女四人長曰十七娘適安定梁宏媿婿得宜鸞鳳雅匹女則婦禮爲世規範次曰廿三娘廿九娘三十娘皆婉婉自持性常柔順處幃帷而潛影履門牖以掩眸公疾甚逾候從諲弟妹夕仍假寐晝或忘滄至夫一藥一膳必先嘗之孝養不闕憂惻寤安泊尙書寢沒泣血號擗毀瘠益甚公以乾甯四年六月十六日薨於私第享年五十九雖不至耆其榮祿孰儔擇其年八月三日龜叶吉辰祔葬高安縣萬載鄉新賢里錢田村原禮也岡巒峭秀

萬載縣志

文徵 墓志

四六

林麓森羅地盤龍鳳之形水濬虎牛之勢彥龍詞多蹇樸學愧雕刊握牋毫而顛臂慮銘頌之奚述者哉其詞曰麟鳳呈祥惟邗之慶爵祿被身惟家之盛昭著殊能頒臨寵命莅事治民克彰厥政珪璧之器帝王之孫前朝鼎族繼代崇門長川碧泚峻岳祥雲芝蘭毓秀聲響氤氳皇天無親惟德是輔積善慶餘門興福祚佩服金璋盤纓大璐都府班僚罔不欽慕天階奏帝榮捧詔書官兼八座恩寵之初手持象簡腰佩金魚名著典藉德耀鄉閭統王雄鎮運鎔五載劍躍匣中鏃飛天外威攝奸邪聲馳邊塞業懋功高馨芳永在

按此墓銘出於嘉慶辛未年錢田村輦下陳氏子於屋側墾土得之可知此地原屬吾邑之萬載鄉不知何時改名石裏鄉隸宜春附登於以補沿革之遺

仰山光涌長老碑銘

邑薦辟南唐楚公宋齊邱

夫眾生者晝則共一明夜則共一暗明不爲之缺暗不爲之分蓋眾生同一智

而共一見也佛佛相授祖祖密傳以茲爲法實無法也仰山心偈天下詠之正爲此也然其化導大綱祖教專用傳龔源流謂石亭仰山之宗則涌公嗣其後也公法號光涌豐城縣張氏也誕生之夕神光照庭鄰人以爲珠璧之祥間而伺之生男子也七歲請學儒詩書禮樂有若素習十三請學佛經論禪智悉如生知一旦請游方求師父母器而從之於時石亭之羶風行四海乃往禮之石亭爲之剃度復就開元寺真公傳淨名經密旨十九詣襄州壽山寺戴公受大戒遂攜餅錫徧禮有德以有間斷意契無間斷心以有生滅身得無生滅體石亭有似驢之問涌公有非佛之對（石亭堂見諸方學人來便問子來作麼學人對曰禮拜和尚來石亭曰還見和尚否對曰見石亭曰見和尚何似驢學人無對石亭將此語每問折倒學人未有能對者石亭乃問涌公對曰某甲見和尚亦不似佛石亭曰既不似佛似箇甚麼對曰若更有所似與驢何別石亭曰凡聖兩亡情盡體露吾有此語來近三十年無人決了境子大利根當自保任

萬載縣志

文徵 碑銘

四七

吾不能盡標子異日可知而自行矣（嘗大奇之謂之內佛可以化人矣石亭歸寂公然第三指以報法又然第四指以報親皆不羣之事也仍歸止於仰之棲隱寺紹祖風也洪帥南平鍾王聞其名若禪師家麟鳳無有肩其威德者遂遣使迎止於府下使者至師不起於是州牧邑尹至亦不起已而士民皆來又不起乃共訴之曰師如不起貽郡縣之咎由是不得已而後從之既至復館師於石亭繼美名也是時爲人說法明色空一相人佛同種使士者捨蓄劍農者棄耒耜工者忘糾纏貴者散金玉萬務失緒官不能禁師之教化明白也如是天祐十四年秋還如舊隱昇元二年夏順化於禪寢僧臘七十俗齡八十有九門人具梵禮塔於山之西南隅表至德也嗚呼涌公王者固召不就因慈悲而復就之眞天人也將來者多方求知猶有弗獲足見涌公不泯其能蓋力救末法之弊爾入室弟子彥新執古之士也任彼肉耳聆余廣譽不遠千里自責而來以行狀授余請銘殊不知人不勝名文不勝德然哀其誠懇強而應之其辭

曰佛佛佛乃真物自迷悟無得失曹溪歿仰山出曹溪髓仰山骨曹溪虛仰山
實佛兮漏漏兮佛 采袁州唐集補

龍長史墓志銘

明甘泉

龍鐔公字德剛萬載人狀貌魁偉氣岸孤鶩髻遊鄉校卽穎敏不羣出入經史
尤長於詩文草隸所與師友者梁公實黃公子澄年十九選入南宮時髦俊蜩
集惟公才識過人曹國李公成宋公遇以國士薦之高皇帝召對稱旨命同
貢士張宗潛等隨春坊官分班入直講悉民間利害田里稼穡陳古今孝弟忠
信文學諸史遂詔治水於泰州視軍於遼東川雲隨試輒效所經軍民利弊當
興革者悉以聞高皇帝覽而奇之引對右順門嘉異其能特授首省按察使司
其屬繁劇甲天下前此以罪去公下車振飭綱紀修明德教民翕然向化道不
拾遺幾致刑措正己率百司悉尙廉潔頃歲薦饑俸贖悉捐廣濟各郡尤嘉與
士大夫敦崇行誼有不軌者白簡不避權貴以故多爲朝士所忌下遷公于蘇

萬載縣志

文徵

墓志

四八

之長洲令文到離任兩浙士民歸德攀轅卧轍遮道送相率於公所植桃李
處碑而亭之以誌棠思歸鄉宦橐蕭然無數畝負郭自矢惟以清白貽世不辱
爲榮家府君亦喜其清潔不問家人產雅嗜山水急爲親卜佳城菽水承歡侍
養年餘適晉府恭王薨世子尙幼上難其傅都御史袁公泰刑部侍郎張公思
恭以公對起公爲晉之左長史遂辭親就職託弟以家事公至任輔導嗣王不
激不阿王禮重之委以督兵重權克承付託時西戎寇大原公率諸軍禦之水
陸戰於河汾有功赫然作一箇長城時皇太孫嗣統患宗藩強盛太常卿黃公
子澄進漢削平七國之計周代齊湘岷五宗王相繼竄流時文皇帝方奉藩於
燕上書求諸王過狀不報師起北平檄至晉徵兵靖難公泣曰高皇帝封建諸
王設置護衛所以奠安宗社今北藩日昌倉卒調兵非先帝意也固拒之文皇
帝親引兵至城下諭招賢王王推之曰兵權出長史司旋諭鐔曰借兵進香鐔
對皇上無肯兵豈可借督軍士堅壁不出文皇帝力攻之不克竟趨金陵入正

大統飛詔械鐔下錦衣獄鐔不屈癸未歲十月九日公死焉有收其骸骨得其衣帶中自作血書有曰捐生固殞弗事二主別父與男忍慟肝腑盡忠爲臣盡孝爲子二端於我歸於一所公生於元朝甲辰卒於永樂癸未年僅四十娶易氏有懿德生男二人叔馳叔颺方三齡卜以乙酉年二月十八日葬於祖塋葛家窩之原將葬屬余以行狀誌銘予與公束髮結盟同朝共事予不能辭也於戲父孝子幼公行不來求仁得仁抑又何怨銘曰祐命方新篤生豪傑早擅文儒備殫勞瘁總持外臺憲節以植弼亮藩孤執兵抗志氣作山河允矣臣極誥贈奉直大夫易君墓銘

明大學士楊溥

貴州左布政使易節奉厥考子謙君行狀以書抵京師告予曰先君子棄養三十九年不肖孤淪膺顯宦食厚祿荷朝廷特恩贈二親爰立墓碑請紀先德以昭不忘予雅重節乃叙其事而銘之君諱復亨子謙字也先世居宜春宋禮部尙書被徙潭州尙書孫筠州錄事遜卿徙上高錄事孫興國司戶仁川徙萬載

萬載縣志

文徵 墓志

四九

今爲萬載人仁則君高祖也曾祖理祖後父谷珍世以賢善相承母彭氏克宜其家君爲人恭慎重厚自幼好讀書及長克勤問學以求要領感物興懷則形之歌咏以見志元季板蕩借兄泰亨震亨奉父母逃難山谷間君爲羣盜所獲脅之不從乘間脫去及江湘平定谷珍甫已歿君兄弟奉母還萬載復修舊業孟兄以茂才薦仲兄起爲江西行省掾君日以敬養爲事嘗於邑東烏溪之上爲別業構堂奉親匾曰壽萱旁作書舍儲經史誨子弟時有司舉孝廉以親老固辭不就母有疾君侍湯藥恒朝夕未嘗解帶夜則焚香籲神以求母安果得康健壽九十有餘君居翁列嘗念二兄坐事沒謫所遺孤七人皆撫育成入君治家勤儉常節贏餘以贖不足鄉人德之邑令待以賓禮年六十有四永樂乙酉五月十三日以疾終於正寢十月八日葬徐山之原宣德壬子贈奉直大夫禮部祠祭司員外郎配龍氏名家子安靜慈惠族里稱賢後十有二年四月十日卒享年如君附葬君之墓贈宜人子男三曰鑑曰鐔節其季也永樂乙未

進士由行人升禮部祠祭司員外郎以薦知成都有政績拜令官女二人孫男三人孫女六人銘曰粵稽易氏自弱始由漢而宋世有據宜春上高遷旣屢尙書錄事及司戶若生未訖而穎悟長以詩書繼家緒遭時板蕩越鄉土秉義抗逃遠豺虎奉親育孤適我所德器昂藏邁前武歛而弗施澤則裕令子維時顯宗府保佑自天申錫嘏恩光丕燭泉臺下徐山之原安靈爽子孫繩繩享厥祚國子監博士郭公宗器墓志銘

明布政使邑進士易 節

國子監博士郭公諱瓊字宗器太父彥正嘗置廩穀於邑之各鄉歲饑出貨資困不責償父孟庸有孝行俱以德隱生公於洪武乙丑正月廿日甫數歲出就傅塾師授以大學輒能悟其解及冠補弟子員旋食餼公益發憤讀書搜尋經史奧旨諸子百家言靡不吸其精液以故一時爲文章者率皆詣公公爲之口講指畫悉有法度可觀屢艱於遇九試棘闈而公無愠容也正統二年詔徵四方碩彥公應召擢國子監博士比入館公守聖賢遺教循循然舉格致誠正日

萬載縣志

文徵 墓志

五十

爲六館諸生訓諸生如獲異解往往私相慶以爲得賢師久之同朝諸大夫亦莫不嘖嘖敬服當是時公賢聲方盛使少戀功名淹留京師將必有薦起而用之者乃念先塋遠隔弗克時相拂拭遂不欲以彼易此亟懇歸大學士楊公等留之不可爲請旨得許復作序以贈之蓋嘉其孝思者甚篤公抵家親詣各壟或封或樹悉遵古制歲時必躬祀其地平居嘗集忠臣孝子錄數卷天順癸未年十二月十五日以疾卒享年七十有九妻楊氏劉氏子男八人初公艱嗣買妾黃氏始不知爲妾至公家乃駭泣訴爲父所誑於公公憐之卽日遣還黃感泣日夕焚香禱公多男至是果生子又長洪次汶次潛次澣次源次日相曰顯孫十人擇明年某月吉葬於竹渡卧牛肋山之原以余與公同時居同邑仕同朝知公生平甚篤也遣使徵志及銘銘曰於戲宗器學成行尊爲國助教探本窮源格致誠正日夕諄諄諸生曰善收我愚昏乃先塋之念切倏返駕於故村思著書以娛日豈知造物者之不可與而悲松菊兮徒存竹渡之野卧

牛之原既固既安允錫禧於後昆

刑部左侍郎郭公瑾墓志銘

明修撰臨江習嘉言

公郭姓諱瑾字弼器其先吉之廬陵人至處士世興始遷袁州之宜春逾數年擇居萬載城西遂世其籍焉曾祖壽軒生彥正彥正生孟庸俱有隱德庸以公貴贈給事中公生穎異得祖父歡心爲構書屋於綠陰池上延宗工多鬻書籍以誨之公展卷輒記憶每讀名臣孝子諸書疊疊不倦及覽古今奸佞事輒變色以筆抹其簡爲文嚴謹有骨力髫齡就試學使者見而奇之謂異日必且名世拔補弟子員永樂癸卯以書經領鄉薦明年捷春官時太宗皇帝詔諸進士遣鄉以俟召用公歸逾月太夫人韓氏遺疾公親侍湯藥目不交睫者月餘及卒哀泣逾常格每歲時薦雞黍潛然涕下宣德三年詔諸進士三十以上才識絕倫授給事中公赴銓曹擢刑科凡有關民命者往往直言奏聞時軍政久弊奸黠匿籍詔公及郎中厲思溫清理金陵各處衛所公按籍數逃匿汰老瘦軍無

萬載縣志

文徵

墓志

五一

隱躬復命稱上旨誥勅褒之且贈及二親公欣喜感激念雖未能祿養而焚黃展敬亦聊慰先人於地下特以展祭告歸學士王行儉贈其室曰志喜堂蓋榮之也比還朝九載考績晉本科都給事中謫英廟注意元元慮民橫遭重獄命刑部侍郎何文淵與大理卿王文審錄在京刑獄命公與巡撫周忱錄南京等處罪囚公訊鞫詳慎常欲於死中求生求生而不得則鬱鬱靡遑是役也垂死而活者蓋數百人又命賑浙江湖廣饑所至沾實惠晉陞刑部右侍郎時中官王振方用人無敢斥其非者公屢直言致忤譴廣西潯州太守嗟乎權貴人所趨也卽稍知自好不阿諛之曲從之以奔走其門下而一動念身家非榮辱繫於中卽生死動於念熒惑焮燦有莫能自主者雖欲不相與安之不能也公當忤王振時豈不知此益榮祿生死之念不設於心也久矣卽幸而見譴尙非公意也公殆所謂不畏強禦者歟比至潯囚其土俗爲設教禁州人順賴景泰朝蒙恩復原官未幾遷本部左侍郎公窺大將軍石亨多不道將禍及國家嚴

効之疏上不報適有數囚罪不至死爲某所忌欲文致其罪諸法司類摺撫成獄公獨不可乃止忌者因嘲之公由是乞歸及行篋中僅載詩章二十年官囊枵如也家居衣無盛服食無珍饈見者幾不知爲司寇日與兄博士公瓊及鄰友故人相遨遊於綠陰之林人遂號爲綠陰公成化二年八月三日以疾卒於家明年八十夫人李氏蘇氏龍氏俱先公歿續娶劉氏子四長藩次濟次溥次燦邑庠生四年三月十日葬於紫蓋山之原遣使徵志銘於余余曰公之事固將光昭史冊無俟予言輕重顧史之知公未必若吾所知之深又況當時忌公者多所言未必盡信使余以不文辭更誰能爲公詳其實哉爰爲之誌而綴以銘銘曰紫蓋巍巍兮哲人歸藏藏焉不朽兮裕後無疆

拔貢汪朝祖墓志銘

清魯 鴻

予年十九膺選貢出仁和趙學齋先生之門明年鄉試同人公讌於百花洲推萬載汪君爲祭酒時君年已五十六矣又十五年而予教諭萬載以君與先子

萬載縣志

文徵 邑志

五二一

故同歲生不敢執行輩若遇予尤篤有過未嘗不盡言相規也比予以俸滿入覲而君旋下世矣今其孤匍匐以銘幽之文爲請嗚呼予其敢辭按狀君諱朝祖字岷山敬亭其別號也曾祖映日祖有本父必照三世皆庠生君少時愛讀有用之書不屑胥制舉業與其兄荆山先生自爲師友荆山素友愛而性微卞急每講學論文有不合輒厲聲色相加甚且不免捶楚旣而悔之凝視君則怡然無怨客年三十餘猶相與連共牀被未嘗輕入內也君生平嚴重端謹於一切世味泊如然遇邑有大利害事輒倚君君亦未敢引嫌邑令施昭庭素造君書齋談藝之餘情事難臆決者必質之君一言而定不令人知邑修葺學宮施令得大木數十株喜甚忽水漲飄沒甚恨明年有鄉總甲以盜木被獲報者令怒甚拘其家盡入囹圄君聞之曰樹久竊必毀今如故果真盜乎訪之則水落大木自沙中出讐家誣之白其寃其人曰吾不知汪先生何如人也家立木主祀之雍正元年邑有警城中人洶洶盡逃去施令獨留君贊畫卒以無事又雍

正年間大府檄下欲復萬載舊菽荒糧原額君奮然曰此萬載世患也不可以
默乃呈於邑令而府而院司皆不許邑令汪元采屬君清理君率同志二三人
冒風雨寒暑遍歷荒山窮谷中將一切水擁沙淤不可墾種者據實呈報乃免
又清復學宮侵佔地基諸大興作如康樂橋崇文堰並倡修董成不自以為功
生平不妄交人既與故久而彌篤性不能容人過然其人能改懽愛如初以是
忌者亦少其卒也命其子喪祭必遵家禮毋得仍鄉俗奢泰君生於康熙丙寅
年十一月二十九日卒於乾隆癸未年三月二十六日享年七十有八葬一都
涂泉鄉子六人孫十七人曾孫二十七人銘曰予與君別曾幾何時而遽至於
斯君才足以有爲而鬱不得施唯使鄉人載其慈銘詞不忤匪一人之私
廣昌教諭袁君墓誌銘

李榮陞

公諱建中字致和邑西鄉白良人也爲諸生以文鳴雍正壬子舉鄉科乾隆丁
巳會試得乙科選廣昌縣教諭月課諸生慎甲乙士皆感憤攻苦科各益增文

萬載縣志

文徵

墓誌

五三二

廟前臨江有沼底滯有力者屋其上以居貨而歲納其羨廟之規漸隘江遇漲
或漂民居以去公謀於守土者撤之水害乃除學使趙公按視撫建試博士
置第一謂人曰袁博士文如富人擁厚貲不作一寒儉語甚喜之選期至公薦
宿學魏兆龍俊童趙由議補弟子六學之人心服焉縣丹黃思亭以廉失官公
倡諸生償所負而歸歲癸亥饑官廩計不給署令趙君策於公公草疏簿單騎
走烈日中勸士民助米得四千斛趙令就城隍祠煮粥以食民相聚益噪公溫
語開道之皆謝去翌日分賑四門按丁給米終事不擾流民有死者咸葬之乙
卯武闈甲子文闈應聘福建校文主考萬孺廬夜分起視公尙未寢歎其勤比
揭榜所得多知名士公官廣昌久大吏廉其能丁卯冬以上考咨赴禮部公以
太孺人春秋高暫謁假歸省卽力陳終養得允旋丁內憂歲壬午行取以知縣
用府縣連催不出矣卒於家時年七十有一考諸生贈修職郎諱則且祖考諸
生諱秉星孺人敖氏子男四人長廷鳳國學生候選主簿次廷鼐廩膳生次廷

龍次廷驩女四人孫男三人孫女二人明年七月葬於本里之青天馬前墓諸孤授使者以狀來請銘予四兄公嫻家也故知公蹟詳然以予之不敏不宜銘辭之不獲乃序而歸之銘曰高士潛光州爰各毅齋制賊里聚寧錦山屏張溪帶縈于公高車壯其闕獨矯而飛輝序巒後嗣翼翼翔鵬鵬遙望松楸神杳冥達者營此佳氣盈

拔貢張焜圭墓誌銘

知縣邑舉人孫馨祖

琢齋先生諱焜圭考康熙甲午舉人考授內閣中書諱明德妣辛太孺人先生生而穎異能言中書公口授二南卽成誦四歲中書公客殮武城太孺人教之讀年十八補學生食餼科歲試居第一者三一等者不計積三十二年四十八得拔貢生以乾隆辛丑疾終於家臨終命家人扶起端坐而逝遺命不用僧道曰自問可對鬼神又令葬某所可以朝夕瞻望先塋遂以九月癸卯葬於潭埠肯堂團山腦享年六十有四先生篤孝友當太孺人病侍湯藥衣不解帶者

萬載縣志

文徵 墓誌

五四

數月及終哀毀骨立予從先生遊久嘗見齋素焚香跪而泣初不解後乃知中書公及太孺人生忌日也又嘗聞終夜讀書起而哭哭而又讀聲與淚俱聞者莫不泣下蓋中書公客病中所寄詩此後或聞先生大慟卽知檢觸先人手澤也年六十三猶赴鄉試錄其文曰得失命也以酬父母心耳嗚呼可謂孝矣平居與人交接坦白無火委曲亦無抗辭厲色談笑溫溫而介然無敢干以私故人皆樂與友而加敬焉夫人私欲感於中而矯飾其外動以孝友相稱述而行或異其所言聞先生之風其亦可以愧矣學以養性爲宗晚年猶有所得嘗書其居室聯云讀書不求甚解飲酒最喜微醺銘曰無愧於親無愧於友無愧於鬼神此爲先生嗚呼久而壽其真

雲南嶺峨縣知縣李厚岡先生墓志銘

宜春令浙江進士黃河清

予求李先生序樸學堂集將拜使而先生之訃聞其孤光宰緘先生答予前論屈子書蓋絕筆也且以銘幽之詞屬予法然曰通儒逝矣詎兼師友銘其忍辭

謹按先生李氏諱榮陞字奠基號厚岡世居萬載高村先世七代單傳祖英文公始有子六季士璉先生父也有學行兩世贈文林郎妣張祖妣郭並孺人先生幼有異資受句讀以神童稱怪康成亂易篇次欲復費氏之舊讀詩無將大車以塵底韻乖疑底爲瘖之誤信古篤學出於天性乾隆己卯鄉薦第六癸未成進士家居從遊者多所成就癸巳謁選時開四庫館彙文達曹文恪知先生宿學將保舉修書先生丐座師翁覃溪辭免尋得湖南永興迎母就養永號難治至則絕苞苴判決無滯豪猾屏跡創試院興義學優膏火分闈得知名士謝振宇李烜等永之羅杰亦雋自是科名不絕丁內艱服闋分發雲南署雲州置土獮劉金魁於法委查普洱及大理府屬陟蒼山遊洱海訪六詔遺跡搗蒙氏鐘文自謂此行差慰旋兼緬寧通判辛丑督運銅至夔州守漲登白帝城謁少陵遺像逾年抵天津銅斤無銖兩失回補呈貢調闈分校得李時昌羅緒等六人邑近省俗好上控先生理冤雪枉終任無越訴者嘗力爭猥夷業漁夜劫拒

萬載縣志

文徵

墓志

五五

捕之獄活十餘人縣離滇海口百五六十里五年一開淤利田先生命賫糧雇役親至海口畫限疏挑五旬之工二旬卽畢巡道承公器之會以鄉約殺人誣誤丁未照例仍發原省題審我先署恩樂地介哀牢蒙樂兩山間卽唐虞崇山也雍正時改流先生至復七鄉義塾清舊租選諸生掌教每篋輿草笠減從巡村落察民疾苦勞耄盡以酒脯童子稍異者獎紙筆會用兵安南派夫井井有法調鬪執正不阿士論翕然闈後之嶠峨嶧峩六詔三十六部之一地瘠貧仕者頗眾習驕悍先生設法行銷墮鹽勢家一御以禮年六十六以疾乞休藩司筠圃費公會榜同年也留之不得然艱洽任薦掌大理書院次年又率屬贖之始得歸所攜惟書籍花木而已居家日事著述多所發明嘉慶二年輯家譜建宗祠率子弟修治先人塚越歲卒先生性嚴毅動靜持敬視不潔若浼雖登科第入仕版浚於名利自少至老孜孜力學虛公無滯見推求至理多心得嘗測五星當聚某度至嘉慶五年三月十八日五星果聚奎鳴呼通天地人曰儒若

先生者可謂通儒也矣生平著作甚富於天文則有考辨於地理則有圖說糾謬辨正於聖賢事跡則自三皇五帝文武周公孔孟各有考辨於經周易則篇第本費氏加以圖考於尚書則分今古篇第自堯典至無逸考辨尤詳於詩則國風解自邶至鄭於禮經則周禮儀禮樂記學記明堂位大小戴各有考並考四塞蕃國於春秋則正毛氏改本及四例論於四書則論孟有類學庸章節著四書細論孝經分章節於諸史有竹書紀年始末考論辨家語考離騷於諸子如莊墨越絕新書說苑新序皆有彙古此外遊歷有紀運銅有記釋道堪輿象並有考論詩則厚岡詩鈔古文本唐宋大家法度考論辨斷爲多而傳贊墓誌應酬諸體略具以時增辨論未及手編成集也生於雍正丁未三月八日終於嘉慶庚申十一月日壽七十有四配劉氏封孺人子五人孫十六人曾孫八人葬九頂山黃岡之原銘曰高村之李乃祖始蕃隱德載鬱昌於其孫初試永興治成奉諱呈貢嶧峩施究則未其昌維何乃以斯文學貫中西誤紉固款上觀

萬載縣志

文徵

墓志

五六

千古下觀萬里山川性情茲焉得隨人文之大莫如六經文爰義圖一覽聽熒書別古文可匹疏證詩迄鄭風已翦榛莠儀禮周官迄大小戴各有訂證並考四塞四子細論孝經分章史志三五子甄墨莊時發爲文槩集唐宋皓首窮經心有專用迄未手編遽嗟龍蛇疇爲發之其書滿家閭有學林公亦有子我銘公幽以告千禩

撫州教授辛淑郵墓志銘

翰林院侍讀德清進士蔡之定

君先世籍山西宋末諱竭者避亂江右萬載縣家焉是爲萬載辛氏始祖十九世孫鄰日卽君高太父鄰日生金澄父子俱邑諸生金澄生汝猷汝猷生樹人汝猷起家拔貢生任湖口縣教諭樹人諸生並以從益貴贈編修樹人子三長又曾邑諸生早卒君其仲也季卽從益乾隆庚戌翰林今官給事中君生而穎異九歲能詩古文詞有神童目熟於左傳杜注地理人名研記精確一時風學有後生之畏長彌嗜學寢食坐作與詩書俱弱冠補弟子員先後受知於曹文

敏朱文正載文端諸公君以考贈公能文而蹇於遇伯又早世益自感奮稔知從益才屬望尤切曰吾季必大吾宗自初學至入仕所以扶植之者不遺餘力卒如所期丁酉君膺選拔學使者爲蔣時菴侍郎棘闈屢躋乙卯甫舉於鄉又十一年乙丑成進士出自余門經策尤爲主司嘉賞殿試前不出戶庭終日習策字或勸以所習就正時公且願以爲先容以跡涉干謁弗之聽殿試列三甲引見以知縣用援教老例呈改教職選撫州教授未幾以憂去服除再任撫州其訓士先行而後文公事一無干預郡守以下咸重之遇事謹恪每常例行香未五鼓輒公服詣公所以俟年餘無疾坐逝君名炳辰字融初一字淑郵性樸直無飾貌枝言生平繩趨墨步介然有守顧見義必爲以公信不苟見推鄉里每爲人排難解紛如建考棚置公田諸事必先君經君處分罔不悅服居家敦孝友勤儉力學時以先澤爲念其誨人必竭誠無少厭倦惜以教職終不竟其用卒前兩月遺給諫書有一生志事盡付東流之語亦可悲已勤於著述詩詞

萬載縣志

文徵 墓志

五七

雜文甚夥多所散軼給諫云行爲蒐輯梓行君生於乾隆癸酉十一月十八日以嘉慶癸酉正月一日卒甲子一周妻宋氏男四登瀛彥瑜彤書彥和仲及李游庠女二孫男女七人將以甲戌五月八日葬上高之湖田新塘埭給諫乞銘於余誼弗可却銘之辭曰嗚呼淑郵哲人其傾甲背玉腹克副才名惟名與福天不兩傳天畀君福若名日裕器也晚就容玉女成載啟四美式紹家聲占彼上高是宅是兆我銘斯邱萬禩長保

山東泗水知縣陳公墓志銘

辛紹業

乾隆癸丑余寓京邸丹山陳公以謁選來同居兩人者言論衍洽意氣相得一日酒酣公慨然曰人生無不做也所不做者名耳然或幸而傳或不幸而不傳豈不悲哉余笑曰公之壽居余前者余必有以傳公因顧謂余曰予將何以爲辭余曰公之於文鏤琢肝肺搯腸胃空山獨往不偶俗士當其會心與聖賢對其未出者若牛腰束世莫得見其已行世者則羣嘖而吮之矣公之於行履

中蹈和不愆仁義白叟黃童咸相嘆喟孝乎惟孝友于兄弟蓋仰事者自祖母
逮世母若而人俯育者子及弟姪若而人旁及者功總兄弟與夫姻黨之困乏
者若而人而公固窶且貧所需皆取給館穀若是者其足傳公乎曰未盡也明
年掣籤得浙江之義烏縣知縣引見調山東泗水縣居官刻己守公省繇役革
官價其爲政先德而後刑民有爭訟曲意勸解不事鞭扑因事至鄉輒召耆老
諄諄作家人語或疑其短於才久而民安其教訟獄稀火囹圄空虛乃皆服縣
有泉七十二源出陪尾數折入運河歲一不疏則運道淤淺舊置地若干頃給
泉夫工食率皆印官入己泉夫仍具空領公界邑紳分理泉夫得領實錢而已
一無所染嘗奉文糶倉穀推陳納新時市值穀石銀一兩遵例祇取六錢秋熟
仍用市價買補雖賠利不惜濟寧屬邑水奉檄往賑每日銀數人數與災黎面
籌皆感激涕零曰安得官爲吾邑父母乎每進謁上憲陳時事委曲詳盡或不
可必據理力爭始若齟齬卒多見從值川楚教匪滋事調東兵往勦所過橫肆

萬載縣志

文徵

墓志

五八

奪民財辱官長公移書將領數其失且言入吾境猶然有以身當不令及民將
得書悚懼亟馳至好言謝過爲嚴號令約軍士縣境肅然若不知有過兵者噫
公內性堅定自信足以任事觀其措施皆人所不能爲不肯爲者而卒以自遂
信乎余昔知公者未盡也官泗水五年以事窒吏議降級調用羈寓不能去衣
不盈笥盎無宿糧縣民相率饋蔬米供薪水卻之不能止郡守知其賢聘爲東
魯書院山長嘉慶甲子遂終焉其孤訃於舊知好各使人致賻始克以柩歸葬
而是歲仲冬余自南昌返萬載與其弟桐村孝廉共舟出公行實見示且徵墓
銘余曰吾有諾在昔其敢辭雖未卽爲然未嘗一日忘諸心乙丑六月始克成
之因致桐村使刻諸墓石庶以質死者嗚呼前言如一日也而公已弗復可見
矣人生聚散存歿之感可勝道耶公諱池鳳字鳴瑞丹山其號乾隆庚子舉人
辛丑進士歸班銓選今職生于某年月日卒于某年月日葬縣西高家嶺月形
所著有丹山稿四書廣義廿二史人物論凡若干卷公家世及其逸事具載桐

村所撰行實中茲不悉書書其大者嗚呼是足以傳公矣銘曰孰躡鼎而不潛以晚公不嚙其清。从月音泣與潛異也孰抵藩而顧奮以觸公有角之觚當作鱗也胡稜稜之隼翮俾鳩鷺之熱也彼啞啞之啼鳥終受哺於眾品音似也懿夫公之生世分內有持而外有立也官既墜而道得名耿耿其常煜也歷千載而徵實視斯文之所輯也

戶部主事辛公質乎墓志銘

辛從益

質乎先生於益爲族父常厚過益至略年輩以字相尊稱既同官京師先後旋里來往相親敬每宴必同席甚相得也自李厚岡家晚堂諸老宿辭世數以文事推益仲兄淑郵弁獎借益益入都而兄淑郵沒先生又辭世追維平昔知好不敦以不文辭謹爲識其墓先生諱文彬字程材質乎其別字世居集賢坊太父樸庵公邑附生父裕齋公職員並以先生貴贈文林郎例晉奉直大夫母周太孺人生母唐太孺人初裕齋公艱於嗣唐太孺人舉先生時裕齋公年五十

萬載縣志

文徵 墓志

五九

四矣以得子晚頗憐愛之唐太孺人課之讀甚勤積針黹所得助購書先生幼聰敏惇愷因是愈感奮力學補邑諸生食餼有聲乾隆戊子舉於鄉報至裕齋公已下世數日先生以親弗及見也每語及輒泫然既數上公車薦不售而唐太孺人年老骨節時隱痛躬率諸子按摩稍瘥因壹志侍養弗遠離庚子母促之比上始赴禮闈旋聞訃亟僦小車走數千里足甫薨哀毀骨立丁未挑發四川知縣以安詳悃悞爲廉使陳公奉茲所器重有粹然儒者之目歷署墊江鹽亭皆有治聲制軍保巡邊過鹽亭聞而獎之補丹稜縣丹稜缺最瘠且多命盜案有史英者曾充捕役實盜魁也場且驚事發輒逃匿其黨庇之役莫敢捕先生抵任嚴賞罰設方法督役往捕倘拒卽格殺律得勿論役如誠夜遇英拒傷數役役憤立門死英弁搜緝餘黨盜風以息諸服毒自經者先生聞報卽往驗驗非毆傷立命瘞非威逼及他故立開釋自是輕生習亦息廓爾喀之役大兵所過須派夫馬先生通計須費若干酌章程榜衢市令公正紳士董之不假手

胥役於是民輸踴躍丹稜故隸詹州州牧派費未善也州民揭丹稜榜控大府大府飭州牧傲先生法民始安焉旋調理巴塘事所經理人皆信服兩宜撫司甥舅也以爭坐位措怨先納印及紅頂花翎於官將舉兵相攻擊先生嚴檄禁之并開誠曉諭面爲勸解兩土司感悟並泣拜去居巴塘三年人甚德之比瓜代灑涕相送者百餘里不絕駐藏大臣松筠馳書嘉獎旋委署大邑兼署直隸邛州凡官蜀十八年所至事皆辦上司未嘗提一案也由邊俸擢雲南賓川知州改戶部福建司主事司員既眾自循分外無可見才同事多輕雋少年喜談諧先生自顧齒宿不樂與追逐輒引疾求去堂官留之不可遂歸歸時年甫六旬其恬退如是性平易近人人樂與親雖悍夫亦聞言自化居官所得俸時以助戚友歸時囊甚儉日用不支至鬻田以贍其寬厚廉潔如是益初官御史銳意建言先生戒以弗亟謂敢言非難言而當爲難益常佩服斯語云既里居以獎進後學爲務屢主講龍河書院郭氏義塾所陶成甚眾族人推爲宗長辭以

萬載縣志

文徵

古志

六十

主修族譜請始就因立義田規積穀爲賑荒及資送試者費族人善之生平自書籍文翰外無他嗜其詩稿戴協揆爲序行於世其友睦一門及他美行不勝述嗚呼以先生德足化人與其才足御紛卽以當方面大任何難顧僅効於巴塘蜀邑與族黨里塾間良爲可惜然卽是可以知先生矣先生以乾隆辛酉年四月廿九日生嘉慶癸酉年五月二十五日卒享年七十有三葬石筍坑元配張宜人繼配張宜人子七元展增貢生元颺邑附生前卒元翰元超前卒元福元匯業儒元采早卒孫男八曾孫四銘曰邦之彥族之雋廉可爲貧非病家雖瘠民則潤其神腴其道勝澤在蜀羗懷恩信寬仁恬浚物無競今之耆成昔先正嶙嶙石筍端且勁鬱鬱佳城此其鎮天豐才德而用弗竟曰留以祚其子姓

寧都州學正聞松園墓志銘

瑞金縣令常州舉人惲敬

乾隆十七年上命王大臣以身言差天下舉人之外次吏部者一等試知縣二等試學正教諭訓導著爲令更六年一舉行至嘉慶六年而聞若星杰與焉先

是海內殷繁朝廷至行省臺皆法令具備知縣但據案行文書而坐擁脂膏不肖者遂以爲囊橐其賢者不日遷去或十年卽建旌節於是舉人皆願爲一等聞君儒者不以爲然當推排位廷中以十人爲班主者援筆曰第七可一等卽有宣問君名者聞君久之曰星杰第八耳於是改置二等聞君出語人曰以冒得官雖三公吾不爲也十年授寧都州學正十一年十二月初九日壬午卒於官年五十有五憚敬子居聞之曰聞君蓋不苟進者於法宜銘按狀君諱星杰字羽儀世爲袁州萬載人年二十七充府學生三十七補廩膳生三十八中式江西鄉試舉人君家貧養父母能勤教子翁有恩禮嘗中途得遺金還其主在廣西學政幕府拒以關節干者其介類如此曾祖來歸從九品銜祖達國子監生父望光府學生妣易太孺人生妣王太孺人配王孺人子三宗恕宗旭宗彌彌縣學生孫二化甯宗恕出學甯宗旭出以十二年五月二十六日葬於祖堂對門團山之原銘曰青原沉沉石隳陳中有幽宮白日揜三公何益君向歎以

萬載縣志

文徵 墓志

六一

禮爲室廉爲門彼貴苟得非吾倫子孫勿忘視斯文

晉江縣知縣袁公墓志銘

肇高廉兵備道侯官進士葉申萬

今歲辛卯春三月申萬以奉命觀察嶺南秩滿將入覲在會城理裝行有日矣適袁茂才南溪自江右抵羊城奉先人行狀來請曰子先君子門人也先君子謝世十餘年矣馬鬣封未獲吉壤今將改遷幽宮之銘闕焉深懼先君子嘉言懿行流風善政泯滅無傳敢託子鴻筆垂諸貞珉是子子先君子以不朽也申萬受知遇恩以歷官中外未獲一報隧道之志萬責也安敢辭按狀公諱廷鼈字駕山號六堂世居萬載歐桂西鄉白良曾祖秉星邑庠生具俠氣康熙甲寅棚寇倡亂圍練鄉勇捍禦里黨事載郡邑志祖則且邑增生履端性和輯家乘收宗族施藥活人數十年罔懈考建中登雍正壬子賢書乾隆丁巳明通進士除廣昌教諭行誼詳李厚剛所撰墓志中廣文君子四公其仲也誕之夕妣敖太孺人夢朱衣人抱嬰兒授之囑善視他日當紹門第已而公生髫齡英挺俊

邁吐屬清遠羣目爲遠到器戊辰廣文君告養在籍課讀嚴漏下數十刻始令寢丁丑邑令張立中拔冠童子軍隸籍郡博士旋食餼甲申奉廣文君諱丙申丁太孺人艱公喪葬如禮哀敬兩盡己亥舉於鄉授樂安教諭樂邑科名久不振公銳意作人凡裨益學校振興文風者罔弗力按月課文等差獎賞諸生袖文來質率夜分爲點竄羣慶得師丁未倡修樂庠莊本爲聖誕會計贏餘贈春秋兩闈士子既又修忠孝節義祠及文廟樂邑自公倡舉諸務科名丕振士論翕然歸之癸丑遷撫州教授疏濬學宮水濠民居鋪戶向屢遭泛厄者至是遂除尋以卓薦擢福建縣令甲寅到閩乙卯上憲委署福清篆下車卽矢志冰清嘗夜燭治官書必與幕友虛懷往復求其生不得而後已且戒曰律例者成法也忝伍成法死生人鞠情者官定讞者幕可不慎歟是春大稔斗米千錢發常平倉賑之司事者以未白上官懼吏議公曰得賑于議願也卒報可既又勸紳耆捐銀六千平糶全活甚眾臺匪陳周全乘饑跳梁海外制軍檄長福營海壇

萬載縣志

文徵 邑志

六二

建寧等鎮渡勸道福清公方示賑懼兵擾籌辦兵差咸得機宜民賴以安八月充同考官得元龔正調萬亦忝列門下闔竣補授順昌是歲恭遇覃恩贈廣文若如公官妣太孺人洽順三月制軍以同安械鬪紛紛檄公往嘉慶元年正月初六莅任越翼日陳村陳呂二姓排鎗列械將鬪公聞之遣家丁賫諭剴切曉導陳呂卽時投戈寢兵公各賜紅綾一疋親書正躬率族四字令懸祠中兩姓各詣謝卽筵琴堂令東西互酬酢鼓吹導出觀者數千人自是終公任無械鬪者尋調晉江同民詣制府乞留未允晉江海疆劇邑也民悍吏獠號難治公極力整頓恩威並濟每逢疑難案卷必先細心披閱數過集訊時旁推泛敲虛誕者微露破綻默識之既參合前後語反詰情實立吐邑中驚爲神明邑有天地會公乘尙未鳴張改裝密偵得陳選魏和許詩楊六會首弋獲研訊供各傳徒八九百人斃杖下尸陳郊亭各匪震懾逃散至今泉民無天地會名目實由於此又於各鄉僉舉族正令約束子弟械鬪擄搶挖塚擯葬者牙口施姓闔邑

第一巨族自僉舉施世祿族正果能約束無犯公旌以匾額風其餘泉城遼澗
向無保正匪徒時乘夜潛入行劫公親詣三十三鋪簽立大街小巷樹堅固木
柵夜則單騎帶役巡查民得安枕無憂制軍魁公稔公治行手書聯句贈之曰
欲求政簡心常苦得到刑清夢亦閒任晉四載一錢不名民皆稱袁青天以逃
竊聞報遲釋吏議解任後上官委任福州審辦十屬二州案丁卯復委漳州審
上控積案三年凡結六百餘件平反者從無駁飭制軍汪深契其才欲專摺奏
復以鹽課缺消格不行丙子歸里門嘉慶己卯四月二十三日以疾終距生乾
隆丙辰十二月初三享年八十有四德配江孺人上高歲貢因禮女先公卒子
三長守均優附生次守道候選縣丞次守學候選庫大使前葬本里蕭家沖風
吹捲簾形今葬茭蕪胡家沖蝙蝠岡合宜銘銘曰有千古不磨之業無百年不
敝之身嗟嗟夫子康樂偉人其青氈所隨也多士仰蘇湖之範其宦轍所至也
萬民懷有脚之春魂雖歸於珂里神猶翔於八閩謝峯巖巖錦水鄰鄰右環左

萬載縣志

文徵 卷之六

六三

抱衛此幽窀千秋萬禩永棲吾夫子之真

修職郎李君復初墓志銘

李宗昉

萬載李生承頊父歿葬有期奉狀求予志其墓生予壬午典試江西所得士也
因取其狀次之按狀君諱明善字雨田號復初邑附生父松軒公廩貢生母汪
氏君事親孝父歿廬於墓骨立母懼其傷也未期迫之反後母歿遺命堅戒之
君以不得致其情痛益深過兩忌日嗚咽不食飲終其身皆然與人交談論侃
侃有過失輒面規之其能改者稱之不去口否雖至戚終不假以辭色家故不
豐然好周急服內長宗窶不能娶予之貧曰是不可使無後也族有負逋謀離
其婦者爲惻然代償之有嫠矢守義而貧不支助之粟并謀於有力者共助之
嫠得成其志又以朱子常平倉後世至於官徒飽奸胥橐出穀七十石於所居
里立義倉以里人愿慤者主其計他姓爭效之賴以存活者甚眾或歸德焉君
益怒然也少攻舉子業後更好陽明學有大志而終於諸生故所見者止此君

生乾隆壬午六月十九日卒於道光甲申十二月二十二日妻曹氏子三人長承烜舉人次承昉優附生季承華孫曾十數人以道光乙酉葬於鵝鼻峯下觀音坐蓮形銘曰俗敝而漓而篤行如斯匪以責報也然不干其身必其齋豈冥冥者果不可知

太和縣知縣郭公墓志銘

知縣宜春進士徐輔忠

文林郎郭公星嶠以今已亥三月在籍告終葬有日矣令嗣光昕奉行狀諡於余曰先君子與君素相知今蓋石之詞未具請有銘予固辭不獲乃據狀而粗陳其梗概焉謹按公諱大經字緯之星嶠其別字也世居萬載郭村鋪曾祖諱如崑祖諱德仁俱贈文林郎考諱世華候選巡司晉封文林郎累世隱德至公而聲大顯幼而岐嶷學有心得初中乾隆戊申科副車就職州判北上考充正黃旗官學教習期滿以教職用嘉慶戊午科中鄉試第二名選奉新教諭課士有法倡建考棚文昌宮奉之人士服其教澤越戊辰會試中式一百八十名

萬載縣志

文徵

墓志

六四

殿試登二甲以知縣即用補安徽潁州太和縣治尙嚴明盜匪斂跡素以養士愛民爲心暇輒課試多士捐金疏濬白洋等湖窪地盡成膏腴士民感恩未幾丁內艱歸壬申復丁外艱服闋呈請改教補南康府教授捐金倡修聖宮復倡濬蓼花池充白鹿洞監院設法修葺復請於鹽院增膏火五月士民利賴修復古蹟表彰前賢指贊不惜引疾歸邑侯衛松甫聘修邑志入閱月稿成邀同志九人鼎建文昌宮因而勸捐寶典以資寒畯又提唱捐濬縣河建閘收閉俾免水患而利農田以義倉爲救荒善法捐穀以倡樂善之心至老不倦病年猶屬其子若孫以讀書立業以好善存心以勤儉持家以溫和處世言訖而歿公生於乾隆辛巳三月初六日午時卒於道光己亥三月十五日丑時享年七十有九歐陽子有言爲善無不報而遲速有時公之封翁三世皆以忠厚傳家樂善好施而尤重道尊師故科甲之顯封誥之膺皆其所操券而致而公復以恬淡招不盡仁義培有餘則天之報施善人子孫繩繩庸可量哉配袁氏封孺人側

室孫氏子二光昕邑增生光昀邑附生繼三弟大綬爲嗣女二孫男五傳曾自
超爲諸生銘曰處則修己慎獨葆真達則兼善利國利民身任繁劇訟獄端平
爬癢櫛垢敦厚嚴明積欠墊解民困以蘇案無留牘謳歌匪諛興廢舉敝學舍
頻修疏漲淪滯水利兼籌所至頌德去則懷思名重大憲首邑是資公性純孝
思親念切急流勇退曾不停轍晚益好善扶困拯乏三黨內外無不惠洽折契
止券樊重稱賢市義捐貲何止盈千公之文藝確有典型後學楷模酌雅稟經
勤儉兩言奕禩可述子孝孫賢遵守勿失某山之原實爲不窳校德焯勤永垂
貞珉

陝西留壩廳同知唐公墓志銘

主事邑進士辛師雲

唐公卒之三年其孤藻等屬其壻師雲爲銘墓之文雲不敏曷敢當斯鉅任顧
以公眷顧之隆栽培之厚渥承覆露得今日惟公期雲者深惟雲知公者切
其曷敢辭謹按公諱錫鐸字廉持一字松士系出唐莒國公儉始祖壽興公自

萬載縣志

文徵

萬載志

六五

豐城遷萬載祖光表公父廷鳳公咸以公貴贈奉政大夫如其官公幼失怙恃
借翁錫純讀書家塾中名噪一邑顧公儻負大志不屑屑經生業值川楚教
匪滋事援例授職縣丞分發陝西時賊烽方熾仕秦者裹足不前公捧檄喜躍
卽日就道大府奇公才命馳赴漢中協理軍需時仁廟在位之四年也九年署
南鄭青石關巡檢以獲首逆荀朝九功奏上御筆加圈十年升褒城知縣十四
年因案波累鐫級離任旋奉特旨開復留陝十五年歷署洋縣澄城事十六年
補授興平今上登極首重廉能勤慎之吏令大吏隨時密保公以道光二年四
月調咸寧首邑四年保薦卓異五年擢留壩同知在任五載卒公爲政廉而不
苛明而不擾壹以勸課農桑崇興學校爲務其待物肫誠坦易無纖芥城府以
故愛民如子民亦愛公如父母所任褒城洋縣澄城皆邪匪蹂躪之餘井邑殘
破公綏集流離士歸學農歸田商歸市兵差餉饋不擾閭閻庠序增修盜賊衰
息人物殷阜歲亦大熟其在褒城被議也川督勒公相過境士民擁轅崩角請

留公者數萬眾因是名動天聽蹶而復振同議十數員中特予矜原開復非倖致也署洋縣備公五旬生辰褒城父老重齎數百里製錦袖祝者累日不絕公任與平久視百姓如家人父子循循拊勸不施刑威而教化以成雖婦孺皆識公聞公鳴騶過夾道聳觀無敢譁私相語曰吾唐爺也土人呼佛爲爺蓋謂公爲佛云歲正城鄉婦女必至內署朝夫人夫人賜以果栗皆歡喜膜拜而去其爲民所愛戴如此興平新尹到任向例有供給三百金歲有點差長規七百五十金公廉其病民悉蠲除之會時疫流行公周歷四鄉問民疾苦捐給藥餌口糧不假手吏胥全活無算咸寧講求水利濬龍洞渠溉民田數百萬畝有兩大姓爭訟公爲平之事後浼邑紳餽二千金峻拒弗受富室某死但乞公一臨弔願以千金爲壽公薄其人堅弗往其清操自律如是留壩處萬山中地僻民淳文風未盛公捐廉建留河書院并設義學七所秦中素乏蠶桑利甫下車出教勸民種藝植桑多者予優獎至今綠陰遍野蠶筐成行皆公惠澤所流也又

萬載縣志

文徵 卷之六

六六

出示勸民勤耕織知禮義禁嬉游凡數千言在復諄懇儻所謂忠信之長慈惠之師歟公官陝右三十餘年歷七政並以廉靜純白著稱治行達當宁行大用矣適西陲不靖籌備兵差供張積勞致疾卒後留壩紳士軍民請主入清官祠清官祠者爲前同知任公所立也任治留有惠政百姓懷之至是與公爲二焉公內行醇備既少孤撫幼弟友愛臻至教督子姪皆成立天懷曠達過人急需振枯濟乏不火吝以故里中沾潤者眾人咸謂公歷艱仕位高多金而不知公身後猶寒素也雲總角侍先火宰京邸公一見器之因壻焉會公女早殤公猶眷愛不衰爲納粟大學赴北闈歲甲申公入覲回任雲送於良鄉公步躡庭數武顧雲曰予自不覺老惟步履差不似前始知事業多在少壯時然所深望者子耳勉之秋風得意當先報我知也嗚呼言猶在耳而雲自是不復得見公矣且雲躡蹻名塲二十二年自公期許之心今雖幸邀一第廩部曹乃不獲及公親見其銜恩茹恨豈有窮耶嗚呼哀哉公生於乾隆丙子閏九月十三日寅

時卒於道光十年十月初一子時享年七十有五元配曹宜人繼配萬宜人側室劉孺人子六長洵業儒次沂候選從九品俱歿次逢辰次若馨俱候選縣丞次逢源次若澍俱業儒女四孫興孫里孫平孫茂孫以道光壬辰年月日葬縣西梅源里飛蝶山之陽銘曰干將莫耶器精斯利夏鼎商彝物樸斯貴精或累仁樸者少知孰兼其長體全用具嶽嶽唐公振轡長塗明不苛察質不迂拘和神中蘊才氣外敷兼斯二道厥本中孚手持大阿剗彼長鯨心結寶筏拯此芸生民資保障天倚長城茲歌不輟桴鼓無驚猛糾寬施一張一弛筆判如山心清似水訟簡刑清化行俗美野沃桑麻戶敦詩禮截矣太華公勛比崇沔彼渭水公澤同豐公官雖瘠民生則充方將分啖大展公庸嗚呼惜哉冬日可愛雖燠暑短春風風人雖和不遠位不副才數奇遇晚三秦父老同聲哭輓何以報德清官有祠莘莘俎豆永傷永懷曲瓊砥室望公之來公之精爽侯不邁哉梅源之里飛蝶之山是有名宦託體斯原清風百世佳城千年鼎銘阡表後起有

萬載縣志

文徵

墓志

六七

賢

安遠訓導袁君墓志銘

辛師雲

嘉慶辛酉先少宰告養歸里其明年授徒城南之宋氏塾一時從游甚眾而蓄道德能文章粹然儒者則白良袁君勤齋其首也予時方九齡視君學業如在霄漢而君獨賞予於儔人中引爲忘年交者十年比予隨侍先少宰都門而君亦以丙子賢書連歲北上先少宰相見喜甚凡視學山左江南皆入幕校閱與予兄弟同堂講貫一如在塾時予方得次女而君亦舉予先少宰命爲姻好相得益歡君志壯甚每舉必赴丁酉計偕余以書速君因攜予來京就婚君回書道其衰病辭悲酸予愀然傷之越數月而君訃至矣嗚呼余與君性命之交殆四十年重以姻媿銘幽之作余之責也雖不文其敢辭君諱開慶字平階一字勤齋系出汝南袁氏始祖庭玉由宜春遷居白良世有令德爲邑著族會祖寬祖廷瑤俱邑廩生父振河能詩早世以君官貤贈修職郎妣周氏旌表節孝貤

贈孺人君生六歲而孤事周太孺人朝夕溫清孝養備至念非讀書求科第無以顯揚其親因肆志於學名大噪自經史外於諸子百家之言無不通入比及詩古文詞每篇出輒軼其儕輩邑人爭頌尤長於駢體幾入庾徐之室弱冠入郡庠旋食餼辛酉以拔萃貢成均丙子舉於鄉道光丙戌大挑二等甲午選安遠縣訓導安遠故荒僻鄉學者少君以醇儒蒞官與士子闡發經術講究文藝手批口授疊疊不倦又拔其最秀者加以獎勵士樂歸之興廢舉墜凡學宮考棚書院一時創建五年文教大興士風丕變以道光戊戌九月初八未時卒於官歸柩之日安遠人傾城走送紳士集河干舉奠多泣下者其遺愛及人若此君天性篤厚事季父繪甫公如父每事咨稟而行至老不衰繪甫公公諒正直或爲族人所忌公悉力禦侮屢艱危不悔然人卒服其誠信無敢犯生平至誠待物抑然善下然遇事有不可者折以義理鬚髯戟張人謂仁者之勇喜排難解紛雖極強暴者得其一言無不悅服邑中公事如志局賓興族事如祠宇譜

萬載縣志

文徵

古蔡志

六八

牒皆主其事而觀厥成友人湯馥堂巢繩齋兩孝廉客死於外皆經紀其喪俾旅櫬得歸其他義舉類如是尤篤於師恩事先少宰三十餘年相從中外恂恂弟子職凡先少宰一言一動無不身體而力行之嘉慶丁卯戊辰間邑人相鬪君獨守師訓持正拂眾論不畏強禦有吾道干城風予兄弟嘗有急君傾身障護走數十里相救應屢遴紛呶不顧也嗚呼君仁孝行於家庭信義篤於師友教澤施於學校其文足以壽而行足以傳可謂有道君子矣昔先少宰於天下所取士得鄭解元兼才於里中教授士得君嘗喟然曰兩生學術人品皆不愧古人皆堪爲當世用而皆不能成進士其將蓄之久而後通歟抑將食報於其後人歟嗚呼使斯言而信勤齋之文之行可以不沒矣乎君生乾隆癸巳九月十三巳時距君之沒享年六十六元配張孺人連舉數子皆不育繼配楊孺人生一子芳泰娶辛氏卽予次女也以道光庚子十一月卜葬於本鄉銀盆淘珠之原銘曰天兮無意何生哲人天兮有意何喪斯文豐胡其才而斬之名躬仁

履道乃有艱屯懿矣袁君吾黨之儔積學力行服膺師訓鼓俗春風與物無競
內介外和賢愚愛敬君之氣度休休有容公輔之器大臣之風是將行道澤被
無窮何庸一命學官以終章句小儒或騰霄漢景拔電飛雕蟲刻篆燕許鴻裁
卿雲詞翰胡爲一第不償厥願德薰桑梓道被鄉閭使庶民社澤我烝黎安遠
之學經師人師使持文柄公道宏施命也何如天道難論爰有一解天佑善人
不於其身於其子孫煢煢遺孤庶大其門銀盆之原版化之里鬱鬱佳城環山
抱水千秋而下鄉人仰止是有人焉有道君子

湖北試用知縣周公育人墓誌銘

李慶咸

公諱樹贊字恬孫號育人周氏世居萬載之黃茅鄉代有隱德曾大父繼德公
孝友齊家七世同居無異爨乾隆五十年合邑請旌義門大父金彩公積學不
遇父治原公邑增生聿繩祖武相率儉勤家法成童卽執有常業秀士樸農無
敢游惰公生而樸茂內慧不外露稍長父命服田帶經而鋤安之若素然性倜

萬載縣志

文徵 墓志

六九

儻有大志歲丙戌同胞兄樹楷補弟子員公瞿然曰溫飽非吾所志奈何久事
阡陌耶乃輟耕而讀壬辰歲入郡庠踰年舉修行補增癸卯登鄉薦益勵前修
枕經菲史孜孜不倦作文必自出機杼不拾人牙慧雖六試春官乙巳會試呈
薦卒以額滿見遺蓋其勃窣理窟湛深經術之言見者無不心折有由然也予
與公爲姻親自丁未同赴禮闈每試必俱惟冀相與有成乃一第之難同深慨
歎數亦奇矣公以功名未遂老母在堂定省久疎又值粵氛不靖騷擾江湖道
途梗塞不獲馳歸遂致憂鬱成疾迨癸丑大挑一等以知縣分發湖北試用始
迂道旋里抵家後屢醫診視僉謂元氣大傷刀圭恐難爲力而公方日夜焦勞
謂江漢經賊匪蹂躪勞來安集措手維難輾轉籌思疾益增劇未幾遂至不起
嗚呼使天假之年以其學術發之爲經濟則其所敷布正未有艾胡優於才而
厄於數不得藉手以展奇才惜哉公卒咸豐癸丑年十二月初九日巳時距生
於嘉慶辛未年六月十一日子時得年四十有三德配郭氏子三人長漢章出

繼胞兄樹楷爲嗣次光琦聘媳宋氏三光琦尙幼卽予女壻也女二長適龍次適郭余先公數月南旋久傷離索會公兄樹楷以明經貢成均藉入賀爲良覲詎登堂而公已屬纊數時矣嗚呼數年聚首一朝永訣余其何以爲情卽哲嗣等卜以明年正月十八日良時葬本村虎形山之原乞爲墓誌余雖不文其何敢辭銘曰公之才足以有爲公之學未展所施孰奪其算天實爲之積厚流光食報未已不於其身於其孫子勒石銘幽以告於禩

通奉大夫唐公逢辰墓志銘

大學士曾國藩

君諱逢辰字芳行號蘋洲姓唐氏江西萬載縣人父錫鐸官陝西留壩廳同知君隨父任習吏事不樂以科舉帖括自程限入資爲縣丞分發湖南補湘潭縣丞大計卓異升知縣旋補耒陽縣調湘鄉縣積功累保同知直隸州以知府記名署澧州事擢衡州府知府加升道君服官三十年廉靜慈惠號稱循吏而所在以武功能辦賊顯在耒陽偵郴州劉大偉之亂牙股擾及耒陽油榨墟君自

萬載縣志

文徵 萬載志

七十

率民兵遮擊之賊遁去時粵賊洪秀全陷道州遂由桂陽州郴州至永興距耒陽城數十里所至官吏望風遁君獨閉城治守具戒士紳募勇殺賊立功賊亦遂掠縣境而北陷安仁茶陵不一犯縣城而常寧之白沙結油榨墟餘匪尹安恒劉高明等乘隙謀作亂人心洶懼君詢知其情急掩捕之盡戮其渠耒陽民竟不知有兵事乃皆大懽明年調署湘鄉前令朱君孫詒故有政聲湘鄉民聞君至張目以伺及見君行政相謂曰吾憂故府君之難爲繼也今得唐侯可以無憾咸豐四年洪秀全既踞金陵遣其將羅大綱上窺湖南時國藩奉命治水陸各軍討賊以水師扼長沙而賊將侯世瑄徑由甯鄉趨湘潭橫出江車君以民兵扼石潭賊以故不得越石潭而西又明年衡陽洪樂市土匪起毘連湘鄉南境君又扼兵石潭地方花門樓以拒襲殺數百人於是湘鄉團練之名聞天下無敢稱兵犯縣境者權知澧州始至訪得積匪一人戮之澧民故強悍相戒毋敢犯君法而在湘鄉以捐例推廣文武學額置田計息爲鄉會試資興及歲

科兩試卷費在澧州備歲豐七年蝗災君爲除蝗通力書散之所屬士民而設局收買蠶子親歷各鄉捕治蝗終不爲害九年擢升衡州府知府府北石鼓書院當蒸湘之交商船輻輳齋舍湫隘置廬前守高若人鑒嘗藉蓮稅充膏火君蹙縮居積籍其贏餘議增建石鼓別墅於石鼓峯之南政建考棚繕葺育嬰同仁兩堂鉤稽出入俾資經久同治元年歲荒君開常平倉輸穀於民而設粥以濟餓者蓋君性慈和而遇事能斷所行政及捕治亂民應機立決無疑難用能受成於一心而孚惠於民所至翕然稱善而在相鄉最久士民思之尤深常粵賊至永興耒陽居民皆走避君獨募勇數十人乘城時徵存民稅萬數千金或勸君留充勇糧君曰此數十人食城中穀有餘耒陽一孤城賊所不爭或幸不至至卽死耳留此何爲是時州縣被賊所徵民稅皆免君獨完解君之廉能不欺其心以能獲信於上而致功與各施顯有聞蓋由此也君生於乾隆五十八年癸丑十月二十三日寅時卒於同治元年壬戌九月初六日酉時年七十葬

萬載縣志

文徵 墓誌

七一

於萬載縣四區大埠頭綠豆園元配陳夫人生女一繼配彭夫人生子林棠軍功保舉同知賞戴花翎女五孫鼎豐候選知縣孫女三曾孫女四銘曰猗歟唐君衆趨利以忘其生君漠不聞難則至矣而人惜其元官則勞矣而人憚其勤各聲惠愛惟所撻取而拱手以讓之人猗歟唐君其施惠於吾楚二縣一州而達於一郡其藏形者三尺之墳世相承爲良吏永徵信於斯文

封君龍子蔚先生墓誌銘

高玉森

天之降福於人必觀其器之所受窮巷之士間舍求田弊弊然若有所不容已其子孫亦遂將沉溺於其中而無以底於成倖而或成數十年之清苦必求償於一日之榮望不滿於鄉閭而澤不流於後也其亦可嘆也已若夫超然物外貴賤一節其爲我龍封君乎封君諱池翰號子蔚世爲邑之石塘人祖父炳本生父介年父如岡故農也封君讀書數年而輟以嫻騎射游庠非其志也於是博觀史傳每於客座中上下古今人品與歷代興衰成敗之所以然纒比然數

千言無遺誤人大驚服以知其沒於名利而殷於學也一時文士樂與之交方家貧時有債負者將鬻田以償慨然曰貧吾命也靜聽之可耳爲此爾妻子令凍餓耶卒却之其寬厚類若此逮予磨言以進士官於皖聞其勤於職事則甚喜不問宦囊之所入就養所至數月輒歸蓋借山水以自娛於世俗應酬之虛文性不耐也年七十精神不衰日步三四里歸則課諸孫句讀以爲常以光緒庚子年四月十一日卒封君爲人身長五立言論慷慨而和易近人故鄉黨無纖芥之釁日用飲食始不過儉後不加豐豪於飲未嘗及亂人以覘其所養方疾之亟也諸子以長兄未歸爲詞曰忠孝不兩全此何待言又以遺命語曰人苦不知足吾生獲所養死無所苦於世不失爲端人忠厚之食報遠矣嗚呼觀封君之所信心無愧與天之所以厚之者其間豈偶然也與熾昌未有艾也封君以道光庚寅年五月二十日生其卒也葬於屋後半里之牛形子五聲言補安徽桐城令歷署望江宣城顧言國學生行言舉人箴言廩膳生前卒鶴言

萬載縣志

文徵 卷之二

七二

國學生女一適府經歷銜鮑模坤孫男女各七人玉森以仰慕之深重以姻親幽宮之石未敢以不文辭銘曰克家有子以濟於屯富貴之迹泊然非所性之存其儲孔無永被後昆

盧侍讀墓誌銘

德化劉廷琛

君諱兆蓉晚易名耿字扶常萬載人弱冠善屬文爲龍學使所賞肄業經訓書院治古文辭光緒丁酉舉於鄉官內閣中書記名侍讀余初不識君一見於魏君斯逸坐中觀其言論敬異之丙午予監督大學堂以君任齋務提調得其助爲多堂中教習多宿學君與郭君復初饒君麓樵最友善所學益進予奉命進呈講義未嘗不就商榷也國變後君棄官歸里設塾授徒課以正學癸丑顧子於青島時兗州有事君爲奔走焉庚申君與復初顧余於九江復往來上海京津間歸就予別慰勗甚至依依不忍去予在大學堂共事蓋百餘人亂後星散或不相聞問君獨數顧予於患難之際有古人風誼君素和易而憤世則激昂

有擊楫之志予方喜君學成而志益堅定將倚以有爲而君卒矣嗟乎此豈獨朋友凋喪之感而吾黨失忠信可恃之士爲尤可悲也曾祖諱後懿祖諱昆樹考諱錫璜均贈如例妻彭氏繼娶謝氏生子四皆幼君以辛酉二月十二日卒享年四十有八君弟貞木以是年四月某日葬君於里之杉樹塢貞木從君學事君甚恭蓋能撫遺孤者銘曰嗚呼天道誠難知矣天澤可以易位中國變而爲夷鶩於學者率從風披靡君獨慨然有志於古不隨世變以推移當國家之多難方有厚望於君奈何遽棄濁世而如遺石可爛而志不可朽茫茫萬禩視此銘辭

贈君郭公孟牖墓表

明禮部侍郎撫州王 英

人之有德者天必佑之昇之福壽或不在其身則在其子孫斯言也豈不可徵信哉予於萬載郭公見之公諱孟牖字善慶世爲名族曾祖德新祖壽軒父彥正俱有學行母龍氏淑德素聞公性端敏自幼嗜學及長博究羣籍而工於詩

萬載縣志

文徵 墓表

七三

賦深有思致鄉先輩器重之名譽日著公自持以謙和有司欲薦其才則以親老力辭由是謝絕人事深居簡出於富貴利祿澹如也公事二親篤盡子道且夕必侍側出入必告供膳必自理凡親意所欲爲必順成之未嘗少拂親沒號慟絕而復甦水漿不入口三日葬祭盡禮人稱其孝家多腴田歲積粟遇饑貧者必以濟里鄰有急難赴之人有爭訟爲剖決之子長力教之詩書俾之成才公之操行蓋如此生癸卯十一月十六日以永樂己丑五月初十歿春秋四十九有七葬其邑地名竹渡紫蓋山之陽既葬之三十五年爲正統癸亥公之子刑科給事中墮以葬有誌納諸幽室而墓未有表乃奉貴州布政司左布政易節之狀請文爲表公配龍氏繼韓氏子二長瓊次瑾俱龍氏出瓊以徵辟授國子監博士瑾登進士擢刑科給事中顯赫甚大皆公之教訓所致也朝廷推恩贈公給事中光榮賁于元壤論者謂公有學不仕而於親能孝於人能周卹其德允臧雖未享上壽而有子顯揚於後且孫枝蕃衍非天之報公也耶士之垂名

于世者豈特以位哉有德而隱者皆當論著也故以瑾之請爲書之俾刻石以表於墓過者式焉

國子監助教敬堂辛君墓表

大興進士閣學翁方綱

乾隆己酉予於江西選拔貢生得萬載辛君從遊南康廣信諸郡歲餘君成進士後官國學者又十年知其經學最深所與予校勘注疏說文諸條手記皆存予篋近年來有持經說相質者必與君共研覈之君證據極博而能審擇歸於一是不爲泛鶩不爲矜異之說今年春尙爲新城魯君嗣光校定尙書說己酉江西選拔諸子惟魯與君洽經尤精密魯君嗣光前十餘年卒予未得表其墓孰意今乃表君之墓可傷也已君爲人誠信篤敬不苟言笑不輕然諾易書詩三禮三傳皆考辨補析凡若干卷君乾隆己酉舉於鄉乙卯中會試嘉慶丙辰進士國子監助教俸滿以同知用諱紹業字復先一字敬堂生於乾隆二十年十一月二十七日卒於嘉慶十九年七月十六日年六十配王孺人子四介公

萬載縣志

文徵

墓表

七四

弼僕仍孫三僕庚午舉人今扶柩歸葬狀其略來求表於墓道雖不獲書丹於石其學行皆可傳於後者

追贈中憲大夫原任廣西泗城府知府調署桂林府知府諭賜祭葬盧公翰坡先生墓表

陳啟邁

余撫江右之二年公嗣子書浙來謁余以通家子弟延見書浙泫然流涕百拜稽首泣曰先君原任廣西泗城府知府辛亥四月調署桂林府知府爾時粵匪肆逆攻陷城邑戕害吏民欽命文華殿大學士賽中堂暨巴達二都護統大軍進勦營駐省城先若督辦糧臺并支庶各營軍餉兼理全省捐輸事務軍書旁午昕夕靡遑積勞成疾不幸於九月六日卒於官時上下戒嚴王子春始獲扶櫬歸里冬間卜葬於本邑麻田龜山之麓雖蒙中堂暨各大憲憫先君爲國隕軀奏請卹典荷恩賜祭葬贈道銜弁蔭一子以縣丞用自足光前壤而慰精誠而墓門碑碣尙自缺然何以表其阡而垂後世不孝偷息人間幾無以立於天

孫某案成潛遁久未緝平邑獲之不解赴本官越境以獻公重賞之不受詰之曰小人聞公長者懼爲公累非貪賞也卒辭而去此以知公之愛民感深隣境刁民不得肆其奸使天下長民者皆如公恩威遠被民知自愛盜賊無由潛匿又何至養癰貽患釀成巨寇重煩朝廷顧慮其視公爲何如哉予爲公述其始終以表於石非徒以垂後世蓋以爲牧民者法也表曰渤海龔遂治化循良武都虞詡盜賊潛藏信臣爲守修築隄塘與民興利澤沛一方公更博大兼擅其長中牟異政屢擢巖疆文教丕振化洽膠庠鉅工底定慎固海防撰文奮武夷險皆臧揭竿伏莽小醜跳梁膺命禦侮厥績孔彰留侯借箸決策非常星隕諸葛返旆南陽功留浙粵日久彌光緬懷巖末青史流芳書之墓石作作有并孝廉方正辛君墓表

元和進士陳鶴

先生諱炳昭字能濟號熹亭江西萬載人袁州府學歲貢生也曾祖金潛廩生祖汝獻湖口縣儒學教諭贈江南道監察御史父樹貴本生父樹國俱增生先

萬載縣志

文徵 墓表

七六

生善事父母推之兄弟宗族嫻黨暨乎一鄉一邑之間恒以信義見推初贈御史公卒羣從兄弟以家事委先生其後季父病革復以身後事相屬先生謹司其財產出入無纖毫私有妹婚素封交不擇人妹憂之先生割宅與共處朝夕規勸終妹世得無敗妹卒壻遂蕩其產則數鬪給之甥既長議婚不能取爲資而取之邑有學田公舉先生司理凡十餘年佃民愛戴若父母邑應童子試者千五百餘人以自攜坐具爲苦諸搢紳謀創立試院而艱於費因率諸有力者出錢諸有力者曰非辛先生任其事吾儕終不出錢時先生已老謝不與事諸搢紳強起之事始集嘉慶元年有詔舉孝廉方正縣學教諭某首舉先生而府學教授某爭之曰此府學諸生也豈可不自我舉乎八年八月卒年七十有六將易篋命諸子治喪不以佛老惟朝夕設奠如禮邑人士多效之其葬也白衣冠而送者幾千人遠近嗟嘆以爲從來布衣諸生所未有蓋先生之爲人類乎王彥方陳仲弓而上希乎夫子所謂信則人任焉者然先生固經生嘗謂讀書

不如鈔書課寫五經至一再遍年逾六十猶爲諸穉孫欽經寒暑不輟信乎經義與治事相兼而信義之所以著於人人者皆自學問中得之也嗚呼斯真克副乎孝廉方正之科者已子七人紹基附生紹業嘉慶元年進士國子學正誠質增生紹顯紹模增生紹訓庠生紹良孫十八人曾孫七人墓在上高縣山棗渡江北月形山之原

湯府君墓表

梅曾亮

君諱勳字績林世居江西萬載縣西鄉考德高娶於潘再娶於漆漆焉人生君幼孤母病禱於神減身年以益親壽兄遠遊從師負書擔簞笠相隨商湖湘中諸賈人有贏錢博塞出敖君獨挾冊危坐眾皆嫌其不類性獨好形象言醫藥方書求者輒應不以爲利娶龍孺人子慶元淑元譽光側室張生星元君性嫉惡有聞見必面責之不問人遠近厚薄面赤語竭而後已孺子婦人聞君至皆避去鄉有豪不便君所爲訟以蜚語連數歲不解欲君奔走匿迹去鄉里爲快

萬載縣志

文徵 墓表

七七

君子譽光年十七大府重其文而館之署仇者乃息昔司馬遷班固屢稱人長者其行類忍詎不臧否於人夫長年之人常不與兒童較是非故長者之名以其遇畜人如兒童者而名之也卽慢人也實甚然則見不善必怒怒必不忍於詞色如君者其設心與彼孰慢孰恭而人反不樂乎是孔孟惡鄉愿而遷固稱長者豈非以世之自待者益輕而卑其論與况如鄉豪者何足責哉譽光官江蘇君嘗再至其縣署見予能其官卽歸曰吾不樂居官府道光十六年七月十九日卒年七十七十八年八月十三日葬宜春縣宜風塘富坪上譽光嘗從先君子遊乞曾亮爲之表習知之不可辭

駐袁州叅將盧公傳

邑庠生李魁春

盧公慎體諱志勝字漢興爲人慷慨有謀略遇紛難好排解見人阨輒傾身佐之爭鬪聞公言卽解故族里中事無大小皆取決又雅好交游邂逅如故四方之士亦咸樂與交崇禎間天井窩盜起攻城陷陣所過殘滅官軍咸震怖公獨

毅然曰大丈夫不能建功立業碌碌於世何所川乃召集豪傑同官兵勦之賊
恐遂降時袁臨侯總督三省除公建昌守備公之任年餘郡守倚如干城洎罷
歸父老皆流涕擁馬足不得行本朝順治初起用爲游擊僭總兵郭天才駐袁
州袁故吳楚衝也兵馬蹂躪閭井邱墟民苦兵久矣公至下令軍中敢取民間
一草一木者斬由是按堵如故厥後郭別調公亦罷袁之城空焉上命總兵蓋
出鎮之聞公能表授叅將其有功地方甚多不能殫述後數年忽動歸輿歎曰
功成不退身之災也遂解綬家居脫然無累或琴於室或羨於淵以自樂焉贊
曰公之度量越人甚遠公之才猷應運而顯交賢納士聞聲載慕翼難扶危羣
情翕附時丁末季盜賊如蜂公暨義旗誓翦羣兇雷轟電掣谷靜山空爾功既
立侯嘉乃績式佐新朝授以顯秩公之中年兩鎮於袁維桑與梓咸沐其恩功
成身退賢如之何著於竹帛千載不磨

廖荆山先生行狀

義寧州學正南昌縣教諭李眞實

萬載縣志

文徵 行狀

七八

先生諱連城字明亮號荆山姓廖萬載人祖諱斯雲馳贈奉政大夫妣黃太宜
人父諱清兆誥贈奉政大夫妣藍太宜人先生清兆公之長子也生有異稟能
孝友事父母必得其歡心閨門肅穆待親戚故舊恂恂如也稍閒則登學古樓
誦讀不事家人生產弱冠後遊庠食餼歲科試詩古文詞罕有出其右者學使
孫符卿目爲遠器以優貢京師需次儒學歸而掌教高魁每以其所自得者開
示及門邑人士咸矜式焉咸豐三四年粵首陷入江南北據金陵分支四出謀
窺江西先生與彭子文練團黨者各賞假分團爲阻撓計子文性剛與之訐控
省叩關詞連大吏先生與子文同事訟亦與焉六年粵首破江西各府縣軍務
旁午欽案未決先生與子文回里起忠義軍與援江軍相犄角一戰於羅城再
戰於天保三戰大破敵於長勝江四戰敗敵於斜口五戰克復上高札營界埠
瑞州大股精悍來援師驚而潰先生幾陷於危而氣不少衰尋以餉缺勇散是
役也徒手號召數千人轉戰萬新上三縣經略曾文正深嘉其忠義有幹才又

年重提欽案予文以積勞病故問官欲全上司體面坐誣亡者論令先生改供
先生堅不易辭人服其義旋丁外艱服除入文正公幕府效用以瘡疾假歸適
髮逆再陷新昌上高先生奉札防堵謂坐與行勞費正等初襲敵於刁樞再戰
大破敵於麻山三戰克復新昌論功保知縣遇缺卽選同治元年大比先生復
應鄉試以五策第一爲榜下知名士五年貴州教黨大亂寧萬羣不逞謀響應
約舉事於交界地方民心惶惑受僞符者十而入九先生與鍾卓如密謀掩捕
擒斬八名火江西教首鄧某之廬渠魁遠遁地方得免糜爛卽久從教者亦多
悔悟反正論者謂先生保全生靈之功最大六年瀏首姜本致作亂蹂躪小源
大橋招呼醜類與白良團勇相持竟月適縣勇由尙鏞坑橫截姜遂進菱湖高
嶺欲乘虛劫先生軍裝火藥先生俟其近宅百步督練勇鄉團一戰滅之其竄
逸者復爲先生弟鳳城伏兵擒斬論功保賞藍翎以知縣不論班次遇缺先選
並加同知銜十年丁太宜人憂服除進京會試以海防策呈兩江制軍光緒二

萬載縣志

文徵 行狀

七九

年四月進呈御覽三年復呈遞條陳均奉旨咨行議奏六年選授湖南新化縣
七年二月到任革除陋規四條書二銘以示潔已愛民不侮鰥寡不畏強禦民
以事至官卽諭以某日聽訊案無留牘出鄉則自備夫駕嚴禁需索新化昔爲
苗疆民多獷悍前官每請兵懲創先生化以文學盜息民安甫一期而疾作卒
於官廡年七十時光緒八年二月初三日也公帑無虧私囊無積寶慶太守蔣
公常垣憫先生清苦設法調劑俾諸孤得扶柩歸葬於邑北之燕竹里焉宜人
凌氏前卒子男三人劔勤劔寬劔和俱大學生女二長適謝次適葉孫男三人
女九人皆幼初高繼東洲兩書院歷聘名宿主講先生肄業其間又得鍾慎齋
爲師謝暢軒賴曉山爲友日以道藝相切劘故讀書能見底蘊經世別具胸襟
居恒每以古名儒名臣自期學問宗有宋五子居敬窮理兼佩服明儒王文成
致良知於事事物物直截簡易人人可以學爲聖人繼以姚江尙悟修重節義
知行合一而存門戶之見者則謂其右陸左朱以心學爲禪學誤矣先生枕經

薛史知大道自有至當不易之歸學者貴能冰解的破凡勦說雷同與揆之情
理形勢有未瑩者皆覆瓿之駢枚而已所著時務策指陳得失皆可見之施行
讀史諸篇抉摛隱微亦多不刊之論義寧陳中丞寶箴爲之梓行昔諸葛武侯
理繁治劇不過妥當二字淮陰侯驅市人決戰取勝要在及鋒而試至於大義
當前毅然爲之死生利害一無所怵於中先生雖僅小試於團練鄉兵而忠勇
知命之學大概可見一斑若吏治以德教爲先刑罰尤貴得中欺人者得志則
受害者痛心子產相鄭以猛濟寬實則惟明克允後世姑息容隱紀綱廢弛皆
庸俗以出人罪爲陰德者階之厲也先生作宰新化實心實政期月之間風氣
爲之一變易簣之際左右問所欲言先生曰全受全歸夫復何言惟天假我新
化獨不畀以三年之期以觀厥成爲可憾耳目遂瞑諸孤以實承學有年知先
生稍詳使其其行狀以請誌傳於作者實謹以所見所聞據實縷書以俟大君
子纂次論定俾後之講學論治者取裁焉謹狀

萬載縣志

文徵 行狀

八十

盧君翰坡先生傳贊

廣西巡撫鄒鳴鶴

公諱昆鑾字金成號翰坡姓盧氏江右萬載人余壬午恩科會試同年也通籍
後公筮仕浙江與余天各一方而公之政績浙撫臣保舉卓異每見諸邸報以
故嚮慕久深今夏余奉命來撫西粵時粵匪滋逆欽命大學士賽統大軍進勦
駐紮省垣戎馬倉皇余懼不勝任適聞周制軍吳方伯屢請於李宮保營調公
返署桂林府事深幸相助得人先於途次扎詢賊情並員弁優劣公剖析詳陳
略無隱諱到任後公一日與余數見商確軍政洞中機宜大有裨益當茲羽檄
紛馳智慮稍有未及卽貽悞非輕公審慎精詳好整以暇此非器識宏深者不
能何其倚任方深竟於九月六日中痰而薨全省官紳軍民皆流涕痛悼欽差
大臣以公積勞成疾歿於王事援軍營例入奏天子賜祭葬贈卹予廕如例公
之忠誠亦無忝矣今令嗣沈浙等將扶櫬返里請余傳余謂公儒林循吏口碑
於浙豈必藉余言以傳然予以年誼感命嗣之誠爰按狀以爲公傳公祖父以

詩書收家一門孝友公生有至性家學淵源年未冠爲名督學王省崖先生拔置邑庠越四年己卯舉於鄉又三年成進士謁選以知縣籤發浙省屢充鄉試同考官得人最盛初宰臨安邑荒僻無黷達公下車卽訪求疾苦百廢具修而於作養人才尤爲厯念邑素無學校公捐廉倡建錦城書院俾生童肄業刑政稍暇則詣院親課優其賞賜不數年民富士興屢有顯達邑人愛之歌頌不輟任滿調石川厯海鹽平湖石門衝繁鹽與平皆海疆素稱難治公到任興利除害一以治臨邑者治之而民之愛公亦與臨無異并祠生主於各邑書院故公每去一邑民皆攀轅遮道河干祖餞有哭泣挽留者蓋公之德澤入人深也癸巳中丞富以公治行爲浙最專摺保舉入覲奏對稱旨諭部記名將任邊徼公回浙適海甯石塘崩塌諸大吏謀改造并外護柴塘以冀垂久商能任其事者僉曰惟盧令可復具摺保升東海防同知而朝廷簡放廣西明江之旨下浙撫留修塘工兩載績成而公之賠累不少矣公慨然不以爲意乙未赴粵題補

萬載縣志

文徵 傳贊

八一

龍州同知庚子以憂免服闋仍揀發粵西厯署明江南甯同知鬱林直隸州知州鎮安思恩府知府粵地苗民雜處風俗強悍公勦撫並用所在有善政邇來大吏過於優容州縣以無事爲福養癰貽患刀民每揭竿蠢動公承委捕勦前後帶兵撲滅屢著勤勞嗣新甯全州雷李興安龍勝李林諸賊目聚眾陷城邑殺吏民猖獗尤甚公統率兵弁直搗巢穴殲厥渠魁擒其餘股匪肅清以功升泗城府知府公大小常變動罔不臧山海深沉莫可測已迨後金田會匪叛逆李宮保督師柳郡引爲行軍司馬省中以首區簡用經屢請不得已方允履任洵知人哉贊曰公嚴以律已寬以待人謙以接物恕以平情屏絕繁華敦崇樸實善勞兩忘名利不役惟惓惓於功業之未成雖殞身而弗惜嗚呼鞠躬盡瘁死而後已公其有焉德配李恭人節儉仁慈善勸內政克成公志子六人長書澍議叙九品次清沈三錫榮皆邑諸生四書浙五書湖議叙八品出繼胞弟展甫爲嗣六書潭業儒女一字本邑候選州同宋公階明次子候選布政司理問

世材孫十有餘人皆足嗣公而世其家者也

唐君蘋洲先生傳

大學士曾國藩

唐君逢辰號蘋洲江西萬載縣人父錫鏞留壩廳同知有善政君自少卽習吏事隨父任析疑決策多所贊助援例以縣丞分發湖南補湘潭縣丞升補耒陽縣知縣咸豐三年粵賊洪秀全連陷郴州興寧永興徧近耒陽城居民走徙一空君募勇得數十人乘城日伏城堞間夜輒炬火發礮賊偵至疑有重兵乃趨安仁北竄而君徵收民稅萬數千金方遣解省城而賊已陷永興或勸君留勿遣君曰此數十人食城中見糧無虞缺乏賊至卽死耳吾留此待賊乎立遣之行於是湖南巡撫以君守城捍賊而所收民稅不爲私利緩急可倚特有意嚮用之矣明年調知湘鄉賊由金陵上犯再陷湖北省城上窺湖南以水陸各軍集省城乃西趨寧鄉陷湘潭擾及縣境君立扼石潭馬托使賊不得西竄在湘鄉四年廣學額置寶興田前令朱君孫詒故有惠愛而君能繼之巡撫駱公屢

萬載縣志

文徵

傳

八二

奏君才可大用調署澧州治蝗尤有聲除慝懲奸鋤其強梗升補衡州府知府至則增修書院建試院更定有嬰同仁兩堂章程同治元年衡州荒穀踊騰貴君飭各屬開常平倉平糶設廠施粥以濟貧民以籌捐軍餉叙勞加升道未幾卒於官君抱負奇偉而慈惠溫溫平易近人所至士服其教民感其誠令出惟行無有扞格自奉甚儉而敦尚友愛推分弟姪不有其私鄉鄰戚族貧不能贍者周濟無缺年過七十而聰強完如火壯時論者謂其所負宏而施之不遐而一病且死之尤可惜也

辛孝子傳

邑優貢辛炳喬

乾隆十九年萬載縣鄉紳袁建中偕里老族鄰以辛金岫事略呈學遞上之大府得咨部後陳守修志列諸雜傳語寥寥且弗本呈官事略非所以紀實也謹撮要別爲之傳按孝子辛金岫字首亮志稱字佳岐源方又歲胞伯母劉年二十九新寡乃繼爲嗣稍長受鄰傭早晚問安習以爲常而仍勤鄰家事過

佳節予之肉弗食必以饋母遠鄉雇之傭雖豐不赴也顧繼母有痼病針指紡績皆廢惟以雞爲羞則病希發孝子所得貲輒買雞以進母嘗浣衣於塘忘攜杵因置衣塘側而歸覓杵孝子自外歸鄉中輕薄子戲呼曰爾母溺塘矣乃疾趨果見母所浣衣而不見母也急投水救母水深且濶良久不出忽似有人托之而上者母亟呼人救起腹彭亨置牛背閱一二時乃甦自是孝子之名大著雍正元年棚民作變孝子負母匿山中遇賊於小石橋將繫其母去以要贖金孝子長跪號泣以頭搶地血丹橋石賊顧問曰爾何人曰辛某然則孝子也舍之去至今呼是橋爲孝子橋母之卒也不復受傭賣薪得錢卽市楮幣焚墓凡廬墓者五載初小源人唐與仁聞孝子赤貧不能聘妻乃自以女妻之生五子邑侯嚴在昌旌其閭曰孝行可風乾隆二年無疾端坐而逝

陳孝子傳

邑舉人鍾斯敬

孝子姓陳名盛森居邑北之黎源里父世龍生子二孝子其仲也甫七齡隨父

萬載縣志

文徵

傳

八三

廬大母墓日必歸省其母劉孺人無間人故詢則應曰吾父知有母我豈忘之乎眾由是奇之稍長就外傳喜聞先生長者談忠孝事晨出暮還依依父母側雖兒曹數復黷戲絕不往已而孝子成立親齒日以衰家又無涖歲資遂輟學習岐黃焉母羸善病偶疽發背潰委頓牀第間不堪逼視孝子時以口吮潰處傅之藥乃漸平復初不覺其穢臭然父犯咯血氣喘而瘖瀕危孝子愴憤願以身代遍召醫巫衣不解帶者兩寒燠聞楚有神甚著卽祇肅走數百里祈之路遇人授紫丸二因進諸父病頓失嗣又侍父奔母族喪比反而雨暴至臨岬父忽驚眩墜溪中其時溪漲驟發孝子躍而入浪花至湧力挽之始得幸抵岸而父氣息奄奄不省人間事矣急昇回家半晌卻甦卒以濡濕中傷成蠱醫百方莫能愈後有不識者扣扉爲言得雉和葭餌當已孝子竊幸轉復以雉難卒索爲慮越日舍之西園瞥一鳥飛來趨而矚之雉也且雉亦不去孝子獲焉果以是瘳其父是二疾也胥沉綿殫殫非尋常微恙比卽孝子亦幾窮於調護所

遇與扣扉者究不知何許人要其所指授皆驗而雉之應念而至則益奇鄉之人咸適然驚齊其口謂非純孝之所致無此也孝子貌不踰中人而坦真抱慙或浼醫治癥瘕不啻身受歲時供侍一取給於業醫常市甘旨作饌而已故食沒人饋之雞豚必盡留養父酬醫者佩其德頻體其孝瓜果珍饈之投往往麻巢父以此彌暢壽躋八十乃終終之日孝子一慟幾絕既葬倚廬墓所朝夕號痛夢寐中猶時呼阿父戚鄰勸其節哀輒愴然曰昔吾母逝吾不敢以哀毀傷父心不得廬終喪委曲承歡慰父然背父固屢屢泣不能自己今苦塊餘生復何往不令吾肝腸寸裂耶言次復嗚咽不能成聲聞者莫不流涕喪畢每飯仍設七箸奉父母遺忌日弗勝悲戚亦所謂事死如事生者矣至孝子篤友于善排解首創家廟捐襄義塾諸事可稱甚富余以爲俱孝德之所發者

贈龍母袁氏貞節傳

張璧

國風列婦人女子之事詳矣事之大者莫如節今考詩以節著者衛共姬一人

萬載縣志

文徵

傳

八四

而已仲尼刪詩存柏舟於經得非闡發幽光以輔翼世教歟然共姬以至戚欲奪其志乃爲自矢之言仲尼於此蓋不能不悲其志矣其後夏侯令女不忍文叔之死至斷髮刑耳鼻然後免於至親之見奪而以節自終爲曹氏婦千載下傳其事者有餘傷焉假令遇仲尼又不但悲其志已也乃今見龍母袁孺人益有感云孺人歸月塘龍先生七年而龍先生逝哀毀幾絕如是者三其子德正君纔四歲德中君尙在襁褓形影相弔服且闋矣於是嫺黨憐之諷以再圖所歸時有富室慕孺人賢欲爲子議配孺人聞之遂斷髮斬指以誓議者始寢其謀而孺人之志得不奪自是含哀致毀以禮自防堅持日月瑩然白髮無點瑕而力撫二孤訓之學以成名養其父母完其節歸見先生於地下蓋始之所遭與共姬令女同而終之所成共姬令女有不及也夫婦女鮮不狎暱而嚴重師儒以訓二孤戒飭禮義以維家範惟從容立於死不死之間彼求者不諒傲幸一嘗之豈其未聞程嬰之言下宮之難我非不能死我思立趙氏後彼以我能

成事若龍母者其能成事者歟彌留之日大能受命歟幾於達生乎哉彼其心蓋與下報趙宣子一揆矣豈惟報夫而已自龍母能婦而舅姑寬然不重遺以憂孝之屬也舉家數千指累世雍雍無間言毋亦內德之茂者足助焉家人利女貞有味乎言之鄉令慷慨而於事無濟是尙爲其易而以難者更遺何人將何以復於世之求多者嗟嗟終夫之事者完婦也終月之志者孝子也今其子才且賢異日翮爲國華者二孤耶是又子與母所以交相成也天使授璧之夢至是徵也夫當月塘棄盛年豈不云促不知其促也顧其所以永也與

鄧與齋先生傳

辛從益

君諱斯沂字浴儒與齋其別字也世爲邑名諸生父諱鐫太學生長厚最鄉里若幼而沈粹穎敏過人授以經書輒通悟十歲從歲貢郭秉銓先生學爲文出筆雋雅郭大器重之甫弱冠以郡試榜首補弟子員尋偕益仲兄淑郵游李厚岡先生門並稱高足當淑郵與益入泮時君已各噪縣庠中歲科試屢超等已

萬載縣志

文徵 傳

八五

而淑郵以選拔貢太學君舉優補廩膳生邑子弟從君遊者甚眾君既年長於予文名亦較余著甚然君不以後進視予每見輒傾倒相與暢談竟日或各出文藝互商間有指摘余悅君君亦不余怪也若既與淑郵聯姻兼友誼相得每屆鄉試僦舟赴省租寓君必與余兄弟偕余兄弟亦非君不樂也君善文而精衡鑒歲癸卯鄉闈畢邑中知好過寓舍必令自誦其闈文君意皆不甚許可獨激賞余文以爲必中謂淑郵曰兄文雖高不如弟捷之速也是科吾邑惟益幸雋人咸謂君決科不爽云然君竟久困諸生中至乾隆甲寅始舉於鄉乙卯留京刻自揣摩數以文囑予直評予慮其過於勤苦勸少休而君所居郡邸西上房地狹狹而熱所服丸多補劑不宜於暑邸中寓人頗雜或呼盧竟日君不能耐乃夜讀蓬旦邸人多笑之所隨僕以不諧於眾遣去君益鬱鬱不自得語郡人曰我若寓辛宅明年必獲雋也郡人爲余言且以爲癡予始不之信既察之良然乃迎入予舍與予姪敬堂同居敬堂知醫囑爲藥之君亦不甚肯服也居

半年癩不巳然當發時聞予言一道破輒爽然止常喃喃自誦其文謂予曰蒙
君前所批某篇某段今已自改矣諦聽之較前實爲精警超脫然自文外其他
語則皆不可曉矣蓋性之所好業之所精雖癩不迷如此適淑郵以乙卯公車
入都與同廳居見其狀曰噫浴儒信癩矣噫郵書其家厥弟秀濤來迎之以歸
歸二年醫不效竟卒邑人惜之君性孝友弟六人皆從君讀一入泮餘皆彬彬雅
能自樹立大學公年既老不欲久理家政乃析箸君意不樂然諸弟間有闕乏
輒引爲己憂或代爲借債不令知也有戚某嘗負百金或勸君控追君不可竟
還其券讀書大唐寺見爨夫私泣詰之知爲債家所逼將鬻妻以償君邀同志
出金代償之一小婢聘者願出八十餘金君告以此婢愚蠢祇取原價遣之其
尙義疎財類如是性恬淡得失不介懷待人甚寬厚然遇同輩被強梁所凌輒
義形於色己亥科寓董家塘試畢將還挑夫十餘輩索值甚昂乃另雇他夫至
則前十餘人者齊制之勢洶洶行李不得發時同寓七八人皆束手無如何君

萬載縣志

文徵

傳

八六

體貌魁梧雄傑直前擒其渠渠愕不敢動其黨乃解散去君鄉薦房師爲卜坦
綸先生謁見時見君貌偉益奇之謂才不虛生必能爲國家出力顧不虞君一
上公車遽病廢以卒嗚呼以君天性之厚與文行之美皆宜大用於世乃早歲
盛名年近艾齒始一登賢書而又不竟其才良爲可惜意者天祚善人不於其
身必於其後固將以有待耶君之子五人一曰可廷予兄淑郵女婿孫七人長
朝颺可廷子文庠有聲

劉君恬齋先生傳

辛從益

吾友恬齋歿之十二年其孤廷杰等以狀來乞爲傳予與恬齋交最稔知恬齋
最深其敢以不文辭君初名鳴臯字鶴和後改名時耕字學不一字恬齋君考
雲臺先生以懋遷勤儉起家母楊孺人有子六君其季也少負奇氣倜儻有大
節壯乃肆志於學爲文雄快俊偉不蹈恒谿稱其爲人大守馬公府試閱其文
甚器之取冠軍入泮歲科試皆高等壬子鄉闈薦未售君陰念得失有數不可

強而昆季相繼去世羣從皆幼弱家事無可諉遂棄舉業援例貢成均嘗意理
家政撫子姪皆成立今江口諸劉多席先業擁厚貲詩禮雍然兼慷慨好賓客
君之力也君勇於爲義乾隆甲寅乙卯間郡守張公五緯飭各屬建育嬰堂君
首倡同志捐貲置田以成之邑向無考棚士子自攜試席坐具出入艱劬君糾
邑中紳耆呈縣丹創建考棚捐貲董其役廊舍堂署規制煥然試者復之其後
郡人改建試院君命姪步雲獨建一棚而躬至郡經理其事工以完固邑中歲
稔米價踴貴民情洵乚君倡議聚公米平糶首出貲勸輸輸者雲集邑賴以安
其他修橋梁道路惜字惜牛諸義舉君無不與事亦非君不辦也君軀幹修偉
美鬚髯日炯炯有光重然諾喜排難解紛視人事如已事戚友皆倚重之顧胸
次軒豁識超邁凡非禮之禮非義之義介然不肯爲人有感者立勸止之雖嫌
怨不避故人益重君始予識君於竹溪書塾喜君語言俊爽遂訂交焉余官京
師久告養旋里君假館課生徒命子一恕從予游前後幾十年朝夕過從歡甚

萬載縣志

文徵 傳

八七

比予服闋入都而君以長逝聞矣嗚呼若始當父兄繼逝之餘子姪百餘人以
一身支持門戶卒能使一家競爽羣季和睦外侮不生其才有過人者晚年閱
世益深見道益熟意氣日益和平顧雄才大略不獲大用於時僅著於家庭鄉
里間爲可惜也己嘉慶乙亥卒年六十有八

文林郎謝公謙福先生傳

袁州知府子笠許承家

謝公謙福諱日郊萬載人先世自贛來萬世居東木橋爲著姓大父其瑯公始
學家徙宜公生彌月父玉松沒母鍾孺人年二十二居貧守節撫公稍長隸乚
如玉聰穎異常童四年粗通經史塾師袁某大奇之以族人芳德女與之公既
娶婦鍾孺人相與力女紅內給衣食外資薪俸不足窘甚將輟學鍾孺人不許
親叔鍾瑩寶銓二茂才亦力爭寶銓者郡稱有知人鑑者也門下士補學官第
子百餘通籍宦遊者數人器公命赴學年餘家益困乃棄學爲童子師積金贖
負郭田數畝助菽水尋復肄業東洲義塾半年方公之初入東洲也院中生童

百餘人間其六年學來此莫之齒焉越日山長邵鄂秋孝廉摘問後漢書三國志疑義眾多莫對公暢言得失纒比如貫珠卷入擊節稱奇一院皆驚讀其文已乃歎服時公年方弱冠意氣壯爽有大志不專治制藝摘錄漢唐宋史有關世道可師行者爲史略各數卷參攷歷代兵制水陸舟車馬步陣法亦數卷既三十猶困童子試會孝廉廖荆山帥鄉勇勦髮酋新昌堂兄錫軒觀參贊左文襄西征軍務知公才先後均聘公入幕公竟以難違鍾孺人意不果往也蓋公性至孝少受書時卽解慰鍾孺人心每朝夕粥午攜蔬食往鍾孺人間賜脰甘輒辭夜讀鍾孺人紡燈側漏四下不先寢一夕偶媿鍾孺人怒則引咎跪泣鍾孺人杖在手不忍下亦泣而已鍾孺人疾夫婦衣不解帶番宿遞侍累月不倦或竟夕搜覽醫書云先是里多豪暴藉巨族欺壓寒微公奮然曰大丈夫得志於朝當鋤暴揄奸扶危定傾以平兩閭憾居鄉亦猶是耳卽集同志請官立鄉禁以約其爲地方害者豪暴迭起難公不爲動自是寒門弱族少吐其氣紛

萬載縣志

文徵

傳

八八

難公至輒解邑施某奇冤公偕友白之施將嫁媳以報公怒止友索謝婦得不嫁其行事疎財仗義多此類里人至今多感思之晚歲爲教子計復授生徒賡志以卒年五十二德配袁孺人順正仁儉知大義敬惜字紙夫沒後鍾孺人壽踰古稀孺人事之益謹課子媳耕讀紡績益嚴而有恩室靡棄物家人大小衣履紉綴澣濯必潔必完外父母兄弟早世無嗣命子擇塋改葬歲時祭掃之濟沂旣補博士弟子兩世親戚交遊多知名士欵洽隆殺未有不當意以去者年六十卒女二長適國學張漢標次適職員范崇謨男六長次殤三濟沂四有秋五有名六有聲媳歐陽張陳卓孫二孫女一

許承家曰余於癸己歲來守袁州屆門試士得公子濟沂所爲文識拔之謁見具述公及先世事甚悉已歎濟沂有賢父母矣余欲館濟沂學適去官濟沂以兩孺人老不能從也今歲庚子濟沂郵狀來請傳予維昔讀明歸熙甫所述者妣事略及國朝曾文正公大界諸墓表竊想見其先世明德而公若有與相類

者濟沂勉乎哉予拭目俟公門第之大已

傷增生謝選卿先生傳

廩貢生注銓訓導受業劉仙瀛

先師選卿夫子萬載增生姓謝其先浙人也遷廣昌復徙居贛隆萬間十世祖登俊公與諸昆季師事吉水李先生與其子忠肅公相與紹鄉忠介公之學詩書孝友累葉見推清初高祖仁品由贛遷萬創業垂統師府君甘谷溫事詩書母張大孺人生伯兄奎堂積學入泮而大孺人逝繼配江大孺人生師兄姊六師居幼甫孩提失恃甘谷公以師幼多疾復續配傅大孺人撫養倍至得以成立故垂髫之歲不使力學顧師夙慧喜涉獵諸家傳奇一覽悉記能旁通其說以娛厥心年十八始就外傳終歲之間文思大進由是以先哲自期銳意進取試輒前茅至二十六始受知於吳淪齋宗師補弟子員游庠以後同學避席品望愈隆時吾舅賴澗軒昆季及廖荆山彭子文諸公皆文苑魁傑咸推心佩服引爲至交鍾仲輿先生作宰吳川聘主西席贛南觀察袁銘泰亦以教讀聘皆

萬載縣志

文徵傳

八九

以親老辭庚子癸卯秋試兩次堂備見遺中丞錢吳二公搜閱遺卷深加歎賞先後咨送豫章書院肄業又俱未果赴祇以親在未遑遠遊故耳師學博而精生平篤於友誼推轂同列扶獎後進常如不及見人有一善片長娓娓稱道闕久不遺論文不拘宗派雲間西江源流底蘊歷歷如數家珍詩古文辭與樊川眉山相頡頏著有綠樹山房文稿待梓故以一諸生名震學校者五十餘年講學里門凡本族及他郡邑爭負笈焉弟子至四五百人類多成就騰達以去仙瀛執贄時師年已六旬矣以樗櫟之姿深蒙褒勛並至當其講貫所及抵掌掀髯令人傾聽不倦是年今上嗣位舉行恩科復薦而不售而豪宕猶昔每逢考試興會颺舉所作亦華實相兼場後榜前持文就決利鈍者聯翩不絕師爲衡曰某必薦某必售某必前列繼而皆若合符詎意十居高等廩餼莫邀入膺鶚薦不離席帽文章憎命今古同慨咸同軍興以來衡陽彭剛直公湘鄉羅忠節公李忠武公勇毅公兄弟皆以諸生從戎豐功偉烈名垂汗青師從姪暢軒先

聖有言生於憂患死於安樂何舜禹傅膠天降大任而能成之能見其然而於兄猶大謬不然哉

總鎮銜補用安徽協鎮謝公青雲傳

謝啟宗

謝君諱青雲字有金從兄日忠之子也先祖與吾大高祖爲兄弟由贛遷萬居邑西三區之東木橋君生而穎異貌魁梧性驍捷儻非常家貧未能竟學而負不羈之志任事果敢值咸豐丙辰丁巳之秋寇氛大熾江西糜爛全國震動官司隨在募兵君投袂而起應募普鎮守部下屢立戰功得授五品銜越明年克復吉安江撫部院耆保授千總更隸郭軍門迭次進戰大獲勝仗至辛酉歲遂克復黟縣及建德等城兩江爵帥曾文正公爲保舉守備賞戴藍翎同治元年寇犯徽州君與諸軍爭先陷陣用解其圍爵帥因奏補安徽遊擊賞換花翎二年又與諸軍乘勝進攻羣酋退走江西底定遂成青陽之功爵帥又奏保參將仍留安徽補用特加副將銜嗣復奏獎陞安徽協鎮加總鎮銜是七年之中

萬載縣志

文徵

傳

九一

君以匹夫從戎屢建奇勲致獲大任不可謂不遇知己矣三年又奉爵帥扎調移師江左方期進軍石頭克復金陵肅清東南詎意年正壯歲將大有爲一疾不起英雄短氣爵帥爲是悵然大息者再特着兵二百人護喪歸家賜錢以葬嗚呼士生於世惟患不川既用矣而天復奪其年以致大勲未集古今如是者不少矣真所謂大丈夫用力於當世遇知於天子殆有命焉不可幸而致也吾誦昌黎之言不禁有感於君因略述其事而爲之傳

論曰記有云共用之謂勇故勇敢強有力者天下無事則用之於禮義天下有事則用之於戰勝用之於戰勝則無敵用之於禮義則順治外無敵內順治此之謂盛德古昔聖王所以貴之者也夫以君拔起卒伍之中傑出虎貔之隊又備天下多故設使天假之年將盡其所長展其所抱負吾知公侯干城公侯腹心者非異人任也而乃大功垂成命與心違不獲翹淨洗兵甲之盛可慨也夫

甘肅特授慶陽府知府謝暢軒先生墓表

謝濟沂

光緒十二年歲在丙戌夏四月既望誥授中憲大夫知甘肅慶陽府事調署寧夏府事雙眼花翎欽加道銜謝公暢軒卒於天水官舍陝甘大吏自督撫以下皆奔走祭賻戴孝送柩出郭數里士民遮道焚香慟哭數十里不絕甯夏慶陽兩郡祀之名宦祠制軍譚鍾麟冀其歷任政績奏請宣付史館喪歸明年葬於宜春大水源之蒔蘿塘又十有五年其子博士弟子培堃請濟沂表其墓濟沂不幸先君子亦以丙戌夏四月棄養追思先德連山處士未遇歐陽握管感泣不可禁奚能爲公表然竊願述公生平出處大節爲後之人法焉公諱大舒字日長與先君子同高祖先世出明侍郎文申公後居贛爲望族十世祖登俊師事吉水李先生與其子忠肅公友善相與紹鄒忠介學稱隱君子十四世高祖仁品國初隨父元儒公遷袁始爲萬載人公曾祖諱兆傑樂善好施祖諱善菽考諱玉樹均學優品正相繼長於族公仕當咸豐同治之間以經濟文學名聞

萬載縣志

文徵

墓表

九一

於時初舉道光庚子鄉試至京師時穆相國彰阿欲羅致天下士爲己重天下士亦爭欲出相國門下以爲榮相國私使人道意公獨謝絕之下第弗顧文宗登極髮首洪秀全等倡亂粵西蹂躪梁徐楚蜀直踞金陵江西連陷八郡五十餘州縣邑侯李吉言窺邑西民家公聞不避危難夜激李乞師楚撫駱中丞介函光容駱公秉章素重公旋許命劉武愼公長佑蕭壯果公啟江分路援江時乙卯除夕事也蕭公既至倚公運謀籌餉如左右手克萬載會劉軍河克袁州江西郡縣以次復至臨江親疾將馳歸蕭以有妨保獎固留公怒其欲以好爵虧人子職也留書不辭而去蕭公將入蜀又欲與公俱手書謝過駐紮資慶待使者三四反而公至蕭排隊郊迎數里當是時公才軼羣倫績著西南左文襄公心紆六合目睨四海謂天下有十一奇才江省惟公與新建夏獻雲與其列由是名益震未幾蕭公病歿崇制軍樸山聘公入川左文襄公扎公赴越公復書左公抗言非部屬不受扎應崇公聘至則川首藍大順等逼省城甚急眾洶

懼議閉城公力言於崇公開城示有備仿兵法虛者實之遺意首果遂巡遁蜀人以諸葛稱之崇公請奏獎公固辭親老歸左文襄公之得公復書也益歎服公能自貴重因以品正才長奏請天子命調公入浙署理台州海防入關宰浦城浦索號難洽公三閱月平反五十餘大疑獄丁外艱去任吏民有三月政成之頌戊辰服闋左文襄方事西征叛回人於是度公爲文襄所思且不得久於家未幾果復奏公入甘時回黨二股強弱異心文襄問計於公公對曰回人無謀聞大軍至弱者必懼今若撫弱而勦強二回必離強可一鼓破也諸將固請節撫及戰二回弁力軍大失利卒從公議而回亂始平以功加道銜守慶陽調守寧夏會長官使人說公稍改慶陽清節以潤私囊公告不能於是人又度公且不得久居官而公果告養歸矣蓋公感九重褒嘉之恩文襄特達之知始移孝作忠勇圖報稱初守慶陽郡城新復千里蒿萊公招集流亡給種畜修城堡來者如市嘗單騎問民疾苦聞多狼害卽禱城隍祠而狼跡遂絕在寧夏亦然

萬載縣志

文徵 表

九三

文襄稱公治行爲隴中第一呼爲慶陽盤古氏繼守甯夏又以諸事廢弛屬公補救轉移公因裁陋規除積弊立學潛渠以蘇民困而多不便於長官禁罌粟事起長官遂排擠誣公營私文襄初未察意不能無動公歎曰知我如文襄且如此廉吏不可爲矣老母在堂遂吾初志可也卽請卸篆告養東歸文襄查得直置酒謝不往時光緒元年也家居後倡建正誼書院移家藏書數萬卷貯之創吾族軍民祠館於袁城八年而大夫人卒釋服總督譚公鍾麟蒞陝復起公赴隴奏公辦事實心老成穩當且云前任慶陽甯夏兩郡辦理善後事宜悉臻妥善士民至今愛戴又憐公清貧無資赴京復懇今上天恩逾格鴻施留甘差委俟補缺後給資引見而文襄沒之前月聞公復出猶致書惓惓稍資方擬暫調蘭州不次擢用而公遽以疾卒矣公爲人精敏有智畧博極羣書以氣節自豪年十三補弟子員學使鄭公朗如贈聯已有立品自當如白玉讀書何止至青雲之譽在蕭左二公軍最久當羽檄紛馳沓來一夕百十起裁答立就悉中

機宜過後人雖精慮不能易所與遊盡一時賢傑不樂攀援權貴人著有春草
草堂集若干卷皆經濟文章卓卓可傳者濟沂嘗聞諸先君子曰士之所蘊蓄
者愈大則其自顧藉也愈重自顧藉愈重則進禮退義其遇合愈難然古今定天
下大難立天下大勲者非得難合自重之士則又不可與有爲而大難大勲卒
不能定立於天下嗚呼此蕭左崇譚諸君子所以汲汲三致意於公而公之出
處大節可想見矣濟沂不敏猶憶少從先君子得一再見公於時公與先君子
縱談袞袞諸公辦軍事及平生知遇輒慷慨起舞有推倒一世智勇意濟沂心
已竊慕公才既又得讀公所爲感懷詩大抵皆痛憤時局艱危當路失策益見
公倘得遂所願爲於一時則所樹立必不止此而乃以不胥爲輒媚耳目先後
失權貴意遭讒畏譏下第罷官以老誠能感寧慶之狼而不能釋羣小之忌豈
真蘇子瞻所謂能者天不能者人與然而公名不朽矣公皇曾祖皇祖均誥贈
通奉大夫曾祖妣氏蕭祖妣氏劉均誥贈夫人皇考誥贈中憲大夫晉贈通奉

萬載縣志

文徵

墓表

九四

大夫妣氏黃誥贈淑人晉贈夫人公妻賴氏黃氏俱誥封恭人晉封淑人子四
有容殤有淞儻廩生先公卒有諫卽培塿請爲公表者有淦殤孫曾林立均能
以詩書世其家公享年六十有九謹表

善學宮雙桂事

韋明傑

歲壬申予議葺學宮學博徐君董其事薛君蔡君左右之已告成廟貌如故堂
廡一新因娑娑雙桂之間見秀色獨挺標韻襲人有欣乚而向榮者問誰種之
則鄧生文輝移自山中問幾何年則萬曆丙午曾未三十年而老幹新枝扶疎
暢茂廣可偃覆高可參天其有神物呵護者歟嘗聞夫子手植檜榮古處世運
汗隆斯文興廢我聖祖肇興於至元間久罹兵燹者故根重發盛與初本埒特
有異焉則闢乾坤洗日月開萬年有道非偶然也而茲胡以雙桂森發亦若與
地俱靈者然意萬士人文其在今日乎遂進諸士而前曰夫采春華者秋則零
矣桂不隨桃李爭妍乃於風霜獨秀其色黃其味辛其位兌孕五行之金氣而

體其堅凝運四時之秋氣而同其擎斂蓋示諸士以欽華就實之思也是故不
可以不植也抑又聞之桂枝之下無雜木取桂屑敷斗勻布砌縫中草經宿卽
萎今天下喙喙爭鳴人立一赤幟家立一標榜聖道榛蕪不墮於仙卽墮於釋
甚且墮於曲學逢世得是桂老辣之性爲之關榛塗掃畦徑使凡芳眾卉無敢
與爲伍者聖道其如日中天乎是又不可不植也然道嚴而寬教惠而普夫子
木鐸萬世其提撕在文字其接引在精神上自稽紳先生下至耕夫牧豎無論
得解與不得解其靈明所入靡不沁以天香而滌其穢臭况諸士林沐浴元化
寢息此中借彼律篴關我性靈解脫語言文字人人自有夫子語不云乎如聞
木樨香吾無隱乎爾則桂豈在樹哉得是說而存之鄧生知植桂當知所以植
桂之意也而第俗之所期香飄雲外種落人間爲廣寒仙木爲郊林一枝則猶
有功名之心淺之手植桂之意矣學博諸君解頤而笑曰有是哉桂之爲義大
也請因以紀之遂勒諸石云

萬載縣志

文徵 書事

九五

書孫孝子事

辛辰雲

老友周茂才融孫爲予述孫孝子汝淑事甚悉非有卓絕奇行可驚世駭俗者
也第循服勞奉養之常而返之爲人子心若未能一日盡非真誠所將何以至
此汝淑居大關嶺東幼隨父食力椎魯人耳而至性甚著父歿事母胡愛尤曲
致家爲烘被捉蝨暑則扇枕驅蚊旬三日必翻掀蓐薦令鬆軟終母身無少間
母或有故含怒長跪爲解至於涕泣霽顏乃起稍違和憂形於色餐頓減終夜
侍內寢不離母安然後復初鄉有白馬廟每朔望鄉晨輒具香楮祝親壽雖嚴
霜盛雪門未收肌粟以俟家僅溫飽出必袖錢施丐遇小爭競卽用以解紛難
穀必減價有虧短聽自補償不復索點者故火齋以欺之自若也意蓋爲母資
福云母喪面深墨三日始粥不讀禮經而聞與之合其爲子如此此非至平無
奇者哉然而行之實難夫孝本庸行其奇行卓絕皆不幸遭其變者也必以奇
行爲孝是爲頑嚚有聖子義慈竟無佳嗣也問安視膳之世子何以云止孝哉

且遭變或出強爲奇行容可僞飾爲處順而行其常出乎心之不容已行乎天之不容僞不容已故不待學問不容僞故無間終身人人可爲實人所不能爲斯乃真孝可風耳余故樂書之以風世之爲人子者

書宋孝女尋墓事

辛辰雲

余族樹瀛公配宋氏大學生寶之女生而失恃寄養外家郭寶好游歷數年不歸母之祭掃闕焉氏年十三思以時展拜而未知墓所日夜涕泣夢一婦人撫之曰無慟吾在郭村某山若借季舅往斯得矣氏覺知其母也如言往則邱壠已平荆榛繁蔓肆覓無端倪日將暮舅強之歸痛哭坐地誓死不空還山下田叟怪而問之因詢其葬時畧指以處斷碑埋首微有跡起而剔之姓氏儼然乃封樹焉迄今歲祭兩家無闕人稱宋孝女云傳此事者不一或云白鬚老父爲指墓所倏忽不見其說近誕此據氏內姪瑞齡述宜可信昔范從規尋祖忠宣墓不得望祭悲號天爲降雨露碣以今視之通夢通天誠孝所感一也而得之

萬載縣志

文徵 墓事

九六

幼女尤難故特表而出之

韋侯邑志跋

明知州邑舉人辛敏道

是志之修也有名公巨筆弁於前已得作者之意而揚扞之余何敢贅一詞顧萬之有志者權輿於成宏增葺於嘉靖代不乏成書亦僥倖修倂廢致令文獻莫徵凡此無主迄今九十餘禩一旦屬其成於侯振一邑墜典然後知侯之七年不遷天故留之爲予萬垂不朽之澤者也夫昔之涖茲土者豈無志薄鷹鷂者乎然而未必皆鸞鳳豈無寧爲保障者乎然而未必皆丹鐸又豈無寓撫字於催科者乎然而未必皆陽城比三載考績卓犖者固超次而升循資亦秩滿而擢獨侯七年於茲三善十奇數登薦剡兩隨計借蓋跨丹鐸軼陽城而獨以鸞鳳枳棲於彈丸凋瘵之邑如此其久也甲戌春主爵者條上治行卓異悉奉內召而侯與焉萬之民拭目踴躍金馬之班烏臺青瑣之列矣竟以逋累留滯至今夫惟歷年多因是閱歷熟而諳練深凡山川之險夷戶口之登耗徭役之

繁簡人文之衰旺士習之貞邪累代之沿革廢置民間之凋敝痛苦靡不悉其
賾理載在民隱諸刻若越人之洞見一方以故隨事編摩臚分縷析成一邑之
書勒千秋之鑑俾後之人得以按圖索驥探病得方真適治之指南而救時之
鍼砭爲予萬垂不朽之澤者也今聖天子銳意吏治詔求天下郡邑志此志進
而垂乙夜之覽必將曰萬之洞悉民隱如此何憂吏治哉異日徵書以至曰予
爲萬得人此志其孺矣予故曰侯之七年不遷天故留之豈無意乎若夫擲
撫品藻幾經校讐閱陵谷之變遷痛江河之日下發前所未發增前所未增則
司馬而雁行董狐矣諸名公已能道之予何贅是爲跋

韋侯志跋

明知縣邑貢生鮑紹湯

邑有志猶國有史也國非史何以統異而致同邑非志何以徵往而俟來顧史
之法在略非好略也採摭難實真贗難核不得不略也志之法在詳非好詳也
蒐羅宜徧收錄宜恕不得不詳也有能於非詳非畧間而邑以志重志以邑傳

萬縣志

文徵

跋

九七

者乎若韋侯青岑翁吾邑之志是已吾邑稱巖邑實疲邑也侯縣名進士莅茲
土下車以來蒿目時艱束於功令思欲寬撫而不可得當路之索解甚啗小民
之供輸愆期朝夕持籌斲七靡寧獨能於簿領冗沓中作詩文若干卷尋且緡
四舊志歎息嘉靖甲辰鏤布迄今九十餘禩世數既遠遺事實繁私念縮符七
載此志不一重新之曷以令通邑生色而政教不幾頓乎因是召諸鄉紳暨弟
子員并耆老有知識者進而論之若謂今昔殊時修建有待曩山川之勝復宜
洩幾何人文之美復映發幾何貢賦之納復加增幾何政績之善復興舉幾何
高逸名藝與孝義貞淑之可嘉賞者復流傳幾何各以所知見無溢美無索瘵
不次而陳之侯受而覽焉自公之頃不厭猥瑣不恡心目之力俱手自刪改自
訂正自繕草以付之剞劂與過疑寧過信與過廢寧過存用意忠厚真得善善
從長之遺大要出於詳而要亦不得不詳也志成是可徵往俟來矣抑侯之成
是志也詎徒肆搜稽示整暇以備近代之偉觀已哉亦惟曰吾且夕脫離去而

後之宰是邑者閱若志當必有灑然道然親自勗以勗邑人觀其美則反是者醜矣居官者務跨軼前修貞教有方董率有條引之康衢大道以爲民計待治者務力追雅道急輸公無煩官府督責而侈者變而樸澆者變而馴悉步飭振起以自爲計俾山陬增美戶多可封人多君子允成醇龐景象侯之意在斯乎侯之立言與德功並垂不朽亦在斯乎至若侯之苦心焦慮恤邑仁邑者具在民隱六列中邑中父老子弟戴侯誦侯者具在德政錄中茲不復贅湯黥淺非能文者因粗述其概以復

志跋

郭大經

石新纂志乘三十卷蓋邑侯衛松甫楊肖巖兩先生屬經借同志輯而成之也邑之有志爲一邑公論所由定卽後世公論所由定成於一手實難集眾手爲之苟或依違涉私公論曷定哉斯志之輯就舊志所存者修其蕪而歸於簡明飾其俚而加之潤色其他生傳瑣事譜序壽詩輓章諸以失檢貽譏者概從芟

載縣志

文徵

跋

九八

易舊志舛錯者取證史書亡軼者蒐宋嘉定等志及直省各通志先正諸集補綴之要其論之所定悉以程中丞刊發章程爲準式存乎其公詎能徇乎人之喜厭非經與分輯諸公有所矯異於其間也誠不敢沒一邑公論以存後世公論而已後之博雅君子覆眎舊志諦審斯志當必有共諒此衷而仍存公論者不無厚望焉道光十二年秋七月

同治辛未志跋

邑進士辛孚德

志之言記也書之於版曰志存之於心亦曰志志不一而能存一邑之文物典章未之有也萬志自雍正迄道光凡三修客歲中丞劉公將修通志徵乘於邑金翥雲明府屬德續輯以謝陋辭不獲於是披讀舊志見者據之精紀載之確前人所編已成善本踵事而增固自易易所患人心未洽意見未融有所窒礙耳因與同事折衷至當一以中丞刊發章程爲準規模粗定而德供職入都雖遠離桑梓未嘗不惴惴焉恐其志之未合而事之不成也今年春諸君計偕來

京告德曰吾邑之志成矣向慮其難合者今竟合矣夫人心之萃渙九事之舉廢所關今吾邑人舉曩昔齟齬之意渙然冰釋和衷共濟以求其成可不謂眾心既萃歟行見正人心以正風俗宰官師儒表率鄉閭以仰副盛朝漸仁摩義之雅化康樂和親睦婣任郵且上而登太史之書矣豈獨志乘之善云乎哉至於斟酌舊志補輯新編則諸君之力爲多而德亦獲附名書後不亦樂乎因僭綴數言歸之以志慶辛未仲夏謹跋

重書黃子中澄波堂記後

元虞 集

其所以大過於常人者以其有量也所謂量者容納萬事而不以爲雜酬酢萬變而不以爲勞世不見知而不爲之愠時見用而不爲之厭高貴利達貧賤憂戚無一足以動其心而區區簞食豆羹蜂蠆之螫破釜之失而愀焉以動執焉而不化者又豈足以語此哉是故斗升釜鍾之分瓶甌甕盎之盛一受形而不可易器之拘也而人也稟天地之粹精而最靈豈無擴充之道哉是以昔

華縣志

文徵

跋

九九

之言量者喻之以江海而不足必準之以天地焉嗟夫常人而望賢人賢人而望聖人豈易至哉然而其得於天者無不同也而心之限量虛明廣大亦無不同也則君子之所自進也蓋必有其道矣故又有言曰識進則量進量之狹劣內識之不明也識不明而謂之量者漠然於事物之應無町畦無畔岸而已矣是故凡有言曰考索而得之者多窒明睿所照則廓然如大公明睿所照識之至也是以求諸聖賢之遺言涵養省察而自靖焉有以擴其心之所之則庶幾矣萬載黃氏之先以澄波名其堂余嘗爲記之其子孟子中自其少時受學於臨川先生之門蓋有聞焉於是又欲余廣澄波之義故爲之言如此乃作而嘆曰昔漢東都世運否塞大往小來陽微陰盛大夫君子不勝其忿起而故之名節相先九死而不悔介特而嚴固猶懼小人之不勝也而叔度獨有汪汪之量爲世所咨嘆至以顏子曰之當時諸賢信之不以爲過後之論者傳之不以爲非而畧無一事之跡可以推見於史冊其爲人也何其高遠深微也哉昔者顏

子簞食豆羹不給於陋巷而夫子語以四代禮樂孟子曰禹稷顏回同道此豈以其跡而論者乎惜夫叔度之生也後不得見夫子而親炙之以就其所至而論定於孔門焉嗟夫子謂回也終日不違如愚退而省其私亦足以發回也不愚觀乎叔度澄不清而撓不濁也誠有如愚之意焉然而顏子之所發當時同門之士固有未盡知之者況於千載之下吾黨小子乎由此觀之叔度之所以爲量其有所不可知也夫其有所不可及也夫而其可知者孔子之於顏子始終以好學歸之學者學爲聖人者也周子曰學顏子之學過則聖及則賢不及則不於令名子中以所聞於臨川者而盡心焉澄波在其中矣 采學古錄

書辛君映斗請減瑞袁浮糧後

尙書義寧進士萬承風

世祖章皇帝御極之十年命入覲吏陳地方利弊江西布政使莊公應會巡南道僉事安公世鼎以瑞州袁州重賦告天子下其章於大司農令置吏覈實

載縣志

文徵 跋

一百

以聞得恩旨減免於是兩郡七邑之民莫不含和吐氣頌皇仁之如天而深感二公之能承宣乎德意以布於下也乃其事之謀於始以善其成者實出於萬載辛君方二公之入覲也沿江右未久不習知民間事疏甫屬草君前請曰在官言官禮由盡請減瑞袁二府浮糧乎莊公固深知若安公亦以莊故同聲曰昔所石袖中出一紙本末粲然二公矐之疏於朝閱一載而果如所請當是時微君言幾無有言之者既而中丞檄郡縣覈元明糧額二郡士民執志乘爲左驗而袁州在前明時有大勢力者宜早請請宜無不應中丞詰袁袁之民無以辨事幾曠矣於是君乃得比較法蓋袁屬邑與吉安之安福臨江之新喻鄰安福新喻田三則上則之糧僅及袁之半袁田惟一則確確不肥地醜而租掣重徵課或乖昔準中丞允其議縛使君無任事之才度務之智襍被從使車後輪籍計帳逋餘懲負枘鑿其言言也或未必聽卽聽矣而中遭駭詰不精司會叅互之術瑞賦減而袁賦未必果減也君之見理明而處事當卓然有賢士大夫

之風矣是舉也君出已貲三百金爲勾當之費事賴以集厥後有議田分三則
加丁糧者卒以前議莫可增益而止君之力能除前三百年之害而利且被於
後百有餘年昔陳宜中之先爲吏常以利物爲心缶投一錢後遂不可勝計孰
若君之一舉而眾善備哉宜乎後嗣之益昌而大也君名映斗字鼎卿袁州萬
載人其他行具家傳余不復書書其請減瑞袁浮糧始末如此嘉慶十六年辛
未仲夏月

學馨堂明跋

邑主事辛孚德

鮑君鍾瑞持學馨堂冊囑予跋其後予讀是冊有名公巨筆弁之於前
取捐姓諸公之意而發揮之奚俟予之贅言鮑君曰聖誕致慶於江浙江右
惟樂安縣首先奉行他邑尙多缺略是冊之刊所以記往事而風將來也願得
一言以爲勸予思神廟香火佛門供養皆以福山利益之說聳動人心求之者
多故奉之者眾至於 聖人則祈禱有所不敢祇以立人之極理所當尊非

萬載縣志

文徵

跋

百零一

若求神禮佛之出於冀幸也向非有所觀感人心曷由奮興乎昔臧榮緒以庚
子日陳經拜奠史傳書之膾炙儒林然止一人之事尙未能以一人之誠敬使
千百萬人得藉以抒其誠敬維典禮於不敝也今鮑君於文廟革新之時捐錢
若干繕嗣復倡捐田畝又有郭君如衡如磐捐田若干把踵起應之宋君鳴謙
如君天宜相繼捐貲而文廟香火聖誕祭費及增修祭器得以概舉俾一邑之
士於上丁釋菜而外齋戒沐浴駿奔走執豆籩踴躍濟濟如升闕里之堂而效
陳經之拜是以一人之誠敬使千百萬人得藉以抒其誠敬也較之新廟宇崇
寺觀以有用之貲財興無名之土木其爲人之賢否若何也章程契約詳載是
冊井井有條行見散布各郡縣聞風興起共襄盛典以仰副聖朝尊師重道之
雅意將以是冊爲號召焉是又諸君用心之深且遠也詎曰人之欲善誰不如
我予故樂書之以爲好義者勸

濟湯堂跋

邑廩生劉履安

曩者安先后與堂內諸先輩醵金若干以興此亭驛站烹茶止渴之舉名其堂曰濟渴自嘉慶六年迄今道光三十年已閱四十九載其開始進斯堂者五十五人頂進者十八人續進者十五人各一股共成七十股但股中前輩存者少而沒者多甚且徙居靡常聚首維艱每當虔祭先代茶神及妥同堂先靈各後嗣或不來其來者必待詢及先世而後知其爲某前輩之裔諸君子懼久而難稽也爰商立冊以紀七十股之人標其姓名詳其年齒錄其子嗣俾來者彰彰可考而凡一切堂內條規與夫所置田宅店房各契據亦皆附載至七十股之人之里居行事社父孫曾則概從略蓋修冊非同修譜其體固宜如是七舉也始濟渴於東一路而繼及於西其南北兩路將次第而漸濟之耳冊成安承諸君囑而紀其實於後至先輩起立斯堂用垂久遠其公善無窮之至意弁冊諸序言之甚詳茲不贅

鵝峯詩草跋

清李榮陞

萬載縣志

文徵跋

百零二

詩之作也矜其富不若率其真行滿天下歸於陶冶性靈而已乾隆戊寅予就館城東與鵝鼻峯近汪子濟川作楫頻過晤語予曰吾不赴近人詩壇於詩不多作亦無留稿也以是轉徵其可詩然君蘊出羣之才以經務鳴於縣惟癖山水與予同重九日偕宿檀下辛象川館攜以登城南天馬之山四顧愴然曰吾其終老窮山乎久聞廬山名勝多地主宜得附遊以抒吾興明年秋闈畢遂相偕下舟章水屆朱溪風阻起陸一火夫持被問關山之南山之頂十餘日隨興留詩返舟會城值揭榜以予獲售經理旬日而歸比予通籍南北獲覽佳山甚衆於匡廬亦環繞不一未嘗忘舊遊而君去世矣前歲歸里屬其族賢崇納曰君家某叔吾忘年交也遇未酬其才在昔縣事糾紛君率二三同志爬梳就緒邦人士咏之其勞勩委曲恐久而易渝願得自臚一切并所雜著讀之既而其家有所避僅將詩稿來予反復再四喜其意新而不涉於浮詞愜而不墮於俗性情夷然盡洗酬應矜夸之才筆墨間時露山川光氣陶冶至此卽詩亦足傳

生平矣君晚歲息影鸞峯間一附糧艘至都門覽宮闕之壯賦詩云含情默欲
教三呼歐陽公所謂老而志不衰深可念也此編前半皆戊寅己卯之作早以
相示然今稿中訛字乃多又脫去孝服僧黃品二首記憶之餘悉爲補訂完好
併予同作二首附後他年有續廬山故實者或不遺焉丁巳季冬

浮收控案遺卷跋

湯克勛

克勛先世以稼穡起家至太太高祖嘉祥公遂富於貲太高祖佐安公兄弟五
而大高叔祖佐臣公序居三性豪爽不屑屑於名利輕財仗義有朱家郭解之
遺風也縣浮收稅糧一案其犖犖者也昔在專制時代控告官府談虎色變當
公投稅時反對浮收責其不應指官欺詐駁詰無效忿然去以計獲印白簿兩
本足爲浮收鐵證乃一控再控至監司督撫不直不休既奔輦轂下卒達天聽
而知縣革丁書杖徒而陋規滌除糧戶普沾實惠矣曾聞諸先人備事之亟也
雞犬不寧舉家惶懼則相向泣公曰耗貲事小盡吾分之所有雖鉅萬亦足以

萬載縣志

文徵

跋

百零二

文大丈夫作事當磊落光明鼎鑊甘之不相累也今觀其控告之波折處置之
縝密其才識有過人者克勛景仰之餘屢欲將遺卷付之手民用垂久遠比以
飄零蕩析書籍罕存幸邀在天之靈竄得先伯父晴波手鈔本適鄉前輩蛻庵
先生編次縣志克勛經理局務以是相告亦謂宜排印以垂後世而塞弊端並
將竣謹誌數百十字於簡末是爲跋民國二十五年春月謹跋

檄交夷黎維潭文

張璧

爲夷情事先據思明府土知府黃承祖揭報安南諒山宣撫司黃廷愛等牒呈
內稱黎氏孫維潭統兵復國擒斬都統莫茂洽收獲印信署掌監國今差宣撫
榮國公黃廷愛等領兵追捕莫氏遺族及招撫地方本國民盡皆歸服黎氏乞
爲轉達等情違宜撫司所牒呈該府呈文申繳到道爲照莫氏乃天朝封賜印
章世爲貢屬恪奉正朔未見有何罪狀黎氏果何人斯輒敢興兵逼弑握印受

成似此亂臣賊子誠國法所不容天討所必加者但據牒呈思明府公文不出自監都統印之黎維潭而出自諒山官撫黃廷愛不由南關正路達之督備官而由私隘達之士官黃承祖則真偽猶未可必若遽興師問罪誠恐濫及無辜且當時諸司勘報稱黎氏俱已盡絕今日又焉得復有黎維潭者出哉即黎氏果有後自當感激先朝曲赦厚恩安守臣節一旦弁髦王章公行篡叛法在無赦除呈三院會題候命調集京省土漢兵征勦外合先馳檄宣諭該國臣民若果能悔悟篡弒之非改圖自新迎歸莫氏納反符印退守臣節縛出首事叛惡逆臣等門請罪庶城中生民可免塗炭爾等官屬亦可保全首領如終執迷則天兵雲集威震山谷區區小醜如探雀雛本道念切爾曹夷獠無知忍令自貽伊戚合先開諭禍福反逆爲順在今日舍存即亡在今日幾介微茫毋貽後悔

采連城集補

存龍河書院十三經牒

武穆淳

載縣志

文徵

跋

百零四

余承乏萬載已期月於地方利弊興剔慙無毫末補惟得從書院諸生童勵朋友講習之業是殷殷也茲屆受代之期爲指廉置善本十三經注疏全部鈐印牒存齋舍俾諸生童誦復講貫期爲明體達用之儒因之留語勗勉曰古人三年而通一經窮經卽以致用漢儒去聖未遠師傳淵源訓詁有自宋儒倡明理學而予未嘗不以道學問爲宗惟明人衍語錄空談直欲舉聖人刪定續修粹一生之精勤思以貽教萬世者皆可皮梨高閣廢爲無用之書良足慨也我朝經學昌明御纂欽定各經說直接古聖人心印今學宮已頗有全書惟注疏卷帙浩繁虞有無力購藏者故以是書餉之諸生誠能從事於訓詁之學其於禮樂制度名物象數之委竟皆可就是而瞭如指掌物格而后知至宋儒誠正之學不外乎此推而至於治國平天下之道又豈能外乎此哉尤願有志之士由經而史而子集逐漸購藏用以擴克見聞將見士盡經明行修人鮮空疏無用未始非余有以肇其端也余用是不能不有餘冀於陽樂之人士矣道光六

年仲夏月

瞻思堂解

明葉 璽

石堂龍子善一日持瞻思堂册事狀以請云以仁失母壯失父次第空歸結廬於墓時邑侯義成劉公清江張公暨庠師鄉英咸夜之詞扁其堂矣世人羣而議之余因其請愧弗能寫其心姑爲之解人之議者曰而過爾矯情爾近名爾且飭於昭肆於冥爾夫割股廬墓賢者過之然吾觀世之戕冠方履誦詩書師周孔者或於其親不能無違言臨喪無戚容既葬置之無復徘徊瞻戀之意此孰與子善之過乎曰矯則矯耳獨不云習與性成乎矯而至於父母之喪悲號歲月試設身孺慕不已難乎若曰好名也非有意爲善乎古之君子篤實而秀名今之君子徇名以就實實至而名從之正惟恐其不好名亦何惡於名也而至於匿瑕飾瑜之說益刻核之論矣子善之爲是舉也非人強而迫之非法制而繩之胡不可徇俗而必爲此者非真心自不容已乎克此慕終身焉可矣

南縣志

文徵

解

百零五

議者又曰孝必有徵古之人若王中楊皞華秋輩皆因廬墓動天地感物類龍子之孝天亦何靳而不徵之以祥乎噫孝者天之命人之心也君子盡人之命以立天之命固不以祥不祥爲加損也古云和氣致祥離則不祥莫大焉吾以人子順親得親苟其心一毫未協皆君子所憂爲不祥者舜底豫而武周無憂乎矣若非家之祥乎乃曾子易簣收手足而呼小子是又不以死爲不祥而以全父母之遺體與無憾於分義之爲祥也子善即自珍顯揚未遂一出言舉足兢兢焉存冰淵之恐以無貽憂先人明發式穀繩繩振振休徵孰與鳩兔甘露親喪所自致區區物論固木秀之風行高之疑惡足爲子善重輕哉嗟嗟世人盡子善子善不足稱子善不多有而不予善者可愧可赧而何暇置喙也子善勉之

黃璧元瑜字說

元吳 澄

玉之爲器不一也有圭焉有璋焉有琮有琥有璜焉而禮天必用璧則璧之視

他玉尤爲貴昔有一璧當十五城天下皆欲得之而不可得者蓋非他玉所能同也萬載黃君名璧而字與其名不類予爲更其字曰元瑜瑜者玉之至美也非至美之玉不足以成至貴之器元瑜之質純然粹然無瑕可揜無垢可磨接於人者溫如斯可謂之瑜也已所成之器吾知其宜於禮天也吾知其重於連城也實之稱其名者夫却人有言天下之寶當爲天下惜之信乎人之貴乎自貴也元瑜爲轉運司屬官持身謹清實異儔輩家素豐殖視身外物有之若無漠然不以動於中其能自重也如是所以全其美成其貴者又豈常人所得而可哉予既更其字因爲之著其說而俾異乎元瑜者知所勸也 采草廬集補舉侯開荒圖說

知縣邑選貢鄭邦德

萬載窮鄉也田多亢曠而租人有限地且僻陋而穀又難通以故輸納不前逋負日多况與異境相連貽累荒敗種種難舉如西鄉洞嶺連接瀏陽之東鄉大圍山烏虎洞黃石洞盜巢也其田瀏陽之人越境而占萬載之糧曷自而輸此

戰縣志

文徵

說

百零六

民之大患存也再風嶺山書堂白水離縣遙遠田率荒蕪民皆逃竄田之荒者愈荒糧之欠者常欠又奇圃竹渡橋墩高城濠田皆亢陽無水之區雖日有事於耕耘而不能享夫粒食畧觀數處自昔爲患使無道以處之不知後之狀何如斯土斯民曷由而濟乎我侯勞心焦思事爲之所曲爲之謀或捐俸以給牛種或貸錢以立甯車或授之役差以爲抵銷流移者招撫之失所者奠居之民乘桑麻之境置買犢之風桔槔有聲刈獲相望立一時之規遺萬世之利以視唐張全義闢關中蕪地者同轍也宜圖各處地土之益以昭示不朽云

篆篁館聽鐘鳴說

譚經濟

鐘之鳴必視實之大小以爲鳴之遠近擬升之鐘崇尺之磬擊之使鳴近不過聞一室遠亦不踰百步非擊之不力聽之不聰也其實小自竭其聲而不能加耳若萬石之鐘則不然小擊之則鳴聞數十里鳳巖之山不能蔽莊洋之江不能限掀天撼地之風不能逆之使返蓋其實大鳴之遠自如是也豈惟鐘哉鐘

以聲鳴人之鳴不止於聲也上者以道學鳴次者以功業鳴又其次者以文章詩詞鳴或鳴於當時或鳴於異代或鳴於無窮與天地相悠久何莫非由實之大小爲聲之遠近哉外此或以酒鳴或以琴鳴或以刑名鳴或以術數鳴他道鳴怪僻瑣碎不足數也然則由鐘之鳴以求人之鳴其近其遠緣實詣何如耳顧鐘之所以能鳴遠者人知聲之出於銅不知銅不自以其聲鳴也曠歲累月以採之積之既豐則又百煨百煉去其似銅而實爲銅累者或三取其二十取其五然後冶之鑄之納之於範圍密其外洞其中又鑿之以牲而懸之於高虛而後聲出焉否則銅與瓦礫無別聲且無安能鳴遠哉知鐘之所以鳴遠則知人之所以鳴遠有自也余館淨安山房盈盈一水之隔清夜聞鐘洋洋盈耳因題說於壁以爲有志者勗焉

墩源老人說

湯肇熙

墩源老人者無姓名兄弟二人行乞里中予幼時及見之年皆三四十身短僅

載縣志

文徵

說

百零七

如小兒以其貌古故稱老人以其居地名墩源故稱墩源老人有廢疾相若聲音向目並相若乞以歌其一以手持竹爲節其一曼聲和之歌已則仰視人而笑與之食則又兩自視而笑笑而食同一碗一箸兄一食弟亦食兄再食弟亦再食見者以其如孺子狀則亦無不視老人竊笑問之老人曰吾無父母妻子無居宏以廢人故無他業業惟乞乞惟兄弟出入坐卧風雨陰晴未嘗不同里中哀而憐我亦未嘗不飽然亦未嘗獨飽也嗟乎使世皆如此乞豈肯不見兄弟弟孝友可風哉夫世非不知孝友之貴也大抵利欲累之耳古者大功同財自秦人子壯出於天下後世寢沿爲俗於是乎小而錙銖之必較大而爭奪之相仇其故有不忍言者庸愚無論已卽儼然名士大夫覈其內行且不無可議豈大丈夫讀書明道竟不若一乞人哉彼乞者渾渾噩噩怡怡愉愉不知有利欲惟自率其性情故也此純乎其天之真者也吾觀古人累世同居號義門者和氣所感有百犬同牢一犬不至眾犬不食之異夫人爲萬物之靈涵濡禮教

之澤乃至以利欲汨其天性毋乃有愧於乞亦且物之不如耶老人老後不知
所終或曰其一死其一遂不復乞亦餓死

請赴吳公講堂課啟

辛炳喬

吳公講堂者前邑侯崇祀名宦故海豐進士陞任河東道吳公克菴先生造士
之遺也夫其延陵華胄康樂好官拒書使於逆藩銷鏞烽於危縣義旅有知方
之號孤城免陷賊之虞固已報在馨香蹟詳志乘矣若其恩隆矜佩化溥絃歌
開別館以廣生徒育英才而宏獎勵稽經誼史句讀親釐說禮言詩養庖賜飫
滋惠既深於保障栽培益切於師儒故爾時丕振文壇而後世常留講院雖復
仙遊鳧鳥僅遺雪跡於鴻泥家遠桐鄉空戒手攀於棠樹而推德化者祀文翁
於石室緬教思者奉李渤於廬山豈其俎豆猶新淵源頓杳者哉所以凜承訓
指珍奉文規雖陳迹久移而新宮別構歲時展祀既修釋菜之儀朋友輔仁尚
闕會文之典夫家祠義塾亦有課程鄉風精廬不無甄勸而令層城月旦莫並

萬載縣志

文徵

啟

百零八

龍河茂宰風流空存槐舍非所以推揚教澤廣啟士途也於是誕日告虔同人
來會宰官拜後紳士座中因支用之稍舒謀均財之必當僉謂擇英髦而肄業
則惠有難周緣集課以普旌則義尤盡善爰抒新意本年爲首甲之科更定前
期五月展中天之節比流觴於曲水畢集羣賢追奪錦於文標纔逾三日約以
仲夏初八闔邑本籍茂才講堂會課自行備卷先報芳名奉學師以鎮息囂浮
相與如臨監史請宦達以商量得失庶幾先覩星雲伏翼鄉城彥士遠近漁才
不憚光臨相邀社會饌饈聊飽敢言夏屋之餐經籍有腴同聽春蠶之葉蓋造
車合轍難獨信於閉門華國聘珍必先徵於待席雖霓裳仙詠知音豈語於折
楊而雲錦天襄麗製爭看於倬漢與其褻懷璧彩一卷自矜何如地擲金聲千
人共見至於街華佩實清麗各殊異曲同工宮商自辨陳思王好人譏彈賈浪
仙待丹推鼓不虧量斗之才無損薰香之供有冰柱雪車之句何妨壓倒名流
無容刀墨水之嫌儘許沉酣試席縱使王前盧後略下雌黃肯教魏竊邢偷罔

分皂白長盡一日無須擊鉢之催藝角先秋必有泥金之捷所望稟經酌雅抽
秘騁妍各矢元音並揮魁墨興酣落筆文峯之塔影如搖氣逸冲霄奎閣之神
光欲爛天荒愈破三元非仙路之登人傑可憑先輩有前旌之導三千字金門
射策恰待揚眉六十年甲榜輪科最先刮目務使梧岡翹羽預騰吉士之聲先
教桂殿分香隱慰賢侯之意若乃霧雲隱豹風雨奉龍當年舟送滕王捐俸賞
力掖助茲者縑胎皇甫體懷聊壯文行雖案之青瓊慙美人之繡段而絲酬黃
相配學士之青錢此則珠玉報揮益廣培風之澤錯刀留贈專希染翰之雄者
矣同侯文旌共成雅集於戲俯筵瞻楠記菁莪育士之心擣藻摭華爭桃李春
官之種奏祥雲於大史他時羣宴杏林近珠氣於文昌此日名書桂籍又如舞
雩穉齒嘯詠能借芄葉芳齡薪樞必採乘時立志正在問年餘力學文先於入
塾趁火樹銀花之看飽絢爛成章借金尊檀板之興豪縱橫試筆別以正月廿
日報名赴課一如前例謹啟

萬載縣志

文徵

引

百零九

高岡雅韻引

明范以淑

萬載鳳池劉君以名家子聯嫻王室秩跡下大夫歲食縣官租稅稱驟貴矣而
爲人溫然如玉恂恂如儒生雅有聲俊傑間方三十壯耳而諸文人客卿各爲
歌詩慶之既而出以示余請數語弁端夫劉君者不以翠釜具列娛其口不以
輕緜文繡華其躬不以螻首蛾眉悅其目不以過雲落塵逸其耳不以怒馬雕
輪適其手足襟度迥出常人而惓惓於聲詩之是求其人中之鳳乎詩有之梧
鳳生矣千彼高岡鳳鳴矣于彼朝陽今劉君際聖天子龍飛之運從容來儀
視枳棘之栖奚翅千里較秦臺當復勝之而諸君子之作皆離離大雅鼓宮鼓
商靡不叶應卽嶧陽之桐音不是過也余乃艷羨之而以高岡雅詠名焉第余
乃以春蚓秋蛩之鳴先之能不辭面因附諸君子質於劉君以爲然否

茅窠微聲引

明學正邑歲貢龍愚卿

按各字書無窠字當作窠音窠空也俗名叫與窠異辛觀濤校正

予爲兒時見羣稚輩戲逐相競選茅管之巨者截其兩端長僅五六寸許剝剝中實修其膚之完而空竅者以吹之屹然有聲鏗然悲壯仍宛轉抑揚高卑亮節與筮篥相似不能附響於樂府也及予頗知向方尋釋章句餘暇博採古韻三百篇無論已求其所謂漢魏晉宋之乘宗既又究盛唐中晚之法律穎悟未透識趣未真如羚羊掛角無跡可尋如靈龜出水無蹤可追於是研精乎志搜元剔遐而根極理要刻苦煅煉尙齊築瓊或因事寓物或感愴懷思凡一切發揚蹈厲諷誦比賦咸欲其體備文質情兼雅怨然而明暗異姿靜躁殊形賢愚有常類拙訥相倚薄以故格體卑俗氣調促迫竟未能脫越舒徐卒廻翳類蒙昧短忌膠固雖學步藻林苦覺邯鄲之刺謬效鸞藝圃徒窺西子之精神大都興象泯迹風骨詮落嫩惡弗暫勸懲曷由而昭耶是以未敢擬古作者姑自爲一家言牒帙成叶揮毫積韻殆猶茅竅之聲弄戲於火小已爾因櫜括取譬以茅竅微聲名篇豈曰詩云乎哉嗟夫俯仰物情流連景擢頻觀法於大雅未半

萬載縣志

文徵

引

百一十

解於小乘登高日昇行遠厭邇信乎作者之難也予不才攻玉於山石速戾於鼠璞不愧謏陋狂僭益甚庶幾大雅君子萬一矜吾志焉可也是爲引

零丁引

邑廩生辛金澄

族人聯珍字惟上幹練才也康熙甲寅長沙告變大兵屯劄於萬勦平後誤據聯珍去其子受實才十歲至孝性成日夜涕泣欲往求之以祖父母老諸弟穉不果越五年弟漸長遂決計北行噫可哀也已以其年幼聲儉途中難於問訊爰倣東漢戴良零丁體書以投之庶有憐其志而指示踪跡者乎揭零丁訴零丁可憐失怙苦零丁願君子眼垂青指示前途識已經僕本萬載人住居東隅族縉紳生逢聖代無戰征父子相依甘食貧詎意康熙歲甲寅長沙變起烽火驚大軍駐萬旂幟明夜半喇叭鼓角鳴鼓角鳴樓槍平唱凱歸師好光榮牛酒飽喫意氣盈擄得民父給樵薪可憐上有龍鍾鶴髮之雙親下有九歲七歲四歲三歲之孤嬰實也較長纔十齡八口供養我何能慟哭山阿劇黃精饑腸雷

轉合家呻生死茫茫斷信音地角天涯何處尋諸君子請細聽民父名聯珍品
藏七尺眼如星兩眉直豎若劍橫雙顴隆起侵入鬢黃金臉兒國字形暗鳴叱
咤聲雷霆嗜哩鄉語辨易真藍布短衫足裹膝多片擔子千行去時三十一
數零鳥飛兔走今五春諸君子指迷津或在山高或水深倘然迎得返柴荆鑄
金事之天鑒誠

縣試公字樂助簿引 代邑令來

清辛卯辰

故事鄉會試有號舍學使者按臨所部有考棚用以壹思慮便勾稽也郡縣試
之於學使者試持始事也其得失宜若無所厚繫然而始進之階其由郡縣試
尤多裁擇之不悞則有能者不得與使者亦無所據而知苟防閑不密或居處
不如法不獲專意文事以盡一日之長即裁擇無由當則試舍蓋其重也余策
仕禹載歲丙辰丁巳兩奉文縣試縣童生來者千三百而未止扇署門試之堂
廡不能容多露坐階下甬道中雨至無所避則散坐儀門及內署各軒下勾稽

萬載縣志

文徵

引

百十

固難焉而所爲試席坐具官不能辦必待其人之自備計縣之爲邑百有四每
考符一下鄉居者競走數十里入縣假具戚友家無則謀諸寓肆往往先期輒
爲人移去稍遲又無地可度唱名既入而索且爭者聲相聞也或臨事乃將則
懷餅囊筆力既不任而又格不得行及卷已納獨力不能持必待其曹四鼓既
瘁矣三兩人肩捧肘挾而出署門固餘地無多諸童僕偵迎者復擾塞其間力
盡氣竭物相曼擊有聲而敗闕不可得償者比比也其每覆而入而出也復然
直天苦雨水泅泅著背項間鞋襪踏泥滓猶相與力排負而前蓋不獨鄉之人
苦之城之人無弗苦之余每見未嘗不勞苦之也諸應試者聞余勞苦爭羅拜
而前曰是無試舍使然也縣之人病此久矣願有以易之公立試所繕以重垣
列以廊廡爲厚板使凭與坐承以巨石使無動移如是則一勞永逸大功德無
量已而諸父兄送試者復以請徧詢之士紳亦胥言便而余猶難之蓋官地燧
費無出官文書亦未易了也眾曰不然請無用官地並不費官帑卽無勞官文

書而事可集蓋先是縣守備既裁其廨地奉文變鬻縣人釀金公購之將事此者有年矣去署地不數十武一發卽至也其費則城鄉間有子弟與試者胥能任之誠一倡鼓掌應者當百倍余曰果若是是其可行於是共擇尤公正者若干人司事繕輸册以聞於余余乃戒之曰諸能輸者多寡唯其意不能者止而不欲勿強言未旣而踴躍願輸者趾相錯也雖然益慎之財入出必謹毋侈毋苟以謀終久是在首事者益天下事意雖美患眾之不從助雖多患己之不官以余所見州縣著稱者省會有試館都門有會館鄉會試道路之有田苟眾樂從而善厥事豈惟縣試之字哉其由是有餘力焉卽一切可次第舉也勉之而已眾以爲然請識其緣起遂書此爲引惜

牛堂引

辛炳晨

夫私宰之有禁也本諸無故不殺之文此亦道與教合之一事也有心者更引以業報之指刷印徧布說法益明且切敬信宜滿天下而近在一縣尙有不及

萬載縣志

文徵

引

百十一

變者惟其依託於禮與法所得行賸者因緣竊以爲姦利而久且成俗此吾黨惜牛堂之所由起也先是學中丁祭春秋例購大牢必與販鬻者謀之祀禮成而歸胙於王者暨所事一切輒使殺牲者坐而割肉於庠門屠沽者見而心利之每先期暗勾致竊匪窩戶牽牲入城曰此祀牲也屆期則明目張膽列肆懸權而鬻之曰此祭肉也旣而武廟之祭有三文昌廟之祭有二亦復然於是一咸中學前之屠牛無算矣而諸鄉中村市墟場各有赴集及演劇賽神之期皆公爲宰剝遍設湯鍋不得問所從來蓋雖有委以彈壓者積習相沿非徒視爲固然亦氣餒而利奪弗能禁也嗟乎物力之不惜而耕本日以艱耗生計之難保而盜風莫可蹤詰無罪而就死地曾莫閱焉蔑法敗禮更無待言此政澤之所無由徧及守土者之所未遑一一整飭也有人心風俗之責者忍坐視晏然無以振救之乎吾黨諸同志乃相與謀於是丁祭之牛則學中首事領其值於官而代具之諸同人又釀金購產爲惜牛會每武廟及文昌廟之牛則以會中

是以則天以化民屈己以濟物使夫子志在於爲君則當假道百里因基一成受祿以有民逆取而順守然後革命創物錫土苴茅布子姓於九州班正朔於四裔因王法以行禮假號令以濟人然而不屑意者以爲堯湯既遠武有慙德樂則有司失其傳禮則益孫病其儀風俗崩弛皇綱解散是以周流天下皇皇列國一車一豎訪葺宏而觀周廟四科十哲昭日月而播微言假陪臣以尊周公修春秋而正王室匡輔元精陶冶情性因國風而正樂順人情以定禮萬物既治我無位焉此則夫子所受老子之元言老子所以釋負而去之義也至夫載誓諸境濡足當時止璿璣而救季孫斬侏儒而存魯國故令君臣懸解井樹不刊而地靡立錐權輕飛羽喻醯雞於道室警喪狗於東門野罽弗糝門徒菜色坐席不暖炊突不黔其利物也甚豐其爲己也甚約是以宰我有言夫子賢於堯舜遠矣豈不謂然乎夫近道者道亦近之遠道者道亦遠之是以七國冰解羸秦灰滅所以夫子欲見於衛姬諸生發憤於陳涉有由然矣漢高甚武

萬載縣志

文徵

記

百十四

心涵帝度爲舊君而袒哭望東魯而輟攻受天明命將半周室其遺言餘祀也則自闕里而徧寰區出壁中而寶東序蓋帝王之崛起大數之中興焉夫子非求祀於人而人皆祀之非術售於人而人爭售之自非大庇生民其孰能至於此聖歷中否羣雄大馳衣冠禮樂不絕如綫聖皇紹祚文思累洽掃太學之煨燼編羽陵之蠹簡濟濟焉煌煌焉民德歸厚矣猶慮隈隅未潤蓬艾未光慎彼觀風敬茲有土保大王子歲以樞密院副使兼尙書吏部郎中李君以古有帷幄之效克定之謀俾守於表下車視事解甲息真廵省農功周行廬室以爲導化有本振葉由枝而孔廟頽替誦堂飄雨顧禮器而輒愆振儒衣而溲法於是攷圖牒徵碑版蓋天寶中大守房公瑄始立廟於州城北門之外五十步乾元中太守鄭公審始移之會昌中又遷於州東大中七復於房公之卜不常厥所於今四遷乃永奠陔次大興力役糞牆俱墁非幸我之難朽壞屋可炊知顏生之不惑回廊月照接廡雲征洞戶靜深重簷掩靄徵兩楹而正坐儼四科而列

侍如嘗不寢似欲無言楯以美材粹以藻泳靈衣兮披披華蕊兮襲襲黍稷令
芳籩豆普淖解危冠於季路見繪事於卜商足以目擊而道存不言而心喻矣
昔魯恭壞宅於舊國廬陵伐木於孔門金石為鳴父老歎息然則夫子之道得
其人而後行文翁之風感於心而自化是以袁江之上袁山之阿朝為崆峒夕
成洙泗用此道也若夫敷孔業而無祠宇是猶棄筌蹄而待兔叩寂寞而求音
益趨翔而無至心是猶衣猿狙為周公假詩禮而發冢也是以李君炳靈州之
錫鍾陵之秀行出鄉里名聞京師題橋以收途懷綬而返國昔之去國而衣
錦者蘇秦無守土之實終軍無表里之名君之兼總其稽古之謂故分符之際
勅改君筠州萬載縣所居高侯鄉高城甲曰懷舊鄉孕秀里君又以私財百萬
代其鄉輸稅增里閭之氣為儒者之華功成不居無待刊紀而庠序之作所以
聳善懲惡託於叙述吾師也故為之記至其遏寇虐浚溝隍則有底績之司書
勲之府焉唐保大癸丑歲正月二十日廟成之日也

萬載縣志

文徵

記

百十五

重修縣治記

宋邑令徐昇

萬載本高安故地初置場隸於洪僞吳順義元年也後為縣隸於筠則南唐保
大十年也皇朝下江南遂割屬袁州則開寶八年也宣和初改曰建成而復舊
名則紹興元年詔也筠袁俗險而健訟有珥筆之號茲邑雖例蒙惡聲然民淳
訟簡風俗特異其產才代不乏人義烈慷慨則有若藺相如風穎秀邁則有若
呵康樂謀畧佐主若宋青陽雄健投兵若鍾南平皆世居其土遺址可存遺風
可想焉舊治地勢隱然負山帶江民安物阜逾二百禩建炎三年十一月金人
陷豫章叛將杜產率羣盜乘亂焚劫明年正月敵騎長驅蹂躪自是井邑化為
墟墟繼而劇賊曹成馬友輩支黨蚊聚大者數萬小者數千據我郭郭血肉我
生靈狼殘虎噬歲無虛日而邑境殆無噍類矣紹興二年冬昇被命謬職宰宇
于時潰寇劉忠張成各擁眾蟠踞山谷克蝕蜂勃也縣官日與編民駢肩穴處
以避難無復辨高下胥吏與案牘竄遁類脫兔首鼠無復供衙諾士庶捐老弱

棄墳墓而散徙無復安土計予視縣治故所則林樾蔚然因嘆息曰昔衛有狄難渡河野處狼狽失措文公營楚邱建城市立官府民始有所歸而國由以興且縣治者所以臨眾庶施政令之地主德宣焉邦賦理焉民訟聽焉今圯廢若此何以安集夫民社哉乃乞師以靖凶殘而扶瘵瘠察招徠流亡比年賊退民漸有生意遂以八月丙戌剪榛莽斥瓦礫鳩工度材庶役並舉己亥建柱架梁辛亥遷入視事且督促焉九月丁卯落成於是宴寢之堂聽訟之廳吏之獄寺完庫倉廩庖厨賓廡各有攸序而崇卑廣狹率視故址者仍舊典也木片瓦悉取壞宇棄材而罔由科斂規模簡儉麓庇風雨而不務壯麗者惜民力也方凋殘而興土木人不以為病纔四旬而訖工人不以為亟者民人離散失所依而喜其有官府也嗟乎自藝祖有天下百有六十餘年間承平日久人不識兵革燕安鳩毒恬不為慮豈知一旦變亂窮僻如是邑亦蕩析靡遺今既修復矣邑人自兵禍以來得脫萬死以復見此邑之成者亦寧有幾然則後之生於斯

萬載縣志

文徵

記

百十六

含哺鼓腹於斯者豈得不念此哉故昇雖及瓜將代不可不書其廢興之歲月俾後人有考焉紹興五年立冬日

祝令新學記

宋博士新喻進士楊愿

衰自唐昌黎韓文公為州文風被於屬邑至今不泯萬載介羣山間風土淳厚士好學而民畏法得一材令則治道易易爾惟皇宋慶厯間制詔州縣立學縣始建夫子廟距縣治東二百步許歷時滋久棟宇腐撓至不庇風雨崇寧以舍法造士乃立學於通濟橋之東南廢廟基為官舍俾監市徵居之乾道一酉適有異議者自橋東南遷之古寺而士托足焉學區至是三徙矣神無以妥靈士無所肄業邑之秀民賴學以成就者蓋少淳熙四年三衢祝侯勛實宰茲邑入學釋菜已事而嘆曰浮屠之法吾儒所闢今寓其舍可乎闕市之徵孟子以為暴今奪教養之地而居之於女安乎蓋亦返其本於我心無戚也焉耳會知丞趙侯師俠主簿江侯琪克協厥議爰相善廟而改作更徙監徵舍於他所是乃

尊吾道激士氣而順人心也於是邑之賢父兄喜子弟之有教也不愛其力爭輸財以供費錢以緡計者二千傭以日計者萬餘經始於四月辛卯迄役於七月丁亥奠享有宮講勸有位退習有齋庖厨滌浴庫廩罔不嚴潔且屈致鄉先生之有齒德者以爲師資自是執經而至者源源不絕然後祝侯知邑民之可與爲善而樂其政之成也以書抵愿求文爲記愿竊觀今之爲縣者日力不暇給嘗懼財賦之不登獄訟之不平吏功之不應程而已至學校事則曰不而不知仰惟主上厲精爲治綜覈名實至於教育人材未嘗不留聖意歲丁酉親近上庠寵光多士又明年臨幸秘書編閱四庫皆所以風厲學宮藻飾太平之巨觀今祝侯能上體德意一新廟學可謂賢令尹矣昔晉范甯爲餘杭令興學校之教士皆宗之史官謂中興以來未有如甯者唐郡邑至廣不聞復有范甯者出獨衡山得一陸宰而杜子美作爲詩章謂其首倡恢大義則茲事寥濶不常見自晉唐以來可知矣愿老於壽罔之麓來歲槐黃之秋聞袁之士充賦有

萬載縣志

文徵

記

百十七

司者萬載爲多異時峩冠振纓策名委贄爲天子公卿大夫百執事之選者皆自今日教養之效而祝侯亦將去此而羽儀臺省益茂尊主庇民之業又孰敢議其歸宿也哉姑承命而爲之記六年己亥中秋日

惠民藥局記

宋直龍圖閣宜春進士張嗣古

鄱陽吳予似丞萬載且三年以書抵予曰丞於是邑政無細大皆得與聞庸詎可以負爲言韓文公謂偪嫌不可否事者益有激云爾走雖不才切有志焉惟是卒卒將受代而奔走臺府無虛月在邑之日無幾顧何以自見獨嘗念邑在萬山中民有疾疢無所求藥束手聽命於天往往不得永年乃捐所得添給等錢通若干緡請諸常平司願循環運惠民局藥以售諸邑使者著作郎章公良肱許焉又請諸常平司願屬諸邑大夫提督月附帳一申以貽悠久使者郎中袁公燮又許焉自是邑人無遠近皆得善藥庶幾持此以謝邑人願公記之余發書躍然復之曰仁人心也民吾同胞物吾與也蓋無乎不在也推是心以往

則隨用皆足以及物仁不可勝用矣心不在焉楚越肝膽但見人自人已自己
尚何望其誠求赤子哉學士大夫志乎仁者也而高者或洪濶於簿書之間卑
者率化俛於風埃之下視斯民痾癢疾痛苦舉無預於吾身者此無他心有不
存焉耳予似不鄙夷其官匪身之謀而倦倦乎斯民唯疾之憂是蓋心之所發
見而非勉強爲之者誠能擴而克之細而理一州大而醫一國必將循標察本
爬剔弊蠹培護根源以致其惻隱怵惕之心所謂暴征苛歛以剝民之膏膚者
必不爲也所謂嚴刑峻法以殞民之軀命者必無有也則其愛民利物之功豈
但創一葯局而已哉請以是爲記乎予似曰可乃書以遺之

萬載縣尉衙清心堂記

宋江西提刑慈谿進士黃震

萬載縣尉婁君撫人也余來守撫君已官萬載未有半面雅而書郵絡繹過於
平生歡豈臭味之同以余爲可語者與予既叨恩司臬將行君又貽書謂尉解
久摧前尉皆莫之居今始葺之一新扁其堂曰清心願爲記余於是益有以覘

萬載縣志

文徵

記

百十八

君之所存凡前此之書郵絡繹非世俗翕七熱矣然六經無清心之說謂心當
養之以清其說方自荀卿始其後荀勉謂省事不如清心宋璟謂清心則庶務
可簡是皆惡天下事繁多欲澄其源之所自出直指政本而言之尉居百僚底
自朝廷諸司皆州縣凡事無不於是乎委事之繁簡夫豈由我而欲清心以省
之乎余初筮亦尉吳門事之以非理而來者紛乎如麻余雖不能清心以省之
亦嘗清心以應之上惟知有皇天下惟知有百姓惟勢惟貨惟來一此所知此
心既清事亦徐就條理由是知清心以省事者制命於上者也清心以應事者
承命於下者也尉最卑官法當如是不知余之心亦有合於君之心否姑書所
身試者以遺之君名南良戊辰進士云咸淳九年癸酉二月十五日

按此記見黃氏日抄其結銜稱新除江西提刑而通志秩官僅載其知撫州
錄之以備續志之補

二先生祠記 宋紹興元年建學宮側

宋丞相浦城真德秀

天地能自立乎曰微聖賢則天地之經不正烏乎立生民能自安乎曰微聖賢則生民之極不建烏乎安天之生聖賢也其意固有在也昔爲老氏之學者曰天有柱地有維若皆依形而立者吁天地果以形而立其不以形而壞乎夫人性之有五常人道之有五品此卽所謂天之柱地之維而有生之類所恃以爲安者也一柱傾則整一維弛則墮古昔聖賢所爲更相扶植而不敢後者以是爲耳堯舜至於周公扶植之功見於事孔子至於孟子扶植之功見於言之其事若或不同然春秋成而亂賊之禍熄楊墨距而禽獸之道消其功於天地生民則一而已矣嗚呼此聖賢之統紀所以不可不續與自孟子沒而聖學失傳漢儒若董仲舒氏揚雄氏皆能以道自鳴而性命之源則有所未究然賴其言而世之學者猶知尊道義尙名教天理民彝未盡泯絕則亦不可謂非其力也鄉使佛老莊墨之徒獨行乎中國其不胥爲彘者幾希故嘗謂堯舜周孔之開皇極創造之勛也漢世諸儒則區區特守而已自漢至唐而有韓子自唐

萬載縣志

文徵

記

百十九

至本朝而有周子其斯道之中興乎蓋昔者聖人言道必及器言器必及道盡性至命而非虛也灑掃應對而非末也自清淨寂滅之教行乃始以日用爲糝糠天倫爲疣贅韓子憂之於是原道諸篇相繼而作其語道德也必本於仁義而其牙不離父子君臣之間其法不過禮樂刑政之際飲食裘葛卽正理所存斗斛權衡亦至教所寓道之大用燦然復明者韓子之功也自湯誥論降衷詩六賦物則人知性之出於天而未知其爲善也繼善成性發於繫易也無不善迹於七篇人知性之善而未知所以善也周子因羣聖之已言而推其所未言者於圖發無極二五之妙於書闡誠源誠立之旨昔也太極自爲太極今知吾身有太極矣昔也乾元自爲乾元今知吾身是乾元矣有一性則有五常有五常則有百善循源而流不假人力道之全體煥然益明者周子之功也二子之學雖所造不同而其扶持天常植立人極要皆有功於百世者紹定元年長樂朱侯令袁之萬載謂昌黎公在唐實自潮移守袁而濂溪先生亦嘗攝萍鄉縣

之瀘溪鎮遺風餘韻在人未泯廼卽學宮講堂之東爲堂三楹繪其像以祠書
來曰願有識某惟韓子之於是邪雖善政良法有以及人而世之相去蓋已甚
遠若周子則暫莅焉治教所施有不得而聞者然則侯之祠之也果何爲耶意
者天經地義之所存一或失政則民有不得其生者二子之道施之是邪者有
限而播之天下者無窮此其祠之之指也學於斯者盡味其言而思其人屹乎
若泰山北斗之瞻粹乎若光風霽月之挹知道之大用常流行乎天下而其全
體具於吾心則知所以用力之地矣蓋韓子言其用而體未嘗不存思子言其
體而用亦不外是也察體用之一源合知行於一致學者其思所以用其力哉
若夫惟筆舌談說是工而亡反躬踐履之實甚者以惑世費利焉是則二君子
之罪人也

尙古堂記

元翰林學士崇仁吳澄

人之所尙有萬不同尙名者進取百途以蘄於升尙利者計度百端以蘄於豐

萬載縣志

文徵

記

百二十一

其他小術末伎足以溺心蕩志者皆能使人尙之終身而不厭嵇康之達也而
鍛劉毅之雄也而博則其下者又奚足怪夫其所尙之不同由其識之不同也
識之卑者所尙亦卑萬載黃元瑜循循謹厚處家處鄉未嘗矯激以求異於人
而其尙自有與人不同者若名利若小術若末伎凡世人所好一切不知尙作
堂於所居之偏聚羣書及法帖名畫克物其中而匾其堂曰尙古予聞而嘉嘆
焉蓋人之所尙者今而元瑜之所尙者古彼尙今者喜其快已喜其俗而笑
尙古者之淡且迂夫孰知淡中之至味迂中之至樂哉孟子言讀其書誦其詩
論其世以尙友古之人斯堂之名於孟子之言有合也其識不亦高乎元瑜之
所尙固已高於人而予又爲之次其品法帖名畫古矣而未爲古也古者莫如
書畫之有集有子有史古矣而未甚古也甚古者莫如經春秋古魯史非司馬
遷班固以來之紀也儀禮古周制非叔孫通曹褒以來之儀也風雅頌古樂歌
非蘇李張平子以來之五七言也書經爲上古之書易經爲三古之易古莫古

於此孰有出其上者黃氏之子若弟沈浸乎是含明乎是因古經之辭學古人之道得古人心則居今之世而與今之人異此尚古以淑其子弟之效也其與尚今以誤其子弟俾日趨而日下者相去之遠奚啻九地之視九天也哉元瑜名璧為權茶都轉運司屬官在江州為予言其作堂之意而予筆之以為記云 采吳草廬補

大本堂記

元奎章閣學士崇仁虞集

萬載黃忠字子中早嘗從臨川吳公游往來者數年歸而題其讀書之舍曰大本堂其後得婿其門有卒業之意而公去世已五年矣公之遺書緒言經手定者皆可考信而其門人子孫嘗所親聞者又可問而辨之以自致其學願來求予為之記而不知予之不足以知此也噫使及公之存因斯堂也得一言以惠幸後學豈不善哉嗟何及矣而使予執筆焉其何以言之哉昔者朱子受學於延平先生嘗以其從豫章得之者而語之曰但於靜中看喜怒哀樂

萬載縣志

文徵

記

百二

未發時氣象為何如竊嘗由見思之所謂未發者豈非吾不睹不聞之時乎所謂靜者豈非戒慎恐懼之至無所倚著之時乎若夫氣象之說亦云危坐澄心而天理自見云耳非必有模擬想像者也其師友問答之言傳諸學者宜無可疑者嗟乎人之受命於天與血氣俱稟而生其為性本靜也知識生而情欲作接於物而動者紛至疊起互為感應反覆相因於無窮雖夢寐休佚之頃其懂懂者未嘗小止而定也是以一往而不復倒行逆施謬迷顛沛以終其身而莫知反其本源者多矣彼為佛老亦或知此以為憂乃為絕物壁立以自勝或為專壹內守以自固其堅苦百倍則有之雖或稊稗之有秋然欲其立人極以贊化育則與聖賢之學為大不侔矣今夫天道之行也必有斂肅以啟發生之機人之為學何可無所涵養以為動而泛應之地乎苟自始及終無一息之靜則隱微之間動機之發亦何以察其辨而致其力况於風靡瀾倒潰冒衝突而後從而制之將何及乎吾是以深感夫延平之言而竊以為大本之立庶由乎是

而區區言語文字之求宜未有切於此者矣若夫其後朱子之門人或傳其師說以爲考諸聖賢之言進修之實尙有可言者則在後學又有以究極之吾聞子中之居是堂也以高潔自克好靜坐故以所聞告之以爲之記采學古錄補三新宣聖廟記

虞集

萬載縣尹懷孟馮士毅縣學教諭匡廬曹邦來告於集曰學校之繫於教化大矣風紀之司以爲職任部使者巡行郡縣下車卽理廟學以爲先務而七教等備員於此謹廟祀繕學舍以待教令不敢緩也茲邑之學始作故宋和中屢遷不常季年始定於水西內附國朝因舊無改越五十餘年至治辛酉之歲僉憲薩德彌失至縣以其規模敝陋弗稱而學計不足以給用用父老言命縣尹河南張輔延見邑人江州權茶大使黃璧咨以修學之事璧承命以爲已任禮殿小不足以容祭器樂懸之設進退拜立之位爲四楹之屋於殿南深丈有八尺廣與殿等以兩廡之迫於左右也移而廣之丈有五尺徙其門而南之凡三丈

萬載縣志

文徵

記

百二二

有三尺又移櫺星門於門之南三丈有五尺皆更作焉講堂齋舍官廳厨屋加葺焉事具郡人前進士夏鎮訊又十年爲至順辛未僉憲聶公延世至以先聖先師及從祀之像設弗嚴知薩公之用人也審又以咨之黃君受命如初不三月而像設之冕舄裳衣五采絺繡如章又八年爲仍改至元之四年今副憲完顏公至以殿棟橈前後簷之交承霽地壞仍薩公聶公之意咨請黃君受命亦如之明年陶鬻材木具作虛屋架其上以通水飾以文瓦建以鷓尾而殿益高以固完矣凡三役三使者一以屬黃君不資於眾人不煩於官府材木之楹工役之備一出於私帑故無所會是以臬司公府標以善士之目焉敢請記之蓋聞之舉直錯諸枉則民服舉枉錯諸直則民不服施諸天下郡國其道一也又曰魯無君子者斯焉取斯昔人以爲稱人之善必本於父兄也司民風者將有爲焉豈乏材用之供哉而審人以托之不以煩煩一事爲嫌者誠有教行乎其間也取諸父子昆弟之無間言者所以興孝弟也取諸謹愿無干於官府者所

以敦鄙薄也取諸敏事而不乏者所以懲驕吝也鄉黨州閭之眾庶見而感焉則鄙薄驕吝之風消善良之類盛孝弟之道興而使者之教行矣尚何憂學校之不修乎乃若嚴經傳之誦說以爲學則尚廉恥敦厚以閑士習出其俊秀而表之勗其所未至簡其所未率則有司之教猶有可爲者焉縣令學官勉之

重修張巖書院記

虞集

袁州萬載縣獲富里有故臨江儒學教授張君千崖世居之嘗得山水泉石之勝於其南作亭榭園池廣袤數里青山趙君文記之言其奇偉華嚴於京洛吳越傳聞者如見繪畫所謂張巖書院在山之麓有禮殿以祠先聖殿有門廡有祠以奉周程張邵司馬六君子有樓以藏聖賢之書有堂以尊師而講學有廄齋以居其學者有庖廩器具以給凡用此又趙君歎其誦詩讀書之美而擬諸廬阜衡嶽之有所自也千崖君歿子孫出仕京師弗遠於茲者且四十年萍鄉榮君南祥娶張氏則千崖君之子之女子也有子岳孫既長而有立稟於其

萬載縣志

文徵

記

百二二

親而請諸舅氏疇願因書院之舊而加葺之以延師取友率其族人鄉黨子弟而就學於斯也舅氏曰是吾意也岳孫乃以元統乙亥之春鳩工庀材致其繕治易朽以堅飾黯以華割腴田以具食其舅氏又資之以樵蘇之山藝蔬之圃不數月而成且備矣十有二月岳孫與巖學之士傅君任來求文以記之夫南山張氏之亭館甚多而岳孫獨先事於書院觀其志之所存可謂知本者矣宜春在江右之上游其風土淳厚其人易與爲善西瞻衡嶽則嶽麓書院在焉東望廬阜則白鹿洞在焉此皆賢之所經營皆依乎名山大川者也今巖學得山水之秀故可托以久長者乎今天下好事者築室買田以資講習然一列於學官則行有司之事而絃誦籩豆殆爲文具者多矣獨巖學遠於城闕之喧囂邈乎公府之拘制饋餉時至無乏絕之慮人跡在邇無岑寂之苦息焉遊焉無所事乎其外及其閒暇可以登高眺遠而發揮其詠歌環千里而觀之爲學之善地未有過之者矣雖然樂順適則志易墮之磨勵則德每孤前輩寥落師友道

廢遺言之微孰究孰擴趨時尙者竊緒餘以釣利祿務高虛者假近似以立名聲疏鹵自欺之風有不可勝言者宜春文物之邦深山茂林豈無古學之士經明行修足爲師表者張巖之人其力致之也乎苟賢者之未易致也則嶽麓白鹿洞晦菴朱子南軒張子之成規緒論在焉宜取而表之相與尊信而從事焉可也尊信則不搖於異議從事則馴致於成功他日衣冠之盛彬彬然自巖學而出則張氏榮氏之名顯著於天下豈直山水光華而已哉

錦江橋記

元學士瀏陽歐陽元

錦江橋者建成敖君玉溪嘗爲新昌通守自之官至受代往來必經是橋偶見其敝以已貲修之鄉人慕其成功相與名其橋曰錦江以志其還鄉之榮焉歲久復敝予伯川又新之書揭記余惟大夫士得意當時歸榮故鄉其志不以宿昔恩讐爲先而能思以一己之惠爲方來無窮之恩若玉溪之於斯橋其識豈不高且遠哉曰錦云者雖山於鄉人愛敖君之辭亦必敖君有以得鄉人之愛

萬載志

文

記

百二十四

而後然也伯川不墜先人令名重葺斯績以永鄉人之美意豈非孝乎在禮祭則設先人之裳衣以其嘗服被也是錦也者玉溪昔者服斯榮於其鄉伯川葺之不盛於當祭之設乎江發源錦山道良溪至橋三十里橋爲墩一爲隄岸二爲屋十有六楹中三間爲樓初修以延祐之六年今修以至正之七年伯川才器通敏今爲岱山場鹽司克廣先志不獨斯橋爲然上而長安昌溪藍田平田高原下而平山龍江晉安雲峯百餘里間凡建十餘橋行道皆登以石

謙樓門廡記

明邑主簿黃自中

萬載縣新作謙樓門廡旣畢知縣趙君中謂其主簿黃自中曰斯役也縣丞馮君原禮實力其事具有牒縣辭盡徵書之以記歲月用示方來謹按其牘曰立網陳紀守職奉公理廢復新宜在規措叨承簡命共撫茲邑欽奉律令公廨官舍修理勿違敬遵罔怠斯縣兵燹之後雖已建立廳事修葺未備爰有北門城樓暨空閑倉宇俱係劉氏敬與姪明德屯據時所建軍民墮毀將成廢物遂理

喻其居守者戒市民拆通其木瓦柱石勸率各都里長供給工食仍添助蓋瓦兼自捐已俸贖布帛犒人匠廼相物料量度長短起造費覆以旃蒙大荒落之歲季冬丙寅作儀門兩廡吏舍明年仲春己未暨譙樓築廳前露臺甬道立戒石亭未始差斂稅民擾害鄉疇也原夫開設之初銓注令丞簿尉典史到任因見官治草創弗稱觀瞻僉議各出利便方策重建一新於是相時成事允屬通敏長材者焉然則締構經營非馮丞固莫爲功而協謀於前思繼於後非同寅之心則亦將曷賴焉乃余復何幸執筆從事以與有榮於其間獨世典史韓昱濂先物故弗克共落成耳乃相與備述其語勒諸石以詒後之人又明年秋杪朔記

南浦橋記

謝詢

縣之南爲適郡通道行不一里有溪流自西南來縈帶其前使命往來邑大夫送迎必涉焉故昔之爲政者礱石爲橋架木爲椽爲屋以便行者橋之有亭舊

南浦縣志

文獻記

百二五

也壬辰以來燬於兵燹十五年間無有舉而復之者今朝廷清明邑大夫幕審皆時英傑庶務集而百廢興橋之復舊蓋有其時也邑人文泰卿者精於醫賴以生活者眾悉以其報德之貲獨力爲之屋凡九間若柱若梁若椽若楹且而壯樸而不華內則因柱爲扶欄外則通爲版壁以障風雨簷棟黜聖規模一新活人而得之濟人而用之皆出於中心之誠而非尙浮屠因果之說徼福於冥冥之中也主簿黃君以正書南浦二字以標其額東魯謝詢簿官之迹老於江南會而別別而會不知凡幾南浦固通於道塗者也登斯橋也覽山川之奇勝懷政鄉而不可到仰其命名之義思文通作賦之意烏不爲之悵然也哉因述以爲記 按壬辰兵燹正元末紅巾據萬年也橋蓋洪武時修以正卽自中字郭志秩官誤以自中爲另一人更列以正名爲成化末年任

賈令建學記

明進士湯 熒

皇帝卽位之初年詔郡縣議學校養育人材以輔翼國家承天休命越甲寅八

載之間政教大興郡縣吏處恭厥職咸能出棟宇於塗炭之餘榘彛倫於廢弛之後炳如也萬載知縣淮安賈侯志通下車以學校爲務嘗與士夫履觀故址某爲正殿某爲明倫堂某爲齋舍某爲厨庫某爲二先生祠某爲魁星堂雖平日案牘山積若無火暇及此者而規模之廣狹位次之伸縮工力之多寡費值之欠餘皆素定於胸中矣一日咨於丞孔思道暨諸同寅咸相其志遂委財命工備物底績黝堊丹漆各中矩度巍然煥然其聖人在天之靈歟抑我侯經營之功同寅贊襄之至也嘗謂法度禁令可以集庶事不可以結人心至觀教化之效仁義恩澤又不出於法度禁令之外故民不期孝弟而孝弟自興不期忠信而忠信自立雖在其責者亦不自知其效之至此也且人材之出也固山川之氣所致其成也朝廷勉勵之功師友琢磨之力人材非聖化不能成王業非人材不能理詩曰於皇多士生此王國王國克生維周之禎此之謂也爲吏者以朝廷之心爲心新令尹又以舊令尹之心爲心庶人材治化相維無窮已

萬載縣志

文以

記

百二十六

陳令修學記

明學士南昌進士張元稹

萬邑廟學曠治已久廟制自禮殿門廡下迄庖庫牲殺之處學制自明倫堂齋舍外洎廡廡會食之所有廢焉而莫之舉有敝焉而莫之葺禮樂教化之地弗急於簿書期會固有司之常歛成化戊子海陽陳君崇文以偉才宏局來令是邑甫下車謁廟視學卽慨然興嗟曰令一邑師帥務孰先此於是經營注措持其無敢慢之心堅其必欲就之志甫一月廟櫺星門成旣一載學書舍成又數載禮殿廡東西戟門及明倫堂成又數載庖室牲房學齋東西門內外饌堂粟廩廨宇成其費也弗糜之官其役也弗徵之民或廢焉起之而加宏壯或敝焉葺之而加侈麗又從而固廡周垣端厥階陛廣厥塗街由是法制宜有煥然大備廟庭肅肅儼乎聖哲之臨堂室言言宜於講誦之樂儒風聿振士氣勃張陳君爲令可爲急當務者矣學司訓葉福桂梧咸嘉君績欲詔之無窮乃諗於貳尹陳衡判簿王琇遣生員宋瑤鄒泰來南昌屬爲記夫廟學國家制自有定廢

以壞舉之有司職固然也而固有忽焉弗之急急之而必待其人是何異於學者理本固有成厥毀作厥隳非上之人有以致厥功弗可歟茲邑廟學固曠洽焉久今陳君乃毅然爲一新之諸士子來遊來歌觀茲盛美其亦反而有所興哉廟制焉久廢而備吾容有久廢而弗備者學制焉久頽而葺吾容有久頽而弗葺者因耳目之新日致所以自新而求無負於賢師帥異時出而登庸將有以推而大振天下之頽起天下之廢以補造化以福蒼生則陳君之功豈徒今茲右於廟學而已哉

重修浮橋記

明邑訓導廬陵儒士曾宜勉

萬載縣古渡曰龍江曰竹渡邑之要津也龍江距邑二里而遙竹渡則沂流西上一舍而近上通潭鄂下通筠陽南抵臨吉前元俱有橋以便濟涉壬辰兵變燬於火竹渡續修未久而復壞龍江五十餘年未有能繼之者每春洪水汪洋孤舟斷岸不無病涉之歎夫橋梁道路乃爲政之首往往官於斯匪困簿書期

萬載縣志

文徵記

百二十七

會則追賦稅逋微奚暇於此洪武壬午貴池舒若仲誠甫尹斯邑下車以來招流民恤孤獨闢土田均賦役二載之間晏如也顧尤亟於徒杠輿梁首修竹渡命僧文隱董其役及修龍江命耆民郭文煥督之始壬午冬訖癸未春眾先欲撤竹渡舊橋於龍江隨宜葺之稅大使鄭子謙請曰盍若更新庶耐悠久侯欣然從之主簿舒君永懷又力贊其成凡一毫之費一力之役不煩於民橋皆載舟於水面隨其濶狹或九其舟或十五其舟貫以長索板其梁欄其側而石其兩岸旁立庵舍擇民復其身守之規模堅緻足以久遠車馬往來晨昏馳驟若坦途焉橋之費也凡若干緡非眾施協力而侯爲之倡孰能成哉眾請書其事刻板於菴以告來者噫龍江竹渡之有橋也成於我侯便於爾民凡僣僕而提攜負載而奔頓行者歌休息者不憂厲揭之勞誰之力歟歷兵燹暨今寒暑代謝九若干載乃始成之又誰之力歟是宜記之以貽後世使繼此爲縣者皆能行政若我侯則龍江竹渡之不朽豈可以世數記哉

重建雙虹橋記

張元積

一橋梁之修於有司詎爲重以大者然古人占茲於政今人盛茲於舉古人曰小且理矧大輕且舉矧重今人曰庸有司急者勢否則利利急第撲滿於已遑民焉軫勢急第簿書期會之劬違民焉廛茲其故事則未而有司臧否焉攸繫亦弗小也萬載縣左有橋曰雙虹崩於元季國朝洪武永樂間圯而重修之至今成化乙未夏霖猝溢復衝廢涉者病焉縣尹海陽陳君璨惕然曰茲非吾責哉乃伐石斲材擇人程督仍故址梁而甃之樓七其間飾三滴叢之飛楹繫之風鈴修尺百廣尺十二崇尺二十復橋北立關王廟以鎮之龍江南海間病涉者免矣工肇於歲乙未八月訖於歲丙申五月陳二尹衡王判簿旃喻掌教消渠司訓福僉曰茲功弗官糜弗民騷匝十月歛焉於成侯誠良厥畫者微有以章之久曠能知厥功之自則相與植石橋左而亭之走生員辛密李升巧吾記吾謂茲今人盛厥舉古人占厥政者陳君善績在民殆弗勝書然茲亦證無小之

萬載縣志

文徵

記

百二八

俾就侃况茲橋袁民之勦則前此有司愧於民已多陳君此功又詎賢於今有司而已於戲先王之政舉自不忍心建橋以利涉亦不忍心一端也有司朝廷責之宜有大乎此者此猶不舉餘從可知使天下事上以下不忍心人人乎陳君茲一橋之能達詎王道焉弗備詎世道焉弗隆噫然而難矣

陳令修縣治記

明修撰承豐羅

倫

國家之待士也因其才而養之養吾民也士之仕也以其才易吾民之養非厲民以自養也是故飲食車服宮室使令易菲惡以甘美敝陋以壯麗野朴以輕便非過也宜也夫公宮之制內以位叙外繚周垣八則同署出則同門蓋欲使之廉貪相察勤怠相繩以立政體傳之無窮非獨以自養也夫何仕者不假官營私則安於敝陋此何道哉萬載礪帶袁鄉俗號易治解宇腐壤漫不可支海陽陳崇文吏斯土也於是八年矣知民之可使也乃圖新之南嚮爲公堂北爲退思之所前爲重門旁爲吏宇龍亭有庫居貨有藏戒石有亭徒役胥吏居息

有舍凡爲屋百餘間民見其成而不知其勞殆非才其然乎移之於理何有今夫四方司牧寵賂章行上之所爲民亦歸之剝膚椎髓公私罄然掃地壁立民不堪命不革其舊而新之殆甚於斯乎夫司牧而奪其有是盜之也吏之盜吾民也久矣安其養而盜之國之養士士之養於民其端固然哉易道以陽爲君子陰爲小人君子者養人而養於人小人者養於人以自養君子內而小外則泰小人內而君子外則否七者陰柔之極致也象曰否終則傾何可長也傾否爲泰易壞爲新天之道也風俗之成政化之行夫豈遠人哉書曰邇可遠在茲君尙圖之是役之興縣丞陳衡主簿王瑋獨相有績以生員彭用中陳鑑來告紀成乃文其成以詔來世成化十三年

譙樓記

明學士安福進士吳節

萬載袁屬邑在漢爲建威在吳爲陽樂在晉爲康樂五代爲萬載宋元因之山有金雞白塔紫蓋之名水有龍江錦江清泉之號巖之可傳者仙遊龍成也橋

萬載縣志

文徵

記

百二十九

之可題者雙虹南浦也名宦則有林景達冷應徵諸公以名績稱人物則有宋齊邱廖洪諸賢以文學著讀書有堂科貢有學仙釋有紀物產眾多誠大郡之勝地諸邑之奧區也成化初海陽陳公瓌奉命來宰是邑宅心以仁懷民以惠暮年而政通人和流逋四歸再暮而風移俗美稼穡以穰遂倡諸寮擗恒祿節用費首葺公廨以嚴出入次營學校以崇士風暇日登麗譙見其棟橈瓦墮風雨汚漫歎曰表望在此其凌替至斯乎迺謀諸父老百執咸曰唯命邑之富民聞之皆願分貲以助遂瀾曰培址鳩工輦土取材於山鑿石於阜建樓五間爲甌三滴叢以飛栢繫以風鈴繪以丹青甃以堅甃大書其額曰萬載縣又設鐘鼓柝簾刻漏於上以備嚴更擇人守之惟謹由是黎庶奔走來下邑者瞻望麗譙翬飛藻繪咸嘖嘖歎美以爲昔未曾有其遇事入公門者亦皆鞠躬引頰無敢差池此邑望所以尊隆而政治爲之一新也一日教諭喻濬率諸生登眺其上聚首言曰茲樓之成功用浩大宜有文以紀之乃遣秀士二人走書安成徵

爲記將鏤諸石予惟麗譙通邑之表四遠所觀望也况考景定時以修政務祇嚴更滴以警閭閻皆事之大者也昔在宋時張希顏知萍鄉殿直范延賞過焉夜宿邑邸聞更鼓分明知其必有美政歸以語大臣張詠詠然之薦名於朝遂登顯仕今陳公爲政清明愛民如子平徭薄賦市不易賈孜孜焉惟耕稼是勸比希顏之政勤勞過之矣且建麗譙以壯邑觀豈特更鼓分明已耶使節所經必有稱道而薦剡者遠大之望端有可期不但展百里之材也於是述其始之始用工之詳壽諸貞石以垂永久

黃令新學記

明大學士安福進士彭華

皇明混一天下自京畿以達於郡縣無不建學校以育人材故嘗時士無不教教無不用用之於家國天下又無不官此其所以時稱盛治而非漢唐宋之可及也矧萬載爲袁郡鉅邑而舊學在縣治之東窄隘弗稱凡文廟祭器堂廡號房悉因陋就簡前之有司鮮有究心於是者永興黃君珙由進士宰是邑下車

萬載縣志

文徵

記

百二十

之初拳拳以興舉學校爲念然不能以一旦遽成比三載政通人和百廢俱興乃慮學宮之窄隘則廣之以曠地憂文廟之傾頽則創之以新祠廟後建明倫堂堂後立奎文閣櫺星門舊以木也今則石以易之泮水池舊所無也今則鑿以浚之禮門義路昔所未闢也今始闢於兩齋之左右露臺躍臺昔所未築也今始築於文廟之前後以至神像之繪籩豆之新庖廩之設戟門之修丹墀之廣號房之造與夫鄉賢祠習射圃辟宇饌堂煥然一新皆出於侯之規畫也經始於丙午夏落成於丁未冬於是二尹黃君仲哲判簿徐君瓚掌教李君仁訓尊劉君顯等具其事令庠生鄒泰柳書請予記予惟學校乃王政之先務職守令者孰不知之然知而能爲者少爲而必成者尤少若黃君之用心可謂知而能爲爲而必成者矣然則斯邑之士宜以邑宰之心爲心務窮理修身於未用之先忠君愛民於效用之後上不負聖天子下不負所學則有光學校也已

城隍廟記

明邑教諭山陰舉人朱憲

古之有國家者必務利民利民者必祀神凡神之有功於民若山川社稷以及坊水庸門井之屬悉載祀典歲尊祀之而城隍之祀不經見三代而下萌於唐歷宋元而漸盛天啟我高廟皇帝綏靖寰宇卽太正祀典以爲高城深池鞏固疆域不戢者不敢睥睨以肆侮民賴以安厥功不在山川社稷下非門井之利一家坊水庸之利一鄉者倫不可不祀也故著於令甲曰廟而天下郡縣皆立之廟之高廣視郡邑聽事爲差職郡邑者將視篆必先謁廟誓神有事於山川社稷則載其主以配享焉夫聖人重神之旨所以崇其功抑欲司牧德與神合爲民利不爲民病也萬載舊有城隍廟在邑東北隅去邑治不一里歲久堂寢門廊俱傾圯予自宏治丙辰視學篆日其廢壞常致慨焉己未冬洛川張公道顯來令邑詔曰廟廢若此曷稱神棲更新之舉不可緩矣義宰辛潤字延仁聞而起曰此吾素志也遂出私帑若干緡市木石磚瓦覓工役作中堂五楹後寢三楹又作東西廡各五楹爲堂之翼作內外門各三楹爲堂之限月臺丹墀夷

萬載縣志

文徵

記

百三一

以磚堂寢門廊覆以瓦與夫龕坐几案之設黝堊金碧之文司曹馬侯靡一不具堅好礪密足垂悠久經始於庚申春三月十二日落成於辛酉春二月吉日道顯公奉神像中座每祇謁顧謂僚佐曰美哉廟之更新也贊不出於官役不及於民辛其克成吾志矣將記其事以貽後會以艱去乃請予記之而予以校文南都旋考績北上不果後八年戊辰延仁走書來徵文予與延仁交之久知之深義不容默况數年心諾不敢不踐竊惟人生世間有財不能施者爲吝能施而於無益者爲濫皆非義也夫人心易惑莫如淫祀相率崇奉之峻厥毀延侈厥臺觀雖傾囊倒篋而不恤由不知義耳城隍之神爲聖朝所重延仁仰尊朝典成邑侯之志不吝捐若干緡撤其廢而一新之誠可謂知義而尙焉者也其視惑於淫祀以其貲爲無益之施者不亦遠哉神用永歆監吏民之臧否而禍福之茲邑其享久安長治之福矣自是而後星移物換廟貌不能恒新不知任起廢之責亦有如延仁者乎故記之以俟

郭司理修學記

明尚書高安進士吳山

萬載學宮故隘陋弗稱制典成化間充拓之歲久就敝嘉靖乙丑春郡節鯤溟郭公臨視邑篆周覽悵然且啟聖祠宇遠隔而敬一亭奎文閣亦遺址僅存非所以遵時制樹風聲也乃屬經衛徐君大且丞貳王君詔市材鳩工聿興役事進學博潘君然王君繼相譚君楚董洽焉詔然等祇受厥成暨事惟謹首文廟次啟聖祠敬一亭又次奎文閣皆鼎新之又念名宦鄉賢缺祠非制則附於奎文之東西而儲用有庫蠲潔有厨藏修游息有號舍諸凡典籍禮樂之具井井咸備於是延經師開經幄日與諸青衿講明經理然未嘗以興作勞庶民也贖金所受錙銖不入私室凡榱桷棟梁版幹力役罔不取給焉蓋常情所必取爲已有者而悉捐用之此所以民不告勞而黌宇就飾也惟時士類欣已焉嚮風承德禮闈春榜宋君良佐先登之共諸文明之嘉會而感應之徵兆乎丕休哉郭君之芳烈不可磨也既而令尹胡君文光至喜前緒之有開而紹休者

萬載縣志

文徵

記

百二十二

之易於爲力也徵記於余余惟古有三不朽之說德其先也功與言固其緒餘焉天生孔子爲萬代道德宗王陶範諸賢無非身心性命天常人紀所繫故萬世允賴報祀至今不衰然曰吾無行不與二三子是以身教之也觀漢郭公東海間出也學孔其素志焉持節明刑得情勿喜孔之曾也摧抑權勢名達帝聰浩然之氣剛大莫禦孔之孟也艱娶者有助弛葬者有禁忌行者有飭無非道德齊禮之遺意則其出身加民又皆孔氏家法也茲而修飾黌宇教學爲先是蓋推其所得於孔氏者以淑諸人此其屬意斯文亦至矣哉二三子服儒衣冠誦法孔子苟於操履之間漫不加省一旦叨竊科第登陟崇牖將上負天子下負所學吾恐其過廟生愧而孔聖之靈亦戚戚然曰非吾徒矣是又郭公之憂也先達爲袁士謀者有曰文當如韓道當如張余亦曰操修作用當如郭也余不敏職列史館日以采錄名實爲事是殆不多見者故特爲記之亦俾爾有司爾多士知所興起以無負郭公惓惓之志焉

啟聖祠記

明邑舉人辛 磊

皇帝九年詔尊孔子至聖先師禮崇封先世啟聖公祠以特廟以先賢孔氏鯉曾氏點顏氏無繇孟孫氏激配徧及天下郡縣林侯聯峯令萬載勵政均輸百廢具興大懼廟隘於地弗舉化尼弗行無以稱合上意旨胥之得西塿廢祠可踵而易理也以聞巡撫三峯高公可其請乃白於僚屬龔君廷憲馮君應軫議以克合計圖百步有奇猶重憂之費越癸巳春董其事於廬君鼎僞工量命日募傭仍厥基新厥良材端厥廉階中爲享殿左爲各宦祠右爲鄉賢祠前列門三門各有扁垣墉聿新畢工於歲秋費弗官糜役弗民擾工弗時詘偉哉事既竣侯將報政尋拜戶曹屈行廬若以磊眎其盛而落其成屬爲記之竊惟聖人之道侔於天地古今知尊事之矣至崇其親以特廟釋奠漢唐宋所未有者實我國家尊師右道超古準今之盛典也夫惟天下吏倖有賢否故廟宇之建有舉有墜侯程工而廟登勢肅而品器飭夫程工而踴登則神位所由崇勢肅

萬載縣志

文徵

記

卷三十三

而品器飭則春秋編祭罔或曠侯無負於國哉然以名宦鄉賢附者何夫道萬世之公出治民退修己一而已矣仕不名宦民罔治處不鄉賢身罔修非聖人徒也從祀廟廡其誰曰不可侯取尤者附之祭畢次名宦又次鄉賢俾獻斯廟者指某宦言曰此先代名宦也吾觀風於後可自諉於斯人外哉士夫詔相者指某賢言曰此吾鄉先賢也吾講學於後可不預於斯人中哉出以道治處以道修無愧聖道卽無愧啟聖之心此吾侯善體上意曲成邑人之化者也若其崇廟貌以侈虛名而已固非國家制詔之意抑亦長吏者之羞禮曰以教道民必躬親之林侯有光是矣詩曰寢成孔安廬君亦有光於是哉

城南社倉記

明大理寺少卿邑進士宋良佐

昔人有言救荒無奇策然王制以國無九年之蓄爲不足無六年之蓄爲急無三年之蓄爲非國前漢志亦曰進業曰登再登曰平三登曰太平夫無蓄則不足且急而非其國有蓄則登且平而謂之太平蓋天時之荒歉無常備之不可

萬載縣志

第十四冊

地 250.91/42

14



文徵續

重置丁山橋公田記

明知州邑舉人辛敏道

萬載橋梁九十餘惟丁田橋去縣治東北數里許五鄉二十四都之民大半往來於斯橋輒於元至正乙亥則邑民龍駒所建也明萬曆丙子夏馮夷爲祟而此橋隨波臣去矣歷四十餘年無議復者至丁巳桐鄉姚侯令茲土以修舉爲己任見此橋爲市鎮通衢視爲拯溺救焚之不可已於是謀之邑眾能不羣於築舍之議遂捐俸蠲贖爲一邑倡以次鄉紳士民各協助焉敏道與其事鳩工庀材不强半菽一力於民間一歲而橋屹然鼎新爲一邑鉅觀然侯計慮深遠復置田二十畝歲儲租糧爲日後修葺費第田隔橋頗遠租屢爲豪強乾沒及韋侯莅任於民事尤切凡各處橋梁廢者興之缺者補之因計及此橋之田擇附橋者倍價易之則皆取贏於侯也而又歲給以牛種今其田離橋不數百步一有緩急其入易收而便於用蓋繼而殫作者之美矣先是橋之旁姚侯欲建

萬載縣志

文徵

記

百五五

一庵以爲橋碑亭會觀去未果敏道於天啟二年冬捐建康樂謝公祠而以侯配今金碧輝煌鐘鼓具備行者歌於斯游憩於斯春秋二祀列俎豆而尸祝之誰不仰姚侯之德語云善作者未必善成我韋侯題額流芳易田善後則經畫周密益垂不朽後之尸祝我侯者豈異尸祝姚侯哉是爲記

學田記

明憲副萍鄉進士簡繼芳

萬曆十有八年郡侯沈公莅政之明年也正己率屬墜舉廢興民熙於業士勸於學因念萬載巖邑士有貧者乃進邑令張君曰有司固須士則必養士貧不能贍於養之謂何乃捐贖六十金令買田贍學毋墮毋確毋浮於稅張君唯七得其腴五十畝以復且爲之辨疆域定輸納悉實贍之數又籍循環於所司用杜侵漁以圖永久不兩閱月而事竣士無論貧不貧皆感侯惠而益競勸焉邑人彭君天補述其事以張君意命記於予予不能辭爰述其顛末且以申告二三子曰爾多士亦知上所以養士意乎上養士欲士知自養也故上焉者唯恐

不知士之貧而不能恤乎其貧下焉者唯恐累於貧而不能忘乎其貧此上下相成桴鼓相應之道也侯之養士至矣爾多士之自養何以哉夫人有治生之田而亦有生生之田治生之田學田之類是矣所謂生生之田非吾心之仁義乎其天則自妙不必正經界其靈臺自炯未嘗蔓榛蕪其生意長存無慮旱乾水溢在多士一反而求焉願自今以往所欲必仁而非仁罔耕所爲必義而非義罔耨毋以私意汨沒其靈根毋以功利窒塞其情田毋以異端曲學稗莠其嘉穀常有事勿忘不可以無益舍也當直養無害不可以助長堰也當修身以平天下不可舍己而芸人也時而遭際聖明則爲莘野之叟爲南陽之夫事業光天而聲華炳日一或窮約其身亦必四道以淑世簞瓢可樂則負郭無羨也敝衣可耕則金石其音也若而士也斯謂不失其本心斯謂得自養之道有司亦得藉手以報國家豈不誠幸歟不然者享不耕之食忘自穀之謀甚則窒塞良心徘徊蹊徑退無禘同井之風進有負見龍之會若而士也亦官牆之荆棘

萬載縣志

文徵

記

百五六

吾儒之根莠耳豈不重辱此田而深負有司之盛舉哉昔東方生之善耕也不憂三年之旱不憂九年之水而唯在一勤君子之善學也不以大行而加不以窮居而損而唯在一心爾多士其慎念之哉毋爲東方生所竊笑也

章侯新學記

明副憲分宜進士鍾 烱

高皇帝定鼎之初首詔天下郡縣設立儒學崇祀孔子聯以師儒董以守令育才儲俊黼黻皇猷列聖相承世爲法守今上御極以來勸學右文詩書之教炳焉萬邑雖僻處一隅而章縫之士被服教化駸七嚮道乃廟貌傾圮風雨剝蝕齋廡蕩然生徒皇皇無所登降先時令茲土者逡巡莫知所舉崇禎己巳冬章侯以名進士綰符茲邑既下車謁廟與諸生講論畢環顧愴然曰學宮翦焉勿治委釋奠於草莽以辱先聖之靈卽博士諸生能恬於弛余可晏然坐堂皇臨士民而置之乎第席未溫而役驟興恐傷民心且圖之越暮年民用嬉遊度可興工而積逋頻年檄催如雨取給於令者無虛日又瞿然念曰是烏可轉告於

上也遂慨然捐俸釀金鳩工庀材進諸生而疇咨之度料經費推學博徐君董其役徐君宵且經營不遺餘力借薛君蔡君襄其成肇功先師廟次庶次齋舍次啟聖祠又次鄉賢各宦祠大飾其舊煥敝者撤棟橈者易垣傾者築門戶階除甃砌如砥是役也經始於崇禎壬申仲春迄功於季冬至今宮牆巍七齋廡翼七誦聽雨而雨化敷課蘭社而蘭臭合休哉文教仰承祖宗培養人材今上壽考作人至意真千載一時也諸士峩冠博帶游息其中可悠七泛泛無欲起欲躍之色以副侯嘉惠盛心乎夫豪傑匪以地限也梗梓之木植於幽巖曲岫物害不侵人跡罕到用全其天爲棟梁之用重淵之下有神物焉深藏以養鱗甲然後風雨奉之高翔青冥之表萬邑賢雋先後雀起代不乏人卽今風氣稍遜而物有采神有工壯氣騰暮氣去從來宇宙重闢之會經一番逃掃現一番文明諸士孕蓄已久正精英鬱而欲鬯之一會也精英何在生氣是已孔顏授受曰己曾子子思曰獨孟氏私淑曰我統之曰生氣生氣常王宇宙常新生氣

萬載縣志

文徵

四

百五七

常流宇宙常活嘯爲文章挺爲節義皆是物也若沾沾焉爲陵陽之位爲躍冶之金視高足揚飄忽不稽罔駕詭御雖有生也與槁同則宇宙之大隱也諸士沐侯之訓必有真才真品翬翟斧藻以應地靈今日之羽雖儀而未振後此之茅一拔而彙征文章節義銘鐘鼎而繪丹青以無負朝廷作養人才之意則侯之所爲聿新學宮者當不朽爾

重修城垣碑記

鍾 炳

康樂邑萬山中四顧巉巖峯崿土瘠室窳徭煩賦重於江西夙稱上疲邇者新餉日增敝民益苦奔命而思免脫雖重關雄堞有所不能域况故堞低庠邇復傾圯什之七八兩河直貫城市頻年暴漲嚙城址且什之三宦茲土者雖隱憂庫獄而詘於時之無可爲不得不坐狃苟簡以及瓜會歲壬申剽寇從關粵蹂躪虔吉昭武尋及盱江臨陽諸地鄰震吾袁兩臺使計切疆圉亟從治行高等中廉文武通材推轂郡侯田公俛振旅靖盜倚爲長城於是田公往而各屬警

備獨康樂全堞就頽重門擊柝靡所倚毗吳興韋侯令其地瘁辛萬狀孤城仰
屋尤日思繕禦周行睥睨而憂之請於田公仰白諸當道得報可則捐貲鳩工
伐石甃其土之圯而崇其墉復爲鼎關建峭周石欄以防衝突復陂堰以備漚
洩今龍河烏溪二哨雉堞重新侯綢繆桑土慮周若此顧嘗謂人曰田公价人
維藩保障四封屹然干城數千里環江以右實嘉賴之席公宇下而不繕城增
備微論曠厥滋戾以仰貽大人羞脫卒有不虞如押櫝何且公實教我更捐祿
入董厥成今日之役匪藉手我公不及此工始於壬申夏月至癸酉告竣屬余
記其略余嘗閱史氏所書請城洛陽與大梁事或以天子守在四夷諸侯守在
四鄰爲說而詆其示人以弱竊以爲不然設險守國重門待暴載在易訓聖人
在隆古盛時曷遽暴客是虞乃繫坎取豫慮固至周且遠也今守牧坐狃積薪
又催科孔迫奚暇爲城垣計然以世宗朝號稱全盛一旦島寇猝至而大江以
南不城之邑與城而低阻庫者悉予女玉帛以餒賊其郭之七里三里乘高而

萬載縣志

文徵

記

百五八

呼猶可爭雄於矢石卽近者瀕海如登萊強敵環攻卒未得志又如虔吉昭武
諸鄰壤窮寇肉其人民墟其村落而孤城斗大憑墻下瞰虜目飽氣盡無能騰
躍數武以肆掠都市貽憂帑儲未必非城之功今幸上臺允議與田公協公之
捐修又與韋侯協金湯屹峙控制上游固兩相與有成哉雖然昔田安平守卽
墨復齊城七十餘韋丹節鎮豫章安堵萬姓其氓歷四十餘祀謳吟尸祝如新
兩侯之境遇品望未審於安平與丹爲奚似而跡其戡定安輯有功城守之
班固彷彿略相當已雖然此險之有形者也無形之險在黔首心兩侯固已得
之顧撫茲疢瘠重困易與爲亂之黎庶蕭牆巨測侯何策急公遂私俾永永堅
其拱衛詩曰懷德維寧宗子維城其不負侯於今日哉

重修城隍廟祠碑記

明邑令烏程進士韋明傑

邑之有城隍祠其規制與邑廳事埒夫豈虛崇廟貌將金湯實式憑之歲有旱
澇則令茲土者必以告神爲之請命於天亦猶民有疴癘邑令爲之請命於上

也萬固巖邑地當四塞鄰境有警則風鶴皆驚而城垣之設初制苟簡近益漫漶與無城同奸宄更復叵測且田居山陀狀如樓梯十日不雨卽苦旱五日連雨卽苦澇故余常謂爲令於萬難而爲神於萬亦難自余承乏若與精神爽相接八年間禱雨七應禱晴晴應聞者小大之獄默禱於神七亦必先告之卒使囂者以定黠者以馴卽無歲不被災沴無年不罹鄰寇而猶能存其子遺寢其睥睨則神之照臨茲土者遠也第廟貌儼然而顧瞻廊廡門寢日卽於頽亦復與廳事埒余謂廳事爲令所山政天禍不德葺而復壞以昭我過回應爾爾祠宇爲神所棲依神則何咎可不謀所以重新之乎而一時會首辛張汪陳楊周彭李潘龍王龔林等遂相與踴躍而前矚金鳩工不踰年而門寢廊廡瓌璋壯麗金碧輝煌通邑士民舉欣欣然予曰是可以彰隆報矣會予遭斥逐羈繫於袁爾時楚寇竊發自昭萍窺伺袁郡予日與袁之戍卒更番守堵登陴而望曰是安得南風不競蠢茲狡奴不北其轍乎則幸有神在耳不然焚劫之慘適當

萬載縣志

文徵

記

百五九

落成之時將神之捍衛吾民者謂何且非一方所以崇廟貌之意也而誠精所至夢寐與神俱亦遂若掀髯而就余應曰唯唯卒也狡奴反風滅火三至張家山下不利而退豈其有神兵在耶夫乃知神之果能捍衛吾民而民之尊崇吾神爲不虛也嗟乎予惟不能爲民請命而議縹緲緩動而獲咎神直能爲一方請命而水旱盜賊保以無虞神亦靈矣哉雖然神之爲道上通於天必能下牖乎民繼自今時其雨暘驅其游惰化瘠土爲沃壤起不毛爲樹藝呼哀鴻而遣集變頑梗而急公其以崇事神明者崇事長上使盡滌肺腸以無累後之賢者予卽斥逐歸休乎猶願述聽風聲以無忘八年對越之忱一時經營之盛云爾故不辭不斐而爲之紀其事因以昭告之若眾姓樂助其費若干繕則命鐫諸碑陰可也時崇禎十一年孟夏月

龍河橋堰記

章明傑

邑故有竹山洞水合烏溪流城內環泮宮以達龍河龍河故有橋於兩岸城關

相連爲邑人譚燠世建橋之下有堰則其子姓通族所築設水碓爲利邑之風氣與扞蔽實兩藉焉歲己酉馮夷作祟懷襄之勢高出城頭一時關門橋堰盡圯中寅秋譚君經濟慨然繼祖志重修是橋越乙卯復圯再又復修皆獨力肩之橋至今綿亘而堰則僅存故址後且爲不法者去其所忌浸以蕩然譚聚族而訟兩臺兩臺檄府縣議復其舊遂巡二十餘年徒望洋而嘆予壬申葺理城垣爲重建左關麗譙見水門高廣以殺水勢厥功固偉將毋尾閭洩之風氣大散乎且新上之民飛駕小艇闖入城河設有奸人暴客剽跡其中何以譏之因與譚君數徘徊水次曰是堰可復也譚君唯唯而咨嗟於眾心之不一專利之多口予曰碓則私而堰則公以一勞貽永利利益一姓者小而以關通邑之風氣以資一方之扞禦者大且橋可繼先志堰獨不可嗣前功乎矧有憲檄在卽專利庸何傷於是譚君復唯唯相率釀金積薪負土畚鍤旋施堤址垂就會暑雨橫流旋築旋圯予再鼓以作其氣終不以一簣廢九仞也已而事竣相與登

萬載縣志

文徵

記

百六十

城凭橋眺望二水洋洋交瀦學宮之前迤邐虹橋灤洄筆架無復有奔流如箭一瀉無餘令人觀川流而興情逝者不大有裨於人文之聚乎水陸十門而水居三南浦踞其上流烏溪樹以石柵龍河得此一堰爲北門鎖鑰無復有篙師舵伯銜尾而進奸人暴客乘間而發者不又有益於干撤之助乎是役也計費幾若干緡爲譚姓通族科派有差議以朝夕錐刀佐歲時修葺所謂因利導之不損民財不費官帑而實陰有造於全邑者也至於經營拮据克紹前業令堰與橋襟流如帶不致問諸水濱以有今日則惟譚君之功予爲記其事勒諸石以告後之君子庶無使不法奸民去其所忌以與譚世仇而重以拂通邑之同然者是爲記

重修龍河橋記

韋明傑

邑之有龍河橋與城連亘作一邑藩維上受竹山烏溪諸水下入隴江予前堰記所稱風氣屬焉扞蔽藉焉然勢當其衝旋築旋圯有元太史譚自廣子孫世

居其左而新之曾五世於茲因名新橋嘉靖間新之者爲譚鉞已而鉞之子登龍繼修焉至萬曆丙子壞新之者爲登龍之子熄熄之子嘉猷嘉謨佐修焉至歲己酉又壞嘉猷之子經濟屢困場屋思人文不振繼志重修率弟經世經綸伐石鳩工經始於甲寅越明年乙卯落成蓋其時復罹水患捧土於河日與狂瀾怒濤爭壘而角勝至費數百緡不惜且也舊列二墩中流柱砥水勢磅礴一時旁徙立壞民居茲去墩易三洞爲一更加高廣比前址益又蜿蜒壯觀登斯橋者曰美哉津梁乎雙虹倒影南浦枕波碧流漣漪滔七乎汨七乎無不望斯橋而北趨至斯橋而迴瀾矣譬之人身右洞烏溪則任督也龍河錦江則尾閭也學前江三江則井營俞會也脈無壅闕而氣有旁壘一邑之水如渾身太和然卽昨年乙亥陽侯復崇其懷襄滔天殆甚前丙子己酉而斯橋得以無壞遂使城市之民免於淪胥將來風氣其轉乎一時人文蔚起與勝概俱新鎖鑰長城與山河永固則橋之功大也夫以橋之功大譚氏父子祖孫其又可少乎

萬載縣志

文徵記

百六一

哉余初受事登陴而望見斯橋之屹然隆然以爲疲邑有此是必眾建不拔者不則請於公仰給縣官必歷數令始得享其成及讀次省徐公碑始知譚氏世澤在焉予爲補建左關麗譙使沒水得石猶纍七不絕其有餘於石者爲不惜傾囊而出有餘於德也溯往推來則譚氏克紹前人光自此世七如新當與康樂津梁之表一邑者同不朽矣謂之新橋也可卽謂譚氏之世澤橋也可喜而補爲之記

重修城記

清郡守奉天舉人李芳春

余莅袁以來旣以萬載田賦事往來縣治躬自較閱蓋不啻如家事必期盡心釐正使公私得當而後卽安厥事之暇按閱縣城四門週遭殆遍見厥土卑溼雉堞傾陔雖若屹立維墉而支吾頽圯猶難言之又一水中流若南浦龍河烏溪等處頗決七不易測扞蔽之法更難設施予悵望久之適康熙甲辰夏仲奉公令修城余旣殫竭心力重新郡城乃單騎詣萬進范令而熟謀之及諗於萬

之役老士民曰役不大興終於無成觀茲殘黎生氣索然能復堪此重困乎今此之役非數千金不可祇用民力不傷民財事乃有濟或捐俸或將助爲爾萬造無疆福願以身先之眾議僉定始請諸督撫道憲壽之寅友咨之協鎮與萬之學博諸屬隨分捐橐共襄曠舉荷守道施公軫念殘疆首行捐助部撫各臺亦捐金有差予乃躬行措置分署邑令及營捕等官畫疆董治予親總其事遂於是夏鳩工版築雖盛暑炎歊而經度營表一木一石皆予所手口拮据每朝出暮歸未敢告勞間閤有苟且畢事不堪持久者必立視其更置完好而後已總計周城一千一百六十四丈自夏徂秋萬堞崇峙提封如繡從此春雨秋霖可無意外之患而樓櫓鼎新防戍有堡瞭遠有臺儼然金湯天險矣至南浦隴河烏溪等處爲水道通筦版築難加予爲籌畫求大木各材立柵其上頗覺永固於是四境之內百塵雲連萬之城居可長享奠安之福嗟乎予爲萬不憚艱辛類如此總計三年中蓋往來十數又爲郡城工亟難以簿書期會集事以故

侯郡倏邑跋涉水草每一念及焦思如焚惟恐吾事之不得其當也今幸麓告成功初心用慰總計修費約二千六百二十兩有零米一千一百石有零出入支給另詳册中予微俸之倡微助之捐區區未足云是役也萬令范廷鳳實同籌策竭心力而典史于昌祿營官李虎等咸著有勞勩例得並書

重修南浦橋記

邑令鄞縣進士范廷鳳

余奉簡命承乏茲土講學後遍巡城郭見茲地之形勢特異也他處城垣多據陸地而水繞其外獨斯邑不然南流之水自竹山洞發源迂迴貫入城中直抵北境始匯大河則城南之有南浦橋城北之有康樂橋連絡城堦橋存則城完固橋廢則城中斷兩橋之所係不啻往來要衝重門鎖鑰關隘地方豈淺鮮哉南浦橋於丙午年洪水爲害巨浪奔騰損兩岸破中墩橋面中陷行人病涉余目擊心傷慨然念除道成梁縣令事也因謀諸父老爲修葺計復詢橋之所由建僉曰辛宦圖猷績也其先不可知自萬曆己酉歲辛公繼創及崇禎九年橋

復壞公子生員啟夏啟商啟周續志重修已數十年於茲矣今欲使圯者復興
厥枝猶盛盡命修之以光先德予因力爲勸勉辛公後嗣生員辛瓊偕弟勤學
等不惜多金鳩工庀材不數月而橋成予深快往來者之不病於涉而城垣藉
是以鞏固也又喜辛公之有賢嗣能繼先德於不墜也因序以志喜勒石垂不
朽云

重新文廟記

邑令廣寧常維楨

記曰君子欲化民成俗其必由學乎學校興則人知禮義勵氣節大道明而千
載有真儒大道行而百世多善治是以古王者建國居民教學爲先予於康熙
戊午秋承乏茲土當兵寇蹂躪之餘里閭凋殘姑勿具述莅任之二日躬謁文
廟豐草淒烟慘然在目乃披蒙茸踐荆棘俯拜荒庭之下成禮而畢仰瞻殿宇
神位剝落傾圯無完瓦全椽以蔽風雨堂廡厨庫灰燼無遺皆爲戎馬飼秣之
地矣躊躇太息久之返而廢寢食者數日以謂春秋豆籩將安薦歟士習民風

萬載縣志

文徵

記

百六三

將安淑歟因毅然曰修廢鼎新予之責也然招徠孔亟時不克舉至庚申秋哀
鴻漸集遂竭捐已貲佐以衣珥委典史于昌祿巡檢鈕嘉豫董其事奈各修實
創百務經始工用材木之資屢給屢匱至癸亥春矢心畢力必期成功乃大集
工材躬親監督復委典史趙濛初佐之閱四月而告竣焉熒煌屏檻檣星建也
丹雘棖題戟門葺也巍峩棟宇宮殿完也翬翼連費兩廡新也不啻七十二子
環立侍坐於洙泗之庭而拱聽先師講學矣而且堂祠重構厨庫咸備齋舍復
增護以垣墉丹桂翠柏前後森挺乃集諸生肄業於斯弦誦之聲達於中外凡
厥士民莫不仰首而嘆曰不意今日觀此壯麗蓋從凋敝後起而大振之其規
模氣象誠有軼於前此者濟濟多士當奠厥攸居之初誠能棄乃舊習維新厥
德爭自濯磨勵精於高明光大之域處爲修士出爲名臣則今日新學之舉未
必非移風易俗之一機也若以爲余功予何敢任

重建明倫堂記

常維楨

天下之治亂人心之邪正爲之也人心之邪正人倫之明晦爲之也人倫常明而不晦則有正無邪天下又安有治亂哉陶唐之時民風淳穆帝堯猶憂百姓不親五品不遜爰命司徒敬敷教焉則倫之必明當剝復益宜亟矣萬邑舊有明倫堂相其故址濶大廣博余初莅任所見惟牧馬馳逐瓦礫成堆柱礎階級無一存者問傾圮之自已三十年所矣因愀然曰斯堂之設非僅司教者位署而實諸生講習小民則效之地也前之長吏奈何委之草莽弗過而問乎因謀於眾不獲乃自捐金佐以雜佩仍其舊基恢以新模繼文廟而落成因思乎聖之所以爲聖亦祇人倫之至耳則天子之所以命吏無非代爲明此倫也吏之所以治民民之所以自治豈舍此倫而他術歟倫既明矣將見爲子知孝爲臣知忠爲友知信爲兄弟知有序爲夫婦知有別今日休風不與陶唐時媲美也哉尤願居斯堂者思命名之義自範其身以範多士無坐擁其位徒自號曰師也庶不失余汲汲構堂之意云爾

萬載縣志

文徵

記

百六四

重修文昌閣記

常維楨

距學宮東南數十步有閣曰文昌俯矚急流下臨孔道環虹橋以挹秀峙筆架以呈奇蓋邑之人士所恃以毓靈者也自兵火蕭條閣亦圯毀感時者輒興文運攸繫之嘆然以財殫力瘁終不克舉至康熙癸亥歲泮宮告成諸生歷階進曰俎豆重輝鐘簷復奏聖之神侯之誠也第東閣未葺如曠闕何楨曰徵諸君言吾已籌之熟矣夫一邑之望憑於山眾山之歸憑於水水不濼洄曲折而直瀉千里則水脈無情山容減色故巨泮狂瀾必有砥柱通都大會必有關鎖在浮圖一佛氏教耳猶能以高銳之壘鎮厥招提况昌明文運羽翼宮牆如茲閣者其不爲一邑明秀鎮乎葺之誠不可緩諸生忻躍而退於是恢擴舊模高甃石址層累營構祀帝君於巍峩之上四牖洞開萬峯羣拱儼若清霄之耀奎壁焉是役方舉有邑民彭衡古者因祖坊廢墜與閣爲鄰願以仆地羣石助修垣址斯亦義風之不限者後之人嗣而葺之不惟於士有益實庇一邑於無疆因

走筆漫記

吳公講堂記

邑廩生辛承頊

語云不生治世不蒙至治之樂不遭亂世不知離亂之苦抑何言之痛且切也夫民處宴安無事之時耳不聞笳角之音目不睹戰爭之形家人父子相與恬熙於光天化日中幾不自知所遭之幸也迨寇賊姦宄變生倉卒水火刀兵禍歷歲年舉人世可驚可駭至奇至異之事胥於一邑受之而民之合者倏離散者莫聚生死決於俄頃性命僅存呼吸於此而有賢仁人蒿目時艱憂心孔棘不憚現金剛身設廣長舌萬慮千思以期出民於水火而一二殘黎遂得以離鼎沸而脫苦海焉則此一人者實大有造於此一方民而此一方民誠宜世世尸祝俎豆勿祧者也若我邑侯吳公是已我公之治萬也善政班班更僕難數茲舉其概而言之公來萬未滿三月卽值湖南失守我邑界在邊陲僞黨徑來煽惑其時人心洶洶大有不堪言者公乃日進屬吏士民講明大義眾志賴

萬載縣志

文徵

記

百六五

以稍定嗟乎危疑之際不有明哲鮮不游移公獨能以堅貞之心正己正物而萬邑之民亦凜凜焉不敢爲非曾不似他邑之眾遍地起兵開門而揖盜焉豈非忠義之教維繫於人心者大乎且萬邑以斗大孤城僻處山陬而又城守之兵屈指可數賊之來也誠如探囊取物耳公於恢復之後力請增兵固守賊之盤踞山谷者公指陳進勦方略皆萬全勝算如白良一戰幸用其策遂使賊心膽俱寒無奈以文史談武事皆以爲迂而怒置之坐令奇謀秘計不盡見効於時而蹂躪日甚嗟乎能文事者未必諳武備公獨資兼文武智勇過人設使言聽計從妖氛之掃計日可俟當不遲之又久也旣而民間婦女半遭係累公挽回無術憂心如擣除盡括囊橐而外并挪移同官之銀而贖回之嗟乎雷驚電閃父子不能相保兄弟不能相恤公獨痲痺切身極力斡旋如此此豈尋常司牧所能及乎又萬邑當失陷後地黑天昏其捕風捉影傾陷無辜者殆不可數計公以己饑已溺之心申雪保護不遺餘力傾陷之風卒衰止焉嗟乎火窮則

呼天情極則呼父母當有口難懇之時呼天而天不能保呼父母而父母不能
救公獨能潛移默運而保全之公之恩德較之天地父母不尤有深焉者乎恢
復數月殘黎之驚魂尙猶未定也而催科之檄一日再至公以萬邑凋殘萬難
開徵再四申詳上憲未允致有乞委能員甘受參罰等語嗟乎惟正之供小民
宜爾公獨哀我殘黎抗聲直陳苟有利於民生不自計乎功名此豈可於今人
中求之乎王師駐劄長沙袁郡實當往來之衝調撥之夫動以千計公以萬遭
屠洗之後惟與他縣齊驅嘔心刺血遍爲請詳迄今萬邑派夫不及宜分之半
誰之賜也又袁城謀濬濠清需夫數千按縣調取他縣已具遵依矣公謂萬民
殘苦斷難從役與當事者動色爭辨夫竟得免此一役也袁屬四縣咸蒙公麻
而萬民鮮有知者嗟乎勞民動眾君子所傷外所應役又不容辭公獨於眾莫
敢抗之時辭苟可以已之役侃侃而發觸怒不顧致使合郡陰受其福而不知
抑何仁人之言其利溥乎解馬一項亦按縣派其時府主顧沱任方新公謂馬

萬載縣志

文徵

記

百六六

數前後不侔縣分大小不一且完全與失陷勢尤迥絕懇懇申詳情詞俱厲致
府主批答有領教二字嗟乎善事上官自昔有言公獨爲民之切不能少爲委
蛇世之惟知事上罔念恤下者可同日語乎又邑值兵燹後人民盡逃亡房舍
盡焚燬田土盡荒蕪公爲憑血具詳連篇累牘不啻數千萬言致蒙各上憲照
詳入告幸免錢糧十之八九嗟乎邵子有言寬一分民受一分之賜今之萬邑
得以少甦不至重困催科者其能忘所自乎戊午之春庚癸頻呼饑殍載道惟
此僦民自云朝不保夕矣公乃進紳士而謀之曰今日之荒祗緣境內無穀囊
中乏錢若能通融銀兩飛輓以濟待哺之眾未至盡填溝壑也爲請於府行以
金易粟術擇邑中誠篤者任其事凡營運米穀者給照放關不旬日而舟車至
者踵相接也公又念萬邑凋敝時當荒月雖有米穀而催科不止將無餘力以
謀生因下令四月五月一概停徵嗟乎大軍之後必有凶年苟非神君慈母救
荒得術寥七子遺雖有存焉者寡矣萬民獨保全無害共慶更生此恩此德

有滌埃乎至若三月宜晴而淫雨不止五月宜雨而亢暘不厭是皆害稼卽以
害民也公虔誠致禱求晴而得晴求雨而得雨嗟乎誠信未孚神勿聽也公獨
感應如響豈非爲民之心可以質鬼神可以格帝天乎他如輯睦文武則委曲
調劑極其至養育士類則飲食教誨極其周逃亡未集則多方招徠之荆棘未
闢則設法勸墾之節烈未彰則蒐索闡揚之種種善政不一而足要皆德澤俾
風雨恩膏並溥海者也茲者公以綸音內召行且有日矣邑之人其攀轅而卧
轍者正不知凡幾也於是相聚而言曰夫人有一日之恩一事之惠尙且終其
身感之佩之而不能忘今公之恩惠萬者多矣吾儕小人其曷能忘遂會議立
公講堂以爲公生祠俾後之人履庭廡而道盛德者僉曰我公之流恩於萬也
如此萬民之感恩於公也如此萬之民感恩於公而又不可誼也如此父老傳
爲盛事鄉黨流爲美談則斯堂之建豈不與南國之棠峴山之石鼎峙霄壤也
哉眾皆躍然而喜邑人辛承頊竊喜眾志之僉同而嘉績之有光也因爲之紀

萬載縣志

文徵

記

百六七

其事公名自肅號克菴中辰進士山東海豐縣人

常公講堂記

邑舉人敖連

古人一言一行足以訓方型俗後之人猶傳誦記載謳歌不忘矧深仁厚澤宏
濟時艱力蘇民困功德八人至深者乎如我邑侯常公誠足令人尸祝弗諼也
已蓋公之功公之甚難事也公以遼左名胄年二十二由成均銓授萬令值吳
逆僭亂邑被禍最慘四境之內幾絕人跡公下車灑泣曰天子命吏守土牧民
今閭閻流亡田疇荒穢將何以爲治乃悉捐已貲招徠近遠布給牛種賑恤衣
糧慰彼安土之思民相率漸集然軍供浩繁征繕無藝公曰傷殘之民卧未帖席
而又擾之是使哀鴻復驚也罄洗囊囊力爲四應而里民初不知有其事每羽
檄到邑痛哭繪文以籲當事當事亦知其愛百姓而不愛功名甚雅器之路當
南楚孔道卒伍時入民居橫索公厲色驅馭纖毫不敢犯甚有迂道不敢過境
者往常納賦有耗公痛行革除一切陋規悉皆屏絕民嘗沾染疫癘公齋戒禱

神疫頓瘳山鄉猛虎爲害公繕文告神虎害亦息兵燹後民間子弟無力肄業有改圖謀生者公設立義學每月課藝必親校閱相與講論書旨及先正體裁文教蔚興其科歲試童子几席飲食皆親爲檢設所拔皆名雋學宮遭戎馬蹂躪焚燬無遺公毅任建葺貨貸不足爲之質佩警裝刻日告成公署中食指約數十常風雨陰晦午不舉烟而讀書賦詩怡然不倦其虛士大夫之間不卑不亢相接以禮而出之至誠屢作爲文詞勸民睦鄰息訟孝弟力田征比賦糧更不忍束溼重困然疲里絕甲逋欠者多在已屢被嚴檄亦恬然不爲艷色凡此皆事之所難而公不畏其難心之所苦而公不辭其苦公之度越尋常爲何如耶吾聞報功崇德者生而尸祝類多建立生祠又歌功頌德者見諸謳思輒多勒垂貞珉同尊且親也第莫若就公精神所聚求之公平日精神在教養今區泮宮之側構公講堂近校以教近庠以養所以綿公之功德於無窮也紳士里民屬記於連連爲公治下士又爲門下生雖不文義不容辭因統邑人之志而

萬載縣志

文徵

記

百六八

舉其深仁厚澤所以入民之深者以爲之記庶公之功德與堂而並永焉公諱維楨字晉臣號白山遼東廣寧人

重修學記

邑令嘉善進士施昭庭

余幼讀李盱江袁州學記竊嘆學校之關於教化甚重今而益信其言之關於衰之教化者爲尤切也萬爲袁屬邑己亥秋余甫蒞任謁學見向所謂禮門義路成德達材諸齋盡爲瓦礫所歸然僅存者大成殿明倫堂而已而昔日就傾圯不蔽風雨私心憂懼竊謂根本之地不能自我新之其何以創興教化培養人材使盡可爲國家用而無忝厥職有告余者曰萬邑僻處山中庀材鳩工俱仰資他郡費且不貲故一時甚難之誓爲葺其牆垣壞榭以有待焉既而思之棟樑之材何地蔑有亦在物色之得其人耳復集紳士謀之諸紳士果奮興踴躍樂輸恐後不憚險阻入山采木未幾得良材若干雖深山窮谷溪流牽挽頗迂時日較諸遠購於他郡者費僅半焉及越歲木石瓦甍畢集眾以舊制卑隘

爲嫌謀高殿之爰誦吉日召匠氏度材興役咸易以新而大成殿戟門層簷飛
楹遂翼翼然宮牆萬仞矣當癸卯之春山寇猝發居民逃散幾至輟工諸生身
其責者猶未嘗少懈亦可知其信之深而行之力方將經度餘材規禮門闢義
路建崇聖之祠新成德達材諸齋性庖有所習射有圃堂廡一新祭器咸備俾
二三子周旋絃誦於其間閭比如也而余適遘幽憂之疾決自引去不能少濡
時日方憾願之未遂諸紳士乃相率請曰學宮之建公之初心也今將以次修
舉不逾年而告成矣安可無記噫是益余慚也余惟學校之設原以育人材興
教化故古聖王治國必首建學以明倫倫者人之大節也自教化衰而士徒知
弄文墨以爲取榮名之具依違媵媵大節不立即間有矜飾氣節居常侃侃非
有特立之操窮理之學果斷之識一旦事變當前鮮不趨利如鶩見害思遷積
爲世道人心之憂國家所以造就人材與士君子所以卓然自立者應如是乎
宜乎李旴江之危言激論於此三致意也夫秉彙之良誰獨無之糾於利欲則

萬載縣志

文徵

記

百六九

昧所從事晰理未明則執而易偏因循中立非怠卽沮矣向使師儒教行士有
同志平日講之既明斯臨事守之也固信之既篤斯當幾赴之也勇自能秉義
執德扶綱常以垂不朽漸入聖賢之域安見人材不古若哉宋明以來學校之
設莫盛於江西故理學諸儒後先相繼如曾文定歐陽文忠諸學記可考也而
予獨以李旴江一記相告者萬袁屬也爲袁州言之也予行有日矣諸君子守
先儒之訓使予未成之志次第畢舉庶教化聿興人材輩出可翹足俟是誠不
能無望於後之人有同志也至與予共事者爲城守施士昌巡司馬昭遠司尉
陳復球始終是役者爲楊辛二孝廉其經營勩事者爲貢生汪廷獻生員郭邦
泰等例得並列於石

鼎建崇聖祠記

邑令長洲程元度

萬載古康樂地隸袁州西北境山環紫蓋水繞龍河鍾靈毓秀代多賢詰邑雖
偏隅而文風與通都大邑埒歲丙午予承乏是邦下車日釋奠聖廟仰瞻殿宇

之巍峩周覽門廡之峻整以及齋舍庖湍無不畢舉心焉嘉尚之竊惟聖學之
昌明莫非前烈之啟佑此我皇上所以有追封之詔也今爵號渙頒而式憑乏
所豈非缺典乃進諸生謀之以詰於工力對余喟然曰舉廢興墜守土之責也
況崇聖祠乎爰出俸鳩工庀材屬貢生汪廷獻董其事經始於丁未秋迄戊申
五月落成余適以鞫鄰獄誥悞部議降調欽奉溫旨引見去有日矣諸生欲予
爲記予謝不敏請益堅遂勉書數行以志祠之成非敢云有裨於學校也後之
來者勿譏言之無文其可哉

禱雨竹山洞記

韋明傑

歲甲戌日在柳邑復大旱禱於神弗應已暴身禱於天弗應也諸生前曰盍往
竹山乎竹山故有洞歲旱必禱有禱必應先是壬申舉意欲往竟以雨尼其行
予憶往事勃勃有動焉遂於七月乙酉朔告虔於羣神越翼日丙戌晨起叱馭
出小南門迤邐轉西南可數里許杲七日升予乃負暄疾趨至方春輿人喘息

萬載縣志

文徵

記

百七十

不能出氣揮汗如雨小憩復行望見四山晴朗纖雲不翳起視阡陌則穰者莢
者芾芾者若將稿形悴容低徊俛首而訴於予前也予曰暑吏爲虐一至是乎
安得雷公雨師挽天河而蕩滌之由是見清泉一道涓七而流於畎澮者則石
洞之餘也比至相與披榛除道躡屩而行山不甚高蒼翠鬱鬱景象忽異入洞
口則劃然天開虛敞可容數百人乃率僮屬布席焚香爲文以祝之命一二羽
衣書符說法以牲血塗地而後敢入居民羣爲伐鼓鳴鑼白晝燃炬乃得手足
瘳痲亦復股栗不能出氣亟就火取溫徐謂余曰翳有法水在行當偏灑法部
以報侯乎予且信且疑姑聽之行而時亦興盡言旋歸途赤日如爐仍相率負
暄而趨欲前此一刻清涼不可得矣忽片雲偃覆山頭而少女風隱隱鳴樹間
余喜曰是有雨兆乎歸未及門果大雨次日乙亥又雨越三日戊寅又雨予乃
詫斯洞之果有異也所謂山不在高水不在深者是耶非耶迨考邑乘止載涂
泉爲龍所居而竹山不與焉物之有靈不靈故自得人而顯設余不從諸生言

身歷其處將此洞幾沒荒崖蔓草爲樵夫牧豎習聞且見已耳然後知誌傳所
不載耳目所未經幻七奇奇爲名勝者何限欲溯其源流窮其奧竅惜余不能
褰裳遂止因與諸賓佐倚蹲石班荆就坐里人歐陽生者摘園蔬餉余爲飲數
酌撤去時涼飈颯然沁人肌骨無不思挾纜者秦皇帝清涼洞至今在其不寒
而慄何以異是頰聽流泉潺湲激石曼曼有聲仰視懸崖倒壁若浮空欲墮而
下有似雲者似波者似宮殿者似峯巒者似束帶朝士者似野服山人者似佛
頂螺髻者似大士千手指者似馬首者似象鼻者似竹倒垂而筆尖矗起懸注
者種種奇怪信神工鬼斧鏤刻自天人巧能至是乎坐良久居民復燃炬一鬪
而出爭取石髓爲戲髓柔膩如飴旋視之皆化爲石又良久則羽人於洞最深
處取勺水挈瓶守之不得比於白鹿桃源之膾炙人口則亦有幸有不幸也余
深德洞之紓我雲漢爲表而出之作此記

重修九仙宮碑記

邑廩生巢汝翼

萬載縣志

文徵

記

百七一

予邑不乏神靈殿宇而形勢崇隆規模壯麗者莫如城東九仙宮宮肇自唐初
其間興廢不可詳矣有明宏治丙辰合宮災道士鄒冲應重建殿宇宮門曾幾
何時正德己巳復災冲應痛且奮與其徒虛靈等同心協力釀金捐貲壬申大
構正殿迴廊修砌門垣起豎石坊越數載復構旁殿歷今二百餘年矣其稍完
固者惟祖師殿若三清與三元兩殿並頽圯上漏下溼風雨莫蔽余於康熙庚
辰教讀其中歷十有一載每徘徊四顧心忤忤然動幸會首數人給會銀百兩
以修葺爲己任計不足捐貲以助己丑春踴躍興工先將三元殿盡撤其舊而
新之砌磚牆四扇凡梁木椽瓦悉堅緻以圖久遠秋方告竣冬又新砌三清殿
四圍磚牆其舊殿梁木可仍者仍之否則易之至庚寅春始告竣焉由是兩殿
改觀神靈共妥而城東九仙宮依然形勢崇隆規模壯麗可以光前可以示後
矣余因而疏其梗概不惟使後之修葺奉元者咸知爲某某之功也且使後之
遊覽其地與讀書其中者亦咸知爲某某之功是爲記

重修廣濟寺記

邑令陸川舉人龐 驥

西關外距城約半里許有廣濟寺者卽晉宋時所稱萬壽山紫霄宮廣報觀也觀之名肇於道流寺之名昉於釋氏各樹其幟不相謀茲乃易觀爲寺易廣報觀而爲廣濟寺揆厥廢興成毀之由或有數存焉而所以命名取義者非無說以處此間之西方聖人之教曰佛菩薩謂其普同濟人也廣濟之義其取諸斯乎顧佛能濟人而爲佛門弟子者亦必待諸檀那協心共濟而後有以宏其願力也己丑冬予承乏茲土見所爲廣濟寺者有僧均濟結茅爲庵繼易以瓦周遭皆蔓草荆棘贖礎斷砌磊磊若晨星慨然欲謀興復而簿書執掌有志未逮及解組後甫越歲有僧電機同徒孫別瀾自北庵駐錫於此布廣長舌得善信人等出其原立三元堂貲修理寺像前殿仍舊後殿兩廊一舉而新之庀材維良鳩工孔固經始於康熙五十九年冬月落成於六十一年夏月結構莊嚴煥然改觀既而建豎山門額曰西屏山堂眾又置石版殿田一千七十把爲永久之

萬載縣志

文徵 記

百七二

計庶伊蒲之饌充於香積而往來行脚不至托鉢無門矣從茲暮鼓曉鐘講經說法大開覺路共上慈航其濟人豈不廣哉相厥寺址延袤不甚寬蓄檀增修以成招提勝境則廣報觀亦不致傳失俾後遊覽者莫不豁目賞心而忘其廢興成毀之感是固余之願抑亦諸善信及繼起者之願也夫因援筆爲之記雍正四年夏月

重修明倫堂記

邑令許松佶

歲戊申余以朝命來宰是邑循例釋菜首謁聖廟殿庭聿新崇聖之祠亦復巍煥惟神龕欹敝兩廡牌位未設稍有間缺成禮而退下就廊廡有碑屹然讀之知施君之力爲多而程君踵成之者也不禁喟然嘆曰爲政不當如是耶嗣與博士師弟偕至明倫堂堂舍傾頽師生無復講道之處是殆施程兩君力所不逮而貽予以責者也予豈敢辭第時已入冬轉瞬改歲開春以來庶務孔亟簿書期會日不暇給拮据數月麓得就理於是先新神座繼設兩廡牌位而後謀

及於明倫堂維堂工費繁鉅非一人之力所及進諸紳士謀之咸踴躍樂從用是釀費經營閱三月而告成既塗既茨以丹以雘書聖經一章於屏每朔望集紳耆宣講上諭并舉行鄉飲典禮今而後師生時集講道微者顯幽者闡人人知父子之有親君臣之有義夫婦之有別長幼之有序明友之有信斯道大明庶民有所矜式焉於戲爲政必先於教化教化必本於倫常修而明之以止於至善治平之道不加於此堂不綦重哉余不敏且莅事未久曷敢文飾其說惟是勤勤懇懇勵精圖治以期化民成俗之心孳孳不怠而於此堂之成既喜爲政教之所由始而又樂諸紳士之共勦厥成卽以質之施程兩君想亦欣欣然共慰也堂之修維年己酉始事於季夏訖工於仲秋儒學教諭徐能宗訓導周溥督其成邑紳士舉人楊言唐裕猷貢生郭邦藩王敷教監生張士魁生員汪朝祖辛汝勳等董其事捐貲勲事者甚夥悉勒碑陰是爲記

重修寅賓館記

訓導邑歲貢辛金鑑

萬載縣志

文徵記

百七三

古者握髮吐哺以接四方之士必先設館以停高軒凡以寅賓也我萬賓館之建由來已舊迨官署壞而館亦廢康熙丁丑何侯重修縣治堂廡譙臺罔不聿修獨缺寅賓一館遂至我客屏止無所托足惟投刺於闈者以聽進止非唯簡褻亦冒嫌疑我邑侯汪公莅治三載政通人和百廢具舉因念令長一邑百里之內咸所托命若惟杜門謝客不接一人不開一語是直自蔽其耳目也乃循舊制率二三紳士建屋三楹於譙門之右潔其堂奧繚以垣牆而晉接有地矣常聞禮有主人敬客客敬主人之文蓋言客有嘉言懿行足爲主人所取而致其敬以故素心晨夕交相引重倘士不自愛或私謁而背公或干牘以營利或爲暮夜之賂則是客不敬主且致主人之憎拒之惟恐不遠豈非自斥於門牆之外乎臨斯館者必敬以律身更敬以奉上非公不至非禮勿言一酬酢而挹其風裁一話言而關於樂利然後賓於邑多士羣相則效賓於王四國奉爲羽儀庶不負我侯寅賓之盛心耳若以奔走趨承爲敬趨趨囁嚅以濟其私特廡

役之類耳何寶之足云

重修南浦橋記

程元度

距治南三百武有橋曰南浦爲適郡要津凡使命往來負販步趨者必由焉建自元之大德至明正德中山水衝圯有宋氏女良貞捐貲重葺及萬曆己酉復遭水患邑孝廉辛圖猷解囊再修嗣後屢補屢塌僅存廢址於是有臨河而興嘆者矣余既服官此土舉廢興墜者余責也緣阮囊羞澁未及一一施行乃辛氏後昆繼承先志謀欲復建是固先得余心者但鳩工庀材貲費浩大非圖猷一支所能給爰邀紳耆數人爲倡而樂助者遂多予因諭於眾曰貲財弗充不能修也董事不勤不能修也財充人勤而工弗良雖修弗能久也眾皆懽然曰信哉是言也於是請良工而董治者愈勤捐己財而醵斂者益力經始於雍正四年四月越明年八月告成登斯橋也濡軌無虞垂虹如故車輪馬足無煩間渡之勞泥濘風寒可免褰裳之苦豈惟辛公後裔善於繼述允捐助者與有勞

萬載縣志

文徵

記

百七四

績焉若以駕溪澗爲通衢乘波浪爲康莊歸功於予予則何敢今予行有日矣橋成而欄楯尙闕心未慊焉原董事者以終始其事酬予夙志是所願也

楸樹潭汪公橋記

辛金鑑

萬邑西行六十里許爲楸樹潭潭之下越二里有橋名下亭明正德間石塘龍大智創修嘉靖癸巳圯於暴水其子昇通伐石斲材仍其故址架而甃之架樓十餘間上通湖粵下抵江淮是亦康樂之通津也迨甲寅兵燹橋復廢居民行旅卻步江干者日不知凡幾康熙丙子先君受中偕龍運開林雲澄等倡導善信重建石墩架木爲梁約費數百金而橋復興於茲二十餘年矣雍正十年五月洪水破墩大水漂流維彼行人其何以免厲涉也論者謂必墩脚橋面盡以石甃如康樂橋庶克垂久第工程浩大用費不貲憂乎難之幸我賢侯汪公白下車來痾瘼在抱一切興舉墜廢凡有利於民者靡不引爲己責適往萍邑道經於斯目擊行人病涉心焉憂之爰屬廉巡馬與鑑等集鄉之善信丁延及李

沐天辛九成林漢承龍達遠等共董其事而侯且捐厥俸殫厥心籌畫經營悉協民志由是閭閻樂助父老抒誠經始於壬子五月之初告竣於癸丑十月之望橫計二丈五尺直計二丈八尺約費二千餘金詩曰庶民攻之不日成之又曰有斐君子終不可諠兮然則斯橋也是即賢侯之甘棠也且在昔橋名下亭而興廢遞更曷若茲之玉虹橫江金鰲跨浪而頌我侯之德於不衰也乎爰題其橋曰汪公橋俾後人報侯之功思侯之德與康樂橋並垂不朽焉是爲記
重建康樂公祠記
邑廩生袁寬

謝公靈運之名垂天壤也固不因祀而重亦不必藉記而傳然予獨有異者古今文人才士其所以彪炳當時照耀後世不與庸眾同其澌滅者祇以其發詞之工繪藻之妙令後世操觚家奉爲科律因其文以想見其人耳未有月視俎豆經陵谷滄桑而愛慕弗諉如康樂謝公者蓋德業文章自古難兼夷考江右十三郡名宦其爲文人學士者遠亾古今不過韓昌黎范文正蘇文定數人而

萬載縣志

文徵

記

百七五

已然數公者皆際得爲之時而又有親民之責久於其任因以布其經綸綿其高澤入人深而繫人思固其所耳若謝公者丁晉祚之末造值劉宋之多故負濟世之才而無所施蘊忠憤之略而無可展於是寄情山水託志嘯歌而不知者或擬顏鮑或比二陸又或致疑其疎豈不過歎觀其薦長瑜識惠連論公閭潘陸具有卓識使遭際聖明倚任綸扉功績必有過人者乃僅以先朝世胄襲名爵土未幾以廬陵獲罪再起祕書監復爲臨川內史尋爲永嘉太守其於康樂遺封亦如遊旅過客瞬息位號已耳乃康樂之人於公所遊歷之處率著其本末誌其原委由是境內山水蒙公姓氏封號者指不勝屈傳至有明尙以名其橋又復建公祠宇則民之不能忘公與公當日所以撫綏民者視韓范諸公爲何如又豈顏鮑諸人所可同日語哉雍正八年邑侯汪公由長寧調萬既蒞康樂橋之成又覩其寺在橋北岸者堂宇湫隘且與釋氏雜處乃率紳士謀所以恢廓之紳士素慕公徽烈共樂宣力咸推郭君邦藩汪君之圖高君代等仔

肩其任乃革其故而鼎新之繞以垣牆華以丹雘宏厥巨麗視昔有加適公裔
太常公巡撫江右復製扁聯雲章燦爛不獨生俎豆輝亦且增江山色矣或曰
謝公翩翩貴胄才名卓犖馳驟千古又重以鳳超諸公之賢接武祠宗後先濟
美積慶所流卽靈爽之所在又何必於一州一邑中沾沾焉俎豆之妥佑之歟
予曰否否夫不聞眉山之言乎賢人之在天下如水之在地中無往而不在也
又不聞劉季之言乎季力經營奄有四海酒酣耳熱猶曰千秋萬歲後吾魂魄
猶樂思沛况爲公星流嶽降祖父世守之區乎則謂公靈爽實式憑之亦無不
可惟是昌黎刺袁無擇爲之立廟范公守饒十朋爲之建祠穎濱沿筠逢辰爲
之崇祀而祖王諸公政治文章復與韓范埒殆亦惟其有之是以契之耳今汪
侯訪公遺躅拓新祠宇則其爲人與其志之所存可知矣異日者人過謝公之
堂瞻其巖翼思其重新之功不惟謝公遺澤流傳不朽而我侯尊事名賢之功
亦與之不朽也予雖不文亦安敢不述其興建之績俾侯與康樂公之名共垂

萬載縣志

文徵

記

百七六

天壤也哉至若碧流縈繞古柏參差長橋且其前嘉林布其後足以妥公靈而
壯廟貌者我侯暨紳士雅韻已曲譜其盛矣又何敢贅

重建康樂橋記

訓導邑舉人楊

言

嘗讀康樂橋舊記其創建之人題橋之名與夫水源之所發下流之所通傾圮
修復之各紀其時高廣延袤之悉志其度以及木石之因革亭棟之建豎詳哉
其言之矣余竊謂橋梁之興創建爲難而修復亦正不易修復而實同於創建
且其功倍於創建爲尤不易也蓋必天時地利人和兼備而後可以成功卽如
斯橋燬於崇禎之末年未克修者八十餘年矣往時孝廉宋君希陳渴欲重修
倡而弗應遂以不果蓋其時物力猶艱也迨雍正四年邑侯程公復南浦橋得
良工盡撤其舊而新之橋成人各歎美因欲重建斯橋斯橋修廣崇高僅倍於
南浦橋而估其工費實過南浦橋十倍乃自邑人高君愈謙龍君言一倡而樂
輸者恐後經始於雍正六年越四寒暑乃成會其工費萬有餘金非人心之協

利能如是乎橋之舊址惟以木椿木板基其下今則掘及數仞而四墩兩岸俱屬生成石底咸稱天造地設已爲奇矣初伐石獅子山運以舟楫順流而下不十餘里卽抵橋畔方謂脚費甚輕及其後採於橋之北岸山頭悉有大石其堅確猶愈於獅子山者且近且便抑又奇矣此非得於地利者乎事之興廢因時盛衰萬故殘疲蒙聖朝休養百年間閭閻阜物力寬紓且工閱四年春夏無霖漲之虞三冬少沍寒之苦俾眾工匠得以就事此又仰藉天時之助洵不誣也由前觀之其修復也若有所甚難由今計之昔架以木今易以石高聳之勢拔地倚天水不能衝火不能燬石獅有四以鎮之石欄有百以繞之視舊制超越多矣所謂名爲修復而實倍於創建者也丁田爲萬邑水口橋廢之後人文財賦不逮往昔今旣隆然屹然鎖鑰於奔瀉急湍之中而視昔有加則所以苞凝風氣蘊蓄精英以鍾秀於萬載者當必有大過於往昔不負眾建之雅意者矣邑侯汪君旣捐助以要其成復據邑志清出橋田率眾力重建祠宇於橋北

萬載縣志

文徵 記

百七七

岸以祠康樂公配以姚侯云

重建康樂橋碑記

巡撫謝 旻

夏令九月除道十月成梁在孟子則十一月徒杠成十二月輿梁成古者道路之政歲必修葺故能歷久而不壞自周禮獨缺冬官一篇而民始有病涉之患袁州萬載縣城東北八里許舊有康樂橋北通寧州新昌南通宜春分宜爲往來孔道元至正年間邑人龍駒實創建橋謂謝康樂嘗封此故名明季燬於流寇至今垂百年設舟爲渡秋冬水涸時行者以濟春夏雨水暴溢橫流急湍津渡維艱民不便之今雍正五年福建許松估來令斯邑政旣洽於民念斯橋之利濟實遠不止一邑所關勸諭重建士民譁應會眾樂輸得萬餘金匠作競力木石堅緻不費於公不煩於民興工於雍正六年八月十一日訖工於八年六月三十日爲袤三十丈爲廣一丈六尺下爲洞五橋旣成許令方調繁南豐於其行也以文來請記其事按萬載縣在晉時爲康樂縣吾先車騎諱元肥水之

捷以功封康樂公子煥孫靈運世其爵故其地有康樂水有謝山皆以得名今康樂橋跨丁田水卽康樂水通流而世人所稱謝康樂專目靈運以其才之著也余故因橋之名而稽其所由來如此方今聖治振興萬民樂業百廢具舉許令克勤其職能以餘力用成此橋而江右士民深受國家百年休養之恩心知感戴故樂輸募義唯恐後時宜其作之也不勞而成之也甚易我皇上課吏教民之道於斯橋也亦足徵化之成矣夫康樂美名也縣又稱萬載繼自今以往庶幾哉五穀用登百物咸阜風俗恬熙用垂億萬年無疆之休也與予先世實顯於斯今奉命來撫茲土而茲橋適成樂其利濟廣而吏士之知勸也遂爲之記其文於石欲俾後人知成毀之由時加修葺能歷久而不壞尙永其澤於無窮也夫是役也許令松佶實董之而萬邑貢生高愈謙諸生龍言各出五百金爲首倡從而樂助者或百金或數十金以至數金者若干人皆知義者也例得書

萬載縣志

文徵

記

百七八

學田記

邑教諭南豐拔貢趙孟琪

聞之見利思義孔聖垂訓經界必正孟子良法是以利之所在君子必及其心善其法以處之苟立法有義則人心服人心服而其法可垂諸永久矣萬邑儒學有學田共叁百叁拾貳畝玖分壹釐六毫原立四項名色一給貧士一給社學一贍兩齋一修學宮四項之田概歸學管此各憲立法盡美而盡善者也但不預立條規散給之際必且爭多競少管理者不惟任其勞抑且任其怨矣是用剖督至精絲毫不紊使管者不煩受者相信豈非公其心善其法哉今據原文以張令田五十畝給貧士查張令所置一段福塘貳拾壹畝玖釐壹毫一段藍田壹拾玖畝捌分柒釐貳毫貳絲一段新田壹拾叁畝貳分五釐大共伍拾肆畝貳分零卽以此三段所收之穀另貯一所除完糧及山河搬運耗折外現存穀若干令真正貧士先造名冊然後示期分給各持領帖赴學親領但此項田內尙多四畝二分零應以三畝三分補社學不足之數除九分歸併修學項

內此零星之數猶必清哲者蓋以每歲終造冊報司庶與原文數目不至互異也又原文以徐令暨程守田給社學查徐程之田止四十六畝七分零尙不足數當以貧士田內所餘三畝三分補足其徐令所置一段東關外肆畝柒分貳釐壹毫一段泉陂院壹畝玖分八釐壹毫程守所置一段徐家塘叁拾貳畝一段煙塘捌畝大共五十畝零卽以四段所收之穀另貯一所除完錢糧及山河搬運耗折外現存穀若干令社學師徒立領帖交學佃穀又原文撥給一百畝以贍兩齋餘田一百三十二畝九分零爲修理學宮之用二項原文並未明指田段不能分佃今以陳令并孟署篆所置棧下梅源涂泉後塘四共三十六畝畢令所置白水楓子塘仙居橋清水塘思公坪宋院尖山下七段共壹百玖拾陸畝又貧士田內餘九分零大共貳百叁拾貳畝玖分零卽以十一段所收之穀一併存貯除完錢糧及山河搬運耗折外兩齋各受五十畝之入其餘一百三十二畝九分零所收穀担照時價發賣易銀除每年修葺外所餘之銀借縣

萬載縣志

文徵

記

百七九

庫存貯俟蓄積充盈爲建造崇聖祠之根柢此與贍兩齋不分而仍分者也以
上田畝既有四項而事權歸於一人其責成固不能辭然襄力必須得人將專
任書役慮其朦混滋弊飽囊私室將信任家人又恐人地生疎欺瞞坵角尤不
能作躬親履畝之計用是立子弟代勞之方每年於兩庠中公舉一二誠實者
管理收支貧士社學諸務其贍兩齋及修學一項亦借力總理此必公爾忘私
亦必敏於治事者而後克勝其任也似此區畫清明分給公正豈非所以正經
界而見利思義者哉以是垂之千百禩可永久而無弊矣是爲記

浴花軒記

知縣上高進士江學訓

余幼讀書爲文章喜翻花樣老師宗匠以爲秀色可餐屢蒙賞異迨春秋二閏
嶺華取實出知河南桐柏縣栽花餘閒輒復論文旋以親老政官饒州教授日
進生徒課之桃李盈門幾忘身在青氈冷署中也萬載彭子明直與從兄孝廉
元升以粲花之才提唱風雅爲鄉里引重寓書於予求爲浴花軒記予謂文者

心之花也儒者讀書十年養氣十年本之經以沃其根叅之史以擢其幹擴之唐宋元明諸大家以沃其葉漱六藝之芳潤挹諸子之菁華採藻摘華而心花開焉設色描神而筆花生焉平者奇者濃者淡者層層門巧步步入勝令人目迷五色而應接不暇又況秀骨珊珊花之君子也精氣內蘊花之隱逸也光彩煥發花之富貴也蓋其浸淫於卷軸者深故其發於文者麗也今彭子既構斯軒復於隙地雜蒔花卉比艷爭妍每當花晨月夕與羣季招子姪及近村子弟之肄業其中者品花衡文務使文章之花樣一新將見榜花盛放探花於上苑簪花於大廷於以上助菁莪之化下增桑梓之光也無既矣因不辭而爲之記

元夜龍河渡玩月記

邑舉人張明德

去城北數十步有龍河渡縣所稱八景之一也更數武爲白竹山予偕二三友人讀書其處正月望夜挑燈論文且飲且歌飲罷相與攜手而游焉至渡頭挽舟溯江而上更放乎中流兩岸之上燈光閃鑠管絃嘔啞童稚之歡笑士女之

萬載縣志

文徵

記

百八十

嬉游者不下千數蓋終歲之間不再見焉是夜也明月似霜煙銷霧釋曠野清空極目無際予樂之甚徘徊乎其不忍去也久之羣喧靜江風清月覺益明予時心境瑩澈萬感皆忘身立江舟風帆之下心照天地古今之上不知月之在心心之在月也予告友曰夫月衆人之月也樂則吾與子之樂也以今之月而煙銷霧釋信能明矣使一時煙霧皆集月亦能明乎以今之心而萬感皆忘信能樂矣使一時萬感俱起吾亦能樂乎然則心無時不樂也而有不樂者譬之月也煙霧害之耳友人曰於此可知治心之學矣請歸而記之以無忘此月

屏石記

張明德

高村里中有石焉拔起平曠邈焉寡儔高盈雉而廣踰丈面西以展望之整端如巨屏然故邇李氏席上居李氏世稱屏石云今年夏予讀書其地遍閱奇勝特愛是石日與席上昆季盤桓其間高村僻在邑北溪山合沓縱廣殆十數里奇氣所鍾是宜多有乃以吾所知者李氏才俊而外僅見此石又以其生之僻

也貴游之士不知問農夫漁父過而隨之惟李氏悅之深世與居焉今更備予一見而愛玩不置其亦有分存其閒耶予因私念吾邑絕少佳勝如迤邐諸石岸眾亦取而品目之以爲美景其不逮此否遠甚獨怪造物者不以此石公都邑而以私李氏也雖然造物之愛憎似與人不同人情尚奇哀喜諧媚故惟迤邐諸石如牛馬熊羆宛轉自致始合其氣類若此石直方端慤於人世正不相當耳園林之羅列巾箱之取攜過竹溪銀砦之工搜奇劇秀則貨而狎之此石安可干耶然則造物即公之都邑人果能好之否耶宜此石之私昵李氏也嗟夫世俗好邪惡正下至觀玩之物亦莫不然可慨也已

遊觀音洞記

邑教諭峽江副貢袁繼輅

凡山之佳以石石之佳以洞瓊康城皆山也而多石由城南門出山行不十里有大石洞二焉其一曰觀音洞闕客董君躍瀾攜子耕隱於其地誅茅伐篠搜奇抉勝爰得斯洞顧余閱康乘所記山石之勝佳不一而茲洞獨不見於志

萬載縣志

文徵

記

百八十一

往來士間有爲余道者心竊識之越明年三月董君忽遣其子持柬來曰余所居去洞僅半里許家君特治蔬枉駕余甚喜卽肩輿行時同城城守李君人兆同寅司訓鄧君天序暨邑孝廉郭君等皆與焉及至董君體肴備具酒半余躍而起曰此心與洞靈有約舊矣吾輩且停杯一遊毋使洞靈久待也董君乃治火炬命傭工者數人持火以隨從洞外俯視其中曠如敞如若堂若房徐而下於洞門稍憩周回審視其上則石色巉巖如古鐵類人工斧鑿痕石漿滲滲滴其下則平坦如砥可坐數十人左右石壁皆嵌空玲瓏均者如窩大可踞坐小亦可置器計其高下徑廣俱可丈五六尺乃由洞稍進有小石室如方丈然光漸微僅辨人面過此則暗如黑夜矣於是燃火炬以一人持火前導中間隔一人一火人各以手捫石壁轉入如小巷行十數武則見前持火者側肩從石縫中緣而入前一人以手牽第二人臂後一人從下助其足乃可上其次復然又其次復然計上五六層前持火者大呼曰觀音在是矣因相與瞻仰見一巨石

巍然莊嚴如大士坐蓮者其身高可丈許第未見面目余方欲畢窮其狀而特
火者遽促下曰少頃火盡不復識路矣斯時也陰風撲面風從石隙中出颼颼
有聲人語如在甕中余亦心怖遂疾下諸君咸以不獲瞻大士面目爲恨余笑
曰嘻大士億萬化身求真面目何可得但以不獲窮斯洞之奇爲可惜耳乃相
與出洞門取道而左尋所謂小洞者洞較前隘而石之玲瓏滑澤又另一番色
相其壁亦有隙縫謂從此緣而上則石之四圍皆空可環遶而行惜乏火炬不
敢入也徘徊久之復返董君宅舉酒再酌盡興而歸抵署已二鼓矣余以是信
康樂之石果多佳勝然不遇董君則茲洞至今猶埋沒荆榛蕪翳中耳余既佳
斯石又以賀斯洞之遭也爰爲之記以補康樂邑乘之缺至觀音像之真否其
事近誕祇足詫鄉之父老不足爲斯洞異也

萬載縣志

文徵

記

百八二

遷建文廟記

清拔貢汪朝祖

從來興造既畢例記其事而於廟學爲尤重予嘗讀唐昌黎韓公宋眉山二蘇
及我江西文忠歐陽公荆國王公文定曾公盱江李公象山陸公諸碑記下逮
元明名作如林其於古帝王設學明倫之意教育人材之方崇祀先師之典言
之皆精切詳明迄今照耀簡編彪炳宇內矧乎尙哉後雖有作莫可及也已今
年秋予邑遷建文廟成邑諸君子謂宜有文以志顛末謬屬予七老矣言之無
文行而不遠其謂予何諸君子曰是役也先生身與其事者久願有以紀其實
予乃據實而質言之邑文廟創始於趙宋間厥後再遷今址地廣袤明洪武初
建學於東偏下截越數百年俛興俛壞最後重新於雍正癸卯春間殿堂門廡
諸制具備顧其地勢湫隘蠹蟻滋生未數十年棟梁俱空椽桷並圯邑紳耆相
與太息僉謀撤而新之遷而大之相彼西偏前瞰綠水後枕高阜厥土爽塏厥
位面陽僉曰遷是地爲宜於是育貢生高嶠者首捐六百金監生王家塾亦捐

四百踵起者各捐助有差乃購木於鄉伐石於山陶磚瓦於野募良工於遠郡歲壬申羣材稍集工匠畢至興工於三月五日越明年癸酉擇吉豎柱因例應詳報邑紳士屢呈請而邑侯朱難之至再三乃遵府檄通詳報可士民咸喜工匠競勸首建大成殿柱皆巨石梁選名木塗以丹漆飾以金碧其堅緻雄麗宏敞軒豁他郡邑未之有也殿之後爲崇聖祠殿之前爲露臺臺下爲甬道俱鑿石爲之甬道左右爲東西廡廡下爲戟門崇廣深邃視殿稍遜上有樓樓之上窗櫺四週光明洞達登樓遠眺山川景物如畫門之左爲各宦右爲鄉賢祠門之前爲池池廣而深中跨石梁梁兩旁繚以石欄池之上左爲禮門右爲義路池之下鑿巨石爲櫺星門門前爲屏牆開道德二大門其諸位神龕及崇階峻級俱用石者固久遠也於東廡墻外構明倫堂及頭門堂之後建儒學兩齋各二棟又於西廡墻外建忠義節孝二祠廟內外橫貫路及圍垣皆砌以巨石凡所作皆堅實精密而廟學以成是役也締造經費通計一萬兩有奇始事於壬

萬載縣志

文徵

記

百八三

申季春訖工於丁丑仲秋維時邑侯張公莅萬甫暮威惠並著政修事舉睹斯作之成不勝欣喜與儒學魯公藍公以其成事具詳上憲焉吾因是知天下事惟難於慮始耳故曰非常之原黎民懼焉及臻厥成晏如也夫以小邑而興建大役非常事也宜其懼也乃以六載勤勞成一時盛事是豈偶然哉後之覽者知遷建之維艱念成功之不易時加修葺則斯作也庶幾垂之千秋萬禩而無敝矣茲役也提調生員汪發楫貢生高懋會計生員郭治清監生聞鳴鶴掌收樂助生員生辛廷皋武舉宋拔監生巢起隆生員汪發峻胥吏郭秉毅拔貢生巢起崙募勸舉人辛廷芝王都毫督修生員周繼盛職監辛衢共矢公慎協力同心始終不怠是皆可嘉也例得備書乾隆二十二年丁丑孟冬月

重修文廟崇聖祠

主事邑舉人辛文彬

邑文廟移建於乾隆壬申距今四十餘年矣聖殿四壁悉甃文磚厥柱以石枅櫺榭完好如初惟殿外牌樓雨淋日炙年深質朽旦夕間摧壓是懼而崇聖

祠木柱盡滋蠹蝕值邑中建考棚諸首事先將牌樓拆卸擬鳩工庀材急修葺而力未暇也嘉慶五年彬告假歸周覽上下惕然不安適考棚工畢卽與首事謀之諸紳士之有力而好義者慨然捐輸自數百兩至四十兩不等計得金八百有奇慮不敷議收考棚餘金以助旋將崇聖祠撤新之地基填高二尺柱易以石締構堅緻大成殿牌樓雕鏤丹雘巍然煥然其餘廊廡門檐上下兩旁缺者補之剝者更之無不慶廟貌之重新也因思我邑自昔廟制規模宏敞爲郡之冠迄數十年樸素渾堅無改於舊此先輩創始之功也間有朽壤諸君葺而新之復可資崇祀者之瞻仰而我邑侯仰承聖天子尊師重道之至意涓吉敬懸御書聖集大成匾額於廟中諸生以時習禮其間瞻仰雲漢涵泳聖涯必有鼓舞奮興思所以樹立者風氣蒸蒸日上益光於前是所望於有志之士已興工於嘉慶六年七月越明年七月告竣同事囑彬記始末敬浣筆書之

重修學宮記

邑令壽張舉人崔登鼈

萬載縣志

文徵記

百八四

萬邑據江右上游山環鵝嶺水繞龍江奇秀所鍾代興賢哲地雖偏隅其士氣文風與通都大邑相埒而聖廟之宏敞自昔稱爲一郡之冠粵稽廟貌肇於炎宋歷及元明數經更易迄清乾隆壬申移建今址嘉慶辛酉重修越今四十餘年規模雖壯而風雨久剝傾圮時虞則修葺之宜急也壬寅孟秋予甫莅任詎吉謁學仰觀棟宇榱桷歷覽內外門亭次第興役將易以新詢諸董事乃知前歲七月闔邑紳耆稟商前任韓君彥章廣勸醵費已庀材鳩工擇能勸事矣自時厥後經之營之功逾三載費至萬金各董事勤其督稽謹其出入盛暑嚴寒必居肆所凡在工需用皆自捐自備弗取於公務期賢歸實用是皆予兩年餘日擊心折而歎民不告勞宮牆漸就巍煥也維時譽髦欣匕向風癸卯秋闈辛君斌遂登榜首周君樹贊韓君覲及副車辛君有功同舉於鄉斯殆文明之嘉會而感應之先聲乎迺者中秋大工告竣正殿戟門新易磁瓦金碧相輝照灼雲霞次及前後祠廡堂楹露臺鬢牆凡關廟制學制均仿原式敞者改缺者補

莫不大飾厥善咸與維新黜聖丹漆各中矩度名之曰修功實創焉而千百年
不拔之基視此矣邑縉紳問記於予予既慚不文且愧未與經始而惟念垂成
之易規畫之遠益信此邦之士氣文風大有卓越於尋常者由是而企聖域登
賢關出入禮門義路處則飭紀敦倫於未用之先出則行義達道於既用之會
啟後承先有光學校永承聖天子尊師重道之至意又豈特廟貌之崇爲一郡
之冠云爾哉是役也始事於道光辛丑七月訖工於甲辰仲秋督其成者前知
縣事韓彥章署縣事張文誥前任教諭鄧三升教諭陳煥春訓導李健翎巡檢
吳元理典史王棟董其事者倡修進士盧昆鑾舉人郭光笏辛樹仁劉文毅武
舉劉以成歲貢生王敬叙龍臨汝廩生辛尊五督修附貢生汪茂楠武生林鳳
章張映輿職員陳守謙鮑承勲職監郭功晟辛東卓監生郭林恭王簡心勸捐
舉人周樹贊副貢生辛介福增貢生郭光昕等捐貲勲事者甚多悉勒碑陰是
爲記

萬載縣志

文徵

記

百八五

聖誕釋奠記

學憲濟寧進士孫瑞珍

自民生以來聖人多矣而道莫盛於闕里自漢魏以來帝王之尊闕里者多矣而
典莫隆於聖代不獨京畿郡縣皆有廟堂卽山陬海徼里塾鄉校莫不恭設粟
主以肅明禋蓋聖天子尊師重道雲漢作人之化與尼山之教澤並億萬
斯年永永淪浹也萬載縣學宮年久漫漶經多士葺而新之又有職員鮑鍾瑞
候選教諭宋鳴謙貢生郭如衡職員郭如磐等各捐田若干畝歲支經費請於
先聖誕辰行釋奠禮此雍正五年通行之例而今之郡縣或有行有不行焉夫
後世嶽瀆神祇安稱誕日簫鼓致賽徧於宇內况二龍繞室五老降庭爲至聖
誕生之日可置令甲而弗行乎穀梁傳魯襄公二十一年十月二十一日庚子
孔子生公羊史遷年月各異闕里志則八月二十七日然穀梁去聖未遠同爲
魯人紀載必實而水精之子繼衰周而爲素王必屬庚子無疑矣今萬載庠序
之彥若以適魯無由不得見聖人車服禮器卽於一邑廟庭時欲升其階陞眺

其几筵爰附庚子陳經之意以抒士林將祀之忱事非創行禮以義起庶幾遵穀梁之說而於清會典仍不悖也是則視學使者所徵叅末議也抑更有說焉鐘鼓玉帛敬聖之文也趨踰拜跪敬聖之迹也不愧屋漏如臨師保敬聖之心也使徒循習虛名飾爲觀聽之具雖日登

聖人之堂而離道益遠矣諸生可不勉乎哉邑令崔君登鼇學道愛人孚乎與頌允士民之請而請予爲記故述其緣起俾勒石以垂永久焉

萬載縣學宮土地祠記

瀘谿舉人盧 諤

古者尊天親地教民美報而郊社之禮遂隆惟尊也必天子乃得行之親則食毛踐土之倫皆可舉焉自主社侯卿大夫置社及庶里社制雖有大小之殊其爲土神之祭一也禮不云乎家主中霤而國主社中霤者一家之土神也又曰祭坊與庸溝隄之土神也土所在卽神所在五行百產之生殖無非土地之菁華隨所在而報之宜也然則泮林之棫樸土地之所蕃滋也泮池之芹藻土地

萬載縣志

文徵

記

百八六

之所發育也泮宮之人才土地之所苞孕也無以報之可乎故凡學宮之設皆有土地之祠萬載人多好義文廟壯麗甲於州郡鄉賢名宦孝弟節義諸祠咸附其中而土地一祠獨缺盛時賢哲挺生蜚英騰茂者相望於學神實與有勞焉職員鮑君鍾端慷慨士也感此奮然而興謀出資獨力建之請于縣商于學得聖廟後圃遺址規其東而偏焉乃經乃度是約是楛不數月告成其中爲堂廣二筵深加一筵左右爲房者四有龕有霤有樓有櫺有庖有溜視所附諸祠爲備粵自陳寶雉鳴寰海無不廟之鄉而所祀多涉非類惟土地一祠爲近古學宮之祀土地雖爲會典所不載準以置社里社之例禮不妨以義起也初祠址爲廟後荒地當圍牆之外豐草翳天藤蘿荆棘遍蔓鮑君營建其間豐草除藤棘去嘉樹美楨挺秀而出佳致亦復可觀夫祠廟乃棲神之地而學宮爲造士之區棲神必尚乎清幽造士最宜於靜謐茲祠實兼有其美神靈既妥之餘或借爲絃誦之所并足補學宮所不足房舍固非虛設也然則鮑君之意亦深

矣絕君嘗捐田若干畝興聖誕之祭辦香之奉昕夕無間茲復擬爲此祠洵所稱見義必爲者是不可以不記

重修崇文堰記

清邑令銅仁舉人張立中

自古學校之隆替視人文之盛衰又視學者之所積所積日深則山川之所瀦蓄亦將大洩其奇以助斯文之盛是故時命聽乎天形勝因乎地而轉移則必藉乎人事持此以徵邑崇文堰之成猶信堰創始於前明督學王公其地承竹山烏溪之委匯爲文瀾士之決科者時驗其成毀以覘文運近因科名稍替邑人士改修學宮復後建書院於龍河門外予來莅茲土適董其成既又徵之邑乘謀復是堰議改舊跡甃石爲久計學博魯公亦以爲言而注明經有燦卽引爲已任鳩工伐石器用具備始事於戊寅之夏訖工於己卯之秋既成礪石請記其顛末余方逡巡者久之適秋闈榜發李君榮陞以第六人魁其經同舉龍君鳳祥則明經之女孫夫也一聞兩雋蓋自壬午至今凡再見云

萬載縣志

文徵

記

百八十七

既二君來謝汪君復徵予文予乃指而進之曰於戲天道無不驗而乘時者在人地氣無不鍾而毓靈者亦在人斯堰之源其初亦僅可芥舟而已及其障爲廻瀾瀦爲大澤遂足以壯一邑之人文然使受任者或怠厥事或事成而卒無驗則恃天命與地靈者其說將有時而窮卽幸而舉矣而不如二君之積學敦行則猶不足以明吾人事之說使奮進者益鼓其氣然則非汪君固不能善乘斯時徵二君又豈能遂鍾斯地之靈也哉蓋天地人三者合以增重斯堰也而吾與學則公乃共觀其成爾雖然吾聞水之流也惟不息故可大亦惟不息故能久人事亦然二君年少而力學方進未已而汪君又將終始其事蓋皆未能量其所至後之任事者使皆如月君其人繼起者又皆得如龍君李君其人相與久於道而大其歸則其所至宜愈無窮也其益深其所積之者而已矣諸君曰然既退遂記其語以復於汪君俾刻之石爲後之盡人事者勸焉

疏河建閘記

邑令陳文衡

與利去害有司之責也顧欲舉一事計費需數千緡功非旦夕可就有司者簿書執掌廉俸無幾勢不能獨肩其任而事又處於必不可已則賴於縉紳先生及都人士之力爲多丙戌季夏余蒞茲土博諮地方利病多以城內河道淤塞亟宜疏濬詰其故緣居民鋪戶厯以所燒煤渣沿河傾倒致河身日就淺狹每逢大雨橫溢街衢市民均以爲患水退則深不盈尺艱於灌溉學前舊有筆架石高出水面六七尺旁有深潭今已堆成連阜水逼東岸石埋土中久不復見及今不治將河道變爲溝渠城市有淪胥之慮余深然之適秋霖河漲宜萍分三邑均遭水災萬邑不通袁河幸無恙然益信疏濬之宜亟矣第功大費繁縣令力不能給時郭君大經辛君朝俊俱致仕家居方董建文昌宮及寶興堂事余往詢之曰先生經濟鴻才退而以文事振興桑梓蓋云盛矣顧事有關於地方民生之重而勢不可緩者其今日之河道乎郭君瞿然曰然此固十數年來所耿耿於懷志焉而未逮者夫疏濬河道必先禁止煤渣然須得空曠餘土

萬載縣志

文徵

記

百八八

使民間有消納庶幾令行可久疎濬後不復淤塞且沿河惟蓄洩兩端其使早有所蓄而不至洩潦有所洩而不至潰者全在崇文一堰今久被水冲塌是宜於壅塞處所闢之使寬而能受濬之使深而能容俾河循故道斯汎濫無虞更於舊堰添設石閘則濬蓄宜洩啟閉由人匪特水患可除而上游田畝得資灌溉樂利正無窮也余曰善哉先生其胸有成竹歟幸爲我條其機宜次第興修可乎於是查出各門空地立界碑諭市民煤渣各就附近官地挑傾舉邑中老成才幹者襄理其事士民踴躍捐輸得金錢若干數乃涓吉刑牲祭告河神自南浦迄龍江逐段疏濬隨於迴瀾橋下烏溪合流之處堅築隄岸使水勢就西以循故道大募夫役將學前一帶渣土併力挑挖閱數月而河身仍舊所謂筆架石數十年不可復見者遂挺然在水中央波瀾浩淼曲折縈迴非復向之奔如流箭一瀉無停矣由是購石鳩工於崇文舊堰改砌建閘勢取乎因而事兼乎勦蹟仍乎舊而功倍乎前匠作競力備極堅緻秋杪告成而河之全局庶臻

妥善已嗚呼以數十年憂水憂旱之區余不揣力量與二三君子黽勉共圖俾
城市居民無水溢旱乾之患幸何如也且閱縣志張公記云崇文爲堰秀水瀦
蓄科第蟬聯從前堰圯水涸萬之科第不競者廿餘載迨重建後士之雋春秋
闡踵相接也又志載筆架山屹立中流與儒學拱對有識云水打筆架穿龍江
出狀元蓋不獨河道攸關實爲文人興起之地所繫豈淺鮮哉功既成士民相
慶謂今而後旱潦無虞文事且蒸蒸日上焉抑余猶有進者河之壅塞由於傾
倒煤渣茲有公地足以容納遂可無憂其繼乎蚩民何知遠慮惟近便是圖使
後之人不思堆積之易疏濬之難徂目前之私便不時申其誥誡將禁令一弛
河身旋失善後事宜何可不預爲之計諸君子竭蹶圖功經年始竣亦云勞矣
其與矜士耆民時加約束以補有司耳目之所不及俾泄泄者不得縱其便安
洋洋者無復失其故道患永除而利可久庶諸君之勞績與龍河之澤俱長矣
是爲記

萬載縣志

文徵

記

百八九

創建文昌廟記

邑令陳文衡

邑隴河門內舊有閣曰文昌康熙初前令常維楨因其地而修之記載前志雍
正十年前令汪元采率士民重建并塑祀帝君奎星像於閣中因其地踞高阜
藉以撐峙文峯雖體勢巍峩而規模偏仄原非宮廟制度也嘉慶六年奉旨以
文昌帝君有功文教仿照崇祀關帝典禮每年春秋動地丁銀致祭著直省各
州縣一體遵照於是天下郡邑皆立廟崇祀萬邑以乏費未卽建就試棚內恭
設神像朔望行香春秋祭祀悉於是乎成禮然而宮廟未營終不足以彰盛典
道光四年邑紳郭世華辛錦斐陳鼎龍宋珊宋海嶠宋謨策郭如岡郭樹藻鮑
啟倫九人子孫僉願捐貲建造惟卜地購材尙需時日未敢率易從事六年文
衡來宰茲土世華子大經等業已筮地北關內相與擇吉鳩工仿廟制構造爲
中庭九楹石柱八重簷四流繚以飛楹周圍石柱二十有二暨牌樓於正中環
以石階階下爲露臺臺下爲甬道拜埽俱甃以文石左右廡廊石柱八列魁樓

於前飛閣拱翼閣前爲儀門內外石柱八閣左右爲官廳旁各有室中庭後爲先代殿石柱六東西夾室四爲祭器庫墀以磚牆牆外西偏構屋五間爲守者棲息地開闔壯麗美奐美輪經始於六年八月至七年秋遂迎帝君神像於新宮行祀禮嗣加斷龔丹雘又五閱月功始竣共糜白金萬一千七百有奇皆九家釀貲經理不旁及焉衡於此竊有感矣世傳帝君爲文章司命士之登科甲躋膺仕者實主宰於冥冥之中萬邑人才輩出甲第蟬聯內致卿貳外膺民社者後先接踵爲帝君眷佑久矣今者廟貌既成神靈以妥雖感應果報之說諸君子不以是存心而宮庭翼翼俛歲時薦馨者得以對越駿奔冀陟降之在庭也帝君實式憑之其益有以福此都人士殆亦理之可信者歟至於不惜多貲經營創建藉以襄盛朝祀典之隆如九家者可不謂勇於爲義乎哉謹記

惜字堂樂助題名碑記

辛從益

萬載縣志

文徵

記

百九十

嘉慶甲子夏有惜字會之約諸同志翕然應之領帖四出書者雲集比冬聚帖計釀錢若干足敷製器募工之用懼其易罄也乃置田爲久計歲收其租入而量以爲出初置某所田若干越明年裏源汪君某又助田若干於是租饒而用給歲遣人坊鄉拾字遐僻之阡山盤水屋罔有弗至萑而收之龜而積之歲終而焚之邑境之地殆無片紙遺字矣然尙未有記也又數年司事諸君乃謀鑄樂助名於石而屬余記之夫事無難易期於善善無大小難於同以字爲聖人之製而宜惜也其於興學育材所以尊敬聖賢道德之意尙非其大者人各私其力愛其財肯出以應不急之務乎乃帖甫出而諸君子轉相勸輸或爭輸恐後不期年而事集以此見人心好善雖小樂從又况其大於此者乎輸既集曠數年未刻石登名而輸者不疑雖司事之賢與事會之偶阻足以相諒亦足見風俗近厚也抑予有慮焉夫義舉者眾慕之名而必出於善必不背於聖賢乃不感於非義之義是會也積租稍贏或欲兼爲他用然與其動而失正也毋甯

靜而守之使義皆由正常如惜字敬聖賢之意而擴充焉奚不可也不然即止於是焉亦奚不可也諸君子善保是哉嘉慶戊辰孟夏既望

重建武廟記

衛鵠鳴

關聖帝君自漢以來祀徧天下清封號彌極加崇蓋以天下生靈之所受庇厚其報也春秋致祭鉅典煌煌蓋爲天下生靈延福澤於無窮重有祈也然非帝君皎然之心浩然之氣光日月而塞天地照人肝膽刷人精神曷能使朔望晨昏供香火者自官員及士民雖婦孺無不虔焉則其節義之昭明綱常之振興天下之人莫不有聖神之監臨在於且明屋漏中而思所以尊親也萬邑關帝廟善志載在雙虹橋今失其址明邑侯姚公移於靜安寺前殿其移自何所亦闕如相傳邑生員宋啟洛集同志百餘人修祀事以爲美談而展祀時宰牲佛前祭者不安邑之人士皆不安焉乾隆四十年職監生辛琿捐石柱六志立廟以獨力寡勩未果嘉慶十六年生員某倡建勸捐數百金以功程浩大未集也

萬載縣志

文徵

記

百九一

余以道光元年春來任斯邑瞻謁時心念悸聖帝有特祀而無專祠宰之罪也嘗與邑人士言之皆爲慨然幸莅任後年穀順成人心鼓舞卽捐廉勸邑人士併力舉之職員宋維新等首其事城鄉土籍皆踴躍樂輸不數月貲可舉矣卽卜基於靜安寺左鳩工庀材作於道光四年十一月告成於五年十二月殿廡門庭與藏貯祭器供事值宿之所煥然肅然無不整備共計三十三間需白金五千有奇以余之舉其事而將去也屬爲記余以萬小邑非年豐人和不克成斯舉今以百數十年善人信土力圖而未逮者期年而告成民力之足以濟眾心之罔弗協無非神之所感而通所佑而行也抑無非邑之人崇義尙節炯然悚然覺有聖帝之神在於心懷而後不忽於所行也已是則節義之所關綱常之所係必有介然其不苟毅然其自豎者由此純臣孝子端人正士森比林立其成風矣受福其餘事也而爲福莫大於此也余惟記其始末推其意爲一邑勸焉廟之基宇及捐貲各數併勒碑陰以示來者道光七年秋七月

武廟先代祠善後記

邑歲貢王敬叙

夫天生神武世澤篤慶其發祥之所自宜尊敬所必推恭惟關聖帝君功垂炎漢羽佐熙廟屢彰異蹟號稱聖神祀典之隆與先師並乃規倣啟聖祠制特建先代祠禮肇三代爵封上公後海先河禮由義起豈非典章明備邁往古所未有哉吾邑武廟建於道光甲申其始末具詳衛侯碑記顧正殿雖幸落成而先代尙闕祀所非所以仰體孝思欽承甲令也爰集同心用載籌畫或輸眾項或解私囊庀材鳩工不數月而葺事如式伸誠敬焉夫吾邑邇來義舉頻興若文昌宮寶興堂屹然與武廟對峙東西岸壯一邑觀瞻他如濬河渠修崇堰起文塔所以培風氣而宏利賴者靡弗具舉故宦吾邑者仰神靈之式妥展謁維虔眷川嶽之鍾英攬勝溢美謂此邦人心悅豫默召休嘉其應時際會理固無爽茲祠其一端也斯舉也勳資得四十六人計締造所贏尙餘貳百緡并兩廂歲租可永供香火及修葺費是在擇人董理遞權子母歲會出

萬載縣志

文徵

記

百九二

納自可善始善終垂諸久遠也詢謀僉同已謹誌緣起於簡端

重建城隍廟記

邑令廣濟進士魏邦達

昔者聖王之治天下也明則有禮樂而幽則有鬼神鬼神之事蓋昭昭也矧今天子當陽百靈効順每邑之有城隍神尤與宰官相助爲理者乎宰官理陽事城隍神理幽事一切彰善罰惡之典宰官以刑賞爲之倡神以禍福示之應故雖有頑梗不率教者莫不陰相轉移於其間至其禦大災捍大患保安疆土庇祐生靈尤神功之彰也在人耳目者萬邑城隍神靈顯最著前邑宰章有記曰自余承乏八年若與神接禱雨雨應祈晴晴應即以疑獄禱之神必先告人或疑其誕余竊驗之不爽溯神自洪武二年肇封護國顯忠王迄我大清二百餘年馨香相延勿替至咸豐五年廣粵匪雜起經過之地兵燹爲災而廟宇之存留者無幾時則邑宰爲直隸李君藹堂躬歷戎行招援鄰勇屢克而城邑以復雖曰人謀之臧抑亦神靈有以默相之李君乃董率紳耆集首士王傳學宋仕

賢林鳳章辛惟寅何文鼎等鳩匠庀材規模隆起九年三月達奉憲調承乏是
邑邑廟以經費不敷猶未竣事乃督催各捐戶踴躍赴工毋曠乃義舉十一年
三月粵匪復出撫建分竄吉瑞各郡責屬戒嚴賴眾紳同志倉猝起團防禦相
持半載每戰必捷賊烽由是而靡或曰是役也聞警先卜之神神示以無恐賊
與我兵相持嘗見有神兵相助及出師接仗遠近望有數白鳥飛覆旗竿示兆
者其得之傳聞雖無確據而要之保衛地方神與人俱有責焉此則理之所可
信者固然其無足怪却又聞之皇天無親惟德是輔鬼神無常享享於克誠方
今數際屯邇城邑半遭烽火惟期都人士廣為勸導巧者返樸澆者還醇勉附
於栽培之列俾神得施其保護之功永遠奉明禋於勿替也是又鄙人之所厚
望者矣今廟貌將次葺事而達亦因保升卸萬象眾首士請叙於余因爲之巔
末以記其事

重修城隍廟記

辛廷芝

神有功於人人必祀之城隍之神功於民也大合一邑之民物水旱疾疫盜賊
悉資保障是以歷世奉祀唯謹自洪武二年詔封爲公侯伯爵有差厥位既尊
其神又最靈萬邑城隍廟明正德九年邑人義宰辛公閏獨力捐建山陰朱外
翰憲訊越崇禎十一年合邑重建邑侯西吳韋明傑記清康熙二十五年廟遭
回祿劉侯體元倡士庶更新之邑貢生辛公礪記歲久廟寢門廊神像皆朽壞
乾隆三十八年西川進士楊侯長佐莅萬廉明且勤見廟宇溼漏無乾淨禮拜
地因歎曰廟壞如斯奚足妥神神致多福以安我萬而萬之人竟坐視神不安
其位非所以答神貺也余雖初蒞茲土願捐廉爲倡邑士鄧君鏞等承侯意偕
同志十餘人董其事撤其舊而新之邑之人知其克矢公慎也感踴躍捐囊焉
鳩工三載規制初就而鄧君歿於是而有起而疑之者告余曰聞人有功於神神
必佑之今鄧君年耄勤勞竟不能假彼數載親睹成功豈神不佑耶余曰不然
正惟是乃見神之所以爲神夫天地無私陰陽而歲功成聖王無私賞罰而中

外服鬼神無私喜怒而鑒臨赫城隍之神代天地聖王以宰民者也謂有功於
神神必報之是以私交也此與貪墨吏暗地受賄囑妄予人以禍福何異古者
聖人設神道以立教非能禍福夫人之謂其謂人能確循人道而無所於苟如
父在斯孝君在斯忠兄在斯恭友在斯信盡孝弟忠信之實積之於衷施之於
行乃足以感天地而通神明倘不遵人道之正祇藉神力之顯應雖朝夕焚香
翦牲匍匐於神座之前祝曰神其佑我神其佑我神且厭惡之尙望其降爾福
免爾禍乎今鄧君體楊侯意爲此非有所祈於神神豈有所私於鄧各行其正
予奚以私心測神聖爲疑者聞言乃釋今廟工告竣視昔有加黝聖丹漆金碧
璀璨巍然煥然其所以妥神者至矣興工於乾隆癸巳春告成於丙申冬約費
數千金有奇首士諸君命予記之予曰此百年來盛舉也誠不可不記第敬神
之道懍於屋漏世俗鮮克知之今共曉斯義知神之所重在此而不在彼於以
各安人道所宜行而神自歆之毋徒奉一炷香以爲我邀神眷也余記修廟顛

萬載縣志

文徵

記

百九四

末并記釋疑之言以此裏事諸君勤勞久皆備書乾隆丁酉冬記

創建財神廟記

瀘溪舉人盧 諤

何以聚人曰財財者眾之所資以爲生也不特金玉貨賄爲財凡五行百產之
英華可以供人之用者無之而非財忽焉自無而之有忽焉自吝而之豐此必
有神焉以司之神固物產之精氣也氣至而財爲之至氣贏而財爲之贏隨在
潛鼓而默盪焉廟而祀之宜也顧凡物皆天地所生其神當屬諸天地財何神
焉而不然也穀之神有稷帛之神有蠶穀帛非天地所生乎天地不自以爲功
分寄其神於各物各物咸自致其功共效其靈於天地矧財者其氣魄足幹回
乎替運其力量足振起乎窮黎踳者可舒稿者可潤窘者可填仆者可立生人
之命於是乎在顧可無以祀之乎萬載舊無專祠商家多卽店爲龕以財之隆
隆而起也邑人士謀立廟相奉道光二十四年於城內福壽坊購屋數椽爲之
基二十六年始塑神像建亭屋二十七年創起歌臺二十八年擴院宇煥門闈

規制大備其地川流縈繞象財之源源不竭也峯巒層疊象財之積累靡窮也每逢報祀之際華燈燦爛笙管噉嘈人喜而神亦歡焉余尤嘉其憑虛而起初無一金之藉諸首事經營拮据五載而後告成而其所合之費皆四民樂輸之羨餘非其義毫無取焉於此見生財有道臨財又復不苟神之所以式憑而財所以日盛也俗傳神爲趙姓昱其名大將軍其封號在隋有斬蛟事其說無稽又傳四月某日爲神誕生此則尙有說焉南風所以阜財四月南風之時正財物初生之候卽以是日爲神誕日無不可也廟成因邑人士之請而爲記首其事者辛基琇等例得並書

重修先農壇記

邑令閩縣舉人楊際華

先農壇在邑南關外雍正四年前令程公元度建嘉慶十三年周公吉士修外壇內祠春秋報神妥焉民庶焉道光九年冬十二月際華來權斯邑歲修祀事命灑埽陳豆籩趨踰對越無敢懈今夏五月大水祠遂圯際華念國家之重

萬載縣志

文徵

記

百九五

農也政事之首食也黔黎之以穀爲天也推原夫水耕火耨之始而報本焉故祀先農今使神無所臨祭無所設於禮則已疎於民事則已怠經之營之烏得而勿亟謹捐俸縉遴吉日鳩工庀材修築如舊規而棟宇加明牆垣增固凡興作三十有五日竣工際華迺寮采率士庶迎神於祠而致祝曰始伊耆祭隆先嗇禮擇元辰爲穀祈實立墀配天尊無與極奉主祠宮繫有司之職茲邑雖小民勤種植澹水畚山蕃稼藝稷惟賴神功以召和甘以驅螟螣而後豐年穰匕得普存之民力敬新厥壇爲神所憑依而降陟令無他求求民足食神果歆焉則必賜之德祝畢九頓首而退謹書其事於版道光十一年九月朔日重修謝山庵記

助教邑進士辛紹業

今之僧非古之僧也古之僧守世尊之教不立煙爨鉢食瓢飲名曰乞士其處世合則留不合則去無少繫戀是以水邊巖際剝草縛茅便足容身烏必豐棟誇美而後安哉今則不然買田以食創屋以居高墉峻宇金煥丹彩傳之其徒

長子老孫一有腐橈便號顛佈施撒善而更新之且將以爲歷劫不失之基視世之貪癡愛戀者有甚焉豈世尊之意歟然則今之僧遂可訾乎曰此時勢使然非一日之故而於中足觀其能焉其能者枯槁堅確去奢斷欲勤身而謹食節用而約出於以豐潤其室有餘也其介然不染於俗又非世之慕膏腴逐爰熱者比夫果有守且能如此謂非君子所與歟若謝山僧瑞月可喜已憶歲丁未余偕袁曙東遊謝山信宿焉時寺主僧爲某瑞月泯然眾僧中未見有異也嘉慶丙辰余以假家居曙東來語及謝山曰今非昔比已煥然更新問誰之爲曰某僧謝世瑞月主寺事而爲之問其寺若何曰基址仍舊而規模有加問所費凡幾曰錢之以緡計者幾百幾十有奇問所由辦曰瑞月清苦自力銖積寸累以有此數而未嘗求之檀越也曙東因道瑞月之意而求記余以爲今之僧背世尊之教而務華其居既無可爲言且既爲之又求文以張其事類弔譽沽名者之所爲則尤不宜爲言既而思之事固有不可一概者天之生人不必皆

萬載縣志

文徵

記

百九六

能其能者又未必皆遇往往摧抑沈埋以老者何可勝道尤其甚者身家之際困頓無聊遂不得安四民之常而爲僧既僧矣其傑出之才磊落之氣欲自韜晦而不可於是山其能力以崇所奉之佛而大飾其寺宇是卽斯人之所以自見而不甘自沒也而吾必從而沒之卽天何不使之昏昏蠢蠢與眾僧者伍而喬翹若是瑞月之才足以興廢振壞則使其幸而不爲僧豈不足肩大事而無難歟其遂無聞於世歟又何必以佛法繩之而不予之記也哉抑僧既新其庵余遂以山之故事告之是山也圖記謂因謝康樂得名而真人謝仲初曾於此修煉上昇意山水清淑固仙靈窟宅而謝公封於茲土屐齒所至不遺幽遠茲山或爲所嘗經二者宜各爲屋以祀之而昔賢劉其姓者讀書堂在焉已湮沒不傳庶幾興之以俟夫遊人之戾於斯亦山間勝蹟也瑞月之能知其不難爲之余又將泚筆而終記之

廬洲重修文昌閣記

邑歲貢廬以介

自祠前道右行數百步踰迴龍庵而下有閣焉屹然特立祀以文昌培文風也閣爲一族鬪會升其上而觀之儼有砥柱中流之勢前人卜吉於斯最稱扼要厥後風雨朽蠹歷二十餘年未經修葺每過其處見頽垣破瓦荆棘縱橫徘徊不忍去間有議及修建者聚訟囂然將行復止皆誤信堪輿之說而不辦其誣予於風水家言未獲究心一二但按地勢之低昂下流之空曠似宜培補以收其氣東望禾峯高出羅列如屏允足保障方然所隔既遠詎專爲我族効靈惟閣適當其缺來有所歸不必盡泥堪輿說也且此地偏幽除牧唱田歌外別無煩擾市街村落不卽不離經生家攜子弟數人其中亦可課讀卽不然或以二三賓朋結社於此斟酒論文何減梓澤蘭亭之盛若夫柳岸飛烟蘆洲點雪風來而麥穗香露滴而稻花秀四時之景不同可以生文情長文思助文瀾則又存夫登覽者之各自得焉丙午春族前輩倡之爰集各房會議約捐金數百擇日興工於是選良材訪哲匠仍故址擴新基中爲大室上架樓一

萬載縣志

文徵

記

百九七

層四周圍以磚壁引水流其前又於左旁築土作堤樹柏數十株規制宏偉包羅完密董事者急欲落成不數月而工竣是歲屆大比靈石先生舉於鄉越明年入泮者五一時傳爲美談而閣之克培文風益驗方今聖天子崇文右學各州縣自學宮外皆立文昌宮吾邑中奎閣亦於是年叔構將來人文蔚起登金馬步玉堂蜚聲天祿之中紀績麒麟之上夫豈有艾哉是爲記

下碓文昌閣記

邑舉人喻

炳

治北三十里許地爲下碓予支祖廷珪公子孫聚居於斯者迄數百載人煙稠密風氣樸淳有水曰奇江水口距眾居九百餘步地平坦恰宜閣宇高建之可作關鎖廣建之可爲造就人材地前人有志而未逮也嘉慶丙子宗兄職員鈞藻與鈞綸林壽首倡議建合族咸喜或捐財或捐工益以祠費八百餘金閱兩寒暑告竣予嘗至而觀之閣以內像設居中瞻望莊嚴進講退修堂室咸且閣以外左山岩紗帽翼然而高聳右山若金匱端然而靜鎮前則石筍凌空天然

文筆其他遠峯送翠雙溪匯流屈巖蕩漾之觀恒令人低徊留之不能去云於
戲地靈者人必傑然則斯閣也其以作一村之關鎖猶小其以成一族之人材
實大古者家塾庠黨州序達於國學其地不同而教則一教之詩書以啟其知
識教之禮樂以淑其性情是以學術醇而經濟裕處則碩士出則良臣也今吾
喻所建名閣而實塾入是閣者藏修游息既得其所尚於詩書禮樂求之通經
致用濟濟輩出爲家幹卽爲國楨以應地氣之靈焉斯閣其亦不朽矣夫

龍龍山公祠記

邑教諭新城進士魯 鴻

吾盱江李泰伯先生作袁州學記明國家教學之旨謂治則當譚禮樂以陶吾
民一有不幸猶當仗大節爲臣死忠爲子死孝儒者至今矚其言袁州人士莫
盛於明代其克踐斯語者三人焉於宜春則袁江督繼成牙宜則黃太常子澄
萬載則龍長史鐔龍公在建文時未嘗與太常同與軍國大計然爲晉王長史
護衛官軍屬焉靖難師起所在多煽動徵兵於晉公獨抗大義不與文皇踐位

萬載縣志

文徵

記

百九八

下錦衣衛詔獄不屈死乾隆二十四年秋鴻與孝廉辛君廷芝同有事於郡志
讀公傳唏噓者久之辛君曰龍公爲吾萬圭臬而祠廟闕焉何以使學者感奮
而興起此亦先生之責也考前明知縣畢公懋良欲建祠於文廟右偏不果國
初曾奉院道檄建公專祠又不果眾志之不勸與時未可與何宜然而久不然
也暇以語明府張公公曰吾念茲久矣顧萬自重建學宮以來歲有興作亟於
役費於財若何而集事因以復孝廉辛君辛君曰往聞學校中巢君汝成聞君
成忠與吾宗汲與試文酒徵逐相樂也嘗慷慨建議欲爲龍公建專祠而今已
矣九原不可作矣姑就其子弟而謀焉則皆應曰諾不敢忘乃選地於明倫堂
之左巢生起隆聞生儀辛生樹茅童生辛廷禮釀白金若干鳩工庀材經始於
二十五年正月某日落成於六月某日堂寢房奧規制具備辛君曰宜人稱江
督公曰袁袁山則長史公亦宜稱龍龍山且志高山仰止之義也龍山者萬載
城內山名亦諸山之鎮也公死節迄今數百年而能令邑之士夫奔走趨事新

勵翼翼可以教天下之爲人臣者矣。巢生等勇於爲義而不忍沒其先人之志，抑亦可以風邑之爲人子者矣。茲舉也。雖非大興作，然協諸義而協將以助先王教學之旨，豈徒以公爲有光於龍山而祠廟以焜耀之也哉！祠成，公子姓龍躍乾等捐薄田若干，以供歲祀，附書之以志不朽。

重建吳公講堂

署袁州府盧 崧

古之君子其自治也重，以周其出而治人也隨時盡分，實有裨於民生國計之故，故能功在一時，澤及百世。謳歌俎豆，久且不忘。此吳公講堂所以一建再建而不能已也。康熙癸丑歲，公宰萬載甫兩月，值滇寇陷長沙，而袁州盜起，欲挾民從逆，人心洶懼，公不爲動，初柵民之居，宜芬萍萬者，苦弁將據三關以叛，至是，應滇寇公潰圍，請救復，率家丁訓練鄉勇，城賴以全。適滇游兵破上高，宿白良勢將及城，公夜襲之，突壓賊壘，斬獲無算，寇憚之，百計啖公公縛使獻其書。聖祖仁皇帝勅曰：忠貞可嘉，寇平公輯流亡賑荒，歉蘇積困，清田賦，與民休息。

萬載縣志

文徵

記

百九九

其事彰彰在人耳目，顧公當兵燹之餘，而邑之人文猶惓惓焉於北郭外辛氏居，額以叢桂書院，招致能文之士肄業，其中凡所作育皆以文名盡瘁五年內，擢中書萬邑人士戴公之恩而不克留也。爲建生祠以奉祿位，是爲吳公講堂。蓋在北城內康樂坊云。丙戌二月，崧署篆袁州，敬念我皇上置守之重，體上憲用人之心，凡有關於郡治者，不憚瑣細以求其要，而於文廟及先賢名教之地尤所兢也。宜春學地則躬率士夫修治完固，昌黎書院立則酌定章程，加增膏火。獨郡志所載吳公講堂者，崧至萬載而拜謁無從焉。邑令翟公廷法曰：前令於雍正癸丑年已改建上諭亭，奉公於賢侯祠。邑人士屢請復而未能也。因集紳耆而延訪焉。眾情踴躍，咸圖所以復之者。爰據紳士巢起崧鄧鉉郭至剛辛樹檜辛衢等四十餘人所請爲之轉詳，而復建焉。時公文孫今大中丞撫來江右，聞而檄止之，而紳士耆民感激奮發，勢不可遏。卜地於學殿之側，庀材飭匠，庶民子來，時新守至而崧已赴任蓮花廳矣。今年春復奉攝袁務而講堂落成。

已六越月中爲堂後爲寢左右爲房前之左右爲廊又前爲門階級垣墉既堅且好丹漆黝堊有光有輝是可以妥公之靈而告天下後世爲官者矣公方宰萬時亦祇盡其職分之所當爲耳豈知一時之政感之深思之永名宦列傳賢侯有祠而邑人猶懇懇勤勤墜而復舉廢而復興如今日也大中丞以閱兵臨萬載紳耆塞道童稚歡迎堂已落成因命爲諸生肄業所瞻顧楹楸躬拜几筵如見如聞如不忍去觀者咸歎歎感歎以爲榮又豈宰萬時所知也然而維天篤慶錫福流光維誠有孚凝庥集祉蓋有不期然而然者矣嗚呼天道昭然民夔不泯君恩崇德惟德斯承願以告天下後世之爲官者堂故有紳士辛受錦辛受載辛汝岐等捐田共一十六畝今其後人辛衢辛金壽及辛汝岐等復行捐入仍爲香火之奉又王錫侯捐田八畝浮橋會王都會等捐田一十八畝四牙具詳於冊掌之學官以垂久遠乾隆三十二年丁亥仲春

重建縣治記

邑令大興舉人王麟昌

萬載縣志

文徵

記

二百

夫苟盡心民事雖甘棠之下可說可斐何地不足以爲政而必資乎縣治者以公解爲親民之所非是不能以治劇蔽芾之所詠未可據以爲常也萬載之爲縣肇自南唐其治在龍山下卽今所其後遷徙不常宋紹興間復還舊治負山襟水其象崇閣元因之明時屢經修建今又數百年矣咸豐初粵匪肆擾狼烽乍發官舍皆墟令斯土者借考棚爲傳舍官民皆有不便今夏閏四月予來蒞任見夫頽垣撲地荒草滿階惻然起重建之志又慮民力之爲艱也躊躇久之旋稽我朝會典事關公署有動帑興修之例適奉大府檄催爰集紳耆會商咸奮然曰我侯蒞此政治一新縣治不可不新庇官卽以庇民也有公籌善後費盡動用之重建便予感其言就夏季誦吉興工董事繪圖以進其中爲堂者三爲門者五爲齋爲室爲樓爲榭爲庖爲庫爲祠爲牲爲書吏房爲賓友館一皆如舊規繚之以圍墻間之以疊壁不數月落成正西有隙地數畝其平曠以之種潘縣之桃樹彭澤之柳於游賞最宜而予則不暇爲此蓋公解所以治

公國賦於此而輸民訟於此而理安得有優游之候况此邦民庶事煩又當甲兵初洗予方蚤作夜息爲閭閻興利除害尙慮民困之未蘇未敢以卧治爲高也是役也予經之眾紳士寔共營之有餘力尙將修學齋助郡城墾工爰勒石爲乃心公事者勸

重修捕衙記

典史漢陽監生程炳

捕署在縣署左側咸豐五年粵西髮賊竄踞縣城兩署並遭焚燬官斯土者賃民屋以居己巳夏余奉檄授鈐於此維時縣署新建而捕署僅存荒址余有志修葺未能也不得已寄寓郭瑞公祠夫尉雖微官而緝捕盜賊防守監獄職任所關蓋甚嚴焉余才性迂拙日夕兢兢常以不獲稱職是懼而寄寓之祠距縣寫遠禁防捕務尤易疎虞余自蒞任至今八年有餘雖於公事無誤然而官署未建究不足資以辦公也爰以下情纓稟郡憲邑憲俱蒙俯允未幾而邑憲卸任署任金憲甫至遂不果行越數月邑修志乘公議籌款再以前情稟求金憲

萬載縣志

文徵 記

二百零一

乃集邑紳會議酌於修志項下提撥錢一千串復於修署通案彙詳估價請款六百串又奉准借廉銀二百兩統計得錢壹千八百餘吊擇公正縣吏宋正賢董其事興工於同治十年二月落成於同治十一年二月門堂庭廡書館內室下人之所居處差役之所止息皆修造完備余因是而重自警焉夫官無大小盡職爲難不知其難而曰我優爲之此職之所以多曠也今者斯署既建密邇縣署公事縱有疑難朝夕可以稟承而且監獄不遠覺察甚便以視向之寄寓郭祠兩相隔越者其難易爲何如也然余向者心知其難而刻刻隄防故無敗於事假令今者自以爲易而曰我優爲之則向之無曠厥職者能自保乎余惟有慎益加慎勤益加勤以求無負初心并以告後之尉於斯者共知所警焉

興賢堂田記 代邑令吳

教授邑進士辛炳晟

文風之各出也視地氣爲豐瘠而鼓舞必因乎人事蓋有同隸一布政司而蹈省門應舉一邑或不過十餘人道紆而費無出卽水陸四五百里之程寒素猶

難之杖策走長安更無待問故并有宿學妙才守燈火息意風檐者入數輩而科名因以消長此萬載興賢堂田租之所爲設也田之起自嘉慶四年來前縣虹橋君創建考棚繕冊勸輸維時土著入者十之七寄籍入其三輸者既踴躍董事者相與杜分肥戒妄費節縮有方迄考棚歲事而金有餘以考棚之人固非獨試童子博一矜而已乃皆將由是而實於鄉燕於禮部臚唱於廷應逆而出以爲閩邑光者也鄉會試資斧宜於是焉由爰陸續購爲興賢田得六千零二十七把歲入租可五百二十四担自嘉慶辛酉科始發給春秋文武路費有年計萬載前後公事出入所留餘不蝕蹤蹟廣且實而可垂久未有如茲役者也戊辰秋余奉檄視篆茲土越歲而縣人議立右刻捐修考棚姓名以興賢堂租實合邑文武春秋試費之自宜定章程額數以昭畫一而憑爲遵守也酌發給各屆鄉試爲錢人二千有四百會試暨拔優貢朝考爲錢人二萬有四千有恩科則分爲兩屆而各半之既以是同辭來請予出示勒石以防冒銷挪用者

萬載縣志

文徵

記

二百零二

而復乞余記事之言余攷縣志前海豐吾宗克菴先生涖縣時諸生有公求科舉盤費之呈先生批答至優許而厚贖之後厥孫蟻園中丞來縣謁祠復留金購田至今縣人以爲試費前之人造士之股流澤之善懇乎其至也今諸人士以縣試立棚之餘不欲其耗乃能推引所事以大其用於以鼓文風翼地氣從此裨益科名甲乙之伍聯翩而上人才之興正未有艾其用意美而規模誠遠也已抑予更有爲諸君告者從來公財散於有常爲永利積於不用卽立弊今租入一以資試事惟穀價有餘乃留以待修理考棚暨各莊屋其意是也若并二者而無須焉則莫如以益試費或更廣爲田毋令墮於公夫財者眾之爭公非可以私爭也勢必彼此借端互託爲公用公費興而試費寢矣此則興賢善後之要而予所竊願藉手以收效於久遠也夫

創建賓興堂記

陳文衡

善哉萬邑尙義者之多也九家既出贊建文昌宮義足尙己一時人情慕義慷慨

慨捐輸若者金錢若者田畝計得財產又三萬有奇遂創爲賓興之舉以其租
息爲童試鄉會試資費培植人材增長士氣誠盛事也考周禮大司徒以鄉三
物教萬民而賓興之鄉大夫攷其德行道藝而興賢者能者以禮禮賓之鄭司
農云興賢者今舉孝廉興能者今舉茂才康成云變舉言興者謂合眾而尊寵
之以鄉飲酒之禮禮而賓之典綦重已近世科舉之制蓋昉此雖然今之縣古
侯國也古者鄉舉里選而升於國無長征遠涉之費今則始彙於縣繼考於郡
而後試於學使者三年太比鄉則省會也賢書入貢國則京師也道途修阻或
數百里或千餘里或數千里程愈遠而費愈多應舉之士每艱於貲斧而裹足
焉可勝歎哉茲乃預爲之籌自小試迄廷對皆有貲助上以副聖主作人之化
下以酬英才利見之懷用意不甚厚乎惟是貲產生息度支出入不可無經理
之人尤不可無經理之地而諸好義捐輸者亦宜誌之以示不忘爰於 文昌
宮左側構賓興堂一所爲屋三重前爲門中爲堂堂後爲寢室設木牌序列樂

萬載縣志

文徵

記

二百零二

輸姓名用以昭茲來許俾不至久而湮沒也其闔閭姓氏則另列於旁舍以示
別堂之左構屋再重爲會計棲息地經營妥善堂宇寬宏誠足以振士氣而彰
義舉矣時三區龍岡及東洲高魁諸書院後先並建亦各有賓興之設故無容
再合予蓋善其創舉之易作育之周且其事緣 文昌宮而起是又 帝君有
以默相我多士俾得憑藉以馳驅皇路也將見奮志青雲聯翩直上建勳猷光
梓里濟濟者皆麻廟之選焉豈不足爲邑人慶哉至其田畝若干租息若干贈
遺貲給若干及董事芳名悉詳於冊茲不具載

思永堂助卷費記

邑舉人辛辰雲

賓興賢能有司事也何卷費足籌哉唐時州縣有貲送驛所有祇候至鍾傳帥
洪州猶歲貢士盛供張資送至三十萬則盛時可知宋代如貢士莊青雲莊產
並官置有司優士如此何卷費足籌哉國初令長尙有遺風鄉試屆期必設祖
餞具船隻捐廉餽購不言卷貲而費自裕今此風不行已數十年矣士之困守

寒窗者念首塗而意沮卷費抑又微焉鄉先輩憂之因是學官考棚吳公講堂
皆有程儀猶慮不給也又勸捐立寶興堂專戶其事蓋舉有司之責均之邑眾
視捐兼徇任者固較便矣然費多則驚者眾每文武錄科生監爭奔走焉而名
試司馬者或且冒餽而不行公財日以絀闈外有餘闈中人不給如故穆堂易
君曰多而濫不如少而覈也用是有卷儀之助歲戊申捐高橋紹江田共七十
八畝零呈官立案交寶興堂一區首士攝筭每科會計所入專發文科鄉會入
闈買卷費此乃出之獨力而實有裨於入闈士不較諸醵眾貲而統發無別者
意更美法更良哉抑余更有進焉夫義利不並域也邑故不乏素封邇來公事
數舉捐輸亦各量力然其中或以議叙動或以報功勸則有利而爲之於義終
無當耳今穆堂兩所不屑而獨爲一邑科第行乎心之不容已此純乎義矣夫
純乎義者豈望報哉然自來培植人材子孫恆以科各顯昔范文正卜宅甚貴
爰公之爲郡學後人食報迄今不衰與公產寶興其心一也吾以是卜穆堂之

萬載縣志

文徵

記

二百零四

後必大也以吾邑富室之多使皆慕義而興焉將見卷費日充士之應秋賦上
春官者宜莫不撫卷思奮興高采烈爲必售之文以無負助產之深心科第且
踵相接也而助產之子孫亦必與邑人士競爽於無窮於以愧夫有寶興之責
而不盡寶興之實者其庶幾修復古典以作養人材爲心焉是余作記之意也
夫

創建試院記

辛從益

一縣之試可名院乎天下書院無大小皆稱院矣奚有於試惟是試院雖一縣
之建其成也亦各有時或地無可爲或財不易集或不得其人以倡之而董之
則皆不能成事而得人尤亟所謂有人此有土有財也吾邑應童試千餘人向
皆就試縣署地既不足容試几坐具皆先期送至署中遲則無張處風雨之侵
不必言也鄉人赴試者尤苦之嘉慶丙辰蕭山進士來侯莅吾邑既縣試集紳
士謀焉邑故有守備衙在縣治西偏後員裁衙廢而基存於是紳士請以萬本

立名公買其基并拓買旁基建試院願建費尙無所出也乃擇紳士之公正爲鄉信服者及廉敏有幹才者如張亨衢劉時耕等四出勸捐并董工作連值國家大慶鄉會恩科疊舉邑之登賢書第進士者踵起其援例急公登仕版者尤眾至於連阡陌善居積挾范蠡術泛舸四方並家有餘蓄樂於赴義聞諸勸捐及董事人至皆踴躍爭先輸助不數月得七八千金遂鳩工庀材相諸位置所宜及就試閱卷者所便堂室漏庖一切俱具踰年葺工并以餘資買田若干爲修葺費及鄉會試購適益告養旋里周觀庭廡則已輪焉奐焉規條備焉因以歎首事諸君經理之勤暨諸鄉人義助之美而尙未有記至道光甲申益視學江蘇而吾邑適修邑乘郵書來俾補記之余惟縣試者士子進身之始也始進重則由此而上進也益重夫以有明迄今數百年欲建之試院一旦而克觀厥成俾諸童得從容展藝知就試之榮而益用自愛人材將蒸日上豈非眾正相扶士風丕振之會耶抑詩云靡不有初鮮克有終昔司事諸君創院之法善

萬載縣志

文徵

記

三百零五

後之規良爲詳盡謹修而審行之試院千百年長存可也易之爲道一陰漸進則爲姤五陽遞進則爲夬眾正方盛有一陰邪焉伏於其間險而健訟則君子恥與爭而相率去之消長之幾不可不察夫試院有田有租倘司事者利其田之入不圖久遠甚者生事開銷假公以濟其私租既虧而田不可保微特鄉會曠漸廢也卽欲望試院之時加修葺也得乎如此則大失前人創院之意乖鄉紳士樂助之心彼應試者亦將苟且媮薄而不知自重人才興替所關匪細保泰持盈之方可無審乎邑自建試院後有郡城考棚之助近又將有賓興堂之舉足徵吾邑好義之多風俗之厚然愚以爲統在司事得人舉能公正廉敏如邑建試院時司事之君子則可也請以是諭邑中諸君子得毋以余言爲迂乎哉遂書以歸之其諸樂助姓名並宜勒於碑陰

宋仕豪捐建試院號舍記

邑令大興舉人王麟昌

萬載宋文苑封翁義行素著耳其名久矣哲嗣炎領丁卯鄉薦山子門下揭曉

後謁予鍾陵官廨詢封翁事甚悉心渴慕之戊辰夏予量移斯邑甫下車以通家誼往拜見其蒼顏皓髮鶴骨珊珊古樸醇厚之風有令人挹之不盡者先是粵匪肆擾縣治毀於兵燹令斯土者寄傳舍於考棚予以此邦民庶事煩洽公暨屆試諸多不便集紳耆謀所以新之縣治新而考棚學齋可兼修焉僉曰善於是籌款鳩工屬邑紳董其事數月縣治落成東西兩齋亦煥然一新將次第經營號舍而公費罄矣適縣試期迫工難稍緩計慮幾無所出封翁迺慨然曰師之莅吾邑也廢必興墜必舉皆為地方計奚忍以地方故相累是役也當獨肩之子聞且感且佩封翁遂剖資斧購木石尅期興功延老成經紀之不兩月而歲事堂廡楹檣垣窻壁修葺完善一一復舊觀號舍桌椅皆鼎新建造又改西偏培風講堂拓號舍一楹綜計坐號二千二百有奇動用靖賦一千六百餘緡誠義舉也予已達其事於大府矣封翁平生好施與族黨比閭贊其惟濟者無算軍興以來尤能急公慷慨上紆宵旰之憂勸啣嘖嘖傳誦不衰茲復獨

萬載縣志

文徵

記

卷六

任此舉其所以嘉惠斯文廣庇來學者意深且遠於戲斯亦足以風世矣昔范文正居貴顯惟期以義遺子孫後世用能修其業封翁之克昌厥後食報無窮可豫卜也且屢以不邀獎叙自陳是其好義之性之出於自然又豈襲義市義之徒所能翼其萬一哉爰濡筆記之勒諸石以垂不朽云

袁州試院雨亭記

邑令山東舉人崔登鼈

事之有裨於人者為善事之有裨於士林者為尤善袁州試院前舊有大廈為試日諸生待漏聽點聽立棲蔽所也其名曰雨亭創自宜邑劉君惺吾應試者使之厥後日就傾圮舊址空存每逢試期多士露立猝遇雨雪沾濡為患而擁擠錯立因之則斯亭之所係豈淺鮮哉萬邑湯君莘圃目覩心惻毅然自任稟呈府憲獨力捐修仲春鳩工越月而歲事揆之舊制展拓有加焉又以餘力重整二門內穿亭增建號門外權廈美哉輪奐非徒以壯觀瞻也時有俊風時有霖雨雖非夏屋居然帡幪矣且於左右轅門外各建耳房數間為辦考書差等

公所是不惟有裨於士林而凡世事於試院者莫不得所棲託斯雨亭之名非虛而試時待漏不患露立矣其心乎好善樂施豈世之修佛寺作無益者可同日語哉工竣勒石請記於余余聿觀厥成固樂爲誌之

重修袁郡試院雨亭記

邑舉人彭夢彰

富翁之世其家者吾知之矣市美田構廣廈以大其家以遺其子孫獨李家坊湯氏積善以世其家先是袁郡試院舊有雨亭創於劉惺吾先生傾圮者數十年湯君莘圃於道光廿三年獨力捐建費白金千有奇我邑侯崔明府爲之記咸豐丙辰燬於兵燹同治丁卯莘圃之子馨榜孫桂雲又鼎新之寸材片瓦一舊未仍所費與前等卽此一事觀之非以善世其家者與夫人之欲善誰不如我然守財虜無善心而有善心者又或力不足以副其心况欲以善世其家哉莘圃建雨亭於前子孫建雨亭於後心善而力足以副之家運之隆隆日起可知也嗟乎市美田構廣廈非不自以爲自一世可百世也而高臺深池忽而碎

萬載縣志

文徵記

百零七

瓦頽垣矣佳花美木忽而蔓草荒烟矣繁絃弱管漫舞緩歌忽而猿嘯狐嗥冷雨淒風矣視湯氏之以善世其家者孰得孰失其亦可以自鑒而自返矣余竊欲爲爲善者勸故爲記之至雨亭之有裨於士林與規制之廣狹崔記詳之矣余不贅

龍河書院記

邑舉人教諭辛廷芝

龍河書院舊在龍山官署後仁和進士嚴侯在昌莅萬十三載廉明勤慎政治肅清陞任之年捐廉獨律以惠邑之學者乾隆丙子邑士注朝祖郭洽清汪發楫聞鳴鶴鄉耆龍德彰張之球等以其地近市塵喧囂不靜不便肄業呈請倡捐始改建於龍河其地距城半里許三面倚山前臨長河中有山水佳趣向爲辛張二姓業以邑人士思振文運因售得之其書院規制悉仍其舊中講堂堂上架以高樓前頭門次二門後內廳左右學舍共十二間周以垣墻庖湢悉具自孟秋及仲冬告竣夫學問之道靜其要也舍靜而求入聖人之道猶越川而

自廢其舟楫登山而自絕其途徑也夫豈可乎莊周云大山深林之善於人也亦神者不勝內不自健而徒借資於外無益也至人亦曷嘗擇地以蹈哉雖然初學之與聖學境地不同矣操持未定一涉紛紜錯雜之會非感於耳即牽於目縱欲勉強鎮定恐善學者終難有功惟置身於幽閒靜肅之地隨所誦讀要自有得則制外養中亦學者學問之一助且斯地也舉目澄觀無境不佳至絃誦之聲與河水相吞吐鳥鳴花放悠然有春風沂水之思此在學者之自領耳矣乾隆丁丑孟夏

龍河書院膏火田記

魯鴻

國家萃髦士於學校月試季考董之以其官又慮藏修之無所也命守土吏得別建書院選生童肄業其中以顓一其趨向所以風天下於學者甚至萬載故無書院乾隆九年明府嚴公在昌始建於縣治後龍山置田若干畝歲廩以租入焉二十年邑人士以近市多喧遷書院於龍河門外時爲宰者奉文建普濟

萬載縣志

文徵

記

二百零八

堂割書院之田贍之師生膏火歲取給於學田中纔五十畝今明府張公立中莅任殷乎造士因諭於眾曰郡治昌黎書院田十餘頃太守陳公興釐有方聘各師禮學者絃誦於今爲盛萬有書院而田弗充其何以仰稱上意晉君袁濂捐田十八畝七分有奇楊生之洵遵父維鏞遺命捐田十七畝有奇而徵予言爲記予曰凡無其事而食於人者非民之窮卽其蠹焉者也自君子觀之二者皆天地之生物要不可無以遂其生耳獨至於養士則其道有進焉者士之官於朝者祿必稱其功學校之士砥名立行則皆其所自爲而優以廩膳邑之士夫又能推廣朝家之意而不責其報皆所以厚賢而禮異之豈以爲賜卹而已哉然而萬載士風好行其德素矣民之窮而蠹者皆有所歸或且置田以贍之而未有議及書院者豈福利之說中之與胥楊二君獨能勤勤於此可謂知所本者矣抑吾尤願肄業其中者明此義也士必修禮陳義厚於自養而後無負乎養士之典不則名雖士也殆亦民之蠹者耳使流俗謂膏火有田徒爲賑卹

貧士之具實應憎且羞矣多士勉乎哉

重建龍河書院記

學憲山陽榜眼李宗昉

書院之設卽古家塾黨庠之遺意所以輔國家學校之教也在江西者鹿洞尙矣其餘隨在皆有大率賢有司創於上而鄉之先達及後民嚮學者共襄成之獨今萬載重建之龍河書院爲最奇龍河者邑之巨川也院創於清乾隆間浙名進士嚴先生在昌宰是邑始建於龍山之顛嗣朱令徙今所易名崇文後因瀕河遂改今名歲久就圯過者憂之邑有義婦曰宋聞氏故太學生海嶠室也先是海嶠之父欲割田助院中未及而歿海嶠復相繼歿婦遂捐貲興役寸材片瓦一舊不仍期年竣工規模倍昔糜白金五千有奇復捐田爲諸生膏火既歲事邑人士重其義請記於余余惟大易說卦坤之象爲吝嗇秦巴婦擅丹穴之富但能用財自衛李氏之母樂羊氏之妻卻金不顧史稱其廉而施則無聞焉婦體夫志以成翁志其孝且賢固士君子所難能者僅曰輕財猶未知婦之

萬載縣志

文徵

記

二百零九

深者也院爲講學之地士遊於斯可徒工詞章掇科第誇耀流俗以爲榮乎近求師友遠希聖賢出輔朝廷處型鄉黨其肯固有在矣巾幗且然偉丈夫之自立宜何如也婦有五子二已成立必能亢其宗者書此以示多士并以勗之

重建龍河書院記

辛從益

天下郡縣皆立學學之外皆有書院爲教育英才計者至周也然學之體制嚴自聖廟奎閣署宅外可爲諸生肄業地者希矣司鐸雖冷官有案牘之勞有檄調之赴既鮮暇日與諸生講論諸生以其官也亦未便數數晉謁故師生恒渙而不親且所教祇庠生廩給弗豐就學者少惟書院專爲課讀設地寬而貲廣生童皆得受學其主講多鄉先達有宿望者無官府迎候之煩身閒任專生徒亦樂與相親朝夕請業無異家塾其心安故其教易成余故嘗謂學者親師取友書院視學校爲尤切也吾邑之有書院自乾隆九年始其初建於龍山二十一年遷於龍河其膏火所取給及捐田增助原委姓氏前志詳矣自遷建迄今近

七十年堂宇齋厨一切漸就傾頽學者幾無可棲息連備邑中公事頻興貲財告匱眾咸欲修之而未能也先是邑太學宋寶承先世遺產饒積蓄甘節省將有所用之末年慨然壹意於義舉而未得其會至其子海嶠善體先志凡縣中以公事勸輸者至必立應已而疾卒嘗以捐建書院屬其婦聞氏至是其孤壽昌始以母命請於官願捐數千金為修建費於是誦吉庀材增拓前規居舍軒楹有加於舊經始於是年十一月落成於次年八月邑之人升堂入室周觀庭廡美奐美輪罔不嘉嘆乃走書京師屬益以誌益聞之禮曰賢者積而能散非儉何由積非仁何能散仁莫大於興賢育才今海嶠席先業繼先志甘出其財為一邑教養人材計可不謂仁賢矣乎其婦聞氏能教其子以成其夫與舅之美慷慨好義得之閨壺此為尤難史稱巴陵寡婦清以財自衛秦皇嘉其貞為築懷清臺彼非必有惠濟桑梓之功也以今視昔賢實過之矣抑益更有願焉魯厚畬師之記膏火田也謂士必修禮陳義厚於自養乃無負夫養士之典

萬載縣志

文徵

記

百一十

若以膏火有田徒為贍恤貧士之具庶憎且羞矣今斯院之成也余亦望居是院者居仁由義務為明體達用之學以遠到自期若徒視為廣廈之庇寒錢粟之足贍其生焉豈惟失儒者以道自重之意亦恐辜捐建者之功而為巾幗羞也學者其勉旃道光甲申春仲

龍河書院增置膏火田記

崔登鼇

歲壬寅予奉簡命莅任康城下車伊始即觀風試士講孝弟之經修忠信之實思以為吏治民風之表會文徵行樸茂可觀者甚多其翹然特出者則龍河書院肄業士也龍河者通邑土籍之義舉因瀕河而河名名之也時主講席者邑孝廉辛君辰雲世家宿學令先若少宰筠谷師余曾忝為門下士盡世誼之相得屢詣院劇談訪養士化民之法辛君曰邑民安業士多廉隅自愛誠得賢師帥因其恬俗而養育之易治耳爰委懷講藝竟日而不知倦環顧諸生衣冠林立於旁竊羨君育英之樂予亦維風之有賴以稍自異於俗吏面目也進詢書

院章程乃知舊有田若干畝師儒之館穀生徒之膏火悉取給其中近年城鄉從遊附課者眾租入不敷司計者苦之現邑人士勸捐增產前任張君文誥捐廉爲倡頗有成效予亦分俸鼓舞之邑之殷戶益慷慨樂輸增置田若干畝有奇申請於部議叙有差其中心好義不邀議叙者予尤獎勵之然則是舉也儒以道得民民以道易使吏以士勵俗一舉而三善備焉是故君子之不耕而食非素餐也其子弟從之則孝弟忠信功可食也司化者患不能養士耳患鹵莽滅裂之報也歟若茲山也詎足爲稽古之榮唯以裕秀實之基云爾行見滋蘭之九畹樹蕙之百畝峻茂之時刈者皆芳甸也種玉之一頃獲璧之五雙理美之能當者皆藍田也禮耕義種之無荒性不善米之有獲龍河書院洵大田多稼矣膏火云乎哉事竣首事楊羅峯高作楫劉履中張昺辛思誠等請記其事於石倡勸捐輸姓名田畝例刻碑陰書以質之幸君以爲何如也

東洲書院記

新昌舉人劉嘉樹

萬載縣志

文徵

記

二百十一

國家崇重學校培植人材百有餘年重熙累洽固已家鄒魯而戶章逢矣而義學之立尤所以優養寒畯故其地常於適中昭其使也萬邑大橋鎮距縣治四十餘里自各鄉計之道里適得其均又居山水之陬諸紳耆謂於建學爲宜於是卜基於河濬之東洲而與閭鄉之好義者踴躍捐租構學舍置田產堂室門廡倉廩庖滷器用畢具經始於道光六年迄期年而告竣每歲冬月具詞呈請於邑侯集諸生童於縣庭而扁試之取正附課如額俟來春開館延師而訓課焉大抵所以獎厲之者法無不周所以培養之者費有不惜其用意可不謂精詳慎重矣乎古者曷士專在鄉舉里選自閭胥族師黨正州長皆以德行道藝及孝弟睦姻任卹爲教而又月吉有書歲終有會而後書升論秀由司徒司馬以次達諸朝廷良以野處之秀質性溫樸其教易入其材易成而國家亦常收養士之效也且夫一鄉之人材每隨乎風會而風會之升降又視乎人心之向背以爲轉移今以數萬金之工程漫無絲粟之憑藉一旦數十人倡之而翕然

相應欣然樂從由之不勞而成之甚速此皆扶輿磅礴鬱積之氣與鄉黨敦龐聚順之風蓄而欲洩有以鼓其機於不自覺者此方之士其聯翩起德爲龍光聲化鳴鶴足令旁觀者咨嗟歎羨因以表盛揚休號爲冠蓋里當無疑也吾見由家而進於學則爲歌在泮焉由學而舉於鄉則爲賦鹿鳴焉由鄉而貢於禮部策於殿廷則題雁塔宴瓊林焉從此迴翔丹地棲息禁林登金鼈玉棟之巔以瞻仰瀛臺之盛回憶大橋東洲之地不信有如天上人間者乎然而君子之入仕也原以行其所學也故雖尊崇赫奕要不改夫韋布之初心而後能淬厲其操守發揮其事業昔謝大傅功高百辟心在一邱范文正公經畧西夏而惓惓於圭峯舊隱則多士他日其必不忘斯地也明矣獨媿予以隣縣經生當落成之始卽主講於是迄今五載於道素未有聞不敢侈陳道德性命之旨所兢兢自勵者惟是嚴課程明賞罰擇其資稟優異者取經學史學治術諸書與之講貫而以其餘功兼及詩古文辭之學至按旬會課仍以制藝爲主論策表

萬載縣志

文徵

記

三百二十一

判酌量試之藉以遵功令育全材以仰副聖天子崇儒重士之心於萬一焉至於捐資之姓字川產店房之號畝基址與夫先生脩脯生徒膏火獎賞小試卷價鄉會試科儀慶賀之定數均將梓而徧致之俾昭然不惑而於捐助之多者又爲設牌位而奉祀之此皆首事諸公悉心籌畫可以經久行遠者也予居西席久知之甚悉因並書之以爲後法是爲記

東洲書院記

新昌進士盧殿衡

書院創始於道光六年丙戌歲在萬載縣之西鄉距城四十里而近其地諸山環峙豁然中開土田平衍風景清迥書院坐良面坤河水自右來潏洄繚繞而過其下故命之曰東洲因地而爲名也有享堂以祀文昌享堂之西有小廳以儲藏經籍東有小廳以批閱文藝又其東另爲客廳以宴會賓客其外爲講堂爲前廳爲門廳各一生徒棲息之所左右羅列計六十餘間庖廩器用罔弗備具而四週更圍以繚垣可謂完且美矣予惟袁郡自唐以來人文甲於江右按

有唐一代最重進士科大抵千人得第者百一二以故唐有天下且三百年江南西道洪吉虔袁信饒汀撫八州第進士者僅七十人而袁士約居其半江西通志選舉條可覆按也論者謂地接衡湘名山大川孕育幽秀苞蓄靈異而房太尉李衛公韓文公以鉅卿碩儒相繼爲州刺史興學校崇教化士之被其甄陶者莫不近文章砥礪廉剛相與發名成業而山川之秀爲之一洩理固然歟萬載自南唐保大開始置爲縣隸袁州宋因之由宋及元書院之建於縣境者不一而元時獲富里張巖書院其最著者也茲幸生文教單敷之日士可不務通經學古以遠紹一郡之前徽而上聽盛朝之驅策乎予嘗竊嘆富厚之家耽逸樂而不說學貧困之人苦饑寒而不能學或學矣而無親師取友之功則亦難以充其量而盡其才故義學之設裨益良不淺也然而雍虞文公之誌張巖書院也又以謂一列於學宮則行有司之事弦誦籩豆殆爲具文者多矣今東洲之學遠於城闕之喧囂邈乎公府之拘制膏火筆質無乏絕之虞勝友良朋

萬載縣志

文徵 記

百十三

有觀摩之益藏焉修焉息焉游焉無所事乎其外及其間暇可以觀山玩水發舒其性情盪滌其漑鬱讀書之勝地蔑有過於此者矣雖然樂順適則志易情喜遊觀則業易荒爲學以精勤爲先行已以篤實爲要必也守岳麓鹿洞之遺規以上溯關閩濂洛之統循蘇湖眉山之教法以養成文章經濟之全由是處則爲有本之學出則爲有用之才東洲之士安知他日不卽爲聖天子東觀石渠之選哉若夫創建之由財用之數與夫條規之盡善足以經久而行遠前之記序詳矣茲不復贅而特舉此邦之故事與學問之實功以期多士共勗焉

重修東洲書院記

邑舉人廖連城

東洲書院吾師鍾慎齋先生邀同志三十七人於道光丙戌歲倡首捐建迄期觀成新邑廬進士星樞爲之記慎齋先生倡建後居院肄業數載中式壬辰鄉榜論者以爲培植人才之報其實不然先生經濟之學膺封疆重寄有餘僅獲乙科以州縣終不得謂非命之窮也顧自有書院以來得名師教授詩文多有

可觀其間志趣嗶以振古人豪自命者尤能登高行遠而卓然爲天下有用才則先生倡建之功偉矣書院故近洲邇來洲渚漲沙日高漸與院中基址等每春夏間洪水驟發滿院頃刻成浸深輒盈尺許生徒爲所苦者有年甲子冬曹君慶餘謝君暢軒謀於眾謂宜升基五六尺庶免水患眾以爲然舉曹君次秋黃君搏萬董其事迺庀材鳩工擇吉興役木以斤運土以簣覆高舊址計五尺有奇凡椽桷板檻之腐折者蓋瓦階甃之破缺者丹漆赤白之剝落漫漶者悉新乃已又於左添置學舍七右添置學舍四工起丙寅夏竣丁卯秋屬余記之余謂書院之設所以育才而才非工文藝之謂也士先器識而後文藝程正公年十五便學顏子范文正公爲秀才時便以天下自任其器識之遠大何如耶姑勿論古人聞慎齋先生在院肄業時好觀史鑑中賢良事跡嘗謂吾他日要作好官後歷任廣東開建新興等邑皆有惠政民懷其德爲建祠立碑蓋其器識亦有不猶人者矣諸生可自菲薄乎哉曹謝諸君之重修茲院者冀人才

萬載縣志

文徵

記

二百十四

日新月盛而爲大儒爲名臣者踵相接也夫必有程正公之器識而後能爲大儒必有范文正公之器識而後能爲名臣諸生肄業於斯亦先宏其器識而已矣如第求工文藝以竊科名則器隘識卑始基已壞吾何以觀之哉諸君謹余言遂書之以爲記

東洲魁星閣記

品哉貢賴作霖

魁本斗樞星名其肖而爲像殆屬附會然相沿已久東洲自書院落成後於西南隅建閣祀魁星其上蓋西南臨江取樓臺近水之意祀魁星者不過別於無名之土木云爾或曰南位文明魁主科甲若有爲爲之者然借氣扶輿乞靈冥漠未免涉形家言而疑於神道設教非士君子所敢知也臺之高幾十尋几橋卧長虹路紆細蚓綠楊曲岸青草淺汀舉可於俯瞰得之南望紫蓋峯蒼翠遠出馬腦近峙於東黃皮遠聳於北各饒雄偉絕特之致其橫且若屏障者則面西諸遠岫也課暇登眺作佳山水遊所以開拓心胸而恢濶志氣者將於是乎

在若夫清風拂檻明月窺窗憑江上山間無此奇况在人自領取耳抑又思之軒櫺四闢透剔玲瓏虛明者似之拔地而起上千霄漢層累者象之諸君子其有意乎昔韓昌黎刺袁州欲一至滕王閣而不得因遙作記故於風景未始一及余以梓里肄業斯院聊舉目之所流覽而有觸於心者誌之

東洲寶興堂記

邑令進士陳文衡

國家稽古右文崇儒重道興學校以養賢設科目以取士郡縣皆立書院多士奮興爭以文章經術黼黻隆平狗歟休哉丙戌夏余蒞茲土甫下車觀風試士遠近生童就試者數百人佳卷林立竊喜此地文風遠勝他邑即以所取士送龍河書院肄業及程月課多不至者詢知爲遠處鄉村艱於跋涉余思居肆成事百工且然事賢友仁聖有明訓吾儒學問不得師友嗚呼能卓然自立者鮮矣嗣或因公下鄉接見紳耆輒告以創建義學延請名師俾鄉中之秀得以就近觀摩庶士無棄材焉是秋紳士張君瀚暨諸首事持簡謁請勸捐序文爲設

萬載縣志

文徵記

二百十五

立書院寶興之舉余志不自勝亟爲之引書於簡端并捐廉爲倡時有耆民鍾天直遽捐銀千餘兩各鄉踴躍爭輸未閱月醵金以萬計乃酌四鄉之中於大松河東洲上置造廣廈周圍垣墻寬百餘丈山水清明規模闕敞匾曰東洲書院中奉文昌帝君次講堂及生徒會文地左右各置廳事書舍計六十間甃房各一經始於是年冬期月告竣復於院左建閣奉魁星院右置寶興堂宇爲餽送科舉度支會計地如肄業眾多兼可分任堂後設立木牌牘列樂輸姓名以彰義行統計捐項三萬有奇除建造書院寶興堂外買田三百餘畝及店房等業歲收租息爲師生脩火以其餘爲童試鄉會兩試資費措置經營斟酌妥善以此見一時好義者之多而諸首事經理之周且至也自今以往進修者既觀摩之有自應舉者復資斧之無虞成人有德小子有造當何如砥礪濯磨奮發興起歟抑余聞之學也者學爲修己治人也俗儒專以詞章爲學徒知博取科名一旦釋褐服官於已茫無所據於人毫無所濟所謂幼學壯行安在乎吾願

多士窮經砥行勿事虛聲奮志風雲留心致澤學爲有用之學斯才爲有用之才於以仰副聖天子造士作人之至意則茲舉也豈徒侈壯觀矜聲氣有裨於寒士進取云爾而已哉時總其事而襄其成者九三十七人例得附之碑陰道光丁亥年秋季之吉

重修東洲寶興堂記

邑舉人賴景崧

古者三物寶興所以選俊造秀爲國家簡拔人材典至鉅也後世鄉舉里選之事難行奮志青雲者每以文章經術爲仕進之階然敬業樂羣雖藉師友之陶育而或念切觀光艱於資斧則磊落莫多之彥未免蟻屈難伸資富能訓不信然歟大橋東洲書院之右舊有寶興堂爲書院度支會計地而多士童試及鄉會試資費亦皆經畫於其中同治戊辰歲左編廳事不戒於火構榑節稅幾無復存兼以前繞溪流沙平水淺當春潮驟漲泛溢堪虞曹君次秋黃君擇萬暨董事諸君思前事可師有基勿壞因舊制而鼎新之鳩工庀材不數月而落成

萬載縣志

文徵

記

卷十六

規模如昔而爽塏過焉經營亦慘沒矣哉且夫廣廈萬間不過詩人託興之辭而斯堂也績學者藉以翹材礪名者從而發軔相與正誼明道黼黻皇猷於以仰副盛朝棫樸作人之雅豈不懿歟

南坡辛氏義塾記

署令巢縣舉人楊獻彌

皇上崇興文教凡天下學塾有關義舉者例得旌並詳入志癸未冬余攝萬載篆適辛氏南坡義塾以載志請南坡義塾者蓋乾隆五十二年其族長聚等倡義所創立也嘉慶初廷芝恬昭等復輪冊釀金置膏火田若干畝名曰南坡以宋時南坡由隆興來萬爲一族鼻祖示不忘也塾距南郭里許枕山面江形勢宏敞平疇千頃翠浪交輸仙嶺鵝峯天馬諸山蜿蜒秀峙可以遠眺望可以舒嘯歌會講有堂藏修有舍退食有廳庖湍有所後有圃雜蒔名花數十種香幹高枝鳥韻悠揚前有月臺方廣數十步有曲池袤延數十弓繞以曲垣闕以重扇俾出入有稽而遊冶者無自而入其所以爲造就計者至深遠矣余既據載

志乘其族復以記請余惟古者家有塾七者熟也以素所熟遊之地萃素所熟習之人深其陶成教自易易也抑又聞南坡之結廬西山也以存誠主敬爲本以格物致知爲功其主講隆興也生徒至者以百數今此塾也萃同姓子弟互相競勸其將專力帖括以爲弋獲梯乎抑亦體驗身心邦家之達由此其選乎吾知創塾者好義以爲倡入塾者集義以爲本大家聲而爲國儲材胥於是乎在因不辭而爲之記道光甲申閏七月

田下郭氏義塾記

辛廷芝

昔范文正公爲秀才時以天下爲己任蓋其學本聖賢之學故其行爲至公之行及貴顯積所賜祿爲義田族人賴之吾邑田下郭氏慕文正之義謀舉立義學出其祖南軒綠陰二公遺金各七百兩因而欣然助五百金者有若宗國正南二公捐田五百把者有若裕才其次以百以十以兩計者百餘人得金約數千遂購田二百餘畝爲膏火貲創義塾於南壇側橫若干丈直若干丈中建講

萬載縣志

文徵

記

二百十七

堂堂之後有聽聽樞洞達廳後闢花園堂前左右迴廊中闢門皆軒敞堂之旁翼爲齋舍五十餘間曲而通奧而明門前鑿池以觀魚躍周垣玲瓏見遠山如畫庖福備具極藏修遊息之大觀也其經營調畫則名都惠和砥中三君之力居多及告竣諸君請記予謂人才者國家之本培植者造士之方今郭姓不下千餘家諸君出至公之心進一族之能文子弟日課以聖賢之道儲其才以爲當世用仰體國家培植人材之意誠知體要者矣先儒云師道立善人多子孫賢族將大往者郭敏齋翁創綠陰書屋以課後人其時南軒綠陰二公皆以文名大顯於世今子孫建此義學則其顯發不且後先輝映乎哉經始於乾隆丙申之春落成於乙巳之冬費白金三千有奇其捐助及勸事諸君併田畝莊所另著於碑以垂後

新建龍岡書院記

邑令仁和舉人湯慶曾

踞邑境上游有鄉曰萬載邑之名由此昉地介瀏陽宜春其山之高水之駛爲

邑境山水之權輿焉元時教授張千崖就獲富里構書院虞道園爲之記稱其殿祠閣亭弦誦衣冠比於京洛蓋一時之盛也厥後人材輩出逮清龍在達弱冠登賢書比來學博湯馥堂明府湯瑞躋皆以科名顯則其鄉之績學能文出爲世用者固有素已今余承乏來斯邑值龍岡書院落成間因公過其地見夫外屹崇墉內闢儀門門以內暨兩亭中構廳事三重前講堂後文昌祠及魁星樓左崇義堂右書室爲肄業地其規模洵闊壯矣哉時進父老詢之僉告余曰書院之設以鄉多舉業士地遠龍河負笈頗艱學博湯公迺謀於鄉諸君子各醵其族之金而成斯舉也置田供膏火更以餘貲給童試卷費及鄉會程儀其爲蒸育人材計者至深遠也余聞起躍喜其鄉之樂善好施何多君子也旣而諸君子來謁語次以記請予惟古昔造士之法莫先於鄉校德行道藝以鄉老鄉先生董之及大比賓興鄉大夫以禮禮賓之獻賢能之書登於天府由是入使長之山使治之罔非由鄉學基之也今多士肄習其中共期乎經明行修其

萬載縣志

文徵

記

二百十八

砥礪廉隅自足善風俗間出文章緒餘亦無不足爲世用豈非與龍河之士有以相望而相成哉則昔以鄉之名名一邑者今日以鄉之學並耀一邑之學回憶獲富書院烏足擬其盛也哉是役也興工於六年春月闋七年冬告竣湯公薦馨周公洽齋隴公文陳公常並倡督有力焉例得書其餘捐助及田畝並列碑陰以誌後之來者是爲記

龍岡書院添建齋舍記

邑令山東舉人崔登鼈

國家崇興文教獎進士類天下郡縣皆立學設之教官定以月課意至厚也典至降也顧學之立也嘗在城且其所考校皆在學諸生而書院之設則隨其地之所近合生童而皆得造就之也萬邑三區距縣城七十里許珠水波廻雲峯翠聳無城市之喧得靜觀之樂道光六年就其地創建龍岡書院經營之善結構之精邑侯湯公序之詳矣嗣因公用不敷未克延師起學前邑令韓公乃爲捐廉倡首先後始得捐銀二萬有奇添建齋舍數十間門樓圍墻庖湍備具規

模洵宏敞矣予蒞任之明年適書院落成時紳士稟請親詣考試予惟興賢育
才有司之首務親師取友文士之先資旋示期親至書院見諸生童雅雅魚魚
皆璫璣器子固知龍岡多士發越正未可量也酌定章程取士如額送院開館
并爲續行勸捐得銀三千有奇以資膏火又以其餘給童試卷賞鄉會試程儀
是年鄉試登賢書者一人明年歲試遊泮水者四人予益知龍岡多士發越正
未可量也夫爲學之道毋屑屑於利祿必先其遠者大者而後浸淫於經史古
大家務爲文章始能爲有物之言予用是急爲商定勸學條規數條又捐俸置
十三經註疏善本全部文選善本全部欽定四書文善本全部多士誠得明師
而講明切究之又得益友而切磋琢磨之又以予言而身體力行之又以十三
經文選各名家文朝考而夕糾之夫而後處爲有用之學卽出爲有之才從此
歌鹿鳴題雁塔經明行修以仰副朝廷造士作人之至意則書院之設其裨益
豈淺鮮哉多士勉之予日望之矣道光二十五年歲次乙巳夏五月撰

萬載縣志

文徵記

百十九

創建龍雲書院記

邑舉人韓觀

書院占庠序制自省而郡而邑莫不設以造士而一邑中或城或鄉隨地分建
俾學者各從所近以藏修游息於其間以無失乎黨庠術序之意誠善舉也吾
邑自龍河建後英才輩出蓋萃城鄉之秀而造就之然肄業者多城居遠鄉或
以負笈爲艱取錄後一徂月費輒不前各區書院之設尤不可已龍雲書院者
故孫家騰辛氏業也地當四五區之中枕高阜帶清流巖居川觀天開講學勝
境四區及上五區之有宿望者擬購以課眾子弟而苦乏貲財鏡山陳綿韻與
謀以告其母吳孺人孺人曰此義舉汝父賚志久矣不可以不倡因首捐千緡
命僭弟勲從事焉於是輸者四應合資產約若干乃購基經營爲堂屋三重後
祀文昌前講堂又前門塾大門左右書室若干翼以二堂爲輸戶報功所氣象
軒敞規制靜穆砥柱目而觀兩區人文之盛也工未既輸不時至綿韻兄弟有
捐千數百緡以藏之事起道光壬寅閱四歲始竣旌獎有差是役也非陳母倡

首不能興非眾君子集腋不能舉非綿韻兄弟合尖不能成功並不容沒云抑
余嘗取其名思之易曰同聲相應同氣相求雲從龍風從虎言各從其類也今
書院議一倡而千緡從焉數千緡又從焉義之從類章矣而况親師取友性命
相孚者乎今日同堂講貫相期為端士純儒此類也異日同朝協恭相勗為良
臣名宦亦此類也在院諸君勉乎哉為師者務以正學為倡為弟者務以篤信
為從則人材蒸乚出處皆有以自見庶不負立院造士之意昔華歆邴原三人
為一龍况合兩區英才以同歸聖賢之學其為龍也多矣一旦得雲雨都非池
中物其慎擇所從無貽割席之譏而噓氣成雲咸為時作霖雨焉則所成豈但
一鄉之善士已乎爰樂而為之記

龍橋書院記

邑廩生張居敬

龍橋書院者敬與高君在梁等十一人勸捐所建也地在五區雲峯里環山帶
水萬歲橋適當其下倚為歸束故名先是家大椿以創建事商予予曰此盛舉

萬載縣志

文徵

記

二百一十

也如士疇何姑集同志諸君子謀焉則皆喜捐者響應會龍君沛霖叔姪有別
業在上游議取作基已立券矣眾以形家言力持不可乃改購今址故事購產
者悔當罰金龍以義故不責償士論躋之至是庀材興役門墻高且固堂室齋
厨以區計者三十有六既歲事擬將田畝租息及善後條規梓冊散給捐戶諸
君子命余書其顛末弁所以諗來哲者余惟書院所以養士士豈無以自養哉
文章根諸道德經濟蘊諸嘯歌不文繡而自華不膏梁而自飽此得所養之士
也院中有此門牆以之增光創建者與有榮焉若文藝徒獵科名經術徒徼利
祿衣焉恥不輕煖食焉恥不肥甘此失所養之士也院中有此門牆以之增玷
創建者與有辱焉二者之間士將何以自處孟子云養心莫善於寡欲又曰養
其小者為小人養其大者為大人予願游斯院者各善其所養無失書院養士
之意他日出為世用自不負夫朝廷養士之意其有光吾里顧不大哉諸君子
以為何如是役也經始道光癸卯春月落成甲辰秋月糜泉布千有餘緡凡捐

輸三十緡以上列牌報功下此備書於冊爲後之好義勸十一人者敬與高在
梁家大椿龍沛霖外錢維日潘厥修高起河家佩神漸達楊吉貞歐陽觀皆有
勞勩云

隴洲書院記

邑舉人彭士模

隴洲書院在羅城故康樂舊治也先是合邑書院惟一龍河而邑分六區獨一
二區附近餘皆遠處鄉村負笈艱自三區創建隴岡四五區龍雲繼之各鄉
以爲便而六區顧闕焉何以稱人文之鄉哉適刺史盧翰坡守制在籍亟出金
爲倡邀余偕同人勸捐合區子姓莫不踴躍得緡萬有餘千至道光癸卯動工
越明年而落成爲棟宇五重後堂祀先師左右學舍各二次暨四照亭翼以
小廊次爲講堂左崇義堂右藏書室堂下兩長廊前起奎星樓左右客廳各一
樓外爲門塾兩廂學舍各廿餘東司守所居西間倉屋二所廂房四寮以圍牆
門首立惜字亭規制大備名曰隴洲以羅城西接盧家洲也餘皆悉置田畝以

萬載縣志

文徵

記

二百二一

給師生館餼一切章程俱倣龍河其地踞全區之勝坐擁三台南則墨山聳秀
北則錦水迴瀾學者藏修之餘縱厥觀覽可以助文峯之奇峻得波瀾之意度
焉抑吾聞士先器識而後文藝器識者謹小慎微以立其體而後廣大高明以
達其用昔孔子於鄉黨恂恂如也而諸葛孔明一生惟謹慎可知道德事功歸
本一貫未有任情肆意而能成遠到之器者也惟文亦然必先謹守繩尺醇而
後肆焉吾願居是院者師以是爲教弟子以是爲學則處爲修士山爲純臣而
文章亦足以名世吾隴洲人文豈特爲一區光已哉昔以善治之鄉而仍名城
行且以一鄉之義學方駕一邑之書院視彼龍岡龍雲或過之矣此余所深望
也故樂訊之同事孝廉楊羅峰盧及芝盧介明經家先生才尹職員李楨李樂
行茂才高炳麟太學楊蓮機盧炳南彭之傑盧鏡彭賢珮或以賞倡或以力舉
例得書各戶捐數具列碑陰

嘯竹齋記

知縣分宜進士習家駟

昔胡翼之秉鐸蘇湖嘗建經義齋治事齋一時能爲士者能爲吏多出於兩齋之中此齋所由立而後來學者宗之也觀溪盧氏家康樂北偏前明篤學諸君子別構一齋在族之西南隅植竹千竿迎風嘯咏因以嘯竹名焉歲壬寅余以伯兄授徒其中嘗一至焉已覺別有洞天纖塵不到越四載而余又忝西席於是此齋之足供玩賞者乃得盡收之耳目間矣齋之內宅窈而深齋之外地宏以敞修篁聳翠繞徑扶疎其北則錦水潺湲聲長在耳而南望晴峯末嶺青蒼鬱勃之氣直排闥而來游息其間可以澹性靈可以揚風雅可以壯豪思而飛逸興名教內有樂地舍此其奚適也諸生有起而請者曰是願有記余謂齋之有取於竹豈徒邇延野綠遠混天碧已哉古來高人傑士往往寄蹟此中故結伴於林則賢焉而七聯社於溪則逸焉而六其心虛儒之謙以受益似之其節勁儒之立不易方似之其勢拔地而參天儒之才凌霄漢胸羅星宿似之然則曷嘯乎爾曰此自然之天籟物必擇其善鳴者而假之鳴松之濤也其聲奔以

萬載縣志

文徵

記

二百一

放蕉之戰也其聲粗以厲孰若此嘯焉者之夏玉鏗金答窅響而生清風乎況伶倫典樂未截鳳凰之管先鳴嶰谷之枝嘯固天地之元音而得於竹爲尤佳也儒者默識此意通之於身心性命以扶質而立幹將見鼓吹大雅和其聲以鳴盛奚必不由此而基故學之爲良士焉學之爲良吏焉則是齋也卽謂得經義治事之遺意也可諸生勉乎哉

嘯竹齋後記

盧兆梅

縣東北四十里廬家洲嘯竹齋建於明之末葉屹存至今余於清末續家乘曾爲文記之廢興沿革略可考而三百年居齋講學之君子其淵源學派闕焉莫及變亂迭乘載籍湮沒時深數典忘祖之懼故徵之志乘與見時見聞及得諸父老之詔示者畧述其概以示我後之人我支祖明文學未入公緝家譜義例折衷於歐蘇所撰凡例及傳序行文縱橫馳騁而一歸於正是首居是齋講學者也閱百年而公之曾孫明經東澗先生以文受知於趙鹿泉學使冠其曹清

代在西學臣最負文譽者惟趙氏及翁覃溪氏而趙氏文章清俊旁通釋典氣味雋永山林枯寂之士奉之爲一代規範考先生受知之年六十矣其文心契合歟而先生著述舊載春秋釋義三卷惜存其目而佚其書詩文之間見於志乘者賅括事理以質直勝先生居是齋久意釋義爲居齋時著錄是能以春秋學接先世之傳者也上下二百餘年間吾支子孫誦讀者惟齋是賴綜計入庠序者達七十人登甲科者一乙科者五而遺文寥落惟行誼多爲鄉里所矜式譜牒具在可攷也先大夫爲公之八世孫從明經喻普齋先生得芑山張氏遺書進求龍川眉山上溯左氏春秋酷嗜之曰吾家學也教行於鄉晚以課盱江之士凡十年先兄扶常侍讀守其學以交當世士遭遇政變歸齋講習嚴義利之辨修明忠信孝弟以爲立身齊家處世接物之本一時耆宿若魏斯逸元曠胡退廬思敬劉潛樓廷琛葉甯愚大椿華瀾石焯章一山駸郭復初立山趙堯生熙商雲汀衍瀛書問必日月至齋所學不盡同而反復研習指歸則一如是

者亦十年侍讀不欲以空文垂世其遺稿係身後余所搜集者而出處大節取之春秋可謂孝已余幼隨侍讀學壯而奔走四方中倏變起息影齋居復倉卒避地經年而未知所屆嗟乎敝廬破麓從容講讀亦有時而不可倖得運命之窮乃至此耶然守傳書而無以示後又余之所天懼也夫春秋酌功罪之中準是非之宜以求合乎天理人心而爲百世不易之法其義則褒貶也其訓則勸戒也故褒善貶惡而善上從長惡上從短凡人自修齊以至平治莫不可於此取則焉故教戒垂而風俗正而學者勿穿鑿附會以求之累千萬言而莫得其旨趣三傳詳略微有不同紀事取義竝存而不可缺復囿於門戶之見甚且雜以假借援引之私逆億曲說至不可究詰此豈善讀春秋者耶君子之爲學也通其旨要致其精粗躬行寔踐以淑身世故不爲美矣之言不立赫赫之異學勤而品粹知致而氣充有放之則彌六合卷之則退藏於密者焉我未入公取善善惡惡之義以修家乘先大夫接踵東澗先生示勸示懲啟後進而綿世澤

侍讀與海內俊彥書問往來於齋中者每於此兢匕其退密慎微居鄉善俗家學淵源歷三百年如一日循而習之道在於是矣夫以荒村僻遠破舊數椽之書齋世廢世興綿延以迄於今日倘非有顛仆不可磨滅之精神寄存於其間其能撐拄於不敝耶世變日亟歐亞戰局汹汹尙未有定環球百數十國會盟徵伐日益變幻而不可測就春秋之義之訓推而準之經以守其常權以通其變窮則抱先人之遺緒達則爲雍容壇坫折衝禦侮之才道不遠人在後之人求之而已爰秉筆記之居是齋者其亦知所勉夫其亦知所勉夫庚辰冬月泰和客次

馬腦山房記

魯 鴻

馬腦山房者故孝廉張若木初與其友肄業之所也九十三人其地背郭面流山勢駁賦嶽然累而下故名十三人者總角同師長以志行相矜許愛此地山水佳構書室一區講道談藝無虛日其子孫卽後圃爲堂如祠宇制歸然十三

萬載縣志

文徵

記

二百一四

本至在焉自張孝廉外龍諱長蕃楊諱維鑑彭諱淶辛諱繼攀辛諱汲汪諱朝宗宋諱啟沙龍諱臣勲辛諱受捷余耳其名也久康熙中萬邑士風澆樸無浮僞馳騖之俗而十三人者尤砥名行盛意氣慨然思有所建豎於時里黨平居相議論謂拔茅連茹可坐致通顯自張孝廉下第以鬱奇死於北諸君子由賻扶襯歸而葬之相對愴怛如醉夢而曩時豪上之氣不知焉在矣厥後或相繼以沒或混迹升斗或老且病今惟三人在耳其齒最少如汪君岷山者且皤然七十有四岷山於余爲選貢同年余聞其勇於爲義邑有大事恆倚以爲重今踽匕族黨中漠然無所向卽一人之身而前後盛衰之故如此可慨也然諸君子之子孫皆篤於氣誼余嘗見辛孝廉秀圃於岷山所侍坐立維謹皆得事父執之道距諸君子之風不遠也人倫有五遇不必盡隆卽觀人者不必徧稽也篤於其一而其他可類徵焉諸君子以朋友爲性命則其天性之肫摯與夫平日之所講求可概見矣今合而祀之子孫仍讀書前楹愜見優聞孝子之心也

儼提命於先生師友之隆也此禮雖前世未之有可以義起也豈徒爲名高已哉張孝廉諱明德在歲一等自一名至九名皆十三中人邑人至今爲美談存者岷山名朝祖韓名大學郭名達

重修馬瞻山房記

邑令大名進士衛鶴鳴

嘗懷謝康樂之爲人欲置身春草池塘間歲辛巳補縣令適得其故封地覽名勝因以訪求文獻有孝廉汪君春圃博學能文端然醇雅昔與同遊齊魯乃今得聚於此又副舉郭君曉齋歲薦辛君涂溪張君帶江辛君曙村文學張權籬楊古嶺龍昂軒辛桐菴汪蘭谷龍衡堂從予講藝者韓介侯皆積學立品士也公餘之暇置酒縱談古今以爲快每與諸君子相見觀其齒序之間坐立應對唯謹不徒敦鄉誼也詢其故言其先世同講學於城北馬聯山房者十三人後子孫相視如伯叔兄弟歲時修祀於山房如宗祠制十三木主饗焉蓋百餘年矣予聞其事而起敬因請其遺蹟觀之有楊公慶遠爲之序魯公厚番爲之記

萬載縣志

文徵

記

二百一五

其傳贊出於晚堂辛公月臺辛君通讀之則十三先生之性情行誼學術文章卓然各有以自立而翕然相與磨勵修能於山房者如在目前乃知諸君子之道台志同克有成就其從來遠也夫士習日非相狎相謗友誼之不篤能要白首者鮮矣而諸君子乃相持於累世百年之久蓋學人以道義相交其托根也厚非世情浮議所能間故十三先生相信於當日者深而十三先生之賢子孫相與感念締固之不忘也朋友之義孝弟之心守先待後之事皆於是乎在吁可敬也邑之人觀此而興起焉講學有源流而卽以敦倫理厚風俗將戶可封也今諸君子將山房重加修葺屬予爲之記予雖不文而樂道其事且以其事之不朽也得附名驥尾爲幸抑予猶有屬焉諸君子之篤於氣誼如此由家庭以及朋友由朋友以及鄉國其義一也今方議纂邑志亦百年未修之業一邑之風教關焉諸君子必慨然同心力以爲之倡風塵之吏所願黽勉以勸其成者也

尚志書院記

辛從益

益幼時嘗從巢匯堂先生遊知其文行之超而未詳其文爲何人也聞有書院曰尚志在城東南蓋先生舊與同志講學處先大夫課益嚴不令輕出家塾益性亦落落寡交游雖鄉先生名蹟近在城隅未能一往觀也通籍後稍稍來往諸鄉然於城居反畧比官京師十餘年以母老告養歸則尚志書院已煥然重新矣先生之子茂才飛鵬偕諸世好以益嘗從學先生邀往遊焉縱覽形勝周觀庭宇升堂窺奧穆然想見諸先生遺澤及與其後人燕談竟日皆郁彬彬有詩禮家法則愈歎諸先生弓冶之庥因題聯以舉其盛今益來京補官又十餘年矣茂才郵寄十二先生傳見示益始得盡悉諸先生之行彌歎匯堂先生取友之端且廣也茂才並有書屬爲書院記雖然則奚待於益哉諸先生結社之由與尚志命名之義則汪岷山先生齒錄序已詳之諸君子繼志肯堂之美則有邑人士題詠卽益聯亦已及之又奚藉記爲哉抑益竊有進焉孔子曰

尚志書院記

文徵

記

二百一六

父在觀其志父沒觀其行夫志必兼行則非徒志孟子言尚志必曰居仁由義居由者行也夫必先明乎仁義之是非然後所行不疑此不可以無學矣若徒高自位置以爲不與俗伍而曰吾以明道自期也以希文自待也微特好大言而遺切近且恐誤入於非仁非義而不自知岷山先生序亦云居敬窮理反身實踐益以此二語尤爲尚志要義諸君子旣皆淵源家學建書院以永其澤入斯院也必皆相從講學使行與志副無負乎先人之訓可知古者一處士居鄉鄉之人薰其德而善良者幾千人況合十二先生之裔各尙其志各敦其行以風示一邑乎師道立則善人多此之謂也風化之成在此矣諸君子其勉之十二先生者郭肅齋洽清龍敬齋培禮郭健齋秉毅汪鵝峯發楫郭景堂溶辛正軒魯郭觀堂瀾辛晚堂廷芝汪滙堂發峻王蘊齋昌隆張琢齋焜圭以齒序滙堂先生居九皆積學敦品人也因書院所自起故備記之遂書以歸茂才

啟元書院記

邑貢生王介眉

啟元之有書院自今日始也啟元之名則不自今始嘉慶辛酉至辛未十年之中少宰辛公筠谷方以侍御告養在籍與其仲兄淑郵先生從子敬堂先生並里居一時守正循禮法之士若劉君恬齋袁君素先陳君桐村汪君春圃相與爲友稱莫逆而予與恕持張君鑑浦高君得厠其間之數人者蓋皆明義理識時勢同方同術不牽制於世俗者也既歷艱貞被疑謗幸而自全思爲久要計乃相與列系序齒釀金付善經理者權子母得以歲時歡聚且各隨力所能及捐金助田將買地爲講塾使子孫肄習其中因取貞下啟元之義而名之啟元蓋以識吾十人志行之合堅貞之節而使後起者有所矜式承前休於弗替也事越十餘載諸君子相繼歸道山而予與高張二君僅存黃公之墟山陽之賦回首舊游觸景傷心顧吾三人亦衰且老矣大懼書院之不及觀成而諸君子之有志而未竟其事也於是商之於眾取先年租息之入購龍江門外屋數椽隙地一區前對龍河後枕龍山山水明秀地勢爽塏無城郭之喧得靜觀之樂

萬載縣志

文徵

記

二百二十七

於讀書求志爲宜蓋書院之名肇於十八年之前至是而書院以立而惜乎少宰與諸君子之未及見也在易臨之泰曰無平不陂無往不復艱貞無咎蓋惟處艱而不自晦其貞乃可以無咎昔吾十人之居里不爲非禮之禮非義之義當時不無疑且駭者迄今日而是非大明其行事豈不彰彰然可共信哉卽以是揆諸貞元相倚之理其庸有爽乎抑余聞元者善之長積善之家必有餘慶今諸君子雖下世吾三人雖衰老而後嗣之賢且秀者鳳毛蔚起多能以文章世其家恭逢聖天子右文之盛海內俊良共樂升庸吾知諸世友中必有拔幟而登搏扶而上撥鄉會殿試之元以爲前人光者由是而貞固以幹事體仁以長人爲國家培養元氣俾世德之駿烈傳諸奕禩永永無窮用以仰副諸君子之志而爲書院之榮是則予之所厚望也夫

友仁書院記

邑舉人劉式穀

距城東百數十武隆然坡起高朗平曠鴈塔聳其旁烏溪繞其後前面雉堞右

瞰鵝峯白板紅牆參差揜映於青林綠樹中而歸然獨峙者友仁書室也室爲屋三重外繚石墻前燕會所中講堂後寢室祀十二先生木主中後房各二左闢書舍六庖湑會計以次備具棟宇崇闕疏櫺摩豁西偏復構四間爲倉廩爲守者棲息地周圍開塲圃植蔬蒔豆俾守者供耕食創建之善謀畫之周他院弗及矣入斯室者無城市之喧有山林之樂每當宵深晝靜風雨一編星月四壁超然遠想初不知人世間更有何樂地余假館有年士之從遊者皆樂其清幽雅靜相與肆志於詩書藏修游息怡煥蕭閒故門下之雋膠庠大抵游斯室者爲多然後歎斯地之秀靈固人才之所窟宅而文會所由昌明也夫學問之道靜其要矣靜則多妙靜則必專以入聖賢之域不難舍是而求吾見紛紛瞽亂惑於耳卽奪於心徒爲勉強鎮定無益也今我十二家既得此爲講學所而又名之曰友仁其必有取於仁者靜之言而非是則弗與爲友矣竊願諸同人一其操持堅其漸向以求進於仁之境卽以科名論而旁觸乎甲之爲仁撥青

萬載縣志

文徵

記

三百一八

於登黃甲顯擢焜耀甲於一鄉甲於一邑以應地氣之靈則又斯室之所藉以不朽也已至其創建增修具詳於冊茲不贅

兩以書院記

盧 諤

滄溟者涓滴之積也太華者卷石所崇也不涓滴無以爲滄溟不卷石無以爲太華凡物未有非積微至鉅者也吾觀兩以書院之始末弁徵十二人之行事而深有感焉十二人者居同方學同術當舞象時夙筆應童子試相得也奮然興謀道之念就邸中結文社定條約樽酒課藝迭爲賓主取以文以友之義各之曰兩以社夫少年意氣相高大都酒食游戲相徵逐豪者以勢貪者以利茲獨出世人所以之外而以古人之所以則其成人有德先定於小子之有造他日道明德立羣然有聞於世者未必非此舉基之洛邑之社以耆英萬邑之社以卮角事固遙遙相配也聞其建社之初人出貲錢四百子母相權積數十年累至千餘金後諸公相繼謝世而皆有令嗣克承先德道光二十四年劃其質

三之二就南城外建立書院面龍山枕仙嶺錦衣帶橫文峯筆秀奉十二木主其中餘貲復購學田喜有慶凶有賻膏火有資甚盛舉也而皆自曩之四百錢始方主人祀時郭公光笏年九十餘蒼顏鶴髮巋然獨存諸家子弟羅拜如禮迴思結社之初初不料成就至此此其所以可感也諸公或登仕版或膺恩賜或蜚聲譽序固屬以文之效有郭公者獨以布衣終而諸公不以是爲輕重道義切磋彼此無間此又輔仁之驗也於戲可以風已書院既成以名社之名爲名而請予爲記因書其概以志企十一人者以齒序邑庠生乾隆甲辰召試入等辛公塋郡庠生辛公紹基歲貢生郭公大曙布衣郭公斯渤副貢生署江蘇豐縣知縣辛公啟泰歲貢生欽賜舉人郭公光笏郡庠生辛公玉成邑庠生郭公樹藻邑庠生易公光達增貢生辛公元展廩膳生張公方郁附貢生直隸興國塲大使郭公如泰

興賢書院記

知縣分宜進士易炳晃

萬載縣志

文徵

記

二百一九

古者國學而外家有塾黨有庠術有序教化興所由風俗懋也萬邑多慷慨好義之舉鄉里族黨間建義塾尤多心竊慕之嘗至其地至喻觀亭家觀亭言曾集同志七人結同庚社亦將建立書院以課衆子弟聯世交焉余聞而愈慕之夫世俗交遊大都里巷相徵逐遊戲相慕悅銜杯酒接殷勤而已斯社之立乃志在學業期諸奕世誠異乎世俗之交能以義交者昔竹林有七賢而文潞公居洛曾爲同甲會談交道者競艷之今諸君取友適合晉賢而命名以庚甲爲仁庚爲義古今人何必不相及耶吾知義重者志勇必能同心同力相與以有成也別後甫十年喻君果郵示請記則城西興賢書屋已落成矣夫古人以多賢友爲益今諸君訂交以義一日之雅期諸久要而卒成其志可不謂賢哉肆業其中者樂有賢父兄因思父兄所以訂交與所以期我後人者必將有過相規有善相勸德日進業日修在家爲賢子賢孫在國爲賢士賢臣賢哲之興起於是乎在賢能之實興亦於是乎在吾以是歎諸君之貽謀者遠而教澤無窮

是又竹林洛下諸賢計所未及者也世之結社者皆取法焉其有裨於世教風俗豈淺鮮哉故樂爲之記同社例授四品柳君承培郡增生辛君錦河國學生李君乾載袁君錫麟晏君治穎相繼謝世存者惟余友附生喻君藩國學劉君廷種兩人年近八旬皆玉面方瞳精神矍鑠成茲盛舉云

崇文書院記

辛辰雲

崇文書院者 贈翁郭公禧堂偕同志崇祀文昌後人贊之成是舉也先是帝君像安考棚有例祭無香火公以謀親友得廿六人合資居積晨昏朔望胥取給仍以時致祭祭畢序齒燕飲歡若一家當時稱盛事焉已而諸老相繼逝歸然者獨文竹先生在後輩志意不一見貲羨或析去故先生册序有慨乎言之惟十二家者志逾堅交逾篤生息亦逾饒於是胥宇鳩工構廣厦崇文堰旁因以爲名今十三年矣會脩志公孫海門明經朝夕共事以册屬記雲讀之深歎前輩興廢舉墜與後賢繼志述事之美爲不可及也夫自佛老風熾琳宮梵

萬載縣志

文徵記

卷三十

宇香花供養者恒經日無斷時士大夫亦波靡焉至 文昌爲吾儒司命香煙冷落曾不措意其眞也實甚諸先生顧獨不惑異端致崇於所當祀可不謂明哉易曰文明以止此之謂矣而諸賢嗣並能恪奉成規彌務恢廣崇 文昌兼崇文學以培植其人才是前人志事引而愈長也孝孰大焉以 帝君主持文運忠孝垂訓諸君子用心若此獲佑何疑今卽前事驗之如公子星嶠先生以進士作名宰彭南垣公族一齋公家熹亭伯子孫並登科第文竹先生則身享高壽邀恩賜諸家復濟濟多才貢太學列黌宮者項背相望崇祀之報彰矣矧星嶠先生更光大前緒倡建 帝宮移安神像十二家香火亦視昔有加吾知孝思所格人文日盛不但贈翁子孫方興未艾諸先生後裔必且極熾而豐則是書院也詎非 帝君默相其成因以默啟其靈秀者乎方當島夷綏靖匿武觀文文章報國此其時也抑聞經天緯地爲文雕蟲繪藻亦爲文諸君子其善擇所崇如前輩之文明以止焉則學皆正學文皆大文鬱爲文棟應運而興此

十二族世濟其美不將與虞廷十二牧後先輝映哉視彼崇佛老求利益所得何如也琳宮梵宇一蕭梁之花雨臺也香花供養一李唐之舍利骨也其亦可
以返矣十二公者恩貢辛學誠一齋穀貢辛炳昭熹亭國學郭世華禧堂邑庠
郭泰均恕堂國學彭英拔南垣恩貢辛廷元升甫國學陳能泰至員邑庠辛煒
斗軒例貢辛汝琳瑤圃廩貢陳經藝圃恩舉郭光芻文竹邑庠辛岐瑞亭以齒
序

彥威書院記

郭大經

距邑城之西八十里許曰書堂在深谷中羣山蟠亘西南卓筆尖秀插天際雖
霧常有雲霧洵崑壑佳境也晉習鑿齒彥威避苻堅亂結屋讀書於此故名曰
書堂具載郡邑志故之史彥威爲桓溫別駕及堅苻陷襄陽聞其名輿致之俄
以疾歸既而襄鄧反正朝廷欲徵召典國史會卒考古錄辨其無避地事夫輿
致徵召當在得地安民時若聞寇而避轉徙他境尋幽結屋亦事理之常書闕

萬載縣志

文徵

記

二百三十一

有聞傳聞要不盡誣也第晉距今久書屋興廢末由遠稽今居其地者爲張氏
族焉歲乙酉余料資興贊道經其地詢遺址則書堂祠踞其半餘皆侵沒爲田
所存僅墨池荆榛蔓之余低徊太息安得有心者攘之剔之構數椽於斯以存
先賢遺蹟乎越丁亥張氏謀諸族挈金數百以倡遠近響應遂購田拓復舊基
備工作庀名材構前後廳事二左右繚以廂列書舍十數庖湍具備門牖洞達
遙與卓筆相拱向額曰彥威書院本志也今秋辛明經起人偕其徒張教軒來
告屬記其事余作而歎曰善哉斯舉也自古學校之教莫先於鄉鄉而爲名賢
所寄跡則興起尤易况以彥威長史才帝蜀削魏深得春秋之旨開紫陽之先
其學術甚正氣節甚高不足令百世下頑廉懦立乎今書院之建紹復遺蹟使
流風餘韻常在人耳目間立意既良厚居是院者因彥威之名思彥威之行得
無感動奮發乎哉其必蓄道德礪廉隅學術氣節出處皆宜將尚友古人不難
自一鄉善士基之然則斯舉也謂不忘古在是矣謂不忘古而善師古亦在是

矣工興丁亥八月迄於戊子十月共費金一千有奇董其事者職員張明芳堂
珩清元與景周秀中等例得書其餘並勒碑陰道光九年冬月記

聯元書院記

邑舉人盧 燧

古之儒者既敬業樂羣又論學取友非徒博習親師也余自嘉慶丙寅歲肄業
於灣溪之上達齋已歷有年矣見從叔副貢及暉優廩及暉郡庠及皞昆季與
邑廩及泳郡增爾素爾訪邑增胡炳鎮郡庠元英翹楚胡廷元國學翹植胡蘭
儒士及灑後杰李兩芹諸先生等共十五人相聯課文觀摩志切以同族同鄉
之好敦相應相求之情久欲起一書院以爲志道之所如工之有肆然頻年升
墟度原尙未卜吉甲申冬羣相鼓舞適於羅城烏泥山麓擇立書院屬余記之
余雖才慙襪線言之無文不足以表書院之美竊喜其志定於前果克成於後
也夫羅城居邑東北境爲晉康樂舊沿山峙似屏水繞如帶前人每詔爲勝地
孝廉辛曉堂前輩題詠曾有四面千峯合雙江十里鋪之句書院踞西南層巒

萬載縣志

文徵

記

二百三十一

疊拱羣流交匯縱不克熨美鹿洞鵝湖亦彷彿昌黎之依山龍河之面水焉諸
先生現存者五率其後之人終年課讀以時享祀世七講習永敦友誼將見今
日相與聯師儒聯朋友聯兄弟異日必如貢少翁之彈冠待薦王文正之試屢
高魁由是而班聯玉筍名聯鴈塔官聯鷺序實至而名歸洵足與古之儒者並
垂不朽也敬書此以答之道光五年乙酉上元節

文聯書院記

衛鵬鳴

孝廉袁君平階爲余言曰其鄉有文聯書院鄉之前輩敦於義而相與以成者
數十年來篤志好學之士往往便之故得多所成就請追記其事以爲勸余時
以簿書殷繁未之及引疾後何生蔚春以事略來向與袁皆先後講學於茲院
者善士也院曰文聯取以文會友之義余謂朋友講習文其所肄業也兼以友
輔仁之義乃以進於道離仁而言文其文可知也今人之文不如古其仁友間
也由文而進於仁其文醇矣而文其餘事也茲院之設起自乾隆三十一年生

員喻顯達曹夢龍太學曹茂芳曹挺高辛芝萱喻顯燦曹廷珍喻聖言業儒者
喻鴻高林發雲王熙化王熙孔聯資生息越二十七年乾隆壬子建斯院爲養
育人才之地當日十二人者相與勸善規過喜慶相賀疾病相扶社中子弟相
視如家人至今每歲十一月合社中子弟祀十二先生於院遵守遺規不墜吁
朋友之道孝友睦嫻任恤之風俱於茲院乎備矣豈徒文乎哉余又有觸焉茲
事之舉起於聯貲二十四金未三十年建院之時得二千餘金此其積累之功
爲何如也爲學之功在於積爲善之功亦在於積天下之理相生者人心之
德立而不孤者也學者有所得引而伸之觸類而長之由一可以知十可以貫
百千通萬理焉爲善者義理之心既動持守而擴充之將不可勝用富有之謂
大業日新之謂盛德無非由積以致之也吁世之學焉而無成偶爲善焉而不
足以自立皆以得少輒止不復因之以求其所未至而並以失其本來不亦惜
哉會文者其課之志在進修亦如先之建斯院者之善積也與之進於仁可矣

萬載縣志

文徵

記

二百三三

豈徒文乎哉

高魁書院記

督學使者山陽李宗昉

道光癸未余按試袁州萬載紳士有以龍河書院記請者余允其請記之踰年
科試復至郡邑人士潘維新劉鳳喈饒廷楷等又以記高魁書院請核其圖冊
院別建於邑北高村里背龍山山有巨石若世俗所傳魁星狀適介院側因以
命名蓋多士創建以便鄉之來學者也經始於甲申四月竣工於十月講堂學
舍靡不周備近堂有亭曰深趣距門數十武有橋曰上津橋上有亭曰餘韻可
以藏脩可以游息規模蓋宏遠矣復慮膏火無資置田數百十畝通計糜白金
一萬有奇皆樂輸無吝色不可謂非勇於義者按魁星名史記天官書所稱魁
枕參首是也世貌其形實憑意造論其字義有爲帥爲首之訓故鄉會試之列
前茅者曰魁士人讀書談道窮則獨善達則兼善貴務其遠者大者豈第沾沾
焉高魁是求然果躬行實踐有獲於心則出其才學以取高魁亦未始非學人

分內事也諸生勉乎哉通志所載各郡邑書院在萬載者張巖曰塢溪曰三峯迄今無復存矣多士有志復古於龍河書院外別創是舉凡肄業於斯者由橋而入當思上達之有基登亭而憩當思深趣餘韻之有在升堂而望當思高山仰止景行行止之不可須臾忘異日學成名立出爲良臣處爲良士學使者與有榮施焉予拭目俟之矣捐廉倡者知縣事衛鵠鳴予門下士也多士捐數不等具列陰碑

高魁書院記

邑令衛鵠鳴

萬載之北去城七十里曰高村其山曰龍山一徑盤折而上至巖間有泉聲泠泠滲人有亭有橋三面峻嶺環之幽邃不聞人聲予嘗以事至其地輒流連之謂於此避囂講學去鹿洞不遠也二里許有李厚岡先生讀書處爲百年來振科名開風氣之鄉前輩多所著述今其遺韻猶存癸未之冬鄉人士潘維新劉鳳階饒廷楷等請卽於龍山之麓創建書院以便遠近來學者眾皆樂輸余嘉

萬載縣志

文徵

記

二百二四

勸之往視焉止見老屋數間旋於役藩陽明年十月役還視之則講堂學舍俱備置膏火田數百餘畝糜白金一萬有奇鄉人士可謂好義而集其事者可謂勤矣卽核所捐等差之數詳請獎勵開課延師肄業其曰高魁者院之上有石聳然若世所奉魁星狀因以爲名予以爲進學之地以魁名疑專爲科舉之學此其義不可不講也士人讀聖賢書當志於聖賢之道深造有得焉以其體驗於身心者發爲文章見諸事業昔之居高第爲名臣者可貴也若徒以記誦辭章之習應給三場假途仕進縱倖而弋獲其操持建豎果可以自信乎哉其魁然立於眾人之上乎哉國家設制科原拔真材上以實求之士豈可虛應之嘗見急試者日執舉業一編極意揣摩十數年不得一售內無實得不足發之爲文也而闔然積學者稱意爲文往往獲雋可知科舉一事專意求之未必得平心應之未必不得也況得者之未必爲得而不得者之大有得哉孔孟書中言爲己爲人之分內重外輕之旨反覆諄至誠以學術之真僞士人一身之德業

繫之天下風俗之滄薄繫之今之人不古若皆急功近名之見橫於中而爲之蔽也諸生其無惑乎哉余以科授官於茲力不能勝以病去愧所學之不逮故以身受者爲諸生言之

創建正源書院記

邑舉人廖連城

木斲根弗茁火絕膏弗揚水斷源弗流爲學亦然古者八歲入小學十五入大學小學者大學之源也自科舉之學興而小學廢童蒙入塾讀四子書甫畢卽課以詩文俾摹擬剽竊以取科第而洒掃應對進退之節愛親敬長隆師取友之道概置弗講此而欲其異日明德親民止至善猶溝澮之水遇雨偶盈而望其滾滾不舍晝夜以達於湖海也豈可得乎蓋小學廢而大學之道亦廢之久矣人才不古若職此之由可慨也夫吾邑之西北隅有村曰黎源山峻而深中有平疇蜀水由此發源鄉先生藍藝圃鍾華軒謀於其地置書院以便童蒙邀同志數人倡捐眾翕然從之遂買屋爲講堂學舍膏膏火田一百四十畝有奇

萬載縣志

文徵

記

二百三五

是爲正源書院余因公至其地見而嘉之曰爲此院者其知道乎何作人之得其要也易之蒙卦其象曰蒙以養正聖功也象曰山下出泉蒙君子以果行育德是作人之道固莫要於正源矣朱子謂古者小學教人以洒掃應對進退之節愛親敬長隆師取友之道皆所以爲修身齊家治國平天下之本而必使其講而習之於幼穉之時欲其習與智長化與心成而無扞格不勝之患故作小學以授童蒙由是思之正源之道又莫要於朱子之小學矣孔子大功在春秋人皆知之朱子大功在小學世罕知者元許文正公爲國子祭酒每教學者自小學入而以其身先之可見小學一書無人不當講習而况鄉曲之童蒙乎彼課以詩文俾摹擬剽竊以取科第者絕其源者也卽課以五經諸子史而不以小學爲先務者亦未爲能正其源也時藍生星成鍾生汝成董其事囑余記之遂書以質書院之爲師者

石溪書院記

尙書萊陽進士初彭齡

余與星嶠交歲之庚戌來館余家居數載深得其爲人并悉家世星嶠家舊載古稱康樂地多佳山水而城南郭村爲尤勝天馬鵝峯聳峙左右村之東山曰石城峯迴路轉有石關焉一水潺湲從關出曰石溪沿溪而南有石壁若屏豁然軒開贈君禱堂築室其間顏曰屏山書屋蓋教星嶠昆季地也循溪之北其地平曠溪水環匝復構石溪書院置膏火以教族中子弟夫古之君子學以致道而學必擇山迴水繞幽深明秀之區江右若鹿洞鵝湖結構皆在勝地而理學名儒忠孝廉讓之士往往山其間蓋山水之情與詩書之澤相摩相盪漸漬久而融結成性故一旦致身通顯躁進之風絕勇退之見明若陶靖節之三徑松菊歐陽永叔之歸田遂初德業交隆身各克保良有由已贈君志篤於斯築室購書匪惟訓迪子孫且以訓迪宗族使不失鹿洞鵝湖遺規其所以造就而漸化者蓋有本已今星嶠成進士宰皖江而叔季偕諸孫及族之子弟俱後先噪譽序稽古之榮亦蒸七矣而贈君造就之心要有規乎大而不規乎小者以

萬載縣志

文徵

記

二百二十六

星嶠之才之學非不可耀功名迺大異俗吏之所爲退而教授廬山不數年又退而講學閭左殆承贈君之志日與族之子弟藏修其中蓄道德能文章砥礪廉隅必有得乎理學名儒之爲之者家學之傳人材之茂自可於城南郭氏徵之抑又聞贈君性樸誠足不入城市好行其德不欲令人知夫陰行善者子孫必昌况復貽之以詩書之教廣之以造就之方世澤相承豈僅書院擁山水諸勝已哉贈君之德固有相衍於無窮者矣余故樂記之并致遠企之私云

仰止書院記

郭大經

仰止書院者鮑氏爲族中子弟建也在西郊石版村蓋不忘先世發祥地云元季鮑御史千泗以直諫忤權貴挂冠歸訪歐陽圭齋於瀏陽還經此村樂其山水遂家焉歿葬村之牛眠岡後裔散居繁庶以富以教科各迭相望爲邑巨族至是族督叙堂怒然恐遺蹟之就湮欲萃族子弟教育其間因首捐膏火田若干把錢若干吊以倡族咸喜願輸者眾或議購舊宇急就居生徒房督茂才鍾

山持不可曰村北三台峯秀插天際峰半壁兩翅展抱中平曠數百弓鵝岑末嶺聳於前龍江錦水匯於下其餘千崑萬壑目莫能窮近瞰城堞市廛隱隱如撲地洵踞一邑勝概地雖半屬他姓而密邇祖居卽重價何傷僉曰然於是購基已就則經營鍾山董其役中爲講堂後有廳前有庭左右翼爲齋舍夾以兩廂繚以崇墻窗櫺洞達庖漏咸具所爲造就計者完且美矣夫古之君子讀書講道必擇山水明秀之區近世學者築室置田非不美瞻顧或偏喧闐或苦岑寂耳目所限性靈窒焉茲獨遠違市囂淵然得乎境之靜迥出塵表悠然得乎境之虛可以遠眺望可以發咏歌爲高明爲廣大非藏偷游息之善地乎雖然境之靜者非學以盡精微則靜失其靜而廣大何能致境之虛者非學以道中庸則虛失其虛而高明曷由極今萃一族俊秀講肄茲山自必有淵然而靜與心謀悠然而虛與神謀者其務求所至焉主靜以立道之極涵虛以觀道之通妙於境而不滯於境則聖賢之學胥於茲山寓之抑又思鮑之先世以直諫名

萬載縣志

文徵

記

二百二七

而又與理學名臣相友善則當年置身君友間所爲樞綱常而勗道義者淵源未遠無事外求也幸得居近先人尙尊信而篤行之尊信則不搖於僞學篤行則可馴於成功繼武前修鬱爲時望名儒良佐彬彬而出先儒云子孫賢族將大不大慰教育之盛心歟是役也經始道光癸未某月閱明年某月告竣叙堂倡捐外族之人慕義興起量貲襄事者並勒其數於碑陰道光十六年秋九月記時年七十有六

育英書院記

邑舉人彭夢彰

古者四里爲族五族爲黨黨有庠夫以黨統族庠於黨卽庠於族今者世家大姓聚族而居其於古之族未知何如而統之有書院其義一也麻田李氏聚族數百年矣有李楊氏者以孀居而樂施好善嘗獨建六百橋費金六百有奇又捐助龍河膏火田八十把一日憫族子弟之秀者多貧而廢學也慨然有志於一族之書院商之夫兄安灝先生因力贊成其志時李族修譜牒遂大書曰某

氏助田一千把爲日後建族義學及童試鄉會試賞爰於道光某年出所入田租費建書院於族祠門首計棟宇二上下以間計者十餘區後建寢室院左齋厨庖廡及倉廩俱備費白金千六百有奇顏曰育英隨出其田於院擇族人董其出入賢哉李楊氏而贊之成者亦賢矣余讀李芝齡學使龍河書院記謂書院之設大率賢有司倡於上而邑之先達俊民相與成之獨萬載重建之龍河書院爲最奇奇其獨成於巾幗也宋聞氏者建書院於縣而李楊氏者創書院於族其所被固有廣狹而其爲興賢育才計者一也士之遊是院者當亦如李學使所云處爲名儒出爲名臣偉丈夫之自立無貽巾幗羞矣育英之院不與龍河輝映哉孝廉棟樓李安灝先生孫也屬余爲記余非蓄道德而能文章者視李學使之記龍河不敢同日語矣然竊喜其不負黨庠遺制也一婦人而立捐數千金也樂爲記之以勸好義併望李氏族之遊是院者

樂類書屋記

知縣金谿進士黃丹桂

萬載縣志

文徵

記

二百二十八

瑞麥之生兩穗紫芝之產九莖世不恆有造物者亦偶破其慳而出之人爭羨之復不容以力致之故足貴也萬載爲江右名邑泉壑清奇所鍾毓多侷儻瑰奇之士文章氣誼之儒未易一二數頃者訪郭君星嶠於南康學署衡杯道故指座中客曰此辛柏坪先生吾邑之同年入泮者也具言同年入泮共十八人閱今幾數十年存者尙十有三前歲爲袁某同年七十壽座上滿矣而我十三人者來而翩然望而皤然醉而頽然羣誇爲天作之合遂重訂年譜剖贊數百就邑錦衣坊構書屋顏曰樂泮弁置產爲會課資以繼馬腦山房之勝焉因咨所謂馬腦山房者蓋其鄉先輩集同志十三人之所作也至今稱十三先生者宋之世文潞公借富鄭公等爲耆英會嘗得十三人馬腦之十三人殆景仰追蹤者歟而今者以希有之奇逢符不可增減之成數雖其間半以諸生老唯星橋成進士然皆礪名檢能文章龐眉壽耆卓爲一鄉之望既無忝於前賢而且向之十三先生成於人今之十三先生成於天兩相輝映間不覺後來居上蓋

天巧過之矣。猗歟盛哉！曩余死之太和，既罷歸星嶠，來洺斯任。英風爽概，邑號神君。余兩人判袂時，自分繼見，難期未幾。星嶠服闋，當補縣。竟毅然捨去，改就南康。鐸而余得造訪，不可謂非奇緣也。因而得聞十三同年之盛，益嘆其奇。屈指余入泮之歲，亦同爲辛丑。同山於胡豫堂夫子之門，則更奇。昔遠公結蓮社於匡廬，強致陶彭澤而謝康樂，以心雜擯不與。然後之談蓮社者，莫不有康樂在。余固金谿籍，不能濫厠於萬載十三人之列。幸獲爲文以叙之，俾異日知十三同年之外，別有一同年。猶之蓮社之外，別有一康樂。亦一段佳話也。夫平巖書屋記。

知縣邑進士李榮陞

愛而知惡，憎而知善，兩端之準也。於人然，山水胡不然？記遊之籍，汗牛馬，責其毫髮無憾者，名勝難言之。况僻壤哉！舊苦大巖山巖崕過輒掩目，家人更以問舍爲鄙。柔峯曠壤，悉他歸。年居半百，從兄弟授先人新土，以此自聊。焚劇芟植，既雨既暘，異日過之，巖者蓋張禿者纓披不惡，而美轉拒爲迎。試進探其奧，得

萬載縣志

文徵

記

二百二十九

坪焉。級而左之，再得坪焉。辰向而睇，後辰前，研兩抱洞，若川橫嶺，互相依不捨。高明遊息之觀，粗具於是。授意山民，迎東曦，立把茅爲耕，讀庇園林，渠沼其成。以漸亦久，已置之者，艾逐食萬里，攬山之宗，過飫生噓，投老歸來，譬之病後虛空，所甘疏糲，他不樂聞。間過有力者，柔曠之墟，沒如也。噫！山之美惡，有定而無定。人之愛憎，益奇而益常，豈不亦以時哉？或致詰曰：如翁足蹟，半天下，又多嗜奇，何由拳拳足蹟，間固舊所不滿也？鄭重學徒而爲之說，吾弗解，請揭此義，以對嘉慶丙辰記。

古城腦山房記

邑舉人李宗彙

邑東北諸墩羅城最廣，兩水潌洞，四山匝，匝平疇萬頃，曠宇天開，相傳晉康樂舊治，故以城名。今城跡久湮，而墩西二阜，尙稱大城腦，小城腦，舊治之傳，洵不誣也。高氏聚族於斯，已歷數世。大城腦實故業，茂才炳麟，金鈴以族多俊秀，而苦乏藏修所，因集同志，釀貲建山房，其地中爲講堂，後廳以居師，左右室若干。

以虛肆業子弟束脩有費膏火有田所爲造就計者至詳且備盛矣哉昔之無力從師與獨學無友者皆得質疑問難敬業樂羣從茲羅城高氏髦士其日蒸蒸日上而余尤羨其得地之美也自來縣治之建必擇山水形勝之區故衣冠科第城中恒視各鄉爲盛地氣固獨厚焉今治徙龍山雖數百歲而故城地氣未嘗衰歇環十里內科名時相望矧茲城騰勢若曲屏依憑孔固前對講書山文峯雙挺遠則末峰入望氣象萬千近則釣石卓於水涯獅璫峙於水口凡茲城之形勢何莫非山房之所有卽何莫非學者之所有乎山川歷目前英靈助文字豈虛語哉往者城中高氏嘗發科矣羅城之高實與同祖而所鍾地氣又略相當其必與城中高氏代興而競爽焉無疑也是爲記

白竹山房記

郭大經

城北里許白竹山房喬居張氏文社所建也地枕山在龍江東岸龍河之水自城來獨水自西來合滙爲江江之口漾爲龍洲適當其前洲盈俯竹波光上下

萬載縣志

文徵

記

二百四十

與碧影相虛涵不減渭川風景下流醜洞則虹橋偃卧波上其西南諸峯送青倚翠如櫓如馬者環巨若畫圖築室於斯洵攬江山全勝哉山名白竹舊結鎮龍庵中書本初先生讀書其中以文章傾海內其嗣琢齋姻翁亦於是肄業中拔萃科游其門者皆知名士一時師友淵源至今傳爲家學自結文社凡十八人厥後庵就圯僧鬻於造船者敗屋數椽外鞠爲茂草余嘗與明經帶江徘徊其地慨然思興復之不易也今帶江與翊亭諸社友先後歸道山存者僅晚籬如持文瀾小鷺和齋而和齋具幹才悉出所積社中金購其地撤舊拓之構前後廳事二左右翼以廂旁列書舍庖湔具備門牖洞達前輩講藝之地復爲後人絃誦之所可謂克紹箕裘矣而余尤羨其啟後之美也古之學道者必擇山明水秀之區如范文正之長白石守道之岨嶭指不勝屈况勝概當前前輩歷著成效者乎諸後進誠肆力於是時而藏修則本初琢齋諸先輩淵源具在有餘師矣時而游息則虹橋在望躍然興題柱之志倚竹盈漢悠然悟有斐之修

曠覽文波紫瀾浩然可接韓之潮蘇之海將鴻儒碩彥皆可於山房寓之余於是為諸君賀且私自幸焉人生少年英颯興自豪耳及情倦境遷感慨係之矣今諸君逾稀壽躋耄齡而豪情不減用能揚先人之清芬發江山之文藻可賀正未有涯余因迴憶曩昔與社中諸君子游有瞻儀範聞緒論者其一二長於予者也餘皆與予齒相若或同窗或角藝或聯事荏苒數十年忽不覺老至而耄及良用自傷顧猶獲與諸君放浪北城之野俯仰瀟江之勝聚晤山房又添一段佳話詎非余之厚幸哉遂忘老荒欣然拾瀋記其顛末如此

文會義塾記

邑令衛鵠鳴

九圖文會肇自乾隆四十三年邑人士廖俊旺周彬文李佐堂王廷機張書秀謝雲峯鄧九松羅明通等集潭埠白水書堂花橋等處九圖地方捐金置買田產為獎勵讀書士子而設者也甚屬義舉迨道光五年廩生謝國華張毓祥監生傅春廷張銘堂李弼經等始將歲收租息與給童試歲科卷費生監科費又

萬載縣志

文徵

記

二百四一

聚九圖生童百有餘人會考社課彙其詩文送署余於批閱之下覺新穎超脫殊多可造之才不勝欣賞因為之次第焉夫萬邑本古康樂地自昔號稱文藪代有偉人予自下車以來時以敦品立學諄乚焉為邑之人士相勸勉今生等本古術序黨庠之意而為是舉是其大有造於讀書之士者何如也行見文風暇七日盛矣予將拭目俟之

樂育義塾記

辛辰雲

書院於四區龍雲為盛而樂育義塾實先之乾隆中武孝廉鮑君震岡上舍生歐陽德安高連雲以民之暱秀野處者往往具慧資雅志奪於生計又距城遼濶雖有龍河書院而負笈維艱爰商之同志合九畝建塾潭埠萃其秀教養之自是慧資雅志皆得自遂游泮沼貢辟雍者相望也然公財未充規模稍隘仍不免有向隅歎於是三君後輩履泰文蔚等復聯尚眾醵多金胥兆楓樹嶺之陽而改築焉為棟宇三進左右書室若干後為寢堂列捐戶名氏翼以旁舍繞

以墜墻顯做巍峩倍加於舊於道光戊申落成餘貲增田產供修金膏火及考試花紅程儀卷價諸費所爲鼓舞作興者彌詳且盡諸君草創樹基與繼起增拓之功俱不可沒也嘗讀詩曰菁匕者我在彼中阿既見君子樂且有儀序者爲樂育英才焉夫君子以育英才爲樂則英才自以得所育爲樂瞻渠渠之夏屋念締構之殷勤而因思昔之負笈維艱望城闕而窘步者今則坐享其成安居肄業當必有因樂生感因感思奮而以有儀自顯者此塾卽中阿也且其地踞全區之勝後睇峯頂山湯周靈蹤在焉前面卓筆尖文峰天造左瞻習彥威書堂興尙友之情右顧龍岡書院屬爭先之志而又帶以長川衍以平疇山水清曠靜觀自得洵育才之善域名教之樂地矣由是歌采芹則泮水思樂歌鹿鳴則實心燕樂育於館爲吉士育於朝爲國楨人文蔚起繼美菁莪豈直龍河龍雲比盛已哉九岳者白水二楓林頭浩石水南汶江陂田石腦背大埠頭各一其在事經理姓名人多不備錄與捐戶並勒碑陰

萬載縣志

文徵

記

二百四二

正誼書院記

萍蘓舉人張家瑞

書院之設由來尙已我朝文教昌明雅化作人超軼千古尤有學校如林之盛自都邑以及鄉黨每多建立書院以爲作育人才之地特沿襲既久間有因循苟且奉行故事徒以膏火黍養孤寒師若弟醜嬉聚處而不以爲非者抑或稍能振勵又徒以詞章記誦之末標榜以爲名高究不免於急功近利之爲以予所聞萬邑之正誼書院則不然其鄉里之賢士大夫既斤斤焉以作育人才爲急務毋歲延師課士必切實講求夫端品力學通經博古之效所立學規亦大有鹿洞鵝湖遺意而士之經甄別從事其中者莫不爭自濯磨以期經明行修無愧於君子無負於鄉先輩而士習文風因之蒸蒸日上猗歟盛哉予欣慕之也久矣然猶未得身親見之丁亥春予客遊萬邑始得至其地時董院事者爲葉君沅秋張君深山皆予舊好也相與款留竟日逐處遊觀則見其棟宇鱗次曲折有使人一覽難盡者其中爲講堂堂後祀文昌堂之右則祀鄉先生以下

及賢媛之好義捐貲者再右則有高閣巍然以祀魁星其下祀崇文堂粟主其前有深院倚階爲兩廊圍隙地數弓作花藥欄其文士適意之所乎堂之左爲山長廳事前有二池以脩祀融再左則爲生徒坐齋鱗次數十間其前有觀光樓以資憑眺敬業樂羣之暇登斯樓也其必有心曠神怡悠然自得者乎其他垣墉園沼庖滷之屬位置周密美哉洵書院之大觀也予顧而樂之徘徊不忍去越歲戊子又蒙不鄙謫陋延予爲主講予因得以覽其山川之勝覺靈秀清淑之氣實萃於此既遠城市之喧復無鄰居之雜院中藏書甚富諸生優游涵泳其間皆足以暢其天而絕無所誘於外蓋不獨宮牆之美抑亦藏修善地無復有過於此者昔元人張千巖曾構書院於獲窩里距此二里許虞道園先生記謂其可儼於京洛今雖遺制不可復覩然以此繼述吾知有過之無不及矣於戲此果誰之功哉因叩之沅秋深山二君曰此固吾鄉好義者之功而實倡始於謝暢軒曹慶餘兩先生也兩先生生於光緒初元里居之暇慮故鄉人士

萬載縣志

文徵

記

二百四三

之學殖將落也慨然以興起斯文爲己任於是遴幽選勝倡建書院於此地業本劉氏產其族瓜分已久頗不易就先生乃與同人曹次秋諸公謀大集里中之賢而有力者捐貲合二萬餘金因不惜重價購之事成乃相與鳩工庀材撤舊鼎新經始於光緒丁丑越庚辰告竣九費錢九千餘緡顏之曰正誼蓋取董子之言欲使學者顧名思義不汨沒於功利而力求夫端品力學蔚爲文章道德之林以仰副盛朝作人之化此兩先生之志兩先生之功也予聆其言而益用欣慕焉天下書院多矣求如茲院之敦崇實學深有合於董子正誼明道之說則未可多得信乎兩先生之志之大兩先生之功之偉也是烏可忘耶且以是區方數十里而五六年中卽能同心成此盛舉是何賢而有力者之多而好義若是之勇則勸建諸君之功又烏容泯耶余故樂述其顛末於簡端以誌之至於董役之多人捐集之多資條例之多則備著於冊中茲不具錄云

正誼書院懷謝樓記

謝旂章

堂伯暢軒公旂未得見其人讀其所藏書而已公以孝廉起家由州縣游升府道在官數十年歸惟書數千卷經史子集具備不私於家不遺其子孫而悉以存於正誼書院正誼書院者公所創建為後進講學之所也書院之左有觀光樓藏書樓在其右而未有名清末正誼改學校所藏書悉訂而鈐校章堂兄籽春夫子任監督有年恐公嘉惠後學之意浸久而遂以湮沒也乃謀諸紳學思整理而表章之決譏徙樓於更右而從新營建之與觀光樓並峙左右勢相埒也樓既成而議其名眾皆曰書院為暢公倡建書籍為暢公遺存曷即名懷謝以資紀念乎籽公稱善遂額而書之既念觀光於義無取而於學校尤無關眾復議易名臨風蓋以唐詩有臨風懷謝公之句東西二樓取其意義相聯貫也昌黎有云莫為之前雖美不彰莫為之後雖盛不傳旂謂暢公之美待籽公而始彰暢公之盛亦賴籽公而後傳後起者當更有與於斯文矣旂少貧困無所得書而又不屑屑於帖括詞章之學聞暢公之有藏書也則屢從而乞觀焉計

萬載縣志

文徵

記

二百四四

所借閱有茅氏武備志陳壽三國志顧氏郡國利病全書歷代名臣奏議資治通鑑紀事本末史記漢書齊書華陽國志呂子呻吟語莊子鶻冠子周易折中詩經註疏陳檢討四六三蘇全集李義山全集是旂之食暢公之賜亦至厚籽公不負暢公旂又可以負暢公而不為一言乎故懷謝樓由籽公建之於先而不能不讓旂記之於後也是樓也遙山若屏近水如帶晝則平疇在望夜則碧月當空蓋又非特為藏書之所亦足為憑眺之資也已足為記

潭埠成德高等小學校記

邑舉人謝濟沂

潭埠踞康樂上游白水西來藍水東會南貫株水瀆漾潑洄其間有竹溪山房者成德高等小學校實建立於此山房當三水之曲高山環之舊為圓善寺清咸豐時僧徒中斷鄉先生黃垣三孝廉始改為學塾稱竹溪余嘗視學成德振衣周覽蓋前瞰清溪後蔭修竹名與實符天然講學之所也民國七年余備員國會將東游於粵成德首事歲進士馮君月槎國子士舍李君小白謝君晉臣

等同詞而請曰潭埠成德一再改組校仍竹溪先後更新易舊爲講堂一自修室會客廳各二寢室十憩息餐膳閱報室各一操場校園庖浴廁所具備頗有記既又述其概況曰潭埠原有聯興文會書堂原有體仁書院自邑庠馮君簫九黃君箴如等稟請以文會開辦成德體仁紳董有文會股者皆不欲嗣經勸學所教育會評議撥文會店屋一所爲成德基礎餘款則成德體仁按股分撥分辦署約呈縣訖不才等乃偕馮黃諸君集合同志捐金助田改組德成於竹溪時清光緒三十四年八月也民國二年同人有倡議歸併體仁合辦者而成德人士多數弗從遂致訟爭累年官廳左右袒韓侯戾止始諭令歸體仁者脫離成德取消產股願成德者仍舊依法改組另予申詳立案爭乃息時則民國五年十一月也每念斯校慮始之艱圖成之不易至今猶令人心悸方事之殷倘非輸捐者急公好義則既稟不繼非理財者會計當而涓滴不苟則將伯難呼非司教育者熱心教授則學生不心悅誠服而或有他志非主任外交者不

萬載縣志

文徵

記

二百四五

避勞怨勾當多方則應付幾窮而根本爲之動搖然則斯役之羣策羣力同德同心任艱鉅而卒底於成者大可紀也而論者乃歸微勞于不才三人則固非所敢任也予其詳爲我記之余唯唯顧因之有感矣君子之存心也不敢以困衡而墮久大之業不敢以安樂而忘艱貞之境尤不敢以小忿而廢鄉田懇親友助之誼往者成德之爭執數君子皆總角交不過意見偶有不合各行其是耳而相爭終於相讓相執究竟相成體仁和會於醴田成德大定於竹溪月榭等既歷諸艱以造地方文明之福又不狃於目前更謀加捐成德另捐崇德培其本而深其根不限區域大和翔洽卽有分體仁者猶所歡迎推斯意也而出之於誠則國中大之南北之爭小之局部之鬪皆可消兵氣爲日月光也非君子人者而能庶幾乎易曰君子體仁足以長人朱子曰成德者君子成其德於己又推其德以成人成物也請爲成德諸君子誦之是役除各捐主另立冊外在事出力若董事生員馮泉李應飛監生謝啟科李景寬楊輪和徐明書李儒

鵬彭斯慶張錦猷彭斯祺馮育生徐明雲徐詒材校長生員李樹南中學畢業
張崇望大學肄業生馮樹屏中學畢業謝步登教員中學畢業楊蔭南初級師
範畢業謝庭玉中學畢業彭鼎外交代表童生馮慕陶郭超謝慧生張寅山謝
金明例得並書是爲記中華民國七年冬十一月

昌黎書院增建萬載學齋記

盧 諤

袁郡昌黎書院在宜春臺下秀江後繞袁山旁峙境地開朗瑰奇萬狀四邑來
學者歲數百人郡守拔其尤餽之聘山長教授其中古州序遺法也院之興廢
前人具記之矣舊制址羸規縮士眾或不足容有店棲而寺託者三邑卽其旁
先後增立學舍士至如歸惟萬邑猶尙有待柳翁滋揚好義士也奮然起謂其
子曰書院爲陶才地所關甚鉅吾鄉有學邑有學房舍皆廣而昌黎獨不加擴
其何以宏獎風流乎吾老矣汝輩幸卒成吾志無何滋陽歿其子太學翹豐暨
弟德輝奉遺命請於官就院西北偏增建萬邑齋舍道光庚子興工越明年春

萬載縣志

文徵

記

二百四六

季蒸成上下爲堂二深七筵廣五筵中爲亭一深四筵廣如之左右爲房八門
窗豁達後有小廳右旁爲庖漏四圍繚以牆垣花磚璀璨闌楯參差太守沈公
題額曰樂育羣英勝舉哉因思有力之家巍樓曲榭壯一己之游觀繆者或妄
希福利侈梵宮琳宇飾茲獨不慕豪華不祈佑報惟以恢宏學舍爲務此其殷
情庇士實有過人之識非漫然爲此結構也夷考韓公年譜元和十五年春移
刺袁州九月召拜國子祭酒是公之在袁僅數閱月而流風餘韻千載猶存諸
生能自得師履公過化之庭必當有鼓舞而興者公之言曰業精於勤荒於嬉
又曰文章豈不貴經訓乃菑畚奉此語以從事他日爲通儒爲名臣英聲茂實
皆於此齋乎裕之斯不負增建之美意也今夏四月翹豐德輝來修士相見禮
述遺命山圖請記余謂父命洵善矣其子能卒成之舉千金脫手不恡亦行誼
之可風者爰附書之

修葺昌黎書院記

郡守丹徒蔡嵩年

自來幹濟天下者視乎人才作育人才者由於學校而輔學校所未備以切劘而磨勵之者則莫重於書院天下四大書院白鹿湖江右居其二地以人重也夫既地以人重則袁州之書院而以昌黎名豈不更爲千古卓絕之人而使鄙寬溥敦奉爲百世師者乎昔者孔子既沒世衰道微沿及戰國孟子正人心息邪說以距楊墨爲己任而後孔子之道大著於天下公嘗云孟子之功不在禹下自孟子後楊墨之道流爲佛老文運日衰道統將絕公於是時以關佛老爲己任佛骨一表可繼孟子七篇觀公原道文云孔子傳之孟軻七之死不得其傳豈不隱然以傳道自任乎然則孟子之功不在禹下公之功亦不在孟子不自漢而唐孔孟之道千鈞一髮而卒賴以不墜者惟公之力雖宋有周程張朱四大儒繼繼繩繩綿道統於弗替然此數百年間必先有砥柱中流開來繼往然後四大儒乃得由百世之下奮乎百世之上則謂公爲孟後一人信不誣也公由潮州刺史移刺袁州雖不數月卽去而德澤在人者至今猶稱道不

萬載縣志

文徵

記

二百四七

袁潮州有韓文公廟袁之人效之建公祠於郡學明倫堂之西嗣復建於宜春臺之右由宋而明以迄我朝守是邦者或重修或改建或添建屋宇或清理學田載在府志班班可考雖皆守土之責然實公之過化存神入人之深及人之遠令人景仰於無窮也當年幸於古名賢所治之地上溯遺徽雖化民成俗之方百無一得敢不自竭駑駘以期則儆於萬一乎故下車伊始卽以興文教培人才爲急務無如書院經費爲數甚微不足爲鼓勵多士之資而仰瞻公之祠宇復朽壞已久勢將傾圮今欲擴而充之葺而新之需費甚鉅萬邑謝賜軒觀察萍邑喻小筋比部皆鄉之望也與之商皆韙之通力合籌集賢若干爲多士之膏火至修葺祠宇則有公後裔名寶書者慨念先澤獨肩其事其附宅則柳紳德輝欣然任之於是木之朽者易壁之塌者圯上囊下篋更撤而新前祀殿旁四齋殿前原道閣殿外講堂悉仍其舊門廡庖厨宮牆四週塗茨丹雘煥然改觀凡四閱月而告成而附齋亦相繼歲事鄉人士之力皆公之靈也且夫公

之於袁豈望袁之人馨香俎豆哉欲其士之好學力行以無墜孔孟之道而已欲其民之孝弟力田以無入邪辟之塗而已然則及今祠宇既成諸生肄業有所盡亦研求公之文與公之生平所寓於文者而無徒有此景仰之虛願也爰於落成之日特書數言以誌年月並書各大令及諸紳富姓名於碑陰光緒壬午年分宜學訓導揭和衷書

按袁州原有中學堂前清光緒癸卯年開辦名則官立實則宜分萍萬四縣公立者也監督以知府兼副監督山監督請此外董事四人由四縣選派學生由四縣考送經費由各縣照依學生名額分擔因昌黎書院爲校舍及舊有租息亦併歸入開辦時監督爲知府山陰傅子純先生副監督爲宜春陳仰山先生計全堂學生不過二十餘名其時科舉未廢風氣未開學生除研究國學外其他科學既不完全亦不注重強半猶是書院舊制也自後監督數更章程屢易至光緒宣統間辦理稍進科學漸臻完備學生逐次加增因

萬載縣志

文徵記

二百四八

此校舍不敷乃於宣統辛亥年遷移於科舉時代道試之考棚自是而規模擴大光復以來府制取銷學堂改爲學校監督改爲校長因四邑渙散經費無着僅一殘局而已民國三年秋收歸省立編爲第八中學校而袁州中學告終焉廿九年八月龍賡言注

創建龍河橋記

知府李允性

萬載縣治東北里許龍河渡風濤不時弗利於濟殆數百禩一旦偃虹於其上蜿蜒巖業然自洪之分寧筠之新昌東西過者如堂瀆閨相與怵且謠曰拯我顛隳兮辛氏之庇善作善成兮是父是子辛氏者邑人故幕官琿其子今職監衢也先是琿於乾隆辛未規易渡爲橋築埭逾年病且革囑衢曰善雖小無闕其心力雖拙不潰於成衢月節歲儲磨其役於庚寅越五載甲午長至始告葺事橋之洞五廣約三尋修三十四丈八尺有奇凡糜白金三萬餘兩一手足之烈蓋其難哉既里老來狀其事於縣遞上之大府以議叙請衢聞再三辭察其

意非僞讓者無已請旌以匾則辭愈力曰微龍墩名胥非先人志且衢幸無負墜言而已他何覲焉噫辛氏僅中人產耳隱情病涉世僞厥功程子所謂存心利物於人必有所濟不其然乎且其讓善不有蓋又加人一等爰記其歲月琢石以詔行人後之慕義者必將有感乎此而俾之勿壞云

重修龍河橋碑記

辛炳晟

縣西南烏溪竹山各水匯於城心學前而北有龍河二門並聯比城垣夾水而中分之以鎖兩岸實爲全流之出口其跨河爲石橋上通人馬而下過舟筏自正德中已然其改三洞爲一而益廣之至高凌城雉則萬曆間譚公經濟爲之也先是北關之譚爲縣甲族經濟之高祖名鉞實始獨創此橋而其子登龍又重修之暨其孫煥父子以逮經濟凡五世迭修之以迄於今縣人享其成者數百年中間重築崇文堰於其下湍瀾峭激舟筏自堰而下上者篙楫之所抵觸竹木之所衝撐橋石往往爲損破近者去橋而下半里許史立石橋橋之上游

萬載縣志

文徵

記

三百四九

木橋又已易而石之於是人寢不以石橋爲意塊石圯零不復修補漸次頽壞三橋管剝落波心過半而橋向之留而未蝕者僅如鳥道盤空一失足便碎黃昏童叟相戒勿前經過者各凜乎危懼有年於茲矣譚之後人思追先志而力未能邑諸君子蓋嘗謀所爲整而修之以眾議之莫專屬而縣中諸務旁午交涉卒未有端緒也歲庚午同人乃慨然決計營之議甫倡其不謀而來首倡者已數家聞而助輸者亦踵至仍因中擇一專司者董理其事九樂助之大與支費之出一錢以上悉以經之諷日鳩工視兩岸水底橋脚頗實且固及橋管有未壞者並仍其舊而補修其剝落之過半者凡東西墩與上下階級橋之全面洎欄杆概易而新之計工灰石需用費七百餘金不半載役告歲於是經過者坦七然如履平地復還舊觀相顧謂茲橋之立本譚姓祖孫所存留永澤創始誠難踵事者雖若較易爲力然使非整修及時卽橋且不久就盡後之從事者其何因爲是則諸君子紹述前人出力整修之美何容沒也爰請立石銘其姓

氏以告成勞予故爲述其始末云

重修迴瀾橋記

訓導邑舉人汪元英

事非決擇之難而堅持實難人非聯絡之難而協一實難夫惟有堅持之力而又濟以協一之心斯能不搖於浮議不怵於艱難足以鼓舞眾志輸將樂效事以集而功乃成蓋嘗觀於田下郭氏之重修迴瀾橋而知理有固然者吾邑踞龍江之曲一水貫城由南浦匯於學前下經城堰而達蜀江兩岸居民所由往來無阻者皆藉橋爲通行若南浦龍河二橋之爲上下鎖鑰雙虹橋之中聯通衢固已熙攘輻輳視若坦途矣而自王家橋以西越筆架洲而前尤爲要道所必經康熙間郭君鍾楨倡邑人創修石橋於此以洲中有筆架迴瀾之景因名曰迴瀾東西終行一時稱便焉後經百年西岸漸淤橋半沈沒存者又皆斷闕剝蝕過者不寒而慄每當春漲人皆望洋驚返當是時豈無有力者欲起而增葺之顧或搖於浮議而遲迴瞻顧或怵於艱難而糜費不貲卒無一慷慨而前

萬載縣志

文徵

記

二百五十

者獨郭氏諸賢慨然以斯役之必不可已而實義所不容辭也遂合一族而共承仔肩焉於是解囊爭輸伐石鳩工不以激而加勸不因謗而中沮踴躍趨事撤其舊而一新之不一稔而功以成向使諸賢不堅持其必欲爲之力復聯其合族協一之心幾何不搖於浮議不怵於艱難而能成功如其亟乎今邑中諸大興作兼修並舉使諸勤事者皆毅然不搖於浮議不怵於艱難一如郭氏諸賢之堅持弗懈協一相濟又何事之不可集何功之不可成也哉若郭氏者是可風矣橋長九丈九尺廣五尺高丈許七墩兩岸面鋪平石如砥礪爲學前作案經始於嘉慶二十年八月初四日訖工於十一月中旬董其事者例得備書

重建雙虹橋記

知縣邑進士郭大經

倚學宮左畔有橋曰雙虹創於元季黃竹關舊矣有明洪永閒圯復修至成化乙未縣尹陳琛重修之閱歲水又圯邑之人以工之屢敗也無有議而復之者

行人病焉時宋先世一鳳公獨挈貲徙東西兩岸中立墩旁闢醜道二階級亭
欄畢具功其偉哉厥後宋族九疇疇子良彥以時修治越清康熙間彥之孫復
承先志續修之雍正五年橋面亭欄悉壞重鋪石新欄楯更覆以屋兩岸勒石
尋作久遠計謀諸族得四十六人偕於是歲取貲貲益廣積至乾隆嘉慶間頻
加修砌近復撤屋建寰亭其上高甍飛楹左右列廡十有一百貨雜陳鬻售梭
織往來者幾忘鴈齒之拾級也夜則篝燈防步躡其爲功於橋者美矣備矣夫
橋之作也所以通行人作於始者難作於繼者難作於繼而復作於累世子孫
者尤難以斯橋之扼市鬪鬻水衝其屢修屢圯亦云瘁矣故竹關後裔無能爲
役浸假而聽於官官糜帑金騷民財卒無由善其後藉非宋之先世起而建之
後之子孫因而重之曷克自明闕今上下數百年不煩官不役民而橋之屹然
亭之巍然與學宮瓌拱美日備若斯哉此以知宋先世以心濟人大有造於邑
者而其子孫克承先志猶兢兢廣濟人之心相引於弗替也是其世濟之美皆

萬載縣志

文徵

記

二百五十一

可傳也已或謂雙虹之名始於竹關之嗣或又謂宋公一鳳其字雙虹學宮泮
池嘉靖間雙虹迭見僉又謂橋之瑞應要皆傳聞異辭而宋族之有功於斯橋
故較然不可泯者余故撫實書之以爲邑之世行其德者勸道光元年仲秋月
重修南浦橋記

邑令西安舉人龔士範

南浦橋距治南不一里橋水自竹山洞山北郭村鋪三處來源合流至此穿城
北達滙大河是此橋爲一邑鎖鑰而由縣達郡道必經此則又往來衝要也橋
建自元大德間以兵燹燬明洪武間邑人文泰卿重建正德間水圯邑人宋珊
女良貞捐貲復建萬曆間水又圯邑明府辛公圖猷重修崇禎及清康熙初圖
猷子若孫相繼修葺兩次至康熙五十八年水盡壞雍正初邑令程公元度率
圖猷後裔並醵金合脩逾年告成尙虛闌楹邑人楊垂遠等募助之迄今又百
餘年矣風霜剝蝕山水激衝日卽傾圯行人病焉余承乏茲土目擊感懷念除
道成梁有司之責因謀諸紳耆議捐廉倡率爲興修計翕然稱願爭樂輸資迺

鳩工伐石並遴舉首事程督橋脚橋管仍其舊而補葺之橋面洎墩級闌檻撤其舊而重新之經始於丙申歲七月杪至十二月初竣工計共費錢五百八十四緡捐數不敷劉子名紱辛子敷韶復各於原捐外倍捐以歲其事而宋氏珊與圖猷兩後裔亦俱輸伙焉今年三月邑明經郭公光笏等請記於余時當春水滋生余因公經行其間見夫沿隄草色碧映綠波川浦畔飛雲與往來人影交錯向之病涉者今則欣欣然如履周道因思浮屠氏入福田之說有識所不惑而以諸君子之好義樂輸與經理得宜其利人以垂久遠者善勞要皆不可沒也若余則藉諸君子之相與有成得免廢教之譏幸已何功之敢居哉是役也董其事者爲郭明經逢時韓茂才覲陳茂才濤宋茂才廷楠李太學祖錫郭職員明例得書其餘捐輸姓名並勒碑陰道光十七年春季春月

重修萬歲橋記

衛鵠鳴

萬歲橋踞屏風嶺下去城十五里白良謝陂之水經注其下余蒞任後嘗因公

萬載縣志

文徵

記

二百五二

往來其地見橋之將成而未竣者工役或三或五寒暑不輟進工人問之言興作已數年其事之舉自何人未詳也余引疾後首其事者以始末告言舊橋嘉慶二十二年圯矣途爲城北往來之衝呼渡爲艱行者苦之眾議仍舊修復張宗理儒成會榮鳴春郭錦肇錦園近仁宋彩雲謙富祖等邀太學韓獻之子學貴往視韓乃揖眾而言曰仍舊非計也必改造方可經久眾以費浩爲難韓顧謂得四十人出銀二百兩者事可成於是韓與郭與張與謙各輸錢二百貫眾爲之動韓卽命三男斯來與同事者走告鄉邑卒易成捐錢四百貫宋橋會李以正胥奉川各捐二百貫宋子銓李伯繁各捐百一十貫其餘量力願輸自百千以逮數百文者無不相觀踴躍眾以爲好善樂施之多而成功易矣爰以二十四年四月肇工嗣因工過半而用不給幾有掣肘之虞韓又增輸一千二百貫郭增輸六百貫李以正增輸二百貫於道光三年橋將成又被水衝損重加修補迄告成之日共計糜八千餘金尙有工料價不敷者郭又增輸二百貫韓

增五百餘貫以竣其事今橋之完固倍於往昔而營作之者蓋十年於茲矣余謂善事之舉非慷慨無以爲之倡非敦厚無以要其成韓爲公事計垂久以二百金爲同事倡可謂慷慨矣因眾力不繼一再加捐韓至二千金郭至一千金可謂敦厚矣凡公事有如此好義之人主持其間焉有廢而不舉舉而不成哉勤其事者固有勞矣而輸財以濟公奮於始而不怠於終尤人之所難也故如所述捐貲始末次第記之以爲勸焉其橋之規制并眾捐之數則並勒碑陰以志其美道光六年九月朔日

竹渡石橋記

辛辰雲

距邑四十里竹渡其澤匯株潭梅源牟溪桃源谷源諸水其地爲自邑抵牟村小源以達瀏陽往來所必經固廣川也亦孔道也元大德間邑人徐信始建石橋明初圯於橫流里人造浮橋以濟後更爲渡遇盛漲輒有漂溺患者苦之有聞公儀者慨然思復其舊而力難獨任商於牟村辛公金壽議頓合改卜舊

萬載縣志

文徵

記

二百五三

基下十丈許爲墩三管五長四十尋廣二丈二尺經始乾隆癸未六月明年季冬落成費金凡萬有奇聞六之辛四之蓋歷今八十五年矣二公墓木已拱橋尙巋然如新則工料堅緻可知二公遺澤之悠久更可知也夫輿梁徒枉本有司事耳自官失其職其情者聽民病涉而莫之省其健者或私利官帑而役以病民卒之苟且塞責不數年病涉如故其弊乃甚於偷情故凡興作之事在官轉不若在民不獨橋也顧人情莫不私財集腋且有恫色沉人少力單竭中人千家之產必不能矣今聞辛二公獨能不惜萬金同心合志以爲行人利可不謂難矣乎登斯橋者其無忘所自而因思昔人不私其富之心則凡吾分所當爲而力所能爲者宜莫不觀感而興起風俗之厚且基於是二公之遺澤又豈獨利涉已哉橋久無記會聞族輯家乘爰因舅氏釋松所屬而補爲之道光戊申季秋

長漕水口橋記

御史新昌進士彭玉田

萬載東鄉長槽余同宗藝圃家焉其地山崇嶺峻溪深湍激下流當四達之衝上接湖湘下通南瑞兩岸懸厓危削中多亂石如牛喘如馬嘯如獅吼水勢益急行者苦之先是鄉人袁姓曾架石梁藝圃隨其尊人朝紳過焉蹙然曰此橋不久將圯吾老矣恨不能擴而大之爲人計歲戊辰橋果圯越七載藝圃乃鳩工庀材因岸石爲基銳者削凹者填甃石成墩南勢陡而隘利醜道北勢平而衰利架梁相陰陽而度機宜費金一千六百有奇橋成計長六丈六尺廣一丈五尺經始於乙亥冬竣工於丁丑夏由是車者徒者負且戴者幾不知是水之深且急而相忘於涉之艱且慨然於藝圃之善承遺志而不惜糜費以濟行人也徵記於予予不能以不文辭是爲記

萱慶橋記

邑侯陳文衡

城北三十里許菱湖村之萱慶橋邑紳張瀚兄弟所建也橋以萱慶名者張君值壽母之辰承大安人命以種善緣遲之十數年卒成其志以是命名不忘所

萬載縣志

文徵

記

三百五四

白也菱湖爲邑孔道上通楚南下達縣治中隔河流負者擔者驅車而來躍馬而至者踵相接舊有木橋然梁蠹易圯或遇大水則漂泊不能支行者病之張君世居此地其大翁雲鰲母顏氏素有改建石橋之志而限於力之不克君壯年卽出爲山左功曹嘉慶己未以父制回籍讀禮越二年大安人年屆七秩若兄弟延親族登堂祝壽大安人顧而語曰兒欲爲吾壽乎兒能酬爾父之志以遂吾願乎今雖力有未逮姑誌之以俟異日乎君兄弟跪而請母曰無他吾聞橋所以濟人彼架木而渡仍同履險昔汝父亟以爲言吾亦目擊而心惻也若能改木而石永利行人吾得與橋並壽焉足矣又何祝爲君唯唯謹誌勿忘既家資稍裕遂購石鳩工獨力起建計兩岸一墩選石之堅厚者爲之長四丈八尺高一丈二尺濶五尺始於甲申四月成於是年冬月共糜白銀八百餘兩於是乎橋無傾圯漂流之患人無涉艱渡險之虞來往車騎如履平地昔有結茅度蟻奪高第者以今方之其造福豈有涯歟夫修理橋梁王政所重執事者猶

或忽焉況巾幗乎而張母以一念惻隱之心俾其嗣建百世無窮之利以成其志以衍世澤並以助王政之隆如母者可謂能賢其嗣亦可謂善於壽母矣予忝爲是邑宰既嘉其創造之善復詳其創建之由亟表彰之爲樂善好義者勸富山石橋記

邑舉人賴炳文

富山距邑東北八十里爲萬新甯往來孔道中界溪水澗經數十里眾流所匯幾成巨浸舊架木梁十餘度屢被洪水衝激板棧蕩然行旅病涉輒興臨河而返之嘆王君時在利濟情殷既捐修萬昌接濟富源三石橋獨於此橋志焉不逮其子光新光命承厥志爰於道光己酉春仲毅然興役鳩工鱗石幾費經營雖以食力者眾兩週期遂觀厥成五墩四管兩旁翼以石欄長十八丈二尺濶三丈高二丈三尺計糜白金一萬餘兩光新喜橋成之速而且堅聞行道者之稱便也遂推其好義之心復修潭前礮石橋及橋前後路三十里悉墊以石中建時逸亭爲過客停驂憩息之所又共費二千餘金而橋道蕩平鮮有踰

萬載縣志

文徵

記

二百五五

斯地者夫古者除道成梁歲煩民力王氏父子願能以謹節餘貲而獨肩其任毫無吝色亦終無倦容斯真所謂樂善者哉吾知其爲子孫種福不淺矣卽其子孫之食報亦可預爲決之矣謹備誌之以規爲善者之後之必昌云

西江橋記

辛紹業

距縣北五十里曰謝山泉源滴沕錦江之所濫觴也由謝山東南行十里許至菱蕪兩岸皆峻嶺一水奔注其中勢極湍急凡適瀏陽往甯州與以事入治城者必經焉元邑人敖玉溪之義女福貞曾卽其地建西江橋數百年間未病涉也乾隆庚子霖漲衝齧橋圯無遺址彭君南垣捐私錢若干整墩架木屢朽屢易嘉慶壬戌復伐石撤舊而新之醜以甃垣翼以欄楯高二丈長四丈有九濶丈有三錢之以繕計者費一千有奇徵記於予予曰錢者泉也流而不滯者也世之守錢者如壅泉然不肯稍出其餘以波及人其潰而出也亦一決不可復遏豈非惑哉今彭君不愛其錢汲汲於濟人飛鵲垂虹於不測之淵出其錢以

與泉爭勝可謂得流而不滯之意者矣乃其汲汲之心猶且推而放之濟困危若濟溺焉是有本之泉之以時出也予何從測其涯涘哉橋成姑泚筆而記之是爲記

重修高村南山橋記

邑令李恩長

高村在歐桂東鄉距治北七十里萬山中忽開平陽人煙稠密市井絡繹不斷宋元豐初郡守廖奏設巡檢司廢後裁其村南山邑人潘君貴麟居此枕山面河源自西南等溪交流數十里至是諸水匯合下注羅城岸坦濶橫津瀾漫由此抵縣郡達湖相往來所必經實大川巨道也舊有石橋因地以南山名焉乾隆間貴麟偕弟榮麟華麟富麟佩麟承其父瑞生先生遺志所建橋長二十四丈高二丈六尺廣一丈五尺四虹出水間三墩各濶一丈二尺上護石欄夾翼高三尺兩岸階級井然通糜白金萬有四千餘兩一家好義之烈蓋其難哉既載邑乘行旅稱便年久爲洪水澎湃柱漸圯其後裔翕然捐貲重葺之南北岸

萬載縣志

文徵

記

二百五六

與中墩完而固費逾千金工成屬余爲之記余聞莫爲之前雖美弗彰莫爲之後雖盛弗傳貴麟昆季心存利濟創造興梁迄今八十餘年使熙攘者無病涉之虞其志尙矣顧不有善成就知善作欲期善始尤賴善終今生等不惜費不斲力鳩工伐石以紹承往跡使宗功祖德歷久彌彰是能以前人之志爲志利濟之懷爲懷洵可謂一鄉善士矣苟擴斯充念見義必爲以仁民爲己任以積善爲貽謀他日功修正未可量是一橋特始基耳此爲民上者所厚望生等其勉副余作記之初心也可

胥君寶亭創建山品院石橋銘記

邑令甘泉進士江

璧

蓋聞風詩苦役江湖多失路之人月令編功政府著成梁之典是以玉欄紀漢金柱標秦朱雀鏤名彩虹繪狀在昔李冰導蜀七星應斗宿以聯輝諸葛通吳萬里指清江而特迺然皆百家襍積贊成好事於輿徒未有獨力創營迭著奇功於橋梓萬載縣治北六十里有地名上高村山品院者環岫攢青怒濤噴白

兩源交匯方洞庭彭蠡之奔馳一綫通貫衡岳匡廬之扼要伊惟孔道不有
津梁涂軌攸經輪蹄奚便先是里人斂貲結會蜜蜂以兼採爲功架木成橋漂
蟻以緣行得濟斯時也亦復霜華印白認人跡之參差酒幔飄青望旗亭之迴
合特是晴暄帶日鴈雖豁齒於春初每當暴漲頃溪虹輒藏形於秋末洪濤浩
淼豈海石之能填寒月蒼涼匪河冰之可合乘輿濟物皆是外篇投鞭斷流徒
成虛語倚閭滯望傷哉遊子之心訂值牙修允矣塘丁之困奏公無渡河之曲
飄沒傷生歌余亦乘舟之詩喧闐爭渡星看七夕鵲禿何年鼓吼三更鼉支無
地則有胥君寶亭者結陶公之宅每傍斜川買戴氏之山原依荒渡嗟茲重役
頻歲傾囊哀我征夫望洋返駕將欲慰迎過客爲一勞永逸之圖則必延訪安
民商百廢具修之略爰乃豪情駕浪義氣廻波揣度工資揆程經用移南山之
石底在齊撐截東海之波橫流特跨使稱河伯應鳴沙咽石而回神號村留輒
鼓浪乘風而至幸祇金之可布方跨締螻之觀驚墓木之忽開旋抱龍蛇之厄

萬載縣志

文徵

記

一百五十七

臨終誠子比晉王三矢之遺事死如生結隨會九京之願有四子焉伯曰獻廷
仲曰贊周叔曰獻書季曰獻瑞後先濟美兄弟稱難感春露之悽愴悼秋濤之
湍駛鴻飛憫其况瘁鳩役惜其稽遲誓續前勲勒成坦路五丁鑿險通棧道於
崎嶇六甲趨功架飛梁以蜿蜒蓋自厥先人經度數載功成過半至是謀踵成
之更以同治元年壬戌仲秋既望卜吉興工越二年甲子季冬先望之一日梁
成其明年乙丑夏季修砌事竣橋長十一丈六尺有奇高一丈六尺有奇濶六
尺有奇費四千二百數十貫有奇兩岸三墩四管中建惜字石亭兩頭石堵五
步厥惟不泯於先人爰索序以紀其事是役也捨錢萬貫不須眾力經營底績
八年豈假神工驅使體洪勢壯基趾工堅石見流清沙平岸濶毀家紓難居者
無箕歛頭會之虞踵事增華行者有轂擊肩摩之樂樊京兆穿渠利眾比厥鴻
勳楊孟文鑿石濟人方斯懿德自是綠楊影裏時來飲馬之人絳雪風中慣見
騎驢之客况復柱題詞客定邀司馬之重來里產名元無俟張僧之贅頌乃爲

銘曰

湯湯河流傾我橋梁哀哀征夫困於周行里有義人胥君增器大功獨任感懷
抗志厥功未成溘然長逝誰其踵之於惟哲嗣捨貲萬貫底績八年父義子孝
世澤綿綿廣載輪蹄利涉大川計圖久遠允矣仁賢行者熙熙謳歌感惠于千
百年厥功不敝

重修洪田福壽橋記

知縣邑副貢辛啟泰

邑西四十五里柴田橋修而圯圯而修郡志詳之矣乾隆乙酉洪水復圯或曰
此橋受九峯及嶺東山谷諸水而扼其衝非登高醜洞無以殺水勢且水淺沙
深非基地之堅厥岸匪固父老曰噫艱已往余見藍田汝岐辛公獨役於此工
之成不知幾費矣今欲易爲高堅非數千金曷濟有心者無力者或視爲
緩圖雖日睹行旅之苦漠然無動於中惡在其能然也架木爲橋時遭冲壞往
來病涉者久之嘉慶甲子春邑人辛衛瞻龍雲從與宜春劉經成憫焉謀諸余

萬載縣志

文徵

記

二百五八

堂伯汝岐子維遷及近村周天沛易奠宇相與疏簿勸輸走城鄉市鎮解囊者
欣若應響因伐石花材相地之堅售於其主壘甃而岸之作醜洞二濶一丈有
奇修十丈高一丈八尺起工於乙丑夏告竣於丙寅冬費五千餘金鄉人曰此
橋之建不可無記遂囑余余惟士君子出處有本出而勤恤民隱盡職分所當
爲處則引導鄉人補王政所未逮皆仁人利濟之心不以顯晦殊也余觀茲橋
昔欲高大未能者今則穹窿足殺水勢矣昔欲遷地爲良者今則有基勿壞矣
且構以碑亭翼以店舍上往湖湘下通豫章俱無病涉患而憇息有所宿次有
館可不謂成且備歟以視昔之難易固何如耶數君子者可以爲世勸矣名曰
洪田福壽橋仍舊也

萬福橋記

邑舉人彭夢彰

語云莫爲之前雖美勿彰莫爲之後雖盛勿傳今觀於楊受益所建之萬福橋
其美與盛吾聞其語吾見其人矣萬邑之下六區叢山雜沓溪水潑廻岐陽開

拓於叢山中溪水駛且陡自岐陽水口而下百步岸涯高村水益大上爲通衢
上通兩湖下達三江一溪橫隔人病涉焉受益之父馨宗曾於其地建一橋顏
曰萬福又捐畝下畷田租三十餘担擇鄉之能者董之爲歷久修葺計樂善之
懷利濟之心周且摯矣董事者苦佃之歎租而強踞也馨宗爲鳴於官仍負囑
董事者乃歸其田於馨宗除納稅外歲收租不敷修葺以橋之屢修而屢圯也
馨歿受益繼之亦收田所出租爲橋用而溪水駛且陡熟計曰橋困於因不若
逸於創費糜於虛不若萃於實乃擇百步岸之上流距橋二里許溪廓而流緩
創建一橋仍名曰萬福不肯本也經始於同治癸亥告竣於己巳墩五而管四
長十六丈有奇廣八尺高二丈六尺六寸費白金一萬有奇經營五六載馨宗
爲於前而受益述事繼志使馨宗功德益彰雖席父所捐田租田磽而佃較歲
入不及十餘金視受益之揮萬金則亦涓滴成滄海也謂海專賴涓滴乎謂涓
滴不歸海乎橋將竣受益無疾而終時己巳冬月也受益之子雲吉於哀毀中

萬載縣志

文徵

記

二百五九

卽不忍橋之驟於垂成也喪事畢皇然有事於橋填其固互其欄缺者補脆者
栗橋費萬金雲吉手所經者不下二千有奇嗚呼美矣盛矣馨宗傳而受益七
以傳矣受益性誠篤儉而有禮勤而不匱與彰世好重以嫻嫻於萬福一橋世
濟其美觀斯橋者山高水長有不羨受益之遇而思受益之德也乎百世後如
見其人矣

張山古渡記

盧昆鑾

康樂水發源高村沿羅城墩而下至蕪溪合藏溪水而流益大津渡甚多而張
山之名最古載在邑志詳於家乘以其地居墩之東兩岸居民耕作出入往來
過從必由此問渡而後得達故重之也自辛卯歲大水爲災將渡舟冲損無資
修復往來者咸病涉焉歷十餘年亦無有過而問者至甲辰冬始議復興凡族
中之分居兩岸者無不踴躍從事有倡首者有續補者迄丙午春共計先後七
十四人人各出錢一千文爲張家山古渡會擇立管首經理生息共議資本尙

微不卽動用見在船隻另捐樂助支銷俟日後會資寬裕用其息以修整改造庶不失乎邑志家乘之舊焉夫歲十一月徒杠成十二月輿梁成其不卽造舟者以溱洧之水淺且狹也若如渭水之深濶則造舟已見於雅矣余居張家山四世矣深喜此舉之有益地方故記之以告後人 此渡於同治元年經生員盧邦榮盧炳堃監生克貞童生棠寶等倡捐置買簡家堰早遲田貳百拾五把額租叁拾肆擔爲永遠修葺之資

湖仙渡記

邑舉人盧瑤林

湖仙之有渡由來久矣曷爲今始爲之記蓋設渡濟人初非示德歷時逾久終恐弊生余嘗東浮渤海北過黑洋西逾神河南遊江漢見夫所在之渡或爲一家獨造或合眾姓捐建波濤萬頃一葦徑杭其初非不美也乃曾幾何時敝難改造卽或改造亦聽舟子索金而莫之禁豈不欲濟人哉其計畫夫渡者有未周也惟觀上盧洲湖仙潭之下流其水蕩漾潏洄廣約六十弓有奇深難見底

萬載縣志

文徵

記

三百六十

有渡焉無冬無夏任人往來絕不問金余初不解其何故既而詢諸父老有知其事者爲余告曰此爾祖同志二十人乾隆初年所創也先是此間有渡過亦索金適朽未及更有褻裳涉者臨深減項二十人憫之乃釀金而造以舟名之湖仙渡又恐渡者囊空無以應舟子之求而莫獲渡也更爲多置田畝以供費羈旅之人安然利涉蓋已百有餘年於茲矣余乃因之有感焉天下豪富之家其倍蓰什伯於二十人者不可勝道然皆特籌權算取盡錙銖至於濟人之事則多毫不肯爲而此二十人者家匪素封獨能於萬人來往之渡計畫如此其周其平居無損人利己之心亦概可覩已第終置不紀日久就湮彼爲之後者保無利其羨餘妄生希冀致使多年善舉卒與予向所見者同歸一轍乎予故不嫌閱時之久謹操不律而爲之記後之覽者倘因是而永率由甚或推廣德心於靡旣是則先人之深幸而尤予所厚望也

義豐倉記

邑訓導盧溪舉人盧 諡

周禮遣人掌鄉里之委積以恤艱阨掌縣都之委積以待凶荒因其地之所蓄以待其人之所乏誠萬古救荒之權輿也周禮之法壞一變爲李悝之平糴再變爲桑宏羊之平準三變爲耿壽昌之常平準與民無預惟平糴常平二法豐收歉散緩急不爲無濟其弊也或至肥吏而瘠民又不若朱子社倉爲盡善也社倉取常平粟始薄息繼蠲息擇鄉之有行義者爲掌隨歉隨貸既杜吏胥紛擾又免奏報遲留豈不甚便但粟本既出公家鈎校必由官府董事者因避事貪吏漸得以持權出納有侵虧買補有抑勒而社倉又不可行矣推原其故在不屬民而屬官失乎立法之本意也夫以官濟民不若以民濟民也邑共濟邑不若鄉自濟鄉也今欲學周官之散利必先效衛文之勸分富者稍出其有餘貧者可弭其不足穀本不資於官自申文註冊外一切聽之民兇則減價平糶豐則和價入糶輾轉而倉不虧且共處閭黨爲惠易周夫固有社倉之利而無其害也然則義倉爲可久已萬載人戶殷庶爲區者六負郭而居數千家地

萬載縣志

文徵

記

二百六一

高灘激水旱時有救荒之法不可不豫道光十五年大憲檄州縣勸捐義倉奉功令多者給職銜有差次則獎以匾額邑人士應命恐後各區咸有捐穀爲倉十有一所近城一二區紳士彌加踴躍上戶捐至千石次百石二三百石不等或折以錢匪歲之間通計不下萬餘石封君宋謨策子孫首捐至三分之一尤爲好義可嘉備邀獎激如令又患囤積之無所也於城內文昌宮側購隙地數十弓卽以準穀錢建倉九厥中有八規制宏敞所需器物惟備視各區十一所又加隆焉名曰義豐豐言穀義言舉也經理之法糶糴視豐凶出入謹參互倉有守籍有掌場漏有葺復以購屋所餘生息而留爲善後董其成者爲劉君瑞生與余同年時方居閒無世道之責而情殷任恤既出所有爲倡復竭力經營之務使水毀火旱之民悉含哺而後已後之人常持此念以時復加附益酌平糶常平社倉諸善法而去其弊以上合周禮意雖長無荒年可也劉君囑爲記因嘉其爲義而志之

安泰義倉記

府學教授都昌進士吳朝鳳

嘗考朱子諸社倉記各因民風土俗使知孝友睦婣任卹之理此聖賢寓教於政因利利民之盛心也然意美而法未盡行非其人官查吏索不勝其擾反以累民故積貯備荒莫若聽民自爲本社倉之意而不以官與其間斯民樂從矣萬邑山多田少民食多仰給鄰縣一遇歉歲卽甚難支自道光辛卯疊遭水旱邑紳或請官穀或運商米平糶民困稍蘇然非久長計也戊戌各憲勸建義倉監生辛基琇聞錫榮首出貲應命并具輪冊邀邑紳湯譽光等勸捐遂有曹世楸捐錢千二百緡厥後輸穀者或數百石輸錢者或一二千緡事以大集立倉於城內九仙宮名曰安泰此非本社倉之意聽民自爲而民樂從者乎而余尤喜諸君子能敦任卹之誼興仁讓之風以濟其鄉里以無負各大憲因利利民至意自茲以往雖有凶旱水溢民無菜色相生相養歌詠太平何其盛也其始終協力務俾可以持久或各舉所知或共推物望以老成爲幹廉以公正集綜

萬載縣志

文徵

記

三百六十一

核上不忤官長下不困貧窮永永年代積貯無虧其造福不更大哉夫倉之在官不如其在民也然以捐輸之多寡定獎勵之等差每年出納蓋藏又報官鈎考是在民一如其在官也則謂今之義倉仍卽朱子之社倉亦無不可所有勸捐經理捐輸名姓置買田租若干與議定條規具於別錄茲不贅

恒豐倉記

韓 覲

吾邑公事漸次舉行惟荒年運米平糶緩不及事自非綢繆未雨詎免邑有流亡積穀備荒尤不容已道光乙未制軍頒示義倉條規令民隨地置倉各保其鄉以免牽制官吏不與以防侵尅法誠善也嗣奉各憲勸論人情踴躍一時城鄉市鎮建倉凡十二所雖所貯多寡不同而量地勢之遠近計人煙之密疎要皆值偏災而可活本處之饑民四區恒豐倉十五都三番士民所捐建也倉在白楊市歲丁未余偕陳君綿韻過焉見其地高爽巨厥四貯穀頗充堂宇房廊工堅料實稱美久之陳君曰是倉之起吾弟勲奉母命捐穀爲倡凡七百廿石

吾兒龍光復邀同志辛炳楷張作培等於本屆勸捐計得錢準穀貳千八百緡有奇建倉費若干減糶折若干存餘若干具有籍事欲垂諸久遠先生其記之余惟事久則弊生常平社倉之利弊前人言之詳矣義倉始於長孫平歉則散之豐則斂之然立法行貨七易則償難是亦不能無弊也茲惟歲凶則平價以出歲豐則別糶以入在民無取息之累在倉無虧本之虞以本屆之穀濟本屆之急則事易舉而亦可繼吾知一處有倉則一處無憂處七有倉則處七無憂豈非人事既至天不能災者歟所望經理得人時存利民之心永杜侵挪之弊而又早爲之計當屢豐告慶或推陳入新或糶三留七變而通之以盡利則積貯日盈自不至有虛名而無實惠吾爲恒豐倉言之而不獨爲恒豐倉言之也

咸豐倉記

邑舉人劉文毅

距城北二十里爲白良四山圍黛一水帶橫遠望紅牆白板掩映於參差綠樹之中而巋然中峙者則咸豐倉焉倉本袁氏故居上下廳事二兩旁房舍十餘

萬載縣志

文徵

記

二百六三

以其地居中也因便承購修之整之聖之塗之覺亭軒逋峻疏櫺彥豁煥然改觀論者謂倉激無須此蓋將本社倉法而變通之積累贏餘爲教養兼行地也夫五區之鄉惟白良地廣而稱饒然第瘠壤中彼善於此者耳非有如坻如京可稱足穀翁者也每逢歉歲亦常告匱辛卯壬辰間至有特觀音土作餐或飯芭蕉棕欄竹屑者鄉巨族憂之咸鳩穀祠倉爲備荒計於是楊子曉湖袁子愷孚作而言曰族無虞一鄉能無虞乎巨宗鼓腹小戶啼饑其忍之耶盍集眾力爲香山裘用咨鄉眾若敖子式鈞袁子樹蕃袁若道建澤樹楠凌雲等踴躍勸輸不旬日得穀若干石會韓明府奉檄建倉知白良業有成績請首其事乃商買今屋鳩工庀材經始庚子仲秋越辛丑三月落成費泉布約千金顏曰咸豐示惠普也余時以事過曉湖便道往觀曉湖等因以記請余惟萬邑諸倉惟城中二所貯穀最多其次莫如白良現存穀若干石買田數百把以較饒之地又能厚積貯以備糶賑向之歉歲告匱者庶幾可以無匱乎况非僅無匱已也數

十年後以其贏餘拓倉基爲講業所且將廣文公社倉法而人文蔚起焉然則
曉湖愷孚之爲鄉里計者固深且遠而同事諸公終始經營之力又豈可沒哉
是爲記

恒足義倉記

邑廩生聞宗弼

縣北十七都一畝與十八都六畝相距二里許村落毗連可呼而應也聚族於
中者豐田爲喻氏東溪爲彭氏下碓之喻裡源之曹高田之李阮裡之喻寄居
者復有陳簡汪王四姓其人多樸質而重鄉誼其俗務節嗇而謹蓋藏皆土著
也道光乙巳因太吏奏立義倉吾邑應者疊起於是職員喻鈞藻增生彭鉞監
生喻含英庠生汪廷藩王樹槐儒童曹金泮邀兩畝土庶踴躍捐輸得錢千一
百緡有奇穀五百七十餘石相地於圳上文聯書院右構屋五楹列兩廊廊各
二倉又置田歲租咸納其中現貯穀六百餘石名之曰恒足事既集董事諸公
請余記之管子曰倉廩實而知禮節故正德興厚生道必相輔而行曩余授徒

萬載縣志

文徵

記

二百六十四

文聯里中來學者輒爲予道前輩壇坫之盛引掖後進之殷今諸君子復推廣
其意而建倉於其側庶幾教養並舉矣乎夫學每患其自足食則不可以不足
也合兩畝之人仰給於六百餘石之穀其爲不足也明矣雖然恒久也又常也
學者必日積月累自強不息而後可成其高大惟穀亦然朱子治南康請穀六
百石不十年而五倍其息恒之效也誠本吾學積累之功通之以爲積穀之法
推陳山新生生不息且復持之以久貞之以常不以不足者自安而因以漸幾
於足吾知學以日積而日進者穀亦日積而日多行見兩畝之中家給人足而
聰明卓犖之士皆得所養以益力於學以儲爲有用之才厚生恒於斯正德恒
於斯恒足之倉將與文聯之院並峙於不撤惠澤無已時矣豈第備荒云爾哉

文明塔記

魯 鴻

雖爲南方之卦火性炎上而必上之以山乃能光遠有耀故聖人觀於晉而得
化成天下之道焉萬載學宮位南向前有筆架山江水繞之而文筆之峯尙闕

傳故塔在城南烏溪址廢無可考乾隆二十一年邑士改建學宮糜萬金易生
瓊依形家言謂必建塔乃稱遂首捐七白金其友人辛衢等共捐二百餘金選
地於南城外而累塔焉塔七級高九丈餘徑濶二丈三尺以漸而合中虛明可
瞰既成請余定其名余曰隆起於地上者皆山也山之銳如立錐者於五行爲
火位又位南名之無以易文明萬邑文事頗盛於前代今稍稍不競其所以曠
然而大振其卑靡之習者必有道矣譬之塔焉厚其基址無以九仞虧一簣則
高大而光明士之蘊諸心見諸事而可以爲天下國家用者皆文也有敦良之
體有光輝之用登諸明堂禘七皇七諸生其亦觀茲塔而思所以責諸身世者
乎若徒謂爲風氣所關文明有塔而邑之雋春秋榜者駢肩接踵則非予之所
敢知已易生曰然遂書以爲記

重修文明塔記

邑廩易泰茹

邑有塔由來舊矣相傳基址在烏溪門外年久傾圮跡無可考乾隆二十一年

烏溪縣志

文徵

記

二百六五

邑人士改建學宮棟宇恢宏輪奐一新左隣奎閣以生輝前對鵝峯而挹秀而
文筆之峯獨缺形勢家謂學宮位南向其卦爲離離爲火火性炎上宜建塔以
鎮之予族祖瓊公深以爲然遂慷慨捐輸大興土木越二年而告竣學博新城
魯厚翁先生曾記之誠盛舉也迨時移勢易風霜侵蝕磚石解裂草木叢生予
於其遺澤不幾漸就湮沒乎道光五年其曾孫斌目擊心傷謂塔爲一邑風
氣所關祖既創之於前孫能不繼之於後於是商諸同堂兄弟將瓊公所留教
養之貲鳩工庀材重加修葺補造堅實粉飾如新糜金肆百有奇斯役也始於
乙酉仲夏成於是年孟冬齋戒沐浴初終如一非徒以祈神天之默佑實所以
曲體先人遺意也塔七級高九丈餘虛明可瞰四面玲瓏巍然煥然誠爲一邑
之巨觀士君子果克自振拔不以九仞而或虧不以半途而輒廢將見人才輩
出科第競爽亦如塔之層累而日上焉是則重修斯塔者之所厚望也夫因撥
筆而爲之記

來秀塔記

知縣邑舉人袁廷鼈

白良在本邑爲北鄉山川輝媚田疇紛錯先君子曾記其勝概蓋造物秀靈之氣之所磅礴而蓄積有由來焉顧山自謝山北折而南水自黃田江順流而東至毓秀橋下象鼻山則吾鄉水口也形勢家謂宜山上建塔以鈐束之俾秀靈之氣益完固而人材之異必有入金闈登紫閣鵲起鳴國家之盛者且雖相錯也先是乾隆戊辰春先君告養歸與鄉耆獻敖公宜也有義李君榮及世勳暨予伯兄家珍廷儒合謀之而卒志焉未之逮蓋時爲之也距今六十年乃克舉其事塔成來請名於予予因之有感矣予惟先君領王子鄉薦丁巳試禮部濱得僥失僅以明通副諸進士後而敖黃諸君經術湛深稱名孝廉皆落第不獲展繇抱子老矣又功令作縣令者不得復上春官然則所謂入金闈登紫閣不重有望於後來之秀歟因名之曰來秀塔顧予有不能已於言者冀後來之秀益礪其志勤其業象塔之層累日上則塔之靈也亦修塔諸君之願也若謂

萬載縣志

文徵

記

卷六六

有塔不患金闈紫閣之不我屬也而德不加立名不加修學問文章不加精進則塔不任咎也而亦修塔諸君所不願也則凡爲吾鄉後來之秀宜何如孳孳矻矻以應斯塔之靈而副諸君修塔之意也夫是役也倡其義者某也從而和之又從而始終其事者某也塔凡七級經始於嘉慶十四年己巳越歲庚午落成計糜金錢如干合有記其捐貲以勸盛舉者例得備書嘉慶十九年正月皆有堂記

辛辰雲

孟子云惻隱之心人皆有之夫事之可惻隱者莫甚於死尤莫甚於死而暴露其尸是以掩骼垂月令相葬著周官此先王所爲以不忍人之心行不忍人之政也漢時如曹褒陳寵在官葬積年露柩宋置漏澤園並得月令遺意而民間相葬不載令甲紀事者亦罕及焉豈人心不古若歟抑以心所同然不足揚歟何以厚民風而勸善行也邑四郊故有官地爲叢葬所諸先輩又創因心堂以施棺蓋兼周官月令之法而有之於貧民甚便然勢不能及遠自非鄉置一局

安能使合邑窮黎送死無憾乎白水歐陽子豹念之用謀諸羣季梅鳳文炳諸君體先人樂善之心因推眾人不忍之心而倡捐其鄉其初釀貲本族施棺尙少既而各村善士甘溲湯調和等聞風起輸資四集於是購田產置義山立堂爲會計所而顏之曰皆有列捐戶名牌於中事起道光己丑至甲辰而大集一切章程具詳冊籍蓋自是遠鄉領棺或至四十里而近之貧無以葬者皆得入土爲安一區之中庶幾無遺憾矣夫惻隱之心不患不動患其動而旋置之坐使仁心見端可以擴克無窮者皆虛發而無成功其負此心實甚今在堂諸君始能不負此心矣乎一族倡之而量力由近始眾家和之而合力以廣推人人皆有之心遂爲人人皆有之事此無他務實其所動者而已矣由斯道也凡善念所萌一一求有以實之力足任以一身力不足合之羣族人同此心倡無不應世尙有難事哉吾願各區則而效之尤願諸君擴是心而克之興仁歸厚比戶可封此堂實基之矣子豹名文蔚明經與余善

萬載縣志

文徵

記

二百六七

存心堂記

辛辰雲

甚矣吾邑義舉之多也而莫勤於卹死者在城如因心堂在鄉如見性皆有各局並以施棺捐地爲務義塚所在多有故一邑中雖極窮無告從無露骸浮屠者何其厚也比修志將竣劉君湘夫辛君雁發以新買義山告詢之則又有所謂存心堂者事起道光壬午二君偕明經汪起鵬郭海門茂才易朝宣等二十四人人貲二千其初本爲培墓設憫無主之墳歲久崩陷或爲狐兔所窟也屆清明遣人四出封樹之中元夕則並官山塚設祀焉武庠劉君龍科實尸其事居積致饒手買田至五百餘把至是辛易二君接理爰購義山貲充將以施棺與因心諸堂爭盛矣昔曹褒舉射聲營停柩葬而祀之韓魏公市并州田給民安葬並見稱史籍彼皆取辦官錢此乃捐自私橐爲尤難也孟子曰君子以仁存心諸君存心若此可不謂仁哉抑余更有進焉子皮稱子產曰夫子禮於死者況生者乎是固然已然自古聖賢言仁必首親親而仁民之術莫大於好生

故曰孝弟爲仁之本文王發政施仁必先養老卹孤馴至樂樂而利利而司徒之教比閭族黨州鄉葬僅居一親疏生死之間輕重判焉今世或不知事親視骨肉飢寒不卹甚且干戈操同室傾軋徧交游恬不爲怪及其路見露骸未嘗不惻然念之將無乍見者易感相習者不覺乎何不忍於死而忍於生厚於疏而薄於親也在堂諸君萬無慮此余恐聞風則效者不得其存心之本以爲仁專在是此外可恣吾志焉則仁之真晦諸君行仁之實亦不彰將何以教民歸厚乎夫不忍死者之暴露與無祀此本惻隱之自然感發非矯也吾願效法諸君者因是心而反求其本死者可念生者愈不容偷死而疏者可矜生而親者更不容忍則方寸肫匕生意彌滿孝女睦嫺任卹相習成風厚者愈厚佻者莫不歸厚大和元氣常在吾康樂卽子皮之言爲不虛矣以此論仁庶有契於諸君所存而卽因心堂以來諸君之所存乎夫仁者存心固欲斯人同歸於仁必不樂獨居於仁也余故揭其所欲言者以爲合邑告

萬載縣志

文徵

記

二百六八

見性堂記

郭大經

春秋繁露云性比不善比米殆謂性之有苗如禾之有種要非遂乎生機究無以全其美善則養性養禾之說亦唯乘生機自動而毋拂焉過焉而已論性之始莫先於仁詩曰凡民有喪匍匐救之又曰行有死人尙或瑾之其哀矜惻怛之意若勃發而不自禁豈非有觸於中卽性之仁所見端乎昔先王本人性之善漸之爲教化大司徒令四閭爲族使之相葬而墓大夫令族葬皆得私地域一時邱墓之間任恤行焉豈其風會獨古哉蓋善氣之蒸不泯乎古今宋置漏澤園率由此歟我邑葬域昔良有司區四郊封之邇來因心堂施構材俾得就近郊瘞埋意良厚已牟村爲商賈閭闔地客死無坏土多浮屠其貧不克葬者又乏營斂具或不免暴露慘偶觸於目卽感於心斯亦仁人君子所蒿焉傷之者乎今李君世華柳君承培邀辛君樹瀛宋君身修與柳平垣韓祥瞻郭甘泉鮑叙堂等醵金若干購近市荒坵爲義山徐權其羸息將次第施構以爲常商

及余余亦學館金助非敢市澤也人非甚不肖聞一善言見一善行未有不油然而動瞿然起者余亦猶是心而已茲構數椽爲會計地額曰見性誠以禾無地不生性無人不具惟不自拂乎生機然後各全其美善者得以共全其美善尙慮區區難成乎哉又奚第區區能成乎哉

有備堂記

彭夢彰

古稱有備無患非無患也惟能善爲之備雖患不能爲患也若有備堂可謂善備者矣財神廟者吾邑商人各釀金而成者也門首右側有空地一區方廣容數百人因而屋之鄉民之買賣米穀豆麥者咸聚集於此歲收利息可得錢若干緡以爲將來建豎廟宇之用嗣因髮逆竄擾地方公事時形支絀助軍餉辦團練俱取給於此焉近數年來齋匪土匪不時竊發尤不可以無備於是紳耆會議僉謂廟宇之修姑從緩圖卽以此項留爲有備之用遂呈府呈縣而茲事以定夫備之道難言矣或遲之經年或需之累月尙有不能集事者而是舉也

萬載縣志

文徵

記

二百六九

無捐輸之費無經畫之勞因已成之事一轉移其局而有兵則備兵可也無兵則備荒可也無兵無荒則留其有餘而凡公項之不足者取以備用皆可也倘異日者屢千屢萬而斯廟之建適逢其會則今日之所取卽可爲異日之所與一舉而眾善備而又何患之足云乎哉爰書其顛末誌之簡端首其事者鮑鍾瑞等

過大圍壺仙二山記

李榮陞

高村南至縣七十里謝山峙於上游北枝所派大圍山爲大南麓所放壺仙嶺爲極大圍連絡小嶼荒山之交梯田雲構東西相望行李往來下出腰肋前後其中隆土成峯三巨石爲之冠焉戊寅八月予自岐源來登秋霽天高極望數百景與意并益紆路以窮其勝山之陽谷泉十數其偏西者合謝山諸流以南至於白良爲錦溪可堰以行觴溪之上下聚落數十百家在元時黃氏敖氏衣冠甚偉與草廬道園遊者數輩圭齋歐陽氏橋記云水源於錦山今以地求之

卽謝山也然未有舉其名者連山北盡引趾坦然遊意有餘明日辛爲霖龍文
采來會遂取徑於壺仙其巔亦有石孤撐可怪昔之人常規爲宮以祀之文或
爲狐仙綴文之士留咏焉壺與狐字易混不知何時宮廢碑毀而山名爲土人
所訛莫有正之者噫萬載爲江西僻縣山川人物罕見稱於前代然吳虞歐陽
之文章翰墨所以資當日之閭巷而傳於本集者亦多矣僅今數百載記刻無
一存土人尙不識諸公爲何如人况於附在交遊如黃敖諸子安能傳其恍惚
哉至於謝山方山二氏之誕幻傳記固已不道餘波爲大巫狐仙其說尤鄙易
爲擯斥然其家口耳相承卽爲故實至今勿替而益張孔子曰文獻不足徵也
十室之邑必有人焉今流俗之所矜重者乃如此可歎哉

鄧公嶺經行記

李榮陞

太溪導源鄧公嶺自高村西上可五十里砮谷層峯鳥道一髮其嶺西則瀏陽
北則寧州跬步之間流分數郡攷之圖記卽首禕之前茅也峯有金架銅陵松

爲載縣志

文徵

記

二百七十

光珠斗之勝棚業連結百十里僑民資竹紙以生歲賦至息十之一然習尙獷
詐不時收則不可得償山旣深不可悉繩以理道壬秋之季朔甲子予從四兄
入其峒戒之以期而坐督之已而兄以病歸地都無可與遊者啞唔稍倦啟戶
卽登山入秋益深如繪之花實隨步升降蟲鳥各專其樹隔峯酬響略不思人
山空夜闌作戶嘔啞四起聞叩所經行多泛瓊海漲臺灣沂巫峽登蛾眉者揚
摧風景鬪然可聽吁二百年前此山莽爲盜窟自先祖從銅鼓公盪平以來始
貨其棄地今太平積久人得免於蛇虎之虞而稍蒙其利奚嫌於久客哉壬午
束歸裝道以一夫取高徑東南行越大西坑升降凡三十里至黃皮絕頂積陰
冥冥僅南東數山青浮如側修鱗於巨海然北自黃蘗以上峰七魁岸如欲進
軌者大圍尤高橫無匹此外周天黃暈下濁上激雲霧勃窣無風捲收不能測
其變矣庵無壁瓦規石如城垣木累其顛以禦衝飈云按黃皮小木也南楚多
以名其山見於水經之注字亦作黃巖見劉後村集流俗不知乃以爲黃皮二

女仙也而祠之癸未晦晴霽謝山出於足履下東行二十里經其觀高谷寬平傳爲東晉時羽客謝仲初得道之處仲初本山下人嘗往來閭皂華林仙蹟甚富而升遐於此好事者比之俗家衣錦唐時至爲帖目以試南宮之士今像設乃爲王公服更稱靈運因靈運襲封康樂而訛合於仲初可怪也七星池煉丹爐試劍石距觀俱不遠讀書臺在頂南東眺望極佳楊誠齋贈劉長者詩所謂祇借謝仙雲鶴駟者卽此其詩本集未載東行十五里至烟竹山甚環澗甚駛長者遺園在焉劉後村詩燈與鄰通眠未易備極莊家之態衝暝行七里出高村甲午七月晦

萬載北區公所記

盧兆梅

萬載舊分六區新制并區爲五今五區卽昔之六區位於縣東北隅山林聳翠東西綿亘六七十里四民安於樸儉足跡罕出里門近稍爲風氣所轉移接踵縣城而苦無會合地區人士創建六區公所於城北有年矣余因新制更名爲

萬載縣志

文徵

記

二百七二

北區公所所爲邑商十餘年前新構二進一寢左客廳書室後築圃前圍晒場錯列襍屋磚木構造堅緻而寬敞商中落不能守余姪震暨彭亮盧澈黃李甘喻惟誠諸君集區人貲承購仍與商平管之民國十三四年間事也商日益不振李涉冰彭德威二君及姪震先後全部購成民國二十二年迄二十六年間事也時閱十載欵逾鉅萬諸君子倡議而有成功信能孚遠毅以有濟可嘉也區人之來縣者有如歸之樂間與諮詢民生疾苦鄉村利弊及農田水利山林陂塘動植區民經營事業之扶助去其不善而從其善其利於地方誠非淺歎泯滅舊俗土客之見借聚一堂以爲全縣倡尤非有遠識不及此余嘗嘆吾縣科名偃蹇有清三百年間入詞林躋顯秩者惟辛少宰筠谷一人而德行政事文學之士往往淹沒而不彰其卓然有以自見者而遭遇蹇困聲名囿於鄉曲族姓之譜省府縣之志乘略述行誼語焉而不得其詳衡量人物者求縱橫一世上下千古之才及之者鮮矣以余所知吾區李厚岡先生通經術兼義理考

據詞章之長旁及厯數輿地諸書曾與戴東原氏同徵入禮學館先生改令滇中踪跡與名公鉅卿耆儒碩彥日以疏故其文精深閱博不得有大力者表而出之遺集梓行而未經編定擇焉不當李適堂氏選先生文入國朝文錄正集而張香濤氏譏其書體例未精自亦行之不遠近胡退廬氏得先生厯數考黑水考刊入豫章叢書更鮮有取而讀之者僅留怪奇偉麗以俟後之好奇愛博而聞望隆重者之彰闡如歐陽永叔之於韓退之推崇其文章一洗數百年柔軟淫靡之積習復古文而垂世範然此豈必可得之數耶彭子文先生見知於湘鄉曾文正公讀劾贛撫陳啟邁摺其期重先生不在李忠武王壯武下先生團練新編於起事時竟夕草成曾公一見所著歎爲天下奇才顧參軍事數不利且厄於大吏坎軻以終其身其命也歟故余每欲鄉祀二先生冀後之人聞風興起奮立於一時而聲施於百世歲月不居同遊零落方耿七於初願之難償而諸君子後起羣策羣力成公所於眾流薈萃觀瞻之地捐資者得享其先

萬載縣志

文徵

記

二百七十二

人二先生皆入祀矣各族姓先達並享者若而人歲時祭祀陟降興懷其遺言遺行入人之深必較景仰古聖賢豪傑影響爲倍切嚮往而至焉或得時而行道安見廬陵湘鄉之不於吾區後進遇之且以補二先生之缺憾也是則茲所之創建既利於地方而嘉惠來世功效正未易量所厚望也遂書此以記之庚辰冬月泰和客次

船埠灘雙廟記

邑舉人廖連城

船埠灘在萬山之中其水自天井欄山發源至此與高嶺黎源水合流可通舟楫商賈集而成市雙廟者左爲天后宮右爲萬壽宮家若於道光乙巳倡首捐建迄丙午春竣工是年城以優行貢成均回里日里人置酒邀飲於廟一人言曰君不先不後貢於廟成之日其爲尊翁倡建之報無疑城對曰君言過矣廟成之也諸君助貲助材與有力焉神何獨福我家爲夫避禍徼福者人之欲也福善禍淫者天之道也神天之功用依人而行故淫祀無福其人曰如君言則

不可求福於神乎城曰又非也詩云豈弟君子求福不回書云鬼神無常享享於克誠所謂克誠者非奉馨香豐俎豆之謂乃求福不回之謂也不回則神降之福矣曰何謂不回曰孔子曰思無邪孟子曰強為善人能以是求福於神是謂不同不回則心正身脩家齊神之所福也故曰積善之家必餘慶若徒奉馨香豐俎豆以媚神神必吐之何福之能得時聞者皆唯唯歸為家君述之家君曰汝言足以解世人之惑宜記之於是乎書

萬載園記

邑進士龍膺言

距東木橋不十里有地曰萬載園亦名催田彭姓世居之以路下名蓋自東木橋至慈化彭姓所居在路之下上下之分從萬載起故其譜曰萬載三區路下彭氏始祖曰天寶於元延祐時由吉水遷歷五六百年矣其地距萬界尚三四里而嵌坐宜境犬牙相錯縱橫不過三四里版籍為萬載縣十一都一尚十甲父老傳聞初時縱橫七八里以里甲測之理固然與以耕鑿自安之民傳之久

萬載縣志

文徵

記

二百七二

而仍不墜其先業矧稼穡之艱難蓋可決其積而必發者哉丁丑八月八一老人誌

萬載龍氏忠孝祠碑記

胡思敬

宣統遜位後七年歲在戊午萬載龍進士贊清創建龍氏忠孝祠於縣城越明年告成同邑盧中翰扶常求余文以記之問其所祀何人則邑乘所載一曰龍先生鍾宇德剛明建文時為晉藩左長史靖難兵起檄至鍾拒不納燕王親率兵圍大原久之不下遂趨南京及即位詔械鍾下錦衣獄不屈死一曰龍先生以仁字子善出吉安鄉東廓門生甫晬喪母稍長追服斬衰三年廬墓而居圖母像朝夕拜之每食必祭事父亦然嗚呼忠孝萃於一家事本非易合一家之忠孝立專廟以祀之尤近世所難能贊清於滄海橫流之日而能存中流砥柱之心可謂知本矣三代以前之學專在明倫倫既明矣舉凡人與人相處之道國與國相接之禮無論上下遠近親疎皆釐然各得其當天下有不洽乎伏羲

畫卦之初仰觀俯察已默會其理而未嘗明言舜使契爲司徒始舉君臣父子夫婦長幼朋友五教以示天下自夏商以迄於周卒由其道不改上以是教下卽以是學志定心專初無他歧之惑故其力不分而才易成孔子之教弟子也先孝弟謹信而後學文孟子舉庠序之教兩告齊梁二君皆云申之以孝弟修於身者在是齊其家者在是所謂人人親其親長其長而天下平不在求諸遠也蓋統論生人分倫求治之理非五教不足以盡之而就五教分別輕重至親者莫若父至尊者莫如君無君之禍余與贊清則旣身嘗而目擊之矣幸經宋儒倡明正學之後仁皇十六年之德澤淪浹於人心旣久無父之邪說不能盡奪人固有之良然生齒日見其削游手日見其多上下消阻已有先中其毒而不覺者天下之亡匹夫有責欲救今日之亂必先變人心欲變人心必先正學術欲正學術必先明人倫明人倫之要莫大於崇忠孝如贊清表揚龍氏二先生之大節一簣之微雖不足以遏稽天之浸而四方君子聞其事者皆欣欣

萬載縣志

詩徵

四言古

二百七四

動色以相告剝復之幾或在是歟二龍事實雖不見於正史據邑乘甘泉徐一唯所述已足與方何諸賢並垂不朽雖然君子願爲禹臯不願爲龍比願爲負米之子路不願爲自毀之臯魚不幸遭逢時變激而爲忠臣爲孝子非君子之本懷又因之以享名志益傷矣而在有心世道者惟恐五教之不彰紀綱之或紊不得闡揚一二藉以正人心明學術贊清其旣知之余復伸其說云

詩徵

四言

我我亭有序

元學士富州揭傒斯

殷仲堪答桓溫曰我與我周旋久寧作我宜春黃元瑜取以名其亭曰我我爲賦詩一首 我遊於袁於龍之干有闕閑閑有環言言有構桓桓維集之安我居我處我笑我語有翼其所而敢予侮我楹孔嘉我構孔華曾莫之迎而莫我多彼馳者子亦孔勞矣我旣觀矣亦莫我迷矣嗟殷氏之老猶弗桓是文我不

友將誰歸咎溫溫其和瀏瀏其清藹藹其芳煥煥其明嗟維古之人倫或予聽

采通志補

有竹五章章四句為龍孔目駿賦

明大學士石首楊溥

有竹猗猗維茂如簣君子樂之載歌淇澳 有竹猗猗中通外直君子樂之四

時一色 猗猗者竹挺挺其標不以春妍不以寒凋 美矣君子翰林之英來

遊來歌治世音聲 猗歟治世千載重熙樂協簫韶鳳凰來儀

題王永誠綠筠清室圖

遺址在上厰塘辛氏享堂後

張璧

繫惟王丈人中之英蘭亭啟肯槐株植庭驅馳宦轍賢勞著聲解組賦歸勁節

尋盟創垂課子驚人一鳴慶擬玉樹綸閣寵榮年逾尚父矍鑠稱評軍持紫芝

煜煜騰馨徂徠松翠偃蹇參冥噫嘻斯圖也豈宮琴書瀟灑披對於疎櫺殆衍

龍鳳之奇種抑亦昌後裔之崢嶸

溥泉吟有序

清孫馨祖

萬載縣志

詩後

四言古

二百七五

余城居之西有溥泉迤城北注於蜀水東至南昌八湖漢夫達淵之泉固不同

於在井之泉通志載此乃與井泉無別安知溥泉之澤借湖漢而入於海為莫

可涯埃哉余既飲而樂之號曰溥翁翁勞人也又將遠行未必能樂於是意未

嘗不在是也作溥泉吟

澹澹溥泉注於蜀水風雲在望咫尺江海孰泳其淵自溥翁始 泉之溥翁居

之下抱甕而汲餅罄有缶不驚波浪何勞車馬 醉翁壯年以翁為戲霜髯不

翁強顏老驥入少年塲飲酒易醉不如飲水適溥翁之味 短歌聲促長歌聲

慢亦有心聲在聲之外寫水聽風可是天籟

五言古

衝雨萬載道中得逍遙觀遂託宿戲題

宋分寧舍人黃庭堅

逍遙近道邊憩息慰億懣晴暉時晦明謔語諧讌論草萊荒蒙蘢室屋壅塵登

僕僮侍偃側涇渭清濁渾

采山谷詩集

題李西傑水竹居

劉章

在昔香山老水友而竹師心虛是師道性靜友亦宜孰謂物理妙乃爲高賢資
佳哉隴西子結屋溪之湄溪上亦何有有竹如在淇娟娟時寒碧澄澄燭須眉
微風一披拂雜佩聲參差俄頃萬籟寂粹然澹餘姿可但子師友我方師友之
未到三歎息徒勞形夢思

前題

章穎

水清湛無波竹直勁有節風味與誰隣夷齊采薇蕨羨君廬其間塵事俱掃絕
無求萬慮空清夢化爲蝶高垣繞華棖未免畏炎熱何如李君好胸襟凜冰雪
玉山曾品題價重萬金埒幽尋勝得趣靜對物理徹雖貧亦何傷政恐汚我潔
吾言儻未然歸聽此君說

寄題張氏中隱堂

張孝祥

吾家中隱君才比萬斛泉短小精悍姿一劍當雄邊去年郴州賦俯視衡嶽巔

萬載縣志

詩徵

五言古 二百七六

君從襄陽來孤忠作戈鋌談笑百雄安淨洗湖嶺煙謂當酬王勳金印如斗懸
言歸遽如許此意誰爲宣小隱卽居山大隱卽居廬夫君處其中政爾當留連
早晚有詔書喚君還朝天欲爲中隱游更督三十年 以上三首采嘉定志補
題歐陽龍南所藏羅雉川秋江晚景 元揭傒斯

弱齡習村疇隨景慕追遊散策步隆阜揮袂陟高邱仰送微霄翮俯鏡清川流
攀條賞韶穠折穎弄芳柔湘南擬詞賦江左狎吟鷗不識年歲邁詎貽軒冕羞
一從黜仕版羣憂積岑樓朝隨車馬塵暮與形影儔雖荷明主知百志靡一酬
懷祿已云忝抗迹豈末由流雷三十載回腸幾萬周朱顏日去面白髮日滿頭
君子委縑素丹素含嶺秋寒蘆被在渚橫靄澹長洲草樹一消落鳧雁各飛浮
亂石夕流駛空郊朝景收庶類趨晏暮孤生增隱憂覽物因有觸流詠慨前修

采贛州府志補

題東岐四房

虞集

秀挺東岐山雲氣常覆之林邱翳幽潛流泉發芳滋盤桓在中谷良疇漾清陂
開堂直岡景長年誦書詩孝友夙所敦求道遠有師雅志尙端潔允近諒難知
康樂昔賜履詠歌足遐思啟書訪前聞往跡無所遺瞻彼古澗松深杳連香枝
亭亭植高節鬱鬱含令姿眾木不同流悠悠或副深期

題蒙庵爲黃石谷賦

虞集

東南有高邱下臨萬家邑汪洋浹春潤沃衍盛秋入羣山若浪波起伏翠重襲
靈運好竒險高平罕相及幽人閑綺閣周覽度原隰隨山導清泉積石拾層級
結庵以蒙名果行信所執良時一來游朔月九交十門當星斗高齋卧風雨濕
一川燈火歸賓從雜車笠登高愧能賦騰身竦山立
爲黃氏賦大雅詩

虞集

岐山鬱嵯峨鳴鳥昔有聞周公盛制作經綸以彌文朝事接燕饗勸勞兼賓軍
蕭雖述盛德工歌贊前勲流蕩桑濮靡何由返咸雲陳肆輒有見吳季直不羣

萬載縣志

詩後

五言古

二百七七

公子有古絃歷然宮徵分大雅忽有作青春日方殷高堂以居之樂康永欣欣

以上三首采道園學古錄補

桐岡書屋 遺址在白竹山房側

明永豐少詹曾 梁

梧桐在高岡下有隱者居屋後山削玉屋前水鳴渠屋中何所有插架多古書
竹簡識科斗芸香驅蠹魚豈伊惜寸陰庶用勤三餘名教有真樂孜孜遂忘劬
及茲得賢嗣發軔登雲衢追陪青瑣賢出入承明廬聲光動鄉邑此屋信不虛
黃金雖滿籬視斯諒弗如墨莊有遺訓永矣垂名譽

靜樂軒

吉水庶子鄒 緝

雅志樂幽篁遠隔塵市喧屏居林壑間息心以忘言背水結茅屋面嶺開柴門
羣峰當簷出修竹遶舍繁時事不相及外物寧爲昏翛然一室內習靜臨前軒
希夷絕塵想泯默謝囂煩至樂惟在茲擾擾焉足論

前題

王英

伯陽貴清靜莊叟樂恬熙寓心得所止達者斯爲宜遺隱在林麓迨遙復何爲
軒窗極明豁草木皆芳菲適意聊泛覽忘情豈知破眾紛諒已卻慮澹志自怡
乃知靜者趣冥默真吾師安得謝輪鞅相與探元微

綠筠書室

明布政使邑進士易 節

我愛西鄰交王若多意氣植物慕佳卉營構擇幽地三徑色蔥蘢一室清陰蔽
若人珊瑚姿虛心遺世累晚節固自堅桃李終僮婢孰云林下風而無諸侯貴
何當賦歸來與子同高致

高岡雅詠

楊宏備

藹藹君子廬乃在宜陽間門環康樂水圖畫五名山夫君懷隱德優游非等閒
酌酒摘瓊枝仙人相與還五色散烟霞頃刻成斑斕文章多令子鳴珮玉珊
山田大智寺古柏并序

清江熊 頤

萬載之北鄙五十里有奇栢焉一本九幹大可蔽牛枝下垂仆而復起軒舉

萬載縣志

詩徵

五言古

二百七八

怒張怪異莫可名狀甲戌余客湖溪主李先生維則之廬詰且主人具酒食
邀諸友往視而寺僧適來相與取道江干徐步山椒林木陰崖擺風換雨忽
聞泉聲清澈如鳴珮環至則方池半畝可鑿鬚眉栢於此托根焉夫山榛隰
苓各止其所栢不山而水是生此殆天地奇尤所鍾不可常理論者也因作
詩以紀

晨熹動山牖剝啄聲頻叩羣友恣探奇相邀陟靈鷲行行俯澗濱灘聲喧石溜
噴浪怒雲飛激響雷霆鬪已足駭神魂更復窮巖岫絕壁隱禪棲披雲衆雪竇
泉聲活活來古栢驚奇遶虬枝怪怒張虎攫紛馳驟兔起鶻復落矯矯勝葱岫
一本幹九枝森然列長幼墳倡和以篋風至號萬竅寒泉盤其根蒼蒼依井甃
吁嗟造物奇耳目安可究昔予謁孔陵老檜傳曲阜萌蘖不徒生千古何能又
嗣聞武侯祠結曲雙栢秀意謂宇宙間無復臻奇妙快哉此日遊眾言良不謬
淪茗出山僧圍蔬雜飢飽坐久竟忘疲歸途已殘晝擲管速成詩慚余先擊缶

舟中留別汪生映極

清邑宰海豐吳自肅

昌黎文起衰世俗皆爲怪可憐太古音時人偏不解君才絕等倫揮毫獨瀟灑
孫陽世所稀修翎嗟屢鍛我誠肉眼人亦嘗爲君戒遇合自有期曷哉斯征邁
壬戌春自桐山旋里賦別辛生承頊并寄講堂諸子

吳自肅

薄遊憶當日遭時何太否舉動半違心面目全非已幸於戎馬間勉強栽桃李
皮骨今尙存所慰猶在此辛子才獨絕奎聚執牛耳縱橫理學窟伐毛兼洗髓
筆走跳天門賦貴洛陽紙善是是亦足而不寧惟是軒冕視如塵肝腸更似水
豈獨號文人真堪稱國士龍江舟上別屈指四年矣我來客龍眠鵝嶺人伊邇
思之不能忘折簡勞尺鯉命駕賁然來歡予爲倒屣握手話當年既悲復成喜
開篋出新詩光芒氣成紫非直冠一軍佇看凌風起聯牀甫浹旬予復還梓里臨
行再叮囑努力青雲裏同志紛多賢並借問諸子

陶家巖

邑舉人辛聯昌

萬載縣志

詩餘

五言古

二百七九

曠蕩今古間高人不世出餘韻日卽微百代猶髣髴陶公徂徠客清名妙六逸
平生一杯酒無心計得失晚歲慕康樂寄跡托巖穴高崖根青冥與曠洞天豁
嵌空俯深溪何殊仙人室向來經遊眺高軒蔭清樾花明春未老好鳥相嚶戛
白雲屯層岡孤月松際山徘徊仰餘照發興驚勝絕伊人去已遠碧草委霜雪
如何埽地盡并此巖俱泊椎鑿雷奔崩剝落骨流血豁訝悲風來泉聲夜哽咽
悠七後來輩空尋昔賢蹟陰陽有代謝物理杳難必茲巖自興廢今古渾如一
南嶺

知縣邑進士李榮陞

吾里環萬山地平不多畝高者無如何往往贅培塿南嶺如胸瓜分頭上下走
又如構重垣睥睨當關守岐原與烟竹鼎列間誰手坐令同井墟秦越判鄰友
高低連兩巒天馬側身驟午日標松顛寒泉豎谷口鴛言何所如揭木得耕耦
遠色增雨餘深光沐烟後飄蕭萬竿接陰壑埋春韭未知雲氣流翠罨破廬否
茲山對吾居相狎遊亦偶蒼然圍屏橫歸徑屢側首 字書無暇宜作廩

天湖山

李榮陞

迴嶂攀將窮一俯萬丈巖孤村鎖東南夾水峯遞應九頂穿雲秀源山躍相命
 旁羅陂陀間廬舍紛餌釘荒臺隱霄漢 鳳女臺 誰雍松楸淨飄然騎鳳仙
 委化草常靚跪飲帝漿餘坐斟天壺竟 天壺泉 摩挲蝕苔字未與玉雪稱
 黠僧習猿嬉宛轉欺天穿破慳身一賭餘崖不可遠 捨身崖 叢石挺雞冠
 雞冠尖 雄聲半空鷹陰竇潛虺蛇陽葩照梨杏東岡何迢七氣象姿包孕
 危步託飛鳥廢蹤憑過詞茲山亦不窄棚棚望相巨通力甚把犁背身泐懸磬
 以茲盤谷開何處寢邱賸勤生非可必况我力難競响七中坑田桐竹積旁磴
 非無水與日所憂草萊病壘岑豺虎塲遺叟陳鴈咏紆回愧先德里門濶造請
 山家愛霜腴焚斫爭時令歸路入暗烟火龍銜照贈 遠同偵

湖陂洞

禹歲貢辛 頤

黃田山水窟一望特奇絕磊砢空中出平地鑄石穴相傳一處好數里綿瓜臙

黃載縣志

詩徵

五言古

二百八十

探之得盡源湖陂聞聲咽李生好奇古爬羅素心切茅庵遠邀我去去洗煩渴
 經行不數武小口似微坼舉手披蒙茸俯窺開瀨洩踟步入沈深側身隨轉折
 胸前礙青苔背上挨石脊崖傾詎堪仰湍瀉仍淺揭貫魚穿地軸逼援心慄冽
 湖陂那可聽少間愁火滅卻不容身轉後進居前列漸遠清涼界始覺天氣熱
 嵌竇億追隨頗嗔李生拙李生還笑我迤邐賴推拽聞者若相詢聊復將句綴
 星光洞 辛 頤

初如醯甕窄旋通天宇敞懸崖擁火看石漿滴形長流水不知處松濤瀉清響
 玲瓏轉來深心體增寒爽覽茲不盡興旁更開晃朗灣環心屢折探討恣幽賞
 沈冥迷晝夜相顧神思慌乍覺一星光別徑通來往欲出轉廻顧一境逾深廣
 欵石作鐘鳴微叩驚翹颺凜然始趨出潺湲漱石上水冽甘可嘗跌坐空塵想
 流連終未懶乘暇復來訪

萍鄉張明府粒民書郭孝子事見貽跋後却寄

魯 鴻

污泥亦有蓮荒郊亦有麟誰言丐兒賤金玉貴其身康城有郭擦孝行芳千春
乞食養母弟求仁而得仁王政先無告何况病且貧奈何令孝子不得奉晨昏
靈藥天所貺至誠實感神富人病如擦踵門求一丸卻金匪小節太懼辱其親
富人亦人子廩擦如所生辭受依於禮母教信不愆古之庠序校皆以明人倫
丐者行如擦可以克嘉賓願君廣物色無令失此人 采陳府志

遊雲峯洞

魯 鴻

百里入雲峯山形如覆盎崕岬豁天開俯瞰不計丈徑絕無鈎梯側身氣沮喪
趾壓前人頂後來勢居上垂危爭杪忽入險得平曠偉哉造物奇狡獪千萬狀
篆籀錯尊彝珠璣疊屏障石乳綉削垂冰柱屹相向恍如閭闔開排列羽林仗
又如禹鼎成神姦窮罔象想當濕溼初融液氣酣暢磊砢鬱不平女媧力批亢
雕鏤虛無根瑣屑事勾當媿妙難具詳茲遊荷靈貺傳聞洞源遠百折不流宕
神物中屈蟠窟宅鎖紐壯世無然犀人詭怪勞想像列炬稍深入復覩高門伉

萬載縣志

詩徵

五言古

二百八一

進退分勇怯力疲覺神王投石驚雷霆天空裂層嶂目贖耳亦聾招魂幸無恙
古來荒僻區靈異語或詎茲洞置城市遊屐添幾兩秘惜自地靈智巧歸天匠
薄暮下山歸空聆樵牧唱高吟懷謝公千載永相望

題龍江橋圖 卽辛鵬程所建

辛從益

一水穿城來北流合西派雙江匯龍河豁然放清快東西崖竟絕渡險舟人戒
長虹倏偃波劃若天所界截業鎮巨鼇何由騁水怪既免呼航勞復勝徒杠隘
諸鄉路交通爾我胸無芥誰歟建此橋橋成力已億毀家利民涉吾宗德種邁
初像今何存行人當下拜 橋西書屋昔祀建橋者像今屋爲劉氏有

我昔下筠洪輕舟發山脚洞鏡入江天鳴橈響幽壑仰視跨虹人行空想複閣
自別京華春返棹溯康樂津亭俟在望風景尙如昨崢嶸雁齒排橫江何秀削
清川既夷曠雲樹煙艇泊洲平莎徑遙輿徒人繹絡惜哉崇文堰吼聲撼城郭
梁石漸欹危誰爲防崩落披圖發三歎利濟施真博食報在後人文章方連蹀

石庵

辛紹業

靈巖閎幽景石洞窈以深人言古寺好細路踏粘陰
說文作粘爾雅作粘徐
鉉曰俗作杉非 山氣無六月峭寒落衣襟長風倏震蕩白日晝蕭森乳泉時
一滴長作雨餘音佛像塑奇古未令蝠蠶侵老僧兩三人布衲穿遥岑渾渾泯
知識塵席久同林一語及世事無言如聾暗頗疑羲皇代遺民遂至今欲從知
不能低徊違寸心

龍龍山墓

邑進士辛紹業

寒鴉噤空山獨樹冷無暉下有忠義骨感我心增悒憶昔明二葉攬槍掃紫微
徵符來燕壘執詞矯且非戈矛起蕭牆孱主莫知歸長史排羣議屹立不可揮
獨保危城小遠七護帝畿神器移北藩蕙毒矢發機檻車日千輛焉問麟與豨
維時方景鞏錚七犯嚴威齒抉猶能罵皮脫仍欲飛纍然環十族血染御街緋
凜烈信莫干中道亦或稀長史外陪臣足未闔帝扉緘嘿豈不好要非心所希

萬載縣志

詩歌

五言古

二百八十一

臣職既當爾臣死焉敢違從容成仁義嗟公其庶幾首邱今在此魂魄天孫依
千載樹臣節雪高霜澄澄 同體

曾仙塘

辛紹業

古墓浸寒水云是曾仙藏曾仙眼如月愛此水雲鄉天機杳莫測仙獨識微茫
有質靡不化聖道其常安有千年骨朽壤閎愈光况復延愚昧餘蔭詠休祥
徘徊山之宅山川鬱以蒼雲日舒清景草木亦芬芳殷勤田間叟就我絮語長
如聞百年前盜掘意匪良土衣杜侵毀實賴遺識彰太息下士頑茲理信難詳
同蕭大 招仙 登九龍山 辛紹業

蕭君好奇者招我登九龍初行密竹徑曲磴盤危峯翠氣生襟袖丹壁秀芙蓉
冷露晝滴漉幽花間白紅決意逞先步險途踰後蹤翹首一天門雙卓鼓與鐘
力盡不得上輕矯羨飛鴻山腰野人家小憇聊從容一掬甘泉水洗我坦心胸
數轉益高峻巖巒蔽晴空古德杳何許遺跡白雲封悟彼桑下意嘸茲世情濃

鼓勇到絕頂寒日浚濛濛黃皮與紫蓋屹立眾所宗大瀉橫西北劃空如崇墉
天風四山下萬壑聲洶洶祇疑人世絕仙樂聞撞椿相對久無語晚煙生重重
迢遞下山去倦焉路旁松

夏日讀書大悲山房

邑廩生彭賢廣

余愛山之幽山亦愛余拙暇輒來山中廿載此清絕青山長此青余髮已半白
落落舊生涯幾人自怡悅老屋數椽支浩歌慣擊節猿鶴久相習狎處豈分別
石古松枝平蘚深水泉冽枯禪響虛籟寒巖冷白雪此地虞與歐 元虞伯生
歐陽圭齋 也曾臥車轍空山有神物何年啟丹穴

秋霽登峯頂山眺遠

知縣邑副貢辛啟泰

窗晴諸鳥散林淨覺山秋偶尋蠟屐着高峯宿霧收老竹穿石瘦古洞闕雲幽
振衣陟絕巘逸興激滄洲決皆天地外羣山若沈浮仰睇天門詅日月轉雙毬
秋色蒼然來地軸清氣澆何當登泰岱俯視小九州

萬載縣志

詩徵

五言古

卷八三

曾仙塘

邑貢辛炳喬

灌木鬱暝色沙渚杜蘅香好風吹汎瀾言尋曾公塘曾仙眼如月天機叅微茫
結廬入境外叱石猶叱羊行歌蒿里曲寄此水雲鄉歲歲春復春白鶴下翱翔
石壁砒然開御風恣徜徉剔蘚讀薤書蒼煙扇仙莊

留別絮言 三十首錄六

邑宰衛鶴鳴

步上南浦橋南浦水盈盈山原忽開朗十里稻畦平往來袁州路霜中月下行
多少惜別人對此不勝情

碧水繞花圍兩岸垂楊柳寥廓九仙塘一灣烏溪口廻瀾石橋下空天立釣叟
烟籠月照中消我酒幾斗

不知雙虹橋深遮白日幽當年清溪渡今者市人獨何事眾忙七日夜行不休
欲與洗塵心泠泠聽上流

秋聲北門外懸流聽不住每當心意煩坐此消百慮露墮橋上月風入城邊樹

欲以載酒船併載清涼去
泛舟下龍河長橋駕橫空河邊幾萬竹併作橋間風悠揚讀書韻來自桂花叢
聽之忘返棹山迴夕照中
生有山水癖離之覺心痒况多素心人願與恣清賞城中可採蓮城南可盪漿
秀絕筆架山看將應春榜

哭辛筠谷學憲

教授鎮洋舉人盛大士

蒼松無媚姿獨得乾坤正公以古名儒躬遇天子聖立朝持大體臨事毋不敬
入叅廊廟謨出握文章柄道氣含冲和柔色式儀令瑩然冰雪胸中有薑桂性
愛民如保赤所賴慈惠師如何催科吏半屬良有司東南日凋敝元氣誰扶
持昌言闢羣議獨荷主上知莠草固當鋤勿傷蘭與芝苦心庇孤寒積憂病難
支失聲哭寢門此意復告誰士氣屈者伸士習衰者起鼓篋肄三雅乃是進
身始以彼不肖徒穿窬弄長技或嫌法大苛誰識意良美至今感恩者翕然稱

烏載縣志

詩徵

五言古

二百八四

國士美人隔雲端嗟我落塵鞅自分髮後桐遺翼物外賞一詩題江亭十年
涉夢想使車蒞淮海王事勞鞅掌我無孝章名公如孔文舉我非寒山石公爲
庾開府苦調空復彈哀絃不忍撫羊曇過西州落葉紛如雨 我生胡不辰
賦命嗟窮薄童烏輟元草予季年又弱秦鏡堂前懸驪珠暗中索遂令樗櫟材
亦荷門墻託開尊悲喜集束筍詩篇作以詩受公知有淚爲我落我詩持奠公
我淚已先涸 一棹冒秋雨晨起謁我公歡其辱投轄欲效陳遵風抵掌議時
政出口無雷同家事及瑣屑一一詳始終客歸不可留淒然與公別送我江之
干昏黃日無色贈物表素心何以報公德 客懷鬱不樂衰病日以深北去一
葉帆遽令音書沈聞公吳門歸亦受風霜侵道心定而靜瘦骨寒能禁泰山胡
然頽索車馳已晚巫陽下九閭或望靈旗返 古人慕修名公自千秋擅曾聞
有道碑絕勝丁儀傳諸孤泣致辭猥以屬下賤負重力不勝答書手頻顛彈琴
不成聲收淚且磨研音容不可追文字空餘悲茫七泉壤隔此恨公其知

七言古

靈棲巖

宋宋 蒙

巖巖業業山如簇磊磊落落石如屋上有綠樹之陰陰下有寒溜之泔泔通天有竇十餘丈遊子攜蘿來復往是中端合巢神仙桃花流水何杳然我來正值春風暮似笑賢勞又還去準擬醜酒聊從容對此坐想飛來峯 舊志作張謬詩茲從嘉定志

謝山劉長者讀書堂

學士吉水楊萬里

前輩學詩如學仙吾謂讀書當亦然神丹九轉骨可換聖門一簣功相先劉公結屋高山巔豈效羽客餐霞煙鄴侯三萬足高尚霧雨養豹和幾年文章笑拍班馬肩書堂看來咫尺天會當擢桂廣寒邊祇借謝仙雲鶴耕

前題

尚書新喻謝、謬

憶昔侍親宰鈴岡首訪盧老讀書鄉鍾山臺高蹟成古苔清華沼文猶香常嗟

萬載縣志

詩餘

七言古

二百八五

盛事少繼躡喜聞劉公志幽獨結堂宛在謝山巔仲初成仙舊巖谷牙載萬軸填窗櫺烟霞鎖封牢著塵風雲夜伴幽人宿便覺富貴來逼人况公一方為長者兒郎競立文章價他時定有奪錦標要與老盧爭逸駕

送張元直令萬載

蕭 燧

少年秀發似洛陽文章氣焰鼎力扛嶄然頭角何可及輩流見之心自降詞源湧出過不往渾令冷泉亭下開聞聲淙七十八年前識芝宇期以功名拾芥俊逸兼奇龐驛驕一日走千里胡為暫淹子男邦春意先聲到雛雉父老望望飛鳧雙漢庭諸公說佳政召音早晚來龍江白應賓之敢言地不爾玉堂雲霧窗過門訪我又輕去匆匆酌別安用買羊羸臨分欲寫贈言意慙無健筆如長杠

采嘉定志補

題南平王鍾傳醉搏虎圖

元吳淵穎

南平酒行山險巖日暮猛虎相抱持僕夫辟易不敢近雙手現出十狻貌口乾

大喊眼光燦腰無寸鐵起徒搏沙飛石走風爪牙草折林摧雪齧齧人強獸勇
盡力爭形格勢禁過用兵英雄變化動靈靈富貴偏梭收機槍老熊當路叱貉
子指擲六州稱刺史摩挲虎須淮甸鬪啖嚼虎膽闕城靡少年本是貧少年狂
卒成功等醉癩盜應有道幸竊柄王竟不死遺橫鋌一時豪特誰與畫千古畫
圖專足戒投弓棄箭浪紛紛馬上愧殺裴將軍 采陳府志補

題歐陽龍南所藏雙龍圖

揭傒斯

七十待罪奎章閣羣玉府中光瑾錯就中董元山蟄圖萬物如睹聖人作天昏
地黑雷雨垂魚鰕盡逐神龍飛飛流上天灑天風絕壑似與天河通山開石裂
電火紅萬木顛倒助豪雄先皇一覽驚且愛高懸長與御榻對真龍已入白雲
鄉空有畫圖今尙在何處飛來兩神物開卷淒然病頭雪 采贛州府志補

大悲禪刹

虞集

不夢金人長丈六中華那得通西域象教流行遍海隅龍江崇奉成真癖佛殿幾

萬載縣志

詩歌

七言古

二百八六

峩高倚山經聲細七朝垂夕邇來行人行路難促裝常候鐘敲畢

鼓樂名山

虞集

太平和聲天下作太平去後瀟風薄後庭玉樹久摧殘南苑寬裳竟寂寞此山
萬古留佳名此地萬年得長樂風清月白天籟鳴滿耳如聞奏韶雍

雲松巢爲胡志同作

明梁寅

雲松巢誰所居乃是洪崖之老仙高栖宜陽北翠谷同匡廬松花金粉酒堪釀
茯苓截肪疾可扶戶牖玲瓏碧雲入以當瑤席掀龍鬚峩峩雲岑鬱鬱松陰白
鶴宵唳元猿晝吟今之曹劉沈謝輩爲歌雲松多妙音妙音世希有老仙筆下
蛟龍走雲松歌詞看在手仙字詩留天地間馬蹄之金其長久 采石門集補

草書歌爲志同作

梁寅

憶昔弱冠遊南昌傑步文苑多賢良草書造古今鍾玉胡君筆勢妙莫當春秋
一經究周綱短長詩歌攀晉唐以書得名時所尙矯矯龍遊鴻驚翔鷹之海清

馬驪鬃豨鬃稍健煤漆光冰紈繭紙疎作行水蒼玉軸懸堂房觀者駭盱環若
牆珊瑚文犀瑱琳瑯無足乃能走四方跨楚連吳譽飛揚荆金充貢驪珠憤怒
貌抉石石顛僵渴驥飲泉泉礪礪羞彼蚓蛇壑穴藏肯臨鮮于爪翅張後師班
侯變老蒼當時同流爭頡頏百羽竟避孤鳳凰揭幘擅奇白玉堂晚有危素擅
芬芳大江以南獨騰驤君胡爲乎遊僻荒二十年來異故常雲松結巢老宜陽
嬪嬙靚服誇宮牆劍舞尤羨公孫孃嗟余與君友戎羊白頭俱在猶康強欲如
鴻燕星黍商百金一字懷不忘緘書遠寄文錦香爲寫此歌爲報章百齡慎愛
遙相望 采石門集補

袁州守何澄爲邵人郭蓮給事作山水圖求題

詹事新喻習嘉言

青山翠嶺開芙蓉層巒峩嶩橫蒼穿白雲片上間紫翠似接岷峨千萬重山下
湖光漾明鏡碧波一色涵天淨湖邊喬木列森聳人家占得湖山勝人家共喜
逢時平年來雞犬亦不驚煙迷渡口無過客白日欲暮孤舟橫伊誰貌入畫圖

萬載縣志

詩餘

七言古

二百八十七

裏竹鶴山人性所喜山人出守向宜陽郡中惟有佳山水山水怡情春晝長公
餘無事退黃堂興來隨意恣點染筆與造化爭毫芒黃門郭君郡中彥得脫新
圖增歎羨官舍朝回清晷時恍惚故鄉長對面我家情江江上居煙霞近隔咫
尺餘謝官他日共歡賞寄書先託雙鯉魚 采新喻志補

題綠陰書屋

大學士永新劉定之

君家住在清池邊繞池松竹高參天綠陰深處讀書屋薜蘿結構三兩椽翠梢
滴雨溼窗紙風送落花入硯水鳥啼祇近當戶枝飛來飛去鏡光裏嗟君讀盡
家藏書致身當路逢唐虞春來回首思故居萬卷森然猶自如後人爲我咀芳
腴莫遣紛紛走蠹魚

綠筠書屋 卽王永誠清室

教授邑人黃 恭

世人紛紛皆草木惟有王君獨愛竹愛竹之意豈有他軒居瀟灑絕塵俗軒前
軒後竹萬竿節金戛玉報平安每從詩禮庭邊見久向琴書窗下看大根臨夏

翻晴籜小莖沿砌森頭角會看裁作紫鸞簪和音嫋嫋諧鈞樂君不見當年姚
魏牡丹花雖云富貴何足誇又不見章臺昔日依依柳雖號風流詎能久歲晚
冰霜寒沍時淡煙疎雨只空朽何如此物獨堅剛托根到處多貧營座上勿看
渾不厭四時長有色蒼七

綠筠書室

知縣邑人龍駿

幽篁夾徑春雲起曲閣長廊淨如水曉日移陰上石闌主人嘯傲烟霞裏時從
賓客坐徘徊翠色娟娟浮酒柶直須勁節拂香漢會見九苞丹鳳來

小嶺樵歌 龍江八景之一

知縣邑歲貢宋九儀

郊垌不禁芻蕘往歸路夕陽歌興爽信步閒忙早早遲相呼前後三三兩兩芒屨
篠杖足生涯斷隴橫江到處家楸枿一肩堪舉火擔頭收拾度年華

坤山夕照 八景之一

宋九儀

西來一帶山容碧對峙參差如兩腋太古常看晚照妍中天時有陰雲繹橫陘

萬載縣志

詩徵 七言古 二百八八

關鎖澗泉流入郭縈紆穩渡頭不是斜陽銜暮景誰憐春色在林邱

萬載謠

清守道江寧進士施閏章

山城夜閉中夜雨夜聞城中嘍猛虎十家九家聲暗吞城中人少荆棘存城高
丈五半傾裂中貫長河無水門盜賊哀憐不肯入官吏倉皇征稅急雁集鳩居
一何多土人拱手客種禾殺牛沽酒醉且歌滿眼燕田奈爾何

麻棚謠

施閏章

山棚鬱鬱多白苧問誰種者闌與楚伐木作棚禦風雨緣岡蔽谷成儔伍剝麻
如山召估客一金坐致十石黍此隰爾隰原爾原主人不種甘宴處客子聚族
恣馮陵主人瞻落不敢語嗟彼遠人來樂土此邦之人爲誰苦 二篇采陳志

補

鵝鼻峯

邑歲貢辛繼攀

陽樂城東小蓬萊蒼翠照耀金銀臺草堂相對空相望落實大懼山靈哈林間

不速三五友奇懷劫暗輕
崔嵬遙看銅鈕日初上山
花山草明巖隈長空好縱
千里目無端濃雲潑墨來
顛風吹雨西北角憑陵猛
氣走電雷草木爲仆石爲
渤如將遇敵鋒交摧須與
滅沒輕煙捲仍餘礪谷聲
喧豗浮光黯上天漠七巒
岡半入雲濤堆百年此山
遇此客靈臂曷不撐天開
得無虛名悞觀者故吐雲
霧深藏埋或畏筆墨工鏡
刻秀靈洩盡天爲灾欲知
特呈煙雨障空歎此日收
興回酣醉村家悞脚酒分
袂平曠各徘徊龍江山下
頻回首應念茲遊真快哉
月臺山寺有序

辛金澄

月臺山踞邑上遊其寺故民居也山後有古木一株扶疏秀挺及遭喪亂廬舍悉毀而樹亦朽先君子於順治間讀書七寶山房爲邀同志共建三官殿不踰月而朽株復生秀結如蓋甲寅之變孤城兩陷焚民舍殆盡廟貌如故更建關帝祠宇於其右益信地脉發祥非偶然也因賦此以志喜

嗟彼月臺兮久翳榛莽中霜冷生愁籟露白助燐紅燐紅隱隱徧寥廓天矯枯

萬載縣志

詩徵

七言古

三百八九

株虬龍若呬呬啞七夜棲烏辜負長空含寂寞地靈人傑果何憑枉傾北斗望月吟先君從來山水癖爲邀同輩結叢林蔚起發幽趣飛錫跨鶴任相取疊閣層巒出雲霄寶幢橫空龍蛇走枯枝頓起弄春風金波奮躍耀長虹光浮萬嶺嵐如翠雨露千家珀色濃紫蓋頂銀山堡康城河作帶鵝峯勢回抱果爾神人居鈞轉造化機縹緲生帝坐歲歲挹清輝

龍山乾隆己卯以忠節龍公鐔號龍山載郡志

教諭邑舉人辛廷芝

康樂龍山山中傑俯視諸山等丘垤克生龍氏英毅人此日精華應欲竭文疊袁山峙一方嵯岬秀出南斗旁此山風格遙相望要與三山無低昂天下名山多稱最空山無人曷足賴吾以斯人號斯山落落聲名從此大好將得人賀山英光耀不藉春花榮當年偶爾供登眺此日清風萬古情

冠邱山

辛廷芝

白良山繞成城郭左右迴環萬馬躍兩水夾浮龍欲飛一峯中尊天外落山住

倏爾嶮巖開小有洞薄金銀臺搖草不隨秋霜隕山風似帶仙氣來曾公一墓
寒塘裏眼鏡天與何取此氣擁南屏北障雲秀挹千巖萬壑水地能蔭人人何
在陵谷千年亦變徙畢竟青鳥術何恃我起呼龍龍不起

九頂山

知縣邑進士李榮陞

石屏西側連夕望九頂全嶂墨堆雲夜夢山神滌山出未明顛倒開衙門風日
遲回果愜眺諸兄曳杖相追奔峭磴入自覓坑口曲折登登履平畝紙碓疏泉
風為守盤石醉人濃於酒繞籬新玉歇數枝弄瀑其中迅雷吼人言此是山之
心仰睇雲端轟者九低徊先龍撥前茅蜿蜒左右窺龍巢遙峯拔地四面包中
有削成蝮脊高躋攀分寸落不落萬里一瞬窮秋毫人生橫據十笏大誰以天
地為輪蓋礪柯團青巖展魄依稀控氣觸仙蛻仲兄採藥師神農季兄長嘯御
列風餘山鎖雷驅雷公驚出黃貓跳天空晚燈碎碎困撲地絕頂已著霞綃幪
克巢寨有序

李榮陞

高村東行二十里溪南有山虎牙屹豎絕頂開平窩多瓦甍故老傳云元宋

詩徵

七言古

二百九十

居民捍寇之地劉克巢寨主也故以名或言偽漢將歐普祥滅之又謂明世
土寇就飲山下豪家而敗豈有賊巢密邇山下人得晏如者齊東語不足辨
山南西有豎旗峰甚險側稍西有梳粧臺土人云當時對山擁水絕高溪積
為長湖望上游九頂虛映如婦人窺鏡整鬢亦一奇也

芙蓉搖霜秋向暮野艇橫篙少人渡羣峯蘸影夾溪涼溪煙數里平山根窈窕
丹黃綴天末溪女連袂歌采葛山頭餘石驚雷碾山曲衝風迅箭箭頗聞元末
兵寇喧有客過水峻重垣巢幕焚林亦難驚踟躕窮谷聲併吞紛紛齊語詎須
辨鬻豹安可儕風犬望湖之亭稱望夫後代婁妃節因顯漢女肯受花源迷秦
人自得捍關選粧臺西攬天鏡慳梳出切雲崔嵬鬢當時逃死足佳趣恰借眉
窩夢雲雨脂香剝盡氛亦平野花年年臺下路

董洞

李榮陞

石亂無路蒿平肩洞口垂蘿暗炊烟敲火下踏饑蛟涎聖巷斜通丈室巔白衣
矐老蒙頭禪宛轉熹光反而復樵蘇踪斷怯幽獨駸駸董園搖風菜悵然穿噴
下山麓回首怪峯左偏矗

讀書紫蓋山

知縣邑舉人孫馨祖

紫蓋山屬謝仙島仙去山中餘茂草當年丹竈不可尋空餘寺鐘聲縹緲孤峯
聳出勢最奇日登絕頂摩蒼昊羣山不敢相倚傍蒼茫萬里人浩浩山下集雲
舊遊處八年奔走失故道眼底浮雲在寥廓富貴何如此山好山靈笑客心無
常安能長此守枯槁棲山自覺面目清入世安知壘埃老清泉白石不解取雕
蟲蝕蟲空論討嗚呼山靈莫相惱卽今讀盡山中書他日歸來應須早
題龍江橋圖 今之鵬程橋以名稱也 祭酒蒙古法式善

龍江橋下江雲飛龍江橋上行人歸行人稱羨橋營緝三十年中祖孫及孝孫
敬奉橋圖來未述祖德先悲哀我對丹黃心獨喜載誦新詩歎觀止匡廬召氣

萬載縣志

詩徵

七言古

二百九一

鄱陽風生平慨想柴桑翁青原峽雨澹秋夢洞底猿聲江上送推窗延月照畫
圖萬峰蒼翠松濤呼夕陽在山紅蒨湖晚風獵七吹秋蘆尋詩人至不下驢擔
者荷者漁樵徒指點江上辛公廬辛公子孫能讀書 新詩指辛侍郎詩江口
原有辛姓宅

書堂山懷古

邑進士辛炳晟

翟泉鵝飛尚與午景略不胥桓宣武撫枕寂七河鼉生卻喚孫郎計門戶滎陽
太守謝病歸漢晉書成厭跋扈當年蹇步習家池閭巷浮沈守環堵豈知五丈
池草滋滄海橫流沸鼙鼓夫人城崩萬氏人馬蹄平蹈千衡宇空將半士誇漢
南蛙聲紫色焉足數飄飄可惜彌天雲蹠蹠抽身免圭組故山風鶴雖可懷問
關迢遞歸王土衣冠吳越正朔存南董何人老胡虜艱危想見入林深西山窮
谷遠豺虎世亂生還定無翼坐闕巾箱送風雨卽今憑弔讀書堂星霜著述知
幾部尋眺故蹟追風流四山松桂浩無主耆舊襄陽此流寓居遊應將國史補

十六國事如牛毛十八家書只帳簿書生識地何咍傑隻義猶堪紫陽祖棗木
山空魂魄棲兒孫奕葉依屋脊策馬卻問騎省墳江山半壁悲終古

遊謝山

彭賢廢

鐵笙羽鶴何年跨不道茲山姓猶謝神哉造化留混茫何人探奇開闢洗洪荒
芙蓉削出萬仞岡千葉蓮花世界藏我來別蘚攀蘿訪仙跡黃毗以西巒半壁
仙人呼之渾欲出幽巘層厓厯不盡望去若近行難覓疑有疑無思悄然滅沒
隱見見飛鳥下有白兔搗藥之丹竈上有袂襪跣趺之翠石頭刻露晝晦陰
冥天風煇煇耳畔聞聲攝入太虛如雷如霆層雲靄兮盪滌丹梯豁兮空靈髣
髴夢之初覺醉而忽醒吁嗟乎丁丑開山幾時代蟲書鳥跡真奇怪仙人已往
山不老笑我不與黃鶴比翼又烏測乎塵囂之外祇今松壑間疊疊風泉響虛
籟

遊石嶺巖洞

邑人湯彬士

萬載縣志

詩徵

七言古

二百九十一

頑石磊砢亂突兀萬古前誰鑿山骨峭石橫排作屏風下有深洞黑羅刹遊人
秉炬方敢前云是前代蛟龍窟初厯一洞尙虛豁漸進逾幽路較濶危磴幾級
石髓滑陰風慘慘凜霜雪入眼恍惚生精靈蝙蝠驚飛去無形積水之深不計
年游魚無日忘陰晴冷氣全欺炬光凌點七熠七鬼燐青遊人力竭心骨驚深
處畏進足自停當年蛟龍戰風雨穿山穴石留險阻相傳異僧求甘霖探幽曾
一窮步武我意未盡興勃然既出更跨層石巔捫苔刻壁書詩篇山靈我欲共
千年

紫蓋尖

邑貢生辛元辰

秋澄景物歸山水亭亭迤西峯獨紫紅日一輪曉霧收丹梯百丈青山峙行行
斜徑足蹣跚扶疏濃翠遙相倚忽聞天半讀書聲犬吠有人爲倒屣名山自古
得名人分韻香清聚蘭芷時王介眉聞子銘昆玉在寺讀書爐煙縹緲鎖
禪關書卷縱橫堆寺几相攜旋復陟其巔一覽眾山皆小矣極目雲天四望蒼

浩蕩情懷千萬里霜楓如醉倚山腰身在朱霞映朱履幽崑曲壑隱斜暉照耀
層巒如散綺蕭疎荻葉幾灣分迢遞布帆數棹止歸來已是月黃昏過眼風光
疾如駛安得太白驚人句芙蓉削出青天裏

書堂山彥成書院落成喜賦

主事邑進士辛師雲

魏丕禪漢作天子誰其繼之司馬氏紛紛篡奪相效尤乃與六朝相終始仲達
方欲師阿瞞晉臣焉敢議漢祀東西百五十年中暗室無燈人心死誰秉直筆
陵董狐咄哉四海習鑿齒習公博洽著漢南征西幕府更誰比風期直邁劉景
升奇才推重袁建武河內大縣紫髯翁雄武專朝恣跋扈爲爾寂七文景笑寮
佐懼息敢正視襄陽別駕氣如虹獨批逆鱗申諫沮笑彼齊臺謝侍中君拜臣
揖作何語直道難容觸雄猜遠郟滎陽一麾指天惜良史教生全太守蹇步歸
田里永固龍驤萬騎來空將安輿辱半士身雖可致道難屈全節不受符秦任
可惜彌天釋道安同輦乃遭權翼毀中原瓦解國步危翩然逸翮辭簪組歸來

萬壽山志

詩後

七言古

二百九二

卻卧茲山中烟嵐清潤供吟几五十四卷漢晉書褒貶豈堪春秋擬帝蜀黜魏
尊本朝皇皇正統論非侈千秋亂臣心膽寒豈獨操賊奸魄褫觀閣令史本蜀
臣三國尊魏義何鄙覓千斛粟作佳傳識見庸庸因應爾孫干奇詭王混淆鄧
謝允復滋無取野民晉紀寓懲勸亦復屈身事逆楚曷若彥威貶偽朝大義遂
爲紫陽祖書堂兀坐閱滄桑不聞中原沸擊鼓英雄割據競戈矛書生筆削嚴
鐵斧卽今公去千餘年四山猿鶴悲烟雨松風猶作清嘯聲谷花尙妍精舍址
坐令勝蹟久湮埋墨池蒼涼復何是清河張君真好奇日策筇杖生仰止山椒
爲闢讀書堂歲歲生徒奠清醑應招八君此遨遊棗木之塋相尺咫余亦弱冠
觀羣書論史幾合前人肯生逢明盛希利見有道貧賤聖賢恥廿年浪跡走燕
齊辜負茲鄉好山水何時蠟屐蹈碧霞手摘溪毛拜靈宇舉頭卻見卓筆峯一
尖屹立青雲裏

遊謝山 以後補輯五言古

邑副貢何 良

白雲翻石壁鐘梵落半天蕭蕭凌倒景翳翳依飛泉陟嶺山重複涉溪水回沿
飛樓凌絕壑精舍繞層巔朝猿霜皚七夜鶴露涓涓枯松倒涸澗古竹卧荒烟
近矚塵襟滌遠視幽情宜迢迢懷七至疎散話四禪趨喧人事雜卽曠道心全
願參維摩術長謝區中緣

遊西源菴

何良

洞靈開靜室雲氣滿虛壁山空人遙絕石磴流玉液有客獨冥游逍遙杖輕策
流詠三清言俯讚八會籍析空借釋子談寂證禪席興感道自陳心契理弗隔
一悟超劫塵何必此投迹

仙人洞

何良

白鹿何年至青牛此地閑仙人昔證道於此閉禪關洞風吹古座石乳滴前山
不見煙霞侶惆悵獨自還

謝康樂廟

何良

萬載縣志

詩徵 五言古 二百九十四

先生六朝秀歛迹謝寵祿發韻寄焯薜超興自林麓鑿險搜洞壑緹幽窮水陸
逸翰紛雲委縵 玉篇續也通尋 昔交綺屬荒祠托巖阿遺像祀山足虛愧
暗塵生古座蒼蒼伏容範雖代去徽猷動心曲視瞻薦蘋藻高風徹流俗

謝山尋道院故址

何良

大谷元關古荒林祕館空欲尋仙境入獨步野橋東金竈寒雲外丹池夕照中
惟餘小山桂淅淅動秋風

送袁廷鰲之官閩中

侍郎邑傳臚辛從益

聚散東西雲偶與天風會十載京邸逢飛飛復南旆斗酒今日樂明發燕山外
八閩古巖疆東南海襟帶奧區衍靈淑陸離燦珠貝遊宦此交樂山水天然繪
顧惟司牧親舉動關利害掣肘虞上官積習紛難決君子志恤民所慮非殿最
俊傑識時務身名俱兩泰守已物或乖枉尺計終昧依違道俗間占決費著蔡
先生吾鄉彥才望傾名輩文壇舊飛將脫手走珠璣廣文一冷官氣與高峯對

諸生競濯磨仰瞻齊斗岱遂令春風座轉起甘棠愛大吏廉賢能交章薦延內
循良且旅進天恩已銜戴霽顏看龍媒拔之驕驕隊出來干將器吹毛了無礙
新礪試盤錯神鋒肯藏退吾聞海疆寇出沒窺堰隸官捕或非實桃僵乃李代
又聞漳泉洲械鬪死不懟秀者得海氣才若江河貫往往潮瀾翻金屑雜沙塊
剛柔謹調馭文章亦不廢此事任良牧推袁誰競大當官有巧拙知命無顯晦
達人守大閑小節無妨貸秋風動潞河南轅方淑載苦憶昔年遊飛霞逐高佩
西湖與虎邱曩跡今可再君去展驩足我留事筆未丈夫為世用量才非一概
焉能志雕蟲白首飾鉛黛美哉親民官歌祝溢草萊冀黃古循吏終然調鼎鼐
卓薦會有期帝心方簡在都門重過我猶能餉鮭菜

遊伏龍山石菴

邑舉人辛萃

每想伏龍遊雲林踐夙約乘興忽浩然探奇氣磅礴亂山天際來高下攢崖峩
急如逸奔騎勢與日相薄廻環四十里雲氣深鎖鑰取徑下翠微曠然見巨壑

萬載縣志

詩後 五言古 二百九五

洞門忽開豁陰森不可度徐步轉石廊曲折造佛閣寺是何朝建金碧盡剝落
天公亦好奇造化費經略不然一頑石相對神轉索何年遣巨靈特伸混沌鑿
茶煙繞雲巖香風解新籜日午啼竹雞四山更冥漠

五言律

題湯周山

唐失名

湯周二大仙廬此得升天風俗因興廟春秋不記年錦雲張紫蓋琴溜瀉鳴泉
丹竈猶存鼎仙花發故園

題高城雪堂

宋邑令三衢祝勛

築室烟霞窟門開紫翠堆真成雲挽住不爲景催回山月窺檐入溪風掠坐來
鱸蕪兼茗飲淨拂綠琴埃

自題樂隱軒

元太史南昌譚觀

一徑營門曲重檐壓路危杏花村店酒楊柳野橋詩地暖鶯來早山深雲出遲

雨餘動東作旋鑿蔭田池

柴門樸木扉村店野花稀粟熟酒初釀黍香雞正肥園紅曉霜改崑白暮雲歸

眾鳥從林盡天空一雁飛

歲暮田事畢農談相往來茶香冰澗水詩思雪村梅甕熟茅柴酒鑪深楮枳灰

陽和露消息東作又相催

錢塘贈黃子中還江西

明王 禕

逆旅暫攜手東風拂面塵乾坤戎馬日江海別離人歸路鄱陽外羈愁浙水濱

歸哉倍珍重行勿負蒲輪 采西江志

靜樂軒

易 節

高懷絕塵想習靜棲幽林寧甘元默處肯與喧囂尋止水見初性澄潭諧素心
樂茲足自養千載希其音

桐岡書屋 張氏建

大學士泰和楊士奇

萬載縣志

詩徵

五言古

二百九十六

桐岡白雲淨中有讀書軒竹色清依檻波光綠繞門吟詩暢餘興把卷詠微言
亦有幽棲者時來共討論

崇信寺

彭 澄

城西南郭寺崇信幾經年市近塵猶遠門深路自偏鐘傳百里韻香繞萬家煙
誰識浮生夢談空覺皎然

遊謝山

經歷邑人彭箋古

躡足謝山上肩輿路幾程殘花四五樹啼鳥兩三聲雲向山腰起人從樹頂行
羽流如有約兩兩路旁迎

次張明府遊淨安寺韻

知縣邑貢龍 玠

促席坐繁陰雲林積翠深笑談傾臘蟻啣響山禽吟眺舒酣思閒遊稱賞心
高陽舊時侶公暇一登臨

贈藍近山學博珪

李一德

北闕除書遠南溟振鐸賢衣冠饒洛澗簫鼓度龍川雨滿桄榔暗風輕翡翠妍
青氈多暇日應理舊時篇

淨安寺

宋九儀

淨域臨江澗僧堂瞰石門風雲隨去住鐘鼓自朝昏天棘開秋色蒼苔贖路痕
猶懷元閣草燈火夜深論 從江西詩徵改

遊九仙宮

宋九儀

羽客翩躚去珠宮馥郁開煙霞遶道隔蕭管洞天來池夢生瑤草庭經削玉臺
不知天上鶴猴嶺幾時回

龍江雪霽

邑人楊遇用

雪色開江浦晴曦動曙天平蕪涵宿潤野樹破寒煙一水浮光轉千峯遠翠連
南來數行鴈搖曳白雲邊

翠巖亭小集分得遠字 遺址在涼亭庵後

楊遇用

萬載縣志

詩後

五言古

二百九七

別業臨江渚幽尋一逕遙池魚依凍藻籬雀戀寒條酒氣林中暢茶烟竹外飄
醉餘凭望處隔水見歸樵

翠巖亭小集分得光字

邑人張汝誠

路繞青山曲亭孤綠水旁風帆懸晚照沙鳥覩寒光谷口終耕鑿濠梁儘坐忘
當尊裁白雪吾輩總高陽

翠巖亭席上題

張汝誠

石徑逶迤好孤亭聳翠巖竹涼收羽扇藤老掛絺衫坐裏聞漁調杯中過客帆
對君思處士谷口有招緘

遊東樵書屋

知州安福周業孔

車馬全非郭烟雲半是村雙池平抱戶一徑曲通園柳色搖書幌梨花落酒樽
七年經史意重得細評論

謝山靈應觀劉長者讀書堂

邑人劉芳譽

厭俗橫青眼尋幽陟翠微門深鎖蘿薜徑滑翳苔衣
含霧書堂寂迎風崖樹欹雲關鐘磬裏拂石坐忘機

題莊嚴寺壁

邑人郭致仁

古寺依城僻重來路不迷山川春白甕殿閣野雲低
老樹空堂色幽禽對客啼秋風如再過擬向此中棲

贈萬載令范抑庵

清修撰浙江史大成

撫字朝廷意催科好酌量遙知民力竭應不異吾鄉
亂後花洲在公餘荔子香殷勤能愛惜風雅卽循良

自瀏陽還萬載

史大成

青霜三日曉微雨萬山東澗斷危橋度峯迴遠徑通
僕夫移樹杪烟火出雲中行路難何有歸思逐雁鴻

遊翠巖亭

邑人張日豫

萬載縣志

詩徵

五言古

二百九八

禪室臨洲渚巖亭擁翠開祇園閒世界方丈小蓬萊
獨鶴穿林去孤僧採藥回圖書今尙在留共曉猿哀

遊新庵

張日豫

倚杖崎嶇裏半山邱壑連結茅依古木汲水引寒泉
鳥道藤蘿織僧居煙雨懸雲堂深處磬空谷一聲傳

宿周家市山庵

邑宰吳自肅

不是偷閒步胡爲到此來逶迤尋徑入剝啄始門開
匹馬荒村暮孤行寒雨催懸知今夜夢定在白雲隈

月臺山寺

邑宰常維楨

香剎山城近庭階盡碧苔雲凝千樹合風漾百花開
入院知僧靜聞鐘見鳥回莫愁歸路晚自有月光來
花開幽徑滿風動野雲過五夜鐘聲近三秋客夢
多紅樓迎翠竹白鳥啄青蘿已悟浮生事山僧意若何

暮秋之花塘偶作

常維楨

馬頭紅葉落谷口白雲生莫怪驚風急還疑疎雨聲山溪流出靜嶺樹影移輕
一日秋空遠寒蛩隱草鳴

秋夜之藍田

常維楨

山徑行來晚一灣月掛西竹高疑路斷星密覺天低溪水三秋淨村雞半夜啼
白雲含露冷何事未尋棲

宿白楊山寺

常維楨

鐘罷僧歸室禪燈繼夕曛樓高千佛靜栢古萬枝分夜柝聲如塞晨爐香若雲
因思支遁事更憶遠公文

讀書莊嚴院

近代名七寶山遺址在辛姓屋後

邑廩生辛金振

不從塵市擾築墅傍莊嚴梵唄傳高閣天花拂畫檐溪廻萬井合雲繞數峯織
讀罷追遺響蟲聲已度簾

萬壽縣志

詩後

五言古

二百九十九

重過莊嚴院

辛金振

憶昔溫經處巍峩古殿齊棟摧迷蔓草砌冷躍莎雞莫辨風幡動徒窺雲鳥低
我生非幻夢陳壁且留題

題鎮龍庵

邑人張列辰

白竹勢龍從凌霄有梵宮雲棲禪榻冷月映佛燈紅白鶴巢珠樹青獅綉寶甍
心空塵自遠說法可降龍

夜讀半雲庵

邑舉人宋希陳

遺址在宋家坊
漏滴催幽客殷勤意最真燈孤惟有我僧定若無人斗室空千古疎窗映列辰
一番風雨過庭草又生新

題莊嚴寺壁和郭致仁韻

邑貢生辛金衍

七寶何年建門幽覺徑迷欲求芋魁熟但看石頭低山斷雲來續林空鳥倦啼
個中尋了悟為假一枝棲 從家集定本改正

龍河書院卽事

邑教諭魯鴻

別業依城北蕭然水石間
有時招月醉盡日看雲閒
煙雨門前渡牛羊
崖上山隔林開
犬吠鐘定覺僧還
吏隱吾何敢山林興未輸
談經淹日月行路識生徒
亦有榛苓夢其如松菊蕪
故人重勸駕懷古意躊躇

高峯寺訪慈茂禪丈不遇

邑人郭大鼎

遠公緣不遇絕境足初經
竹懶迎風動雲癡度壑靈
怪禽人對語幽澗水搖鈴
惆悵尋歸路回看一抹青

紫蓋峯

邑進士辛文彬

古寺嵐光滿寒陰積未晴
青松含雨意綠竹助風聲
春暮花仍放山空鳥自鳴
悠悠澄俗慮鐘磬有餘清

西屏山寺

辛紹業

喬木簷邊合新秧夾路長
寺內稻畦數畝禪扉人寂
七經室梵琅琅幡影

萬載縣志

詩歌

五言古

三百

看臨砌鐘聲不過牆
沒然銷百念鼻觀旃檀香

輓辛筠谷學使

知縣常州進士李兆洛

哲人悲日遠模範至今垂
樸訥仍儒素殷懃作導師
薰蕕令自擇蕭蕙許同滋
已盡嗟薪火無窮是教思
文豈輪轅飾詞由德業成一心培國脈百計軫民生
陳力無中外當官有性情
願憑青史筆爲勒太常名

贈湯紹卿二首

南皮張之洞香濤

舊是郎官宿權爲枳棘棲
荒城猶犖确春隴始耒耜
皂蓋鞭笞靜青山笠屐攜
懸知詩筆好題徧浙江西
宋賢多乞郡今見聖恩宏
爭壯登車語兼歡捧檄情
曹司蟻蝨眾史職馬牛輕
家國都何補輪君有政聲

五言排律

謝真人還舊山

唐范傳正

麾蓋來仙府笙歌入舊山
水流丹竈俠風起草堂
關白鹿行爲衛青鸞舞自閒

種松鱗未老移石蘚仍斑望路烟霏外廻輿嶺岫閒笑他遼海上空見羽衣還
康樂風景

常維楨

溪澗西江接峰巒南嶽連邑荒城落雁市寂院啼鶻雉堞藤蘿絆羊籬橘柚編
山中多鹿跡竹裏少人煙密雨常經月淒風更接年喜邀高嶺入恨速夕陽偏
桂實秋深結梅花春到妍官貧無宿米民病半蕪田棄葛空絺綌遺桑櫛繭綿
蒼茫難自慰長嘯獨生憐

石庵

常維楨

石洞危巖下琳宮峭壁前高岑惟鳥過幽徑獨僧旋鐘度長松老風吹嫩竹偏
簷覆不避客嵐霧只迷天秋有飛鴻報春憑杜宇傳雨來千澗滿雲起萬峯連
應是鴻濛日神令鬼斧穿

常侯別墅

宋希陳

康樂荆榛闢委蛇三徑開哀鴻今慰矣馴雉日悠哉杜母輿情協潘花滿縣栽

萬載縣志

詩後

五言律

三百零一

公餘惟飲水乘興便登臺環戶蕉抽綠侵階露濕苔垣低却月入庭敞任風來
鵝嶺當窗矗龍河繞帶洄敲詩不讓李步雪獨宜梅不假簪纓氣居然鳳閣材
佇看丹詔下移座向三台

七言律

雲蓋山泉

唐正字萍鄉唐 廩

危嶠高七幾十層梵王宮裏一泉澄引來石竇明如玉瀉落山厨冷似冰淨影
不關秋賦客清音時警夜禪僧從茲洞口潺湲去勢入滄溟豈可仍
獻江西鍾令公 以上采嘉定志補

劉望

負笈蓬飛別楚邱旌旄影裡謁文侯卽隨社燕來朱戶忽聽鳴蟬泣素秋歲月
已嗟迷進取烟霄只望怨依依投那堪思切溪山路家苦篋淚欲流

宿萬載廣慧寺

按山谷集赴德平作采嘉定志

宋黃庭堅

鴉啼殘照下層城僧舍初寒夜氣清風亂竹枝垂地影霜乾桐葉落階聲不遑

將母傷今日無以為家笑此生都下苦無書信到數行歸鴈月邊橫

送張元直令萬載

謝 謬

嘗抗封章奏九重忠言讜論動宸衷合從京國陪諸彥先向江鄉宰一同聯事
每思天咫尺愛民常見日冲融如公人品非凡器想在黃扉手記中

建成道中

呂本中

建成南路入袁州怪石縱橫水亂流盡日衣冠足圖畫百年心跡在林邱中原
未起重歸興胡馬能令此地憂浪迹江湖亦吾分連籌帷幄有留侯 以上二

首采嘉定志

靜樂軒喜成

邑宰張 謬

山縣為官不見山一朝列嶂忽當關抽身蹠訴時舒眼領客杖藜聊解顏常樂
本來由我靜俗飛每爾愧知還莫嫌邑小仍兼陋曾有涪翁賞是間

逍遙閣

洪 炎

萬載縣志

詩歌

七言律

三百零二

傑閣龍樓倚翠微中秋午夜望清輝桂枝委地三千尺栢影垂壇四十圍簫鼓
或疑風雨下雲霞猶想錦帆飛只今井臼依然在不見歸來丁令威

送龍南歐陽縣尹

元黃 潛

絲綸閣下半同袍獨上南船去莫招出宰不嫌官俸薄過家未覺驛程遙長溪
白石晴雷轉深洞黃茅毒霧消想見行春有佳句坐令遠俗變風謠 以上二

首采通志補

賦得越王臺送萬載敖司令之官

吉水郭 鈺

層臺高與越山齊南斗諸星入地低海氣秋澄鴻雁到野煙春合鷓鴣啼官船
北走輪珠翠幕府南開振鼓聲側想到官多暇日登臨長聽玉驄嘶 采西江
志

和寄龍長史

郭 鈺

扇外風塵素不干湖光遙送酒船寬錦箋傳草春詞好銀燭燒花夜枕安四海

交遊空老大百年世事半悲歡子真谷日深相憶黃獨無苗風雪寒
采元詩選

憶樂隱故址 參江西詩徵改

譚觀

朝暉初斂夕陽收雲自無心水自流縱飲且將杯似海卧遊聊以屋為舟橋牙
草色斜通寺樹容山光半入樓歸隱始知閒是樂誰人肯向此中求
歸石門山居寄胡志同 明梁寅

一別鍾陵音問稀金門應召燕鴻違江湖屢涉詞人老書劍猶存遠客歸春雨
劇茗思養病秋風製芟可為衣暮年情味還相似幾誦停雲思欲飛 采西江
志

被械寄家弟

左長史品人龍 鍾

一陣西風破雁羣兩年消息未通聞祇圖宦達從先進豈料才疎負聖若黃壤
好將收白骨青鸞無復駕紅雲信知秋雨梧桐後剪紙招魂誦祭文

萬載縣志

詩後

七言律

三百零三

悟元樓

參政邑進士龍 儀

祥雲渺處異香飄百尺巍樓構紫霄鶴響應知天路近鸞乘那見玉京遙陰
翠柏傳天籟冉冉元風引洞蕭獨羨紫微居勝閣幾班仙侶任遷喬

題廣報觀

易節

翼翼仙宮傍紫霄玉皇香案御煙飄天河倒浸星壇近風露寒生月殿遙琪樹
枝頭巢鸞鶯碧桃花裏聽笙簫倦遊欲學長生訣且向雲房覓子喬

送劉廸誠判通州

易節

同步青雲折桂香復聯珂珮侍明光判州已喜花生筆行卷驚看錦載囊京國
十年交誼重河梁千里故情長黃堂到日多清簡好寄平安字一行

桐岡書屋

御史邑人彭 昶

幽齋虛敞遠塵氛滿架牙籤漫討論涼沁綠陰松入座光分翠色柳環門晝閒
當午琴三奏賦罷清宵酒一尊訓子已能酬素志殷勤會見課諸孫

題泰和觀

秦舊昂

迢七仙境若難尋身到蓬瀛小翠岑
梁棟倚天香霧合闌干傍日曉光臨
碧桃紅杏千年實翠栢青松半畝陰
重沐相從情思好更煩揮翰寫清吟

前題

教諭邑人張益謙

仙真昔日記曾遊遺迹如今幾度秋
宛若瑤池環翠水空疑蓬嶠在丹邱
風雲上接元都界星斗遙懸紫綺裘
白鶴不歸丹竈冷幾回延月轉西樓

綠陰池

侍郎廣昌何文淵

卜築依林織世氛林間雅趣在斯文
薜蘿繞徑秋先到竹樹侵檐日易曛
研沼松陰凝紫翠紙窗花霧散清芬
披圖卻憶藏修處克棟牙籤插典墳

其二

何文淵

松竹森七繞屋栽綠陰池上講堂開
夜深燈影波中落晝靜書聲樹底來
煮茗掃殘三徑葉敲詩踏碎半庭苔
居人久作黃門客耿耿文星照上台

萬載縣志

詩徵

七言律

三百零四

題廣報觀

侍郎邑進士郭瑾

巍峩樓觀聳層霄凜凜天風六月飄
香裊金爐仙仗肅簾開寶閣畫圖遙
紅塵不到闕丹竈彩鳳長鳴叶洞簫
試問大還回首處滿懷歸思出林樾

憶郭贈君

吉安鍾復

縣城南面綠陰池上有高人樂盛時
酒後靜觀前代史花邊閒和昔賢詩
春風門巷鶯啼早夜月樓臺客退遲
捐世共憐成蝶夢承家應喜有麟兒

輓劉處士

祭酒安福李時勉

藜閣雲孫世共誇林泉幽隱老煙霞
門前種竹惟三徑屋裡藏書過五車
舊友每尋陶令宅行人猶問鄴侯家
朔風蕭瑟空齋冷惟見梧桐幾樹花

贈別郭邦器給諫

大理水豐艾廣

幾年簪筆侍明光此日焚黃思甚長
薊北秋風雙去旆江南雲水一歸航
青蘋幽薦元堂遠紫誥親承御墨香
別後重期何處是春風聯珮月蒼蒼

贈李蘊素之任汀州

大學士眉州萬安

玉麟遙捧向臨汀五馬翩翩喜氣生
斷鴈謾添分袂恨東風偏稱過家榮
官升已協三刀夢政洽還聽五袴聲
見說謝公樓尚在陳軒佳句好重磨

前題

侍郎安成李紹

詞苑春官有令譽分符今喜拜新除
朝班已別雙龍闕驛路遙乘五馬車
致治政須勤撫字過家甯用久躊躇
到來燕寢多清暇請看龔黃列傳書

前題

尙書華容黎嵩

當亡安民任老臣近承遷秩寄專城
春隨畫戟朱旛遠秋共丹山碧水清
聚散每懷金殿直循良都是玉堂情
到時莫說終爲郡尙有三台待爾平

弔元翰林譚觀樂隱

庶子南昌張元禎

雲擾中原幾屈伸碧山何事解簪紳
溪邊恍似桃源路巖裡猶疑晉代臣
翰苑久無金馬夢草堂聊與蕨薇親
焚魚豈爲逃矰弋龍戰龍飛蚤繫神

萬壽宮志

詩後 七言律 三百零五

遊九仙宮

邑宰陳璨

幾年閒說元都境此日登臨興轉深
白晝井寒龍吐霧黃昏煙暝鶴歸林
道童熟煮爐中藥仙客橫彈席上琴
卻憶避秦人去遠茫茫世事古由今

題謝仙觀

邑人易聖教

浪說真人煉九還曾棲此地掩元關
仙壇竈煖浮雲紫寶砌砂明照日殷
劍卓降魔精化石丹成升馭鶴來山
年開丁丑知何代真訣誰傳與駐顏

坤山夕照八景之一

侍郎上高黃景

落霞散彩映簾櫳欲墜金盆嶺面紅
鳥雀入林青嶂外牛羊歸路碧煙中
酒帘處七收餘暝砧杵家家動冷風
最苦無情烏兔急遞相催老白頭翁

寓靜安寺書壁

少帥分宜嚴嵩

山城下馬對寒松古寺重門一徑中
林靜已知巢鳥定月明初覺梵堂空
驚傳警鐸敲殘夢愛聽絃歌振古風
卻歎此身渾似寄萍蹤明日又西東

遊九仙宮

巖 嵩

鶴馭鸞駝去不還千年遺跡在
人間應隨絳節朝金闕尚隱丹爐閉
竹關福地烟霞元不改洞宮雲水自長閒
無因得問長生訣乞取刀圭一駐顏

前題

彭 澄

黃子求仙轉九還尚留丹室寄人間
諸天雲外連三島萬載山中闢一關
翠竹停鸞煙霧隔青溪飛鶴洞門閉
昔年假館曾舒卷今日移尊欲解顏

幽隱自吟

邑人張 藥

綠水青山是舊家種桃溪畔記年華
招來仙侶因繁實勾引漁郎是落花
欲向門前植楊柳何知野外樹桑麻
早輸公賦供王事剩得閒身竄五車

題靜安寺

失 名

龍江江上一奇峯遙望樓臺聳碧空
夾道喬松招夜月滿林幽竹喚秋風
迎人野鳥閒關語惱客巖花爛漫紅
讀罷傳燈回首處禪關時有白雲封

萬載縣志

詩徵

七言律

三百零六

重過靜安寺

學正邑貢龍愚卿

黃竹橋邊訪舊林上方隨起翠微陰
和風梵宇疎櫺透皓月禪房曲徑深
三世種緣寧問報一經揮塵自須尋
松窗蓮榻重相過細與山僧話古今

翠巖亭

尙書高安吳 山

翠巖宛在龍江上占斷青山萬疊幽
泉石座間成一笑乾坤高處著雙眸
紅塵不到亭常靜明月來時夢正悠
老此巖居何所事清風千古說巢由

贈彭水部

吳 山

羨君今作治河使卻憶扁舟共濟時
寒夜客牕頻過酒中流擊節並哦詩
風塵擾擾原無定松栢蒼蒼久自知
結綬彈冠如可慶青山綠水更相期

前題

編修新喻張 春

四郊烟雨馭輕雷水漫河橋畫鷁催
聖主正須經國計使君應是濟川才
湖山杳靄開淮甸雲樹霏微接楚臺
莫道抵京都邑盛年年憑仗萬艘來

送宋培節還康樂

知府浙江范 欽

秦淮秋日錦帆開江上芙蓉伴酒杯天府蜚英稱弱冠帝鄉作賦見雄才星隨使節南昌遠日計征途北斗迴歸到重陽無別眺仙郎高築讀書臺

送伍給事謫萬載丞

進士臨川湯顯祖

年來清奏出陪京每向秋江送客行給事舊從關令尹爲丞新失漢公卿星通百粵蠻差火地接長沙溼較輕自是世情能物色不妨黃綬去逢迎

瞻思堂集

邑人張 棟

空山風景遞晴陰孝子銜哀日夜臨想像音容儼若在痛思恩愛慕何深烏啼花落非吾事物換星移獨此心幾度白雲空悵望低頭無語自沈吟

遊九仙宮

知縣邑貢鮑紹湯

冉冉乘雲竟不還驚傳紫氣在人間稚川雞犬留丹室緱嶺笙簫度碧關一沼洪深春不斷千家隱見洞常閒徜徉此地仙蹤杳玉蕊峯頭抱笑顏

萬載縣志

詩後

七言律

三百零七

前題

知縣邑貢辛圖猷

蓬萊宮闕寄塵寰鶴筆踟躕霄漢間寶殿瑞烟通玉殿竹關紫氣出函關簫臺鳳去雲陰冷瑤樹風清月影閒一別千秋誰識面何須大藥駐朱顏

辛圖猷

七寶何年奠此山青青翠柏藹禪關風霜不老仁王像歲月仍深古木顏藜火夜分僧入定茶烟朝起鶴飛還木蘭遺事皆陳跡莫放光陰白日閒

畢侯祠成

邑人張紹渠

六載披星理僻鄉僅惟一水飲龍江買牛給種桑麻盛捐俸空囊豆粥香化被綠林荆棘淨春融黌序李桃芳遮留借寇知難挽遺愛千秋寄召棠

康樂橋

張紹渠

兩岸青山擁石磯長橋跨水鎖江扉墩侵浪裏陽侯宅樓礙河邊織女機古柏烏棲啼夜月垂楊鶯語戀朝暉謝公祠外行人渡應望龍光拜袞衣

題畢侯冊頁

按察使邑進士彭自新

四色花封此最衝賢侯冠蓋日從容政成大壑趨流易才擬干將出匣同苦節
自甘惟飲水烹鮮有序見屠龍士民已荷中牟令姓字還看徹九重

康樂橋

劉芳譽

彩虹長卧碧灘頭傑閣凌虛四面秋古栢枝高巢鶴穩空江日落暮帆收千年
夢草人何在一片浮煙水自流獨倚危闌傷往事白雲相對思悠悠

過謝公祠

劉芳譽

古廟幽沈瞰卓峯山雲長擁晝朦朧年深樹杪盤蘿薜地迴書臺長華蓬闌碣
無文消古字乞靈有客扣晨鐘夕陽幾度明檐屋疑是仙來駕彩虹

康樂橋

邑人鄧繼耀

謝家春草賦江東此地津梁駟馬通百丈虹光亘地軸千層錦浪蹴天風帆歸
小市官亭驛旛拂靈祠古栢叢煙路牛羊喧渡口廻瀾猶頌濟川功

萬載縣志

詩徵

七言律

三百零八

自題雅人之居

邑舉人喻懋敬

光中現影幻和真習靜觀空自不貧鳥話天機明牖我花呈生意默提人倦來
欹枕清無夢醉去揮毫妙入神燕處超然長自在風光不竭四時春

寓安德寺讀書次前人韻

龍 玠

尋幽養學寓珠林晝掩重門春意深風遞水聲鳴碎玉日臨花影漏疏金芰荷
展破寒潭碧山鳥啼酣綠樹陰講罷庭前閑眺望盡收好景入豪吟

策筮館有懷

兵馬司邑監譚嘉猷

白憐肺病未曾蘇且向深林獨據梧亂木風聲隨遠近空階草色自繁紆謾言
五嶽真禪客仍是高陽舊酒徒縱使悠悠俱白眼寸心還與月同孤

中秋日借友遊西庵

楊遇用

撫景秋中強笑顏聯鑣尋樂蹈松關細聲樹杪風吟葉霽色窗前水映山蛩響
寒階僧自定蘇留雲徑客常閑那知身世俱成幻一任蓬鬆鬢去斑

飲林家渡

張汝誠

小市臨江盡日幽偏宜酌酒對江流遊人眼醉春花媚買客船來晚照收興擬濠梁還自放心同谷口亦何求孤城新月看看上更載清尊泛剡舟

輓龍德剛長史

長史劉本彝

玉樹經秋事已非臨風不覺淚頻揮一朝遺世心傾日百代留名血染衣雲暗楚天仙永逝月明華表鶴空歸鵲鴿原上飛鳴急讀罷應知儔侶稀

前題

吳興沈葆

夫命陰移事已非孤忠有淚向誰揮抗師豈為全忠計就逮何辭濺血衣骨返龍江蛟欲吼氣浮紫蓋鶴來歸即今日月還依舊惆悵先生絕調稀

前題

宜春王國斌

定論千秋有是非英雄血淚不須揮綱常大義堪維世忠孝餘馨尚襲示介性豈思天意改游魂多逐月出歸稜稜生氣今猶烈不負君親宇宙稀

萬載縣志

詩後

七言律

三百零九

康樂風俗

會稽邑宰陶大邦

瓦白家家似帶霜茅柴水酒編村鄉士衣布褐雲鞵淺女插荆釵蟬鬢去五月稻梁登野圃三秋瓜果足山莊池魚宴客隨投網不似人間逐逐忙

題廣報觀悟元樓

邑宰章明傑

兩郊飛閣上千霄卓劍仙風奕世飄古木龍窠堦界繞羣峯縹緲望中遙雲封石屋留丹鼎月滿空庭聽紫簫漫自登臨舒阮嘯冷然出谷恍遷喬

秋日入黎源

章明傑

雄關天造楚江分景值秋高思入雲繞廡長流清見底環雲列嶂曠無垠那堪野老殷為主惟願山魃永息氛乘興遠來觀保障歸途漫賦夕陽曛

題紫雲庵有引

章明傑

癸酉秋日予入黎源所過皆崇山峻嶺鳥道盤旋因有穿雲轉石此身輕之句歸泊陂陽信宿即發不數里有紫雲庵結茆嶺上仰矚霄漢俯瞰溪流予

散步入庵室僅如斗而行人小憩其中等於招提問僧此何地則云古荒坑
是今俗改芳坑予笑謂僧云禪心入寂何分并與荒諱荒爲芳亦邊隅之見
耳迤邐而下轉爲十八洞其洞不可考則見古木交映寒泉瀉流山光雲影
間多磊砢危石令人應接不暇惜胸無山水者未免眼前錯過也因拈一律
書以紀遊

登臨怪說古荒阮歷盡幽深思轉清泉瀉涓流鳴曲澗山迎朗旭照林明僧依
嶺畔松爲侶客躡雲根石送程得趣不知還上下紆廻險道履如平
慨慕黃竹關和嚴分宜韻

章明傑

一片虛明自往還倏然飛上白雲間何年辟穀全遺世此地成丹舊掩關物外
煙霞留竹韻壺中日月掛松閒塵勞千古誰能脫慨慕仙蹤祇汗顏
遊紫霄宮

邑人王若棟

言尋郭外喜相招步入仙宮近紫霄影落空壇松色古寒生深殿柏陰饒地偏

馬鞍縣志

詩徵

七言律

卷一十

迴覺塵緣斷心淨應知習氣銷倘得三花猶未落終期宗遠訪迢迢

前題

知縣邑貢龍兆楨

危樓高倚碧雲霄爽氣朝來玉殿飄琅篆細參元覺近金經頓解悟非遙彩雲
未散燒丹竈紫炁長流遶洞簫不盡登臨今古意還須世外訪王喬

前題

邑人鄧文輝

高樓積翠轟層霄道氣仙風奕世飄精殿烟霞丹竈古三峯福地紫薇遙乘牛
東度開金鑰跨鳳西飛品玉簫欲覓葛洪勾漏令維山那得會王喬

高岡雅詠

張壽朋

人中巢許白衣冠不愛華軒愛考槃帝女瑤臺雙鳳起仙郎桂樹五枝攀青山
雅足供棋局白日何須問羽翰况我入公招可致定將鴻寶授劉安

筆架山

邑人馮其恒

綠滿平蕪石一拳微分數罅筆牀偏不從萬疊廻巒出獨與千秋泮水連山樹

影臨毫散采江霞色映錦飛箋文園再有松烟染指顧鼉磯錦硯圓

馮其恒

春遊新庵
駐馬深山萬綠中鷓鴣啼處杜鵑紅石鳴春澗泉初急花隱時巖香暗通樵徑
草深朝過雨僧房衣冷晚多風年來遊倦思肥遯徙倚禪關思不窮

吳自肅

贈別明經韓克忠
回首康城事已非獨憐知己共依依片帆江上因君住尊酒舟中送我歸
桃花隨浪暖牽情楊柳正春肥論交自是文章久莫向東風怨落暉

常維楨

課農
長夏循行徧隴阡村村頻囁莫貪天晨須藿食趨田早晝勿松陰枕石偏日落
記牽門外犢雨過休洩澗中泉課餘暫息垂楊下多少兒童聚馬前

常維楨

勒馬孤村疎竹外溪流時帶落花輕幽林雨後雲知去野徑人過鹿未驚鳥送

萬載縣志

詩後

七言律

三十一

春歸聲切切風搖樹晚影橫橫杜鵑猶自啼深處似有依依不舍情

遊月臺禪院

常維楨

累案盈函亦自清同人約步出孤城石苔巖下承跌坐山鳥林中雜梵聲雨過
萬峯青髻出香浮一院白雲輕年來撫字知無術爲愧河陽花不生

早秋勘荒宿新庵

常維楨

沿流投止見禪關修竹千竿屋數間僧向溪邊依石坐鳥從谷口伴雲還低垂
綠樹迷幽徑徧起紅霞繡暮山豈是閒遊恣信宿循行只爲惜民艱

常維楨

贈義學汪生映極
濂洛真傳首豫章於若今日道重光席榮臬比非爲僭帳列笙歌未足狂分俸
自慚山邑小從游敢托簿書忙喜看時雨均沾化漫道文翁守蜀疆

九日登月臺山有懷

邑人汪映極

楓樹凝丹落葉忙飛七細雨送輕涼山猿哭抱空枝瘦塞雁聲催野菊香世事

堪愁七不斷物情若夢夢偏長橫塘弱柳門前老那是當年醉客塲

題石庵

邑人郭遠

岩堯拾級上方通石屋天然色相空峭閣連雲蒼靄裏疏簾捲雨翠微中雉屏
竹影迎棲鳳鶴蓋松陰隱落鴻好景牽懷情緒亂幾能飛鳥任飄蓬
遊石庵

邑人宋希商

虛靈數闢境通元裡外穿雲別一天獻果猿歸青嶂裡咽泉蟬噪碧巖前虬松
有意孤隨月疎竹無心密補烟門戶洞開諸品淨半栖雲鶴半栖禪
次郭遠同常父師遊大尖峯韻

宋希商

嶂崎尖峯勝玉林中藏古剎護濃陰樹雲山色一屏畫蕉雨溪聲幾曲琴松落
烏啼煙帶遠日高僧話雨花深無邊好景難都覓且看先賢駐馬吟
重建文廟有感

宋希商

無端難發起西封到處干戈到處空百里燎原無吠犬一城積礫有哀鴻軍營

萬載縣志

詩徵

七言律

三百十一

未息烽烟警文廟誰傷草莽中幸際清廉常邑宰起衰振敝有成功

九日登靈鷲院訪僧

邑貢辛 補

九日尋僧到上方蒼顏白髮不尋常水流石澗龍歸鉢花轉清陰蝶繞廊數卷
楞嚴消永晝一簾風月任徜徉攢眉欲效陶潛別衣袂飄七風露涼

中秋日遊月臺山步韻

邑人張汝梅

臺閣凌霄帶霧開松風滿地拂塵埃遠山有意供青翠野鳥無心任去來長笛
聲邀天外月疎林影送坐中杯雲籠半榻柴門靜那識上方儲駿才

步月南浦樓

邑人何士傑

一溪碧水靜無聲兩岸風蟬帶露鳴明月移秋雲入岫荒山傍晚鹿投城萋七
茅屋陰蘿掛寂七柴門埜蔓生猶憶當年啼鳥處戎衣千騎佩刀行

登紫蓋尖

邑人辛金振

岩堯高聳碧雲寒覆蓋凝輪紫氣闌峰險盡如迴雁嶺溪流不減釣魚灘日從

海面天邊小雨過山腰頂上乾聞道仲初遺世處空留蘭若倚危巒

登康樂城晚眺

張日豫

城頭極目接秋空古木寒山盼不窮茅屋同居蕭瑟裏街衢總在寂寥中纔生
秋月三江碧未了殘陽半壁紅雖然半菽炊煙少絃誦新聲有治功

張日豫

草色青青陌上深馬蹄帶露踏輕陰斷橋水港荒煙度古刹苔垣冷雨侵幾處
犁鋤忙綠野數聲雞犬隔疎林隴頭試問春多少默默桃紅泛水心

丁田橋

邑人龍上元

江天十里墜長蚪裘馬翩翩選勝游西落斜暉催客舫東凝曉露棹漁舟浮空
樓閣星辰近遠檻峯巒霧靄收來往漫思前輩跡姚侯功德鎮千秋

前題

邑人張列辰

流水遙穿郭裡來滔滔寒玉去無回長虹遠帶青山出傑閣高從碧漢開複道

萬壽縣志

詩後

七言律

三百十二

逶迤通駟馬游人絡繹動塵埃吟風古柏多清韻似問於今題柱才

憶遊石庵

宋希陳

曾度鸞叢入洞天磷七澗石咽清泉不須巧匠揮斤斧自有瓊花傍几筵古寺
雲間橫古樹新篁風發擺新烟遠公一笑渾如昨何日重來問大還

暮春遊竹山洞

訓導邑貢張 整

怪石層崖護竹山洞門虛敞幾重關春深草蔓階長綠雨後苔錢地滿斑水冷
雙溪沙畔古風香數樹碧桃閒從今得箇清幽趣欲識仙凡舉步間

宿翠巖亭

邑舉人辛 顥

翠巖深處上方家古木參差一徑斜石倚坐間生異草泉通甕下試新茶環池
飛動合風閣到岸逶迤逐浪槎夜半聞鐘塵慮淨羣僧競起覓袈裟

都門春日雜憶麝腦山房五首錄二

知州邑人龍鳳祥

石室何人起大觀渠渠終古不勝寒嶺頭雲木霜根皴洞口劫亭月露溥久別

名山憑夢到每思舊友取書看時名謝得從吾好金碧潭心把釣竿
橫截山腰開局面直撐洞口卓簷牙神斤鬼斧天人地穴處巖居伯仲家鵝嶺
有田分鶴料龍潭無路透牛車珠崖翰墨清香水活火新烹蒙頂茶
筆架廻瀾八景之一
辛文彬

曾聞椽筆夢奇觀石架天然水際蟠色麗珊瑚光翰墨香潔芹藻襲衣冠璇源
細織澄江練砥柱中分學海瀾長傍黌宮標勝概何人文藻重詞壇
筆架廻瀾
辛炳晨

浩蕩城心幾笏觀生花飛座尚泥蟠劇憐活水如清腑消得中書一免冠鸚鵡
洲邊羞浪墨珊瑚架下賽文瀾迂生更有凌雲筆直擬簪從玉檢壇
世虞生盧爾洛

釣魚臺
山廻岸曲翠屏隈怪石江皋擁釣臺映碧潭空懸倒影瀕涯水落長新苔忘機
跌坐朝還暮任意垂綸去復來髣髴富春漁隱地清時穎起涓濱才

萬載縣志
詩徵
七言律
三百十四

桐溪灣
盧爾洛

涓涓一曲赴桐溪繞麓穿崖石壁西澗底游鱗時隱見巖前飛鳥倏高低小橋
谷口滌洄抱長堰陂頭去住迷知有問津人未至碧梧看取鳳凰棲

龍龍山祠
邑歲貢辛燈元

大節當年孰可攀後人追號擬龍山秋風烈士相懸弔月夜忠魂自往還下邑
專祠今特立東鄉議血早相關袁山並峙同千古扶植綱常振懦頑

龍河晚渡八景之一
邑舉人鄧斯沂

夕陽斜映綠楊紅喚渡人來認短篷一棹水痕城郭外半江烟景畫圖中漁翁
罷釣歸新浦騷客沽春醉晚風古寺鐘聲催月上匆忙影散各西東

石筍凌空八景之一
辛文彬

霹靂何年裂石洪嶙峋巨筍迸崖中孤標不受風霜蝕終古還疑節目空玉版
孰參真妙旨靈根長護藉神工莫誇解籙能成實勁質羞儕集鳳桐

龍河晚渡

辛炳晟

江干斜照艷丹楓滿目飛鴻繞樹重暝色十分臨近岸行蹤一樣鬪歸客寒烟
馬腦山前棹深竹涼亭寺裏鐘送盡朝來城市客繫舟留渡水中龍
小嶺樵歌

辛炳晟

東皋薄暮白雲遙羣下危峯驀澗橋落日半肩人近市秋風一徑銜橫腰都將
好夢忘占鹿誰學披裘笑傲貂穩有青山消不盡勞歌談道解憑超
石筍凌空

辛炳晟

何來斗絕奮奇峰踴躍龍山黑子中山地幾會驚圻偪著鞭突欲碎虛空雷風
咫尺猶難定袍笏商量總未工根到九泉終勝竹枚生恨說半生桐
龍江泛舟

辛啟泰

洲環錦水碧迤邐古渡人來唱六么畫裏江亭依晚照鏡中烟樹落長橋波涵
扇影魚還唼渚漾旗風檝自搖兩岸疎鐘雲壑靜鳧鷗散處想清標

萬載縣志

詩後

七言律

三百十五

坤山夕照

邑宰錢塘周澗

城闌西去見坤岡恰好郊行趁夕陽嶺外飛來孤鷺白山坳露出遠峯黃鹿柴
鳥散煙初暝牛背人歸影倍長萬丈霞光烘晚景攜筇獨立蒼茫

湯周雪霽

周澗

擬向湯周訪謫仙殘冬冰雪一年年難尋鷓鴣爪留泥蹟又是鷓翎送騰天洗盡
塵埃歸大澤參空色相悟前緣袁眠戴隱尋常事翹首清風獨悄然
浮樓曉日 涂永八景錄四

辛師雲

何人屹立金盤頂手捧朱輪過海來山勢渾如虛閣迴日光恰向曉峯開珊瑚
髮鬢凝烟樹火齊玲瓏嵌石臺漫向神山觀若木此間便是小蓬萊
明月泛舟

清秋皓月照波心萬頃琉璃一鑑臨雙槳載將桃葉麗扁舟放入藕花深空明
樣似浮銀漢皎潔身如在鏡林玉笛幾聲人遠近天風吹送廣寒吟

村虛夜春

蕭樓靜坐夜三更忽聽遙村杵白鳴秋水半塘煙欲暝寒空萬里月孤明敲砧
詎擬征人怨相唱猶含樂嶽聲白露滿庭人寂寂聽來逾覺道心清
珠泉萬顆

柔祇終古毓靈泉湧出明幾顆顆圓定有鮫人潛止水漫勞象罔索深淵璿源
激射光難定壁沼濼洄勢欲旋更喜文昌星夜照珠光相映徹中天

送李藹堂吉言明府

知縣邑舉人廖連城

留賢爭泐沈君碑曾為巖疆歷險巖健令終欣恢郊邑孤臣深苦泣秦師四郊
壘偏嚴防禦十里新虛廣度支祖述卻慙空擊楫輸公全局整殘棋 名宦風
流數幾人書生面日宰官身危時赤紫紵畫劫後黔黎仗荆循王渙寬還能
用猛益州廉竟不言貧篠駮何日重迎旆矯首槐楊望再春
送魏實甫邦達邑侯有序 知府邑舉人謝大舒

為載縣志

詩徵

七言律

三百十六

侯蒞萬四載有治效歲辛酉寇至侯率士民破賊援靖鄰邑民益德之此以
勞遷受代邑人倦七借借寇未能也賦此以志去思

萬山深處長官清今日依依共此情歷代安危關吏治幾人仕宦尚書生蒲鞭
虛設民無狎藻鑑中懸鏡益明爭欲留賢留未得篠駮何日使君迎 劫後剛
售渤海刀往年羣盜又如毛能收叔度撐持力持耆君侯保障勞志養屢思軒
冕謝才難未許石泉高匡時自此宏霖雨遮莫攀轅悵我曹

東孫中山先生兼懷國會同人

國會議員邑舉人謝濟沂

白山峻極停雲久黃浦無涯駭浪深卻想臣佗曾憤憤那知夥涉更沉沉海珠
月色新潮動梅嶺花香幽夢尋料得洪鈞氣自轉民情可見即天心
漫題再柬中山先生 謝濟沂

羣龍無首爭平等百犬吠聲談自由豈果長江天作壑祇緣大錯鐵連州丹方
醫國思和緩白話臨文愧夏游指望羣言衷至聖發明哲理統全球

五言絕句

登祝融峯

欲上祝融峯先登古石橋鑿開巖險處取路到丹霄 采南唐近事補

記萬載風俗

宋蔣之奇

居民覆其屋大半施白瓦山際兩三家如經新雪下 官醅米為麴釀出成紅

酒里社醉豐年便是宜城酎 田中多峭石蒼玉亂欹斜怪似湘中見封域近

長沙 舊志作謝譚詩誤編為五古一首又府志通志俱作祖無擇詩此從嘉

定志

寓崇信寺宿僧如晉禪房

明推官高要舉人陳 輅

禪關留幾日風雨過西堂老衲渾無事頻來炷博香 漢七山城暮秋深寒氣

生江村煙雨裏遙望不勝情

廣報觀閔步

邑舉人聞應期

萬載縣志

詩後 五言絕 三百十七

百里山河外孤城雨雪中遷鶯猶未起應足待春風

過坤山

邑人喻應魁

露冷蛩聲急雲寒雁影偏蕭疎滿目意斜日照山川

登龍河城樓

邑舉人喻懋敬

谷竅風吹萬江天月印雙巍樓觀四達遠秀入虛牕

靜安寺

喻懋敬

月照殘燈後鐘鳴夢醒初虛堂無法說默坐契真如

翠巖寺

魯 鴻

古寺遙臨水招邀得此君梵聲與清磬疎冷入秋雲

六言絕句

龍河晚眺

魯 鴻

芳樹落霞綺瓏沒雲將雨清酣遙望海鴻歸去聲聞江北江南

七言絕句

辭南平鍾王召

唐僧耽章

摧殘枯木倚寒林幾度逢春不變心樵客見之猶不採郢人何事苦搜尋

次萬載

宋蔣之奇

碧嶂千層附城出清江一條穿市飛聞說當年謝康樂雲間雙屐去忘歸

萬載道中

知袁州府阮閱

謝家山下雁聲中道上逢僧問上功（寺名）漠上雨絲千萬縷織成煙素靄

秋空采嘉定志補

萬載縣

阮閱

門橫路斷竹為籬雪色漫上瓦屋稀黃嶺青腰墟市罷盡沽紅酒夕陽歸

寄題張氏中隱堂

鮑同

當年蚤有菟裘意歲晚塵埃尚困予聞說龍江真可隱欲將餘日寄仙居

萬載縣志

詩徵

七言絕

三百十八

問舍知君困欲還才高那得卧家山由來甘井人爭汲卻恐心閒身未閒采

嘉定志補

題春風亭

王克勤

舊時康樂庭前地今日春風更揭堂堂上詩情仍對酒妙於草色映池塘

愛民盛意醇如酒閭里遙知絕歎愁只恐天邊爲翹手趣歸清廟薦黃流采

嘉定志補

訪龍長史不遇

明郭鉅

鸚鵡窗深鎖翠寒松花不埽紫苔乾自將名姓題修竹延桂樓前第五竿

坤山夕照

吳節

縣西有路過坤湖荆楚雲山入渺茫行客不須憂日暮幾枝高柳掛斜陽

筆架廻瀾

吳節

巨石崔嵬架筆鋒千年長對素王宮試向雙虹橋上望詞源倒挽盡回東

龍河晚渡

黃恭

清溪一曲抱龍江，沙際舟橫水泚茫。
隔岸行人遙喚渡，歸心斷絕日昏黃。
翠巖四峙歌

知州曾夢祺

誅萌結屋枕龍江，鈎引春光到小堂。
獨立東風塵夢醒，杖頭時帶落花香。
博山添火裊沈烟，石枕藤牀午夢便。
棋子一聲山鳥去，翠巖偏覺日如年。
巖桂浮香襲短袍，黃花綠酒薦霜螯。
梧桐未老孫枝秀，拭月清霄有鳳毛。
翠巖高聳玉峯寒，人在冰壺眼界寬。
閒傍梅簷索春意，未春時節正宜看。
漢源嶺莊

喻應魁

金鶯玉鶯綵青林，水曲峯廻路轉深。
樵牧放歌花氣馥，雲中雞犬武陵陰。
靜安寺

鄭邦德

繚繞廻廊通碧殿，密蒙繁樹蓋山軒。
白雲滿地無人到，雨打松花落寺門。
遊丁田作

通判邑人宋良翰

萬載縣志

詩後

七言絕

三百十九

得意尋春曲徑賒，山間好鳥和鳴蛙。
登虹疑是蓬萊窟，收得春風兩袖花。

瞻照堂

歐陽材

重來廬墓倚斜暉，雲鎖松楸欲掩扉。
一自蓼莪詩廢後，有誰更舞老萊衣。
過如是庵

邑舉人袁汝祝

如來世界自清涼，白晝談禪未覺長。
袂破個中無隱義，木樨滿院放秋香。
釣魚臺 在潭頭

邑人潘璧

蘆白沙明宿鶯飛，桐江蟠水隱淪希。
一絲九鼎千鈞重，謾向漁人話此機。
水天別業

張汝誠

小築江皋架蒲書，水天澄澈浸吾廬。
晝長倦欲停披卷，起見忘機鳶與魚。
獅巖

劉芳譽

獅踞巖空蹟尚留，書巖人去幾春秋。
世閒事物消磨盡，惟有寒灣長對流。
百歲作

張藥

石田茅屋野人家百番春風換歲華
畫道長生緣辟穀不知香飯有胡麻

常維楨

龍山晚眺
小小孤城不斷雲
蒼山止處碧流分
晚煙初起迷村樹
漸有樵歌送夕曛

常維楨

清泉山小憩
樹密鳥飛人不見
杜鵑啼散暮春花
隔林竹影搖溪水
靜繞山村一二家

辛 劖

登紫蓋峰
偶上龍山第一峯
禪關時有白雲封
高人身在蓮花府
隔斷煙嵐數十重

辛 劖

龍河晚渡
龍江城下水如梭
尊酒論文幾度過
無限風光波浪裏
綠楊隱隱起漁歌

宋希商

雲峯道中
感夏炎蒸按響回
雲峯迎我入雲隈
無端風雨前村過
剩有餘涼馬上來

采

萬載縣志

詩徵

七言絕

三百一十

竹山洞

張 鏊

洞門虛敞幾重關
怪石玲瓏水竹間
滿地白雲春雨後
風香數樹碧桃閒

采

府志

錢志遙

觀音洞
情懷半載未曾開
此日公餘選勝來
不是相逢賢處士
怎能塵跡印蒼苔

采

引玉集

前題

吳 涉

螺旋一逕傍巖開
似似青蓮托跡來
長得此身觀自在
落花紅雨滿蒼苔

采

引玉集

夏日過月臺山寺

魯 鴻

康樂風流蹟已陳卅年手澤尙重新（寺有先太父通政公題額）老僧未解沈吟意翠竹蒼松是故人

萬載山中追和同年辛景淳題壁韻

府教授新建進士熊日華

風高鶴嶺羽書遲飲馬巖城欲暮時十八渡頭飛鳥盡一緘冰雪故人詩

庚辰秋仲遊上鄉各山

李榮陞

二龍行廟在昌田羽士無聞像就湮畢竟僧家憑藉得誰云神力懼安禪

山廟

有元鄉校盛江南下里生徒嶽麓叅辛苦榮甥恢廟器祇今無路覓張巖 獲

富

九州望祀各名山古往今來瞬息間尊甚秦皇秦記確無人引義繕遺壇 泰

皇山

晉世名流蹟可思襄陽建業往來疲彥威於此留貽厥蕪沒書堂紹者誰 書

萬載縣志

詩徵

七言絕

三百二一

八

堂村

正議不磨萬古傳正峯不缺一錐圓卓哉此筆尼山授漢晉春秋綱目先 卓

筆尖

捨逕就荒高脊平閣無人跡草綿生九龍長是貪雲霧漏出金盆日脚明 九

雲山

東面天梯不假攀身騰盤背俯人寰剛風又迫南窻去徑熟無憂行地難 玉

皮尖

過黃田庵懷僧予山

李榮陞

盼睐青巖引步遲嫩松披偃逕叅差庵前桐樹宛相笑憶爾涼衫匝繞時

同穿霧雨半天行銀海遙連足底平轉過山腰雲似鶴凌空還讓錫飛輕 風

門凹

聚石峯巔萬法身祖師借力牧童勤高天雷靛徹根盡拍手遊僧更不嗔 煉

魔場

飄零湖海夢重回
泉谷生疎興未灰心
洞暫教燃漆去
髻峯還擬挂冠來
重過樂院庵有感

辛文彬

細石蒼苔曲逕穿
禪林重到記前緣
道傍塔影清陰匝
曾倚琅玕聽暮蟬
寂寂回廊鐘磬稀
登堂疑是復疑非
緣何十畝開金地
換作山家白版扉
寶巖寺訪慧遠上人不過

辛啟夫

樹杪山橋十里程
綠扶纖草午風輕
寒巖欲莫空山落
獨倚長筇聽鳥鳴
詩餘

烟雨觀 水調歌頭

宋縣丞趙師俠

江流清淺外
山色有無中
平田坡岸廻曲
一目望難窮
波向輕鷗客
與沙際野航橫
渡不信畫圖工
路入神仙宅
翠鎖梵王宮
俯晴郊
增勝概
氣橫空
雲林城市層列
知有幾重重
更上危亭高處
徙倚闌干
虛敞象緯
逗璇穿
要盡無邊

青藜縣志

詩餘

七言絕

三百一十一

景煙雨看空濛

